

# যমুনাধারা

শ্রী সুরোজনাথ ঘোষ

“শক্তির গ্রন্থাবলী”, “রূপের মোহ”, “মহাপ্রজ্ঞার কবিতা”  
“যমুনাধারা”, “বিস্মার্ক” প্রভৃতি রচয়িতা

প্রকাশক :

শ্রীরমেশচন্দ্র পাল, বি-এ,  
শুরুচরণ পাবলিশিং হাউস,  
৪১২, আরপুলি লেন, কলিকাতা

দাম দুই টাকা

প্রিন্টার-শ্রীমহানন্দ।  
শ্রীকালী প্রেস।  
২২, বজা লেন, - কলিকাতা

ঐক্য

নং ৩৬৮৫

৭

সাহিত্য-জীবনে যিনি সুদীর্ঘকাল সমকক্ষী ও  
সমধর্মী, আমার পরম স্নহদ, প্রবীণ ও প্রসিদ্ধ কথা-  
সাহিত্যিক শ্রীযুক্ত সত্যেন্দ্রকুমার বসুর করকমলে  
“যমুনাধারা” উৎসর্গ করিলাম।

শ্রীসরোজনাথ হইল।

১৩নং পরমহংসদেব রোড,

চেতলা।

জন্মাষ্টমী, ১৩৪১



৩৬৮-৫

## যমুনাধারা

এক

“প্রীতিভাজনেষু,

এবার কলিকাতার স্বদেশী মেলায় নানারূপ ব্যারাম ও মল্লযুদ্ধের প্রতিযোগিতা হইবে। ভারতবর্ষের নানাস্থান হইতে প্রসিদ্ধ মল্লগণ আসিয়াছে। আমাদের ইচ্ছা, তোমার এত দিনের শক্তিসাধনার পরিচয় প্রকাণ্ডভাবে দেখাইয়া বাঙ্গালী জাতিকে উদ্বুদ্ধ কর।

প্রতিযোগিতার পরীক্ষার দিন এখনও নির্দিষ্ট হয় নাই। দুই চারি দিনের মধ্যে আমাদের অতিরিক্ত বৈঠকে তাহা স্থির হইবে। তুমি আগামী কল্য রওনা হইও। তোমার নিৰ্জনে পাকা অভ্যাস জানি, সেইরূপ ব্যবস্থাও হইয়াছে। আশা করি, আমরা এই অনুরোধ তোমার কাছে উপেক্ষিত হইবে না। হ.ও—”

তোমার গুণমুগ্ধ

ভবতোষ।”

বাল্যবন্ধু ভবতোষের পত্র বার বার পড়িয়া যতীন্দ্রনাথ অগুঠি সন্ধ্যার একসপ্রেসে কলিকাতা যাইবার সংকল্প স্থির করিয়াছিলেন। ভবতোষ শুধু বাল্যবন্ধু নহে, তাহার সতীর্থ। একত্র বসবাস পড়া-শুনা ও খেলাধুলায় শৈশব, কৈশোর ও যৌবনের প্রথম ভাগ, কি সুখেই না কাটিয়া গিয়াছিল! কোনও প্রসিদ্ধ অভিজাত-বংশে

## যমুনাধারা

জন্মগ্রহণ করিয়া, অতুল সম্পত্তির মালিক হইয়াও ভবতোষ তাহার সঙ্গে কিরূপ অসঙ্কোচে মিলানিশা করিতেন—প্রাণ দিয়া তাহাকে ভালবাসিতেন, বিপদে সাহায্য করিতেন, এত শীঘ্র যতীন্দ্রনাথ কখনই তাহা বিস্মৃত হইতে পারে না। সংসারের কোলাহল হইতে সে আপনাকে দূরে সরাইয়া রাখিয়াছে সত্য, যশঃ ও প্রতিপত্তিলাভের আকাঙ্ক্ষা এখন আর তাহাকে প্রলুব্ধ করিতে পারে না, তাহাও সত্য ; কিন্তু তথাপি বন্ধুর এই অনুরোধ তাহার কাছে অলজ্জ্য আদেশ। তাহাকে যাইতে হইবে।

একটা ব্যাগে প্রয়োজনীয় বস্তাদি গুছাইয়া রাখিয়া যতীন দুইখানি কম্বল, একখানি সতরঞ্চ, একটা বালিস লইয়া একটা ছোট মোট বাঁধিল। তাহার পর দীর্ঘদিনের নিত্য-সহচর দুই মণ ওজনের ডাম্বেল জোড়া একটা চটে জড়াইয়া লইল। কোতূহলী দর্শকের বিস্ময় ও কোতুক উৎপাদনের সে একান্তই বিরোধী ছিল।

সকল কাৰ্য শেষ করিয়া যতীন্দ্রনাথ একটা চুরুট ধরাইয়া লইল। সংসারের যাবতীয় ভোগ বিলাসকে সে অনেকদিন বিদায় দিয়াছিল সত্য ; কিন্তু তাম্রকূট-সেবনের অভ্যাসটা সে ত্যাগ করে নাই। যখন কোনও কাজ থাকিত না, কোনও কিছু পড়িতেও ভাল লাগিত না, সেই সময় হয় সে গড়গড়ায় তামাকু সাজিয়া ধূমপান করিত, অথবা একটা বর্ষা চুরুট ধরাইয়া লইত।

“বাবা !”

যতীন্দ্রনাথ মুখ ফিরাইয়া চাহিল। তাহার সমগ্র আনন সহসা

## যমুনাধারা

যেন মাধুর্য্য-রসে প্লাবিত হইয়া গেল। আসন ছাড়িয়া, বলিষ্ঠ, পেশীবহুল বাহুযুগল প্রস্তুত করিয়া সে বালককে বুকে তুলিয়া লইল।

পিতার বিশাল বক্ষোদেশে পরম সুখভরে মুখ রাখিয়া বালক তাহার কোমল বাহুযুগল দ্বারা পিতার গলদেশ বেঁটন করিয়া ধরিল। কয়েক মুহূর্ত্ত কেহ কোনও কথা বলিল না। যতীন্দ্রনাথ নিমীলিত-নেত্রে পরম স্নেহাস্পদের স্পর্শসুখ যেন সমগ্র ইন্দ্রিয়ের সাহায্যে উপভোগ করিয়া ধন্ত হইতেছিল।

কিয়ৎকাল পরে বালক অতি মৃদুস্বরে বলিল, “ঠাকুরমা বললেন, তুমি না কি কল্কাতার ঘাচ্ছ, বাবা?”

পুত্রকে লইয়া সন্নিহিত পালঙ্কে বসিয়া যতীন্দ্রনাথ স্নেহাৰ্দ্ৰকণ্ঠে বলিল, “হ্যাঁ, বাবা। তুমি লক্ষ্মীটি হয়ে ঠাকুরমার কাছে থেকে। আমি পাঁচ-ছয়দিনের মধ্যে ফিরে আসব। তুমি যে বন্দুক চেয়েছিলে, এবার কিনে আনব।”

বন্দুকপ্রাপ্তির আশায়, বলিকের মন হর্ষে উচ্ছ্বসিত হইয়া উঠিল। সে তাহার পিতাকে বন্দুক ব্যবহার করিতে দেখিয়া ঐরূপ খেলানা পাইবার জন্য সেদিন পিতার কাছে অতি সঙ্গোপনে নিজের ইচ্ছা প্রকাশ করিয়াছিল। তাহার কোনও বাসনা যতীন্দ্রনাথ অপূর্ণ রাখিত না। এই বিশাল সংসারে, তাহার ইহ ও পরকালের একমাত্র সঙ্গিনী—তাহার আশা, ও আনন্দ, সুখদুঃখের ভাগিনী পত্নী এই পুত্রটিকে উপহার দিয়া পরপারে চলিয়া গিয়াছে। তদবধি সে আর বিবাহ করে নাই। সেই প্রেম-প্রতিমার পবিত্র

## যমুনাধারা

স্মৃতিকে মনোমন্দিরে প্রতিষ্ঠা করিয়া যতীন্দ্রনাথ পুত্রটিকে লালন-পালন করিয়া আসিয়াছে। তাহার বিধবা পিসীমা-যতীন্দ্রনাথের সংসারের যাবতীয় ভার নিজের ঝঞ্জে তুলিয়া লইয়াছিলেন। পিসীমা ও পুত্র ছাড়া যতীন্দ্রনাথের সংসারে অণু কোনও আত্মীয় ছিল না। সে তাই দেশের সহিত সকল সম্বন্ধ ত্যাগ করিয়া দেওঘরের বাড়ীতে বসবাস করিতেছিল। পৈতৃক জমীদারীর টাকানায়েব-গোমস্তা দেওঘরে পাঠাইয়া দিত। তীর্থ-স্থানের যুক্তবায়ুর স্বচ্ছন্দ প্রবাহের প্রভাব পিসীমাকে ভ্রাতৃপুত্রের সংসারে প্রতিষ্ঠিত করিয়া রাখিয়াছিল।

আসন্ন পিতৃবিরহের আশঙ্কায় পুত্রের কোমল হৃদয় ব্যথিত হইলেও বন্দুকপ্রাপ্তির আশা তাহার মুখে আনন্দ আলোক বিকীর্ণ করায় যতীন্দ্রনাথ অপেক্ষাকৃত লঘুহৃদয়ে পুত্রের সহিত নানা অর্থহীন কথার আলোচনা করিতে লাগিল। পুত্রকে ছাড়িয়া সে কোথাও বড় একটা রাত্রিবাস করিত না। পিসীমার স্নেহচ্ছায় প্রতিপালিত হইলেও এই ক্ষুদ্র শিশুটি স্নাতিকালে পিতার শয্যায় শয়ন করিত। যতীন্দ্রনাথ তাহাকে বুকের কাছে না রাখিতে পাইলে যেন স্বস্তি পাইত না। পুত্রও পিতার ক্রোড়ের মধ্যে পরম আরামে নিদ্রা যাইত। ঠাকুরমা ও বাবা এই উভয় প্রাণীর মধ্যে সে কাহারে অধিক ভালবাসিত, তাহা বলা কঠিন। কারণ, সন্ধ্যার পর পিতা বখন পড়াশুনা লইয়া ব্যস্ত থাকিতেন, তখন সে তাহার ঠাকুরমার স্নেহের ক্রোড়ে শয়ন করিয়া গৃহহারা রাজপুত্রের অনির্দেশযাত্রা, ছয়রাণীর ছুঃখময় কাহিনী, 'বেঙমা-বেঙমী'র গল্প



## যমুনাধারা

কৌতুকভরে শুনিতে শুনিতে নিদ্রার ক্রোড়ে ঢলিয়া পড়িত ।  
মধ্য-রাত্রিতে ঘুম ভাঙ্গিলে দেখিতে পাইত, সে তাহার পিতার  
পার্শ্বেই শয়ন করিয়া আছে । পিতা তাহাকে বুকের মাঝে সম্বরণে  
রাখিয়া নিদ্রা যাইতেছেন ।

পিতার নিকট হইতে চুমা পাইয়া বালক নাচিতে নাচিতে  
তাহার ঠাকুরমার কাছে আসন্ন বন্দুকপ্রাপ্তির শুভ সংবাদ  
জানাইতে গেল । পুত্রের গমনশীল মূর্তির দিকে চাহিয়া চাহিয়া  
বলিষ্ঠ যুবকের বক্ষোমধ্যে একটা দীর্ঘনিশ্বাস সঞ্চিত হইয়া—  
নাসাপথে বাহির হইয়া গেল ।

আনমনে কিয়ৎকাল বসিয়া থাকিবার পর যতীন্দ্রনাথ ধীরে ধীরে  
কক্ষের অপর প্রান্তে উঠিয়া গেল । প্রাচীর গাত্রে একখানি তৈল-  
চিত্র ছলিতেছিল । সে সেইখানে স্থাপুর মত দাঁড়াইয়া আলেখ্যের  
প্রতি অপলকনেত্রে চাহিয়া রহিল । সে চিত্রখানি তাহার  
পরলোকগতা পত্নীর । চওড়া লালপাড় শাড়ীর প্রান্তভাগ ললাটস্থ  
কেশরাজির উপর বিগুপ্ত, সীমন্তের সিন্দূরবিন্দু জল-জল করিতেছে ।  
মুগ্ধনেত্রে চাহিয়া চাহিয়া যতীন্দ্রনাথ মনে মনে বলিল, “কল্যাণি !  
তোমার আদরের, বড় সোহাগের সতুকে ছাড়িয়া কয়দিনের জন্ত  
কলিকাতায় যাইতেছি, কর্তব্যের আহ্বানে যাইতে হইতেছে ।  
তুমি নিশ্চয় ইহাতে দুঃখিত হইবে না । আমার মনের কোন্ কথা  
তোমার অগোচর ? আমার কাছে তুমি মৃত নহ । প্রতিদিন,  
প্রতি মুহূর্ত তোমার সান্নিধ্য লাভে আমি ধন্য । তুমি যেমন চাহিয়া  
ছিলে, ঠিক তেমনই ভাবে আমাদের সতুকে গড়িয়া তুলিবার চেষ্টা

## যমুনাধারা

করিতেছি। যদি কোথাও এতটুকু ভুলচুক ঘটে, কল্যাণি! আমার  
সে ভ্রান্তি দেখাইয়া দিও।”

বলিষ্ঠদেহ, বলশালী যুবকের নয়নপল্লব অশ্রুসিক্ত হইল।  
ধীরে ধীরে নয়ন মার্জনা করিয়া যতীন্দ্রনাথ অনেকক্ষণ নিম্নলিখিত-  
নয়নে কি ধ্যান করিতে লাগিল। তাহার বিশাল বক্ষোদেশ ঘন  
ঘন আন্দোলিত হইয়া উঠিতে লাগিল।

“বতু, তোর হয়েছে?”

পিসীমা কক্ষমধ্যে প্রবেশ করিতেই যতীন্দ্রনাথ আত্মস্থ হইয়া  
ফিরিয়া চাহিল। বান্ধকের চিহ্ন কেশরাজিতে প্রকটিত হইলেও  
পিসীমার দেহ তখনও ঋজুতা ও স্বচ্ছন্দগতি-বিশিষ্ট। তাঁহার  
প্রসন্ন ললাটে রক্তনাগারের স্মৃতির লেখা—স্বৈদবিন্দু তখনও  
মিলাইয়া যায় নাই।

“খাবার জুড়িয়ে যাচ্ছে, সতু তোর জন্তু ব’সে আছে। আর বেলা  
নেই, সন্ধ্যার গাড়ীতেই ত যেতে হবে। খাবি আর।”

“চল পিসীমা” বলিয়া যতীন্দ্রনাথ চটি-জুতা পায় দিয়া পিসীমার  
পশ্চাৎ পশ্চাৎ রক্তনাগারের দিকে অগ্রসর হইল।

## ছই

“যায়গা নেই, কেমন ক’রে যাবো !”

একদল বালক-বালিকা ও মহিলা-বেষ্টিত ছইজন পুরুষকে ব্যাকুলভাবে এদিক-ওদিক ঘুরিতে দেখিয়া যতীন্দ্রনাথ থমকিয়া দাঁড়াইল। তাহার সঙ্গে দ্রব্যাদি কুলীর জিন্মায় রাখিয়া নিরুপায় যাত্রীর দলকে বলিল, “আমুন, আমি আপনাদের উঠিয়ে দিচ্ছি।”

যশিদির ষ্টেশন-মাষ্টার হইতে আরম্ভ করিয়া প্রত্যেক কুলী যতীন্দ্রনাথকে চিনিত। তাহার বলবীর্যের খ্যাতি, ব্যাঘ্র-শিকারের কাহিনী সে অঞ্চলের স্থায়ী ও দীর্ঘকালের অধিবাসীরা উত্তমরূপেই অবগত ছিল। সকলেই তাহাকে যথেষ্ট খাতিরও করিত।

যাত্রিপূর্ণ গাড়ীগুলিতে তিলধারণের স্থান না থাকিলেও যতীন্দ্রনাথের চেষ্টায় মেয়েদের কামরায় মহিলা ও বালক-বালিকাদের কোনও মতে স্থান হইল। পার্শ্বের কামরায় ভদ্রলোকদিগকে ঠেলাঠেলি করিয়া উঠাইয়া দিতে অনেকটা সময় চলিয়া গেল। কৃতজ্ঞতার বাণী শুনিবার বা অপেক্ষা করিবার সময় আর নাই। যতীন্দ্রনাথ দেখিল, গাড়ী ছাড়িবার উপক্রম করিতেছে। কুলীকে বকসিস্ দিয়া সে ছই মণ ওজনের ডাম্বেল জোড়া স্বল্পদেশে তুলিয়া লইল এবং ব্যাগ ও বিছানার পুঁটলিটি বাম হাতে বুলাইয়া সে দ্রুতপদে চলিল। সকল কামরাই জনপূর্ণ। সহসা সম্মুখের

## যমুনাধারা

যুয়োপীয়দিগের জ্ঞ লেবেলযুক্ত কামরাটি তাহার দৃষ্টিপথে পড়িল। কামরার মধ্যে মাত্র চার-পাঁচজন ফিরিঙ্গী। এই যাত্রিবহুল ট্রেনে পরম আরামে তাহারা একখানি কামরা দখল করিয়া রাখিয়াছে। বিন্দুমাত্র ইতস্ততঃ না করিয়াই যতীন্দ্রনাথ কামরার দরজায় গিয়া হাতল ঘুরাইল। অমনই কামরার ফিরিঙ্গীগুলি সারমেয়-দলের স্তায় দরজার উপর বাঁপাইয়া পড়িয়া দরজা চাপিয়া ধরিল, কোনও মতেই বাঙ্গালীবেশী যতীন্দ্রনাথকে তাহারা উঠিতে দিবে না।

অনুন্ন-বিনয়ের সময় নাই, বাঁশী বাজিয়া উঠিল। ট্রেন মৃদুগতিতে চলিবার উপক্রম করিল। উপায়ান্তর না দেখিয়া যতীন্দ্রনাথ স্কন্ধের বোঝাটা অগ্রে জানালা দিয়া গাড়ীর মধ্যে ফেলিয়া দিল। তাহার পর দক্ষিণ হস্তের সাহায্যে হাতল ধরিয়া গাড়ীর উপর ক্ষিপ্ৰগতিতে উঠিয়া দাঁড়াইল। ফিরিঙ্গীরা বাধা দিবার পূর্বেই ব্যাগ ও শয্যাটা ভিতরে ফেলিয়া দিয়া দরজা খুলিয়া দিবার জ্ঞ সে সবিনয়ে অনুরোধ করিতে লাগিল।

তখন ট্রেন অপেক্ষাকৃত বেগে চলিতে আরম্ভ করিয়াছে। ট্রেন প্লাটফর্ম ছাড়াইয়া গেল। নিশ্চয় ফিরিঙ্গীরা কোনও কথা না শুনিয়া সবলে তাহাকে ঠেলিয়া ফেলিয়া দিবার চেষ্টা করিতে লাগিল, কিন্তু দৃঢ় হস্তে সে গাড়ীর হাতল ধরিয়াছিল বলিয়া তাহাকে স্থানচ্যুত করিতে পারিল না।

দেহে প্রচুর শক্তি ও মনে প্রভূত সাহস সত্ত্বেও যতীন্দ্রনাথ সহসা ক্রুদ্ধ হইত না ; কিন্তু একবার দ্বিতীয় রিপূর বশবর্তী হইলে

## যমুনাধারা

তাহাকে ঠেকাইয়া রাখিবার শক্তি কাহারও হইত না। ফিরিঙ্গী গুলির এমন পশুবৎ নিষ্ঠুর ব্যবহারে সে ক্ষিপ্ত হইয়া উঠিল। ইহারা কি মানুষ? তাহাকে টুেণ হইতে ফেলিয়া দিয়া নরহত্যা করিতেও পশ্চাৎপদ নহে!

বিশুদ্ধ ইংরাজীতে সে দৃঢ়স্বরে বলিল, “দরজা খোল।”

অটুহাস্যের সহিত একজন ফিরিঙ্গী একটা কুৎসিত গালি দিল। যতীন্দ্রনাথের স্মৃগোর মুখমণ্ডল সহসা আরক্ত হইয়া উঠিল। দরজায় পিঠ দিয়া প্রচণ্ডবেগে সে ভিতরের দিকে দরজা ঠেলিয়া দিল। সে বেগ প্রতিরোধ করিবার সামর্থ্য তাহাদের ছিল না। চাবি দিয়া বন্ধ থাকিলেও সে ভীষণ চাপে হয় ত দ্বার ভাঙ্গিয়া যাইত। হুড়মুড় করিয়া ফিরিঙ্গী গুলি গাড়ীর মধ্যে পড়িয়া গেল। দরজা খুলিয়া গেল। দুই তিন পদাঘাতে তাহাদিগকে সরাইয়া দিয়া যতীন্দ্রনাথ অগ্রে গাড়ীর দরজা বন্ধ করিল।

দরজার ঠেলা ও পদাঘাতের মাধুর্য্য ঐন্দ্রজালিক ক্রিয়া করিয়াছিল। যে ব্যক্তি কুটুক্টি করিয়াছিল, যতীন্দ্রনাথ কামরায় প্রবেশ করিবামাত্র সে তড়াক্ করিয়া ‘বাকের’ উপর আশ্রয় গ্রহণ করিল। অপর কয়জন কোর্টের ধূলা ঝাড়িয়া কটমটভাবে নবাগতের দিকে চাহিয়া রহিল।

নিজের দ্রব্যাদি শাস্তভাবে গুছাইয়া রাখিয়া যতীন্দ্রনাথ ফিরিঙ্গীদিগের প্রতি ফিরিয়া বলিল, “তোমরা নরাধীম পশু, এক জন মানুষকে খুন কর্তেও তোমাদের বাধে না।”

অপেক্ষাকৃত প্রবীণ-বয়স্ক একজন ফিরিঙ্গী এক পার্শ্বে

## যমুনাধারা

বসিয়াছিল, সে এতক্ষণ কোনও বাদ-প্রতিবাদে যোগ দেয় নাই। সে বলিল, “এ কামরায় তুমি কেন এলে, বাবু? এ কামরা ত ইউরোপীয়দের জন্ত নির্দিষ্ট।”

শ্লেষভরে যতীন্দ্রনাথ বলিল, “ইউরোপীয় আবার কে? কোর্ট, প্যাণ্ট, টুপী পরলেই ইউরোপীয় হয় না কি? তা আমারও আছে। দরকার হ’লে—কোর্ট ত গায় আছেই—প্যাণ্ট আর ক্যাপটা বার ক’রে নিলেই তোমাদের মত ‘টাস্’ সাজতে পারি! কিন্তু তা করব না, এই ভাবেই আমি এই কামরাতে যাব।”

ওভারকোর্টটা খুলিয়া ফেলিয়া যতীন্দ্রনাথ চারিদিকে চাহিতে চাহিতে বলিল, “সে অসভ্যটা কোথায় গেল যে লোকটা ঝাড়ুদার—মেথরের মত ইতরের ভাষায় গালাগালি করেছিল, তাকে গোটা কয়েক কাগমলা দিতে চাই, কোথায় গেল! ঐ বুঝি কাপুরুষটা লুকিয়ে আছে?”

ততক্ষণ যতীন্দ্রনাথ নগ্নদেহ! পরিহিত বস্ত্রখানি বেঞ্চের উপর রাখিয়া সে রীতিমত কোপীনধারী হইয়া দাঁড়াইল। প্রচণ্ড শীতেও তাহার শরীর দিয়া বিন্দু বিন্দু স্বেদ ঝবিত্তেছিল।

আলোকিত কক্ষমধ্যে দীর্ঘাকার, বৃষস্কন্ধ, কপাটবক্ষ পুরুষ দণ্ডায়মান। তাহার লৌহদণ্ডবৎ পেশিবহুল মস্তক বাহুযুগল দেখিয়া ফিরিস্কীদিগের বদন শুষ্ক, নয়ন নিম্প্রভ হইল। সকলে এক পার্শ্বে গুটি মারিয়া বসিল।

যতীন্দ্রনাথ ইংরাজিতে বলিল, “এস—এক একজন ক’রে এলে ম’রে যাবে; সকলে একসঙ্গে এস। বাঙ্গালীর হাতের

## যমুনাধারা

তুই চারটা মিঠে কীল কেমন মধুর লাগে, একবার পরখ ক'রে দেখ !”

একবার অঙ্গ ঝাড়া দিয়া যতীন্দ্রনাথ সকলের প্রতি তীক্ষ্ণ দৃষ্টিপাত করিল। ব্যায়ামপুষ্টি দেহ স্ফীততর হইল—আলোকিত কক্ষমধ্যে সে ঋজুতর হইয়া দাঁড়াইল।

রেলের অবিশ্রান্ত গতি ; কামরার মধ্যে প্রচণ্ড নীরবতা। আরোহীরা যেন বাকশক্তি হারাইয়া ফেলিয়াছে—তাহাদের অঙ্গ প্রত্যঙ্গও বোধ হয় নিশ্চল হইয়া পড়িয়াছিল।

ভীমদর্শন, শক্তিদধর পুরুষের শুভ্র ললাটে শিরাগুলি স্ফীত হইয়া উঠিয়াছিল বক্ষোদেশ আন্দোলিত হইতেছিল। যতীন্দ্রনাথ দৃঢ়পদে ‘বাক্কের’ আরোহীর দিকে অগ্রসর হইল।

সহসা আঁতুর্কণ্ঠে যুবক ফিরিস্কী বলিয়া উঠিল, “বাবু, ক্ষমা কর। আর কখনও এমন বেয়াদপি হবে না।”

লোকটার ক্ষীণ দেহ থরথর করিয়া কাঁপিতেছিল।

“আর তোমরা ?”

তাহার দৃষ্টিতে যেন অগ্নি-স্ফুলিঙ্গ নির্গত হইতেছিল। এক জনের বাহু ধরিয়া একটা ঝাঁকানি দিতেই সে কাতর-দৃষ্টিতে যতীন্দ্রনাথের দিক্রে চাহিয়া বলিল, “আমাদের অপরাধ স্বীকার করছি। তুমি শাস্ত হও।”

তীব্রকণ্ঠে যতীন্দ্রনাথ বলিল, “আমাদের দেশে বাস ক'রে, আমাদের অর্থ শোষণ ক'রে, আমাদের দেশের উৎপন্ন জিনিষে প্রাণ ধারণ ক'রে, আমাদের অপমান করবার সাহস যে তোমাদের

## যমুনাধারা

হয়, সে দোষ তোমাদের তত নয়, যত আমাদের নিজের। আর তোমাদেরও বলি, পৃথিবীতে এই ভারতবর্ষ ছাড়া তোমাদের স্থান কোথায়? এই দেশই ত তোমাদের জন্মভূমি। নিজের দেশের লোককে অপমান করলে যে আপনারই অপমান করা হয়, সে জ্ঞানটা তোমাদের কবে হবে? যুরোপীয় ব'লে আত্মপরিচয় দিতে তোমাদের একটু লজ্জা হয় না? তোমরা যে যুরোপীয় নও, এ কথাটা খাঁটি ইংরাজরা তোমাদের কতরকম ক'রে স্মরণ করিয়ে দেয়, তবু তোমাদের লজ্জা হয় না।”

প্রবীণ ফিরিঙ্গীটি চুপ করিয়া বসিয়া তামাসা দেখিতেছিল। সে বলিল, “বাবু, তুমি ঠিক বলেছ। আমাদের স্থান কোথাও নেই; কিন্তু ভ্রাস্ত্র ধারণা আমাদের মধ্যে এমন ভাবে শিকড় গেঁথে ব'সে আছে যে, আসল সত্যকে আমরা চিনতে পারি নে। যাক— এখন তুমি শান্ত হ'য়ে ব'স। খালি গায় থেক না, বড় শীত। এস, তোমার সঙ্গে গল্প করা যাক।”

যতীন্দ্রনাথ তখন অপেক্ষাকৃত শান্ত হইয়াছিল। সে ধীরে ধীরে কাপড় পরিয়া জামা-কোট গায় দিল।

প্রবীণ ফিরিঙ্গী একটা ফলের টুকরী বাহির করিয়া, আপেল ও কমলালেবু তুলিয়া লইল। “বাবু, যদি কিছু মনে না কর, দুই একটা নিলে আমি অনুগৃহীত হ'ব।”

ধন্যবাদ জনাইয়া যতীন্দ্র বলিল, “মাপ করবেন, আমি গাড়ীতে কিছু থাইনে। সন্ধ্যার আগেই খেয়ে বেরিয়েছি—কোন প্রয়োজন হবে না।”



## যমুনাধারা

বৃদ্ধ বলিল, “তোমার বলিষ্ঠ চেহারা দেখে আমি বড় খুসী হয়েছি।” আমার বিশ্বাস ছিল, তোমরা বাঙ্গালীরা বড় বিলাসী, শারীরিক ঘ্যারামে তোমরা অভ্যস্ত নও।”

মৃদু হাসিয়া যতীন্দ্রনাথ বলিল, “তাই বুঝি আপনারা বাঙ্গালীদের অপমান করবার সুবিধে নিয়ে থাকেন?”

বৃদ্ধ ফিরিঙ্গী বলিল, “আমাদের সম্প্রদায়ের অনেকের মধ্যে হয় ত সে ধারণা থাকতে পারে—সেটা হয় ত মিথ্যা নয়! কিন্তু বাবু, তোমাদের শক্তিচর্চা করা খুব দরকার। শক্তিকে সবাই ভয় করে—শক্তিমানকে সকলেই শ্রদ্ধা ক’রে থাকে।”

যতীন্দ্রনাথ বাহিরের দিকে চাহিয়া কি দেখিতেছিল। মুগ্ধ ফিরাইয়া লইয়া সে অনেকটা আপন মনেই বলিল, “বাঙ্গালী সে কথা বুঝতে শিখেছে। আমার জীবনের প্রধান স্বপ্ন, সমগ্র বাঙ্গালা দেশের লোককে শক্তিমান—বীর দেখে যাব। জানিনে সে স্বপ্ন কবে সার্থক হবে!” • •

## তিন

হাওড়া ষ্টেশনে গাড়ী না থামিতেই যতীন্দ্রনাথ একবার মুখ বাড়াইয়া প্লাটফর্মের দিকে চাহিল। যথাসময়ে সে কলিকাতায় তার করিয়াছিল। যদি কোনও পরিচিত কেহ তাহাকে লইতে আসিয়া থাকে। ভবতোষ সম্ভবতঃ কোনও কর্মচারীকে পাঠাইতে পারেন।

সহসা তাহার মুখ আনন্দে উদ্ভাসিত হইয়া উঠিল। ঐ যে, তাহার চিরপরিচিত, আশৈশবের প্রিয়তম বন্ধু স্বয়ং তাহাকে নামাইয়া লইবার জন্ত আসিয়াছেন!

গাড়ী থামিবামাত্র কুলী ডাকাইয়া সে নিজের জিনিষগুলি নামাইয়া রাখিল। সহযাত্রী বৃদ্ধ ফিরিঙ্গীটিও সঙ্গে সঙ্গে জিনিষপত্র সহ নামিল।

তকমা-শোভিত ছই জন দ্বারবান্ ও কর্মচারী সহ ভবতোষ দ্রুতপদে বন্ধুর কাছে আসিয়া দাঁড়াইলেন। প্রসন্নহাস্তে বলিলেন, “তুই আসবি ব’লে আনন্দে সারারাত আমার ঘুম হয়নি, ভাই! সকালে নিজেই চ’লে এলাম।”

যতীন্দ্রনাথ, বন্ধুর আলিঙ্গনপাশ হইতে ধীরে ধীরে মুক্ত হইয়া বলিল, “মহারাজ, নিজে কেন কষ্ট ক’রে—”

বাধা দিয়া ভবতোষ বলিলেন, “মহারাজ?—ওসব চলবে না। সত্যি ভারী রাগ করবো! তোর সঙ্গে কি আমার আপনি বলার সম্পর্ক?”

## যমুনাধারা

বৃদ্ধ ফিরিঙ্গী সম্ভবতঃ কিছু বিস্মিত হইয়াছিল। . গাড়ীর পরিচিত বীর যুবকটি রাজা-মহারাজার পরিচিত ! সে ভবতোষকে চিনিত। টুপী খুলিয়া তাঁহাকে অভিবাদন করিয়া বলিল, “মহারাজ আমাকে চিন্তে পারেন ?”

ভবতোষ তাহার দিকে চাহিয়া বলিয়া উঠিলেন, “মিঃ ব্রাউন্ ফিল্ড না ? তোমাকে কি ভুলতে পারি ? যতীন, তুমি এঁর পরিচয় জান না ; আমার একটা কলিয়ারীর ইনি এসিষ্ট্যান্ট ম্যানেজার ছিলেন। বড় ভাল লোক। মিঃ ব্রাউন্ফিল্ড, ইনি আমার সতীর্থ যতীন্দ্রনাথ বসু—বিখ্যাত ব্যায়ামবীর।”

ব্রাউন্ ফিল্ড সহাস্ত্রে বলিল, “উনি যে ভারী পালোয়ান, তার পরিচয় পেয়েছি। মহারাজ, আপনার এই বন্ধুর মত শক্তিমান বাঙ্গালীর সংখ্যা যদি বেশী হ’ত, তবে—”

ভবতোষ হাসিয়া বলিলেন, “হবে, হবে, মিঃ ব্রাউন্ফিল্ড ! বাঙ্গালী ক্রমেই শক্তিচর্চার মুন দিচ্ছে। একবার প্রদর্শনী দেখতে যেও, দেখবে, এই বাঙ্গালী পালোয়ানের শক্তি কি রকম। আচ্ছা, এখন বিদায়। ব্রাউন্ফিল্ড, একদিন আমাদের ওখানে বেড়াতে যেও।”

অপর ফিরিঙ্গী যুবকগুলি তখনও প্ল্যাটফরমে এক একটি বিষ্ময়-রেখার মত এই দৃশ্য দেখিতেছিল।

যে সময়ের কথা লিখিত হইতেছে, তখন কলিকাতা সহরে মোটরবাস, ট্যাক্সির আধিক্য ঘটে নাই। সম্ভ্রান্ত ধনীরাও সকলে তখন জুড়ী ছাড়িয়া মোটরযান অবলম্বন করেন নাই। অত্যন্ত সৌখীন অভিজাতবংশের ছল্লাগণ জুড়ীর সঙ্গে সঙ্গে এক একখানা

## যমুনাধারা

মোটর রাখিয়া সখ ও আভিজাত্য-মর্যাদার পরিচয় দিতে আরম্ভ করিয়াছিলেন মাত্র ।

প্ল্যাটফর্মের বাহিরে একখানি ল্যাণ্ডো অপেক্ষা করিতেছিল, জিনিষপত্রসহ কর্মচারী ও দ্বারবান্য়ুগল তাহাতে চড়িয়া বসিল । রোল্‌স্‌ রয়েস্‌ মোটরে যতীন্দ্রনাথকে লইয়া ভবতোষ আরোহণ করিলেন ।

“তোমাকে এখন আশ্রমের ওখানেই নিয়ে যাচ্ছি. যতীন ! জানি, গোলমালে থাকা তোমার অভ্যাস নয় । কাঁছেই আর একটা বাড়ী তোমার জন্য ঠিক করা আছে ; কিন্তু আগে আমার ওখানেই তোমায় নিয়ে যাব, ভাই । অনেকদিন পরে তোমায় পেয়েছি । তা ছাড়া গৃহিণী তোমাকে দেখতে চেয়েছেন ।”

যতীন্দ্র ভবতোষের পূর্ব-সৌহার্দ্য অক্ষুণ্ণ আছে দেখিয়া মনে মনে পরিতৃপ্ত হইল । ধনীরা ছুলালদিগের মধ্যে এমন সহৃদয়তা সে আর কাহারও আচরণে প্রত্যক্ষ করে নাই । এজ্জ্ব সত্যই সে ভবতোষকে আন্তরিক শ্রদ্ধা করিত, ভালবাসিত ।

বালীগঞ্জের পরিচিত ভবনে মোটর থামিলে, ভবতোষ যতীন্দ্রনাথের হাত ধরিয়া উপরে উঠিয়া গেলেন । অনেকেই সেখানে তাহাদের প্রতীক্ষা করিতেছিল । সকলের সহিত পরিচয়ের পর ভবতোষ বলিলেন, “ভাই, এ বেলা এখানে একসঙ্গে দু’জনে খাওয়া যাবে । বৈকালে তোমার বাসায় থাকবে ।”

যতীন্দ্রনাথ বলিল, “তুমি ত জান ভাই, আমি নিরামিষভোজী, সুতরাং আমার সে সৌভাগ্য ত হবে না ।”

## যমুনাধারা

সমবেত ব্যক্তিগণের মধ্যে একজন বলিয়া উঠিলেন, “আপনি মাছ, মাংস খান না ?”

যতীন্দ্রকে উত্তর দিবার অবকাশ না দিয়াই ভবতোষ বলিলেন, “স্ত্রী-বিয়োগের পর থেকে উনি ব্রহ্মচর্য্য পালন ক’রে আসছেন। একবেলা হবিষ্যান্ন আহার করেন।”

যুবকটি উত্তেজিত-কণ্ঠে বলিয়া উঠিল, “বলেন কি ? মাছ-মাংস না খেয়ে আপনি শরীর এমন বলিষ্ঠ রাখলেন কি ক’রে ?”

বিদ্রূপের লোভ সংবরণ করিতে না পারিয়া যতীন্দ্রনাথ বলিল, “মাছ-মাংস না খেলে কি শরীরে শক্তি-সঞ্চয় হয় না—এই আপনার ধারণা ?”

যুবক বলিল, “আমার ত তাই বিশ্বাস। আপনি যে বড় বড় পালোয়ানের সঙ্গে লড়বেন, তা আপনি পারবেন কি ক’রে ? আপনি কি খান, বলুন ত ?”

যতীন্দ্র মৃদুকণ্ঠে বলিল, “সকালে কিছু কাঁচা ছোলা, দ্বিপ্রহরে আতপতণ্ডুলের ভাত, ঘৃত, কিছু আলু, কাঁচাকলা। • রাত্ৰিতে আটার রুটী, তরকারী, কিছু দুগ্ধ। খুব বেশী খেলেই যে গায় বেশী জোর হবে, তা মনে করবেন না। শক্তির কেন্দ্র সংযম।”

যুবক একটু অপ্রতিভভাবে বলিল, “মহারাজের কাছে আপনার অসম্ভব শারীরিক শক্তির গল্প শুনেছিলুম, তাই জিজ্ঞাসা করছিলাম। আমার অপরাধ নেবেন না, যতীন বাবু !”

যুবকটি মেডিকেল কলেজ হইতে ডাক্তারী পাশ করিয়া বাহির হইয়াছিল। ভবতোষের নিকট সে সর্বদাই আসিত। তিনিও

## যমুনাধারা

তাহাকে বন্ধুর মত ভালবাসিতেন। তাহাকে সম্বোধন করিয়া ভবতোষ বলিলেন, “ললিত, তুমি যতীনের বাসায় থেক, যেখানে বেড়াতে যাবে, সঙ্গে ক’রে নিয়ে যেও। তুমি ত’ স্বেচ্ছাসেবক দলের একজন। যতীনের ভার তোমার উপরেই রইল।”

যতীন্দ্রনাথের জন্ম যে বাসা নির্দিষ্ট হইয়াছিল, তথায় পাচক ও ভৃত্যের বন্দোবস্ত পূর্বাঙ্কুই ছিল। যতীনের আহাৰাদির ব্যবস্থা সেখানেই হইবে, তাহার আদেশ দিয়া ভবতোষ বন্ধুর সহিত অমৃতপুরে প্রবেশ করিলেন। তাঁহার পত্নীর সহিত যতীন্দ্রনাথের বাল্যাবধি আলাপ-পরিচয়, ভবতোষের পত্নীর পিত্রালয় ও যতীন্দ্রনাথের বাড়ী একই গ্রামে; পাশাপাশি বাড়ী। এ জন্ম যতীন্দ্রনাথকে ভবতোষের পত্নী জ্যেষ্ঠ ভ্রাতার গায় জ্ঞান করিতেন। তাহাকে দাদা বলিয়াই ডাকিতেন।

## চার

“খুকু আমাদের মাগিক! নাড়ব না চাড়ব না—দেখব খানিক খানিক।”

আদরিণী খুকুরাণী শয্যায় শুইয়া থাকিয়াও আদরে গলিয়া পড়িল। পিসীমার গলা জড়াইয়া ধরিয়া সে আধ আধ স্বরে বলিল—“আমাল পিসীমা!”

তাহার জ্বরতপ্ত ললাটে হাত রাখিয়া যুবতী বলিল, “হাঁ বাছ, আমি তোমারই পিসীমা। এখন এই দুধটুকু খাও। ডাক্তারবাবু এসে এখনি ভাল ওষুধ দেবেন—জ্বর সেরে যাবে।”

এবার খুকুরাণী কিছুতেই পিসীমার কথা শুনিল না। সে তাহার ক্ষুদ্র, সুন্দর, কচি হাত তুলিয়া ক্রন্দনের স্বরে বলিল, “না, খাব না!”

চুমা খাইয়া, আদর করিয়া, নানারূপে ভুলাইয়া যুবতী খুকুরাণীকে কিছু দুগ্ধ পান করাইল। শিশু ক্রমে পিসীমার স্নেহশীতল ক্রোড়ে অর্ধতন্দ্রাচ্ছন্ন পড়িয়া রহিল। তরুণী তাহাকে ক্রোড় হইতে নামাইল না।

বাহিরে সন্ধ্যার অন্ধকার ঘনাইয়া আসিয়াছিল। প্রদীপ্ত বিদ্যুতালোকে কক্ষ স্ফুটাসিত। তরুণী নিদ্রিত শিশুর মুখের দিকে চাহিয়া কি দেখিতেছিল, সেই জানে। এমন সময়ে দ্বার

## যমুনাধারা

খুলিয়া এক জন সুন্দরী নারী ঘরের মধ্যে প্রবেশ করিল। নবাগতা বলিল, “ঠাকুরঝি তুমি অনেকক্ষণ খুকীর কাছে বসে আছ। এইবার গা ধুয়ে এস, আমি ওর কাছে বসছি।”

তরুণী মুহূর্তে বলিল, “খুকী সবে একটু ঘুমিয়েছে, বৌদি। এখন ওকে নাড়াচাড়া করব না, একটু পরে গেলেই হবে। তুমি জোরে কথা বলো না।”

নবাগতা সন্নিহিত একখানি চেয়ারে সন্তুর্পণে উপবেশন করিল। নন্দার দিকে চাহিয়া একটি ক্ষুদ্র দীর্ঘশ্বাস তাহার কোমল হৃদয় ভেদ করিয়া বহির্গত হইল। আহা, যমুনার কোলে যদি এমনই একটি শিশু থাকিত! ঊনবিংশবর্ষ বয়স—এখনই তাহার সংসারের সকল সুখে পূর্ণচ্ছেদ পড়িয়াছে! তবু যদি একটা নাড়িবার চাড়িবার মত ছোট ছেলে অথবা মেয়ে থাকিত, তাহা হইলে জীবনের দীর্ঘপথটা হয় ত এমন মরুময় বোধ হইত না! তাহার খুকুরাণীকে যমুনা কি স্নেহই করে! একদণ্ড নয়নের অন্তরাল করিতে চাহে না। সেই দ্বিপ্রহরে হবিষ্যন্ন গ্রহণের পর খুকীকে লইয়া বসিয়াছে, এক মুহূর্তের জন্ত তাহার শয্যাপার্শ্ব হইতে আর নড়িয়া বসিল না। সে শুধু খুকীকে প্রসব করিয়াছে মাত্র; কিন্তু জননীরা যাহা কিছু কর্তব্য, সবই ত যমুনা করিয়া আসিতেছে।

“ঠাকুরঝি!”

“আমায় ডাকছ, বৌদি?”

খুকীকে আন্তে আন্তে আমার কোলে দিয়ে তুমি একবার



## যমুনাধারা

বাইরে যাও। লক্ষ্মী ভাই আমার! সারাদিন ত ওকে নিরে বসে  
আছ; তোমার কোমরে ব্যথাও ধরে না?”

যমুনা বলিল, “আগে ডাক্তার এসে ওর জ্বর দেখে যান, তার  
পর যাব, ভাই। ওর জ্বরে আমার মনটা বড় খারাপ হয়ে আছে।  
হঠাৎ এমন জ্বর হ’ল কেন?”

ভ্রাতৃজায়া হাসিয়া বলিল, “তোমার সবতাতেই বাড়াবাড়ি।  
সামান্য একটু জ্বর হয়েছে, ওতে ভাববার কি আছে, ভাই? ছ’দাগ  
ওষুধ খেলেই সেরে যাবে। নাও ভাই, ওঠ—হাতে মুখে জল  
দিয়ে এস।”

ভ্রাতৃবধুর আশ্বাসবাক্যে যমুনা কতকটা প্রকৃতিস্থ হইল।  
তাহার পর বৌদিদির পীড়াপীড়িতে সে ধীরে ধীরে নিদ্রিত শিশুকে  
কোমল শয্যায় শোয়াইয়া দিল। খুকুরাণী একবার নড়িয়া চড়িয়া  
কোমল করপল্লবের মৃদুস্পর্শে আবার যুমাইয়া পড়িল। তখন শয্যা  
হইতে যমুনা সন্তর্পণে ভূমিতলে নামিয়া দাঁড়াইল।

“ডাক্তারবাবু এসেছেন,” বলিয়া একজন প্রিয়দর্শন যুবক  
গৃহমধ্যে প্রবেশ করিল। তাহার পশ্চাতে ডাক্তার।

যুবতী-যুগল ডাক্তারের আগমনে মস্তকের অবগুষ্ঠন ঈষৎ  
টানিয়া দিল। যমুনা ধীর মন্ত্র-গতিতে অপর দ্বার দিয়া বাহিরে  
চলিয়া গেল। তরুণবয়স্ক ডাক্তার একবার তৃষিতনেত্রে সেই দিকে  
মুহূর্ত্ত দৃষ্টিপাত করিল। তাহার পর ধীরে ধীরে একখানা চেয়ার  
টানিয়া লইয়া রোগশয্যার পার্শ্বে উপবেশন করিল।

খুকুরাণী তখন জাগিয়া উঠিয়াছিল। ডাক্তার তাহার শরীরের

## যমুনাধারা

উত্তাপ এবং বুক, পেট প্রভৃতি পরীক্ষা করিয়া বলিল, “না, সর্দিজ্বর বলেই মনে হচ্ছে, কোন ভয় নেই, এর জন্ম এত ব্যস্ত হবার কোন প্রয়োজন ছিল না, সুশীলবাবু।”

সুশীল বলিল, “আমরা ত মোটেই ব্যস্ত হই নি, ডাক্তার বাবু। কিন্তু আমার বোনটি আমাকে অস্থির ক’রে তুলেছিল। দারোয়ান চাকর আপনাকে ডাক্তারে গিয়েছিল, তাতেও নিশ্চিত নয়। শেষে আমাকে পার্ঠিয়ে দিয়ে তবে ছেড়েছে। খুকী-অস্ত তার প্রাণ।”

ডাক্তারের আননে একটা প্রসন্ন স্নিগ্ধ ভাব ফুটিয়া উঠিল। ষ্টেথস্কোপটা নাড়িতে নাড়িতে সে বলিল, “আপনার ভগিনীর মত স্নেহকোমলা নারীর সংখ্যা খুবই কম দেখা যায়। বাস্তবিক সর্বাংশে এমন গুণবতী নারী—”

ডাক্তারের মুখের কথাটা শেষ হইল না। ভদ্রঘরের সুন্দরী যুবতী বিধবার সম্বন্ধে স্মৃতিবাদ শোভন নহে মনে করিতেই তাহার সুন্দর মুখমণ্ডল সহসা আরক্ত হইয়া উঠিল।

সুশীলচন্দ্রের স্ত্রী তখন কণ্ঠ্য গায় ভাল করিয়া লেপখানা টানিয়া দিতে বাস্তব বলিয়া ডাক্তারের দিকে মনোযোগ দিতে পারে নাই। সুশীলচন্দ্রও ডাক্তারের ভাবান্তর বোধ হয় লক্ষ্য করে নাই। সে বলিল, “যমুনা আমাদের কত প্রিয়, তা আপনি হয় ত জানেন না, ডাক্তার বাবু। ওর ভাগ্যবিড়ম্বনায় আমরা মর্মান্বিত হয়ে আছি। বড় সাধ ক’রে ভাল লেখাপড়া শিখিয়ে, ওক বেশী বয়সে সুপাত্রেই দিয়েছিলাম। কিন্তু হুই বৎসরের বেশী ওর ভাগ্যে স্বামিস্থ ঘটল

## যমুনাধারা

না। আজ প্রায় ছ'বৎসর যে কি রাবণের চিতা বৃকে জ্বলে দিন কাটাচ্ছি, তা বলবার নয়। মোহিতকে আপনি জানতেন। সে আপনাদের সঙ্গেই মেডিক্যাল কলেজ থেকে ডাক্তারী পাশ করেছিল। কি ভাল ছেলেই সে ছিল! সবই অদৃষ্ট!”

ডাক্তার যেন একটু বিব্রত হইয়াই উঠিয়াছিল। মোহিত তাহারই সতীর্থ এবং পরীক্ষায় সে প্রথম ও ডাক্তার দ্বিতীয় স্থান অধিকার করিয়াছিল। সে সব কথা ললিত ডাক্তার কখনও ভুলিতে পারিবে না।

প্রাচীনা পরিচারিকা সোণার মা ইত্যবসরে ঘরের মধ্যে আসিয়া বলিল, “দাদাবাবু, দিদিমণি তোমাকে ডাক্ছে।”

ডাক্তার ব্যবস্থাপত্রখানি টেবলের উপর রাখিয়া বলিল, “আমি তা হ'লে এখন আসি। কা'ল সকালে আবার দেখে যাব। ঔষধটা তিন ঘণ্টা অন্তর খাওয়াবেন।”

ডাক্তার টুপি লইয়া একটু দ্রুত-চরণে বাহিরের দিকে চলিল। বারান্দায় আসিয়া তাহার উৎসুক দৃষ্টি একবার চারিদিকে নিক্ষিপ্ত হইল। চরিতার্থতা লাভ করিবার মত কিছু না পাইয়া দৃষ্টি ফিরিয়া আসিল। পরিচারক ডাক্তারকে গাড়ীতে তুলিয়া দেওয়া পর্যাঙ্ক সঙ্গে সঙ্গেই চলিল।

## পাঁচ

পিতা বহু পূর্বেই গত হইয়াছিলেন। যমুনা যখন আট বৎসরের বালিকা, সুশীল তখন বি, এ পাশ করিয়া দ্বাদশ-বর্ষীয়া মণিমালাকে বিবাহ করিয়াছে। মাতার যত্নে ও চেষ্টায় ভ্রাতা ও ভগিনী লেখাপড়া শিখিয়াছিল। এঞ্জিনীয়ার পিতা ব্যাঙ্কে পুত্র, কণ্ঠা ও স্ত্রীর জগু পর্যাপ্ত অর্থ জমা রাখিয়া গিয়াছিলেন। কলিকাতায় পাঁচ-ছয়খানা ভাড়াটিয়া বাড়ী, পুরী ও বৈষ্ণনাথধামে বিশ্রামভবন, দশ হাজার টাকার মুনাফার জমীদারী সবই তাহাদের ছিল। ছেলেবেলা হইতেই সুশীলের বিলাতে গিয়া ব্যারিষ্টার হইয়া আসিবার বাসনা ছিল। বিবাহের পর সে মাতৃ-আদেশে আজন্মের সাধ পূর্ণ করিতেও গিয়াছিল। কিন্তু জন্মভূমিতে প্রত্যাবর্তনের পর মা বেশী দিন ইহলোকে রহিলেন না। যমুনা তখনও অবিবাহিতা। ভগিনীকে ভালরূপে লেখাপড়া শিখাইয়া উপযুক্ত পাত্রে সমর্পণ করিবে বলিয়া সে কিশোরী যমুনাকে পাত্রস্থ করে নাই। মাতৃবিয়োগশোক ক্রমে কমিয়া আসিলে, সুশীল প্রাণাধিকা সহোদরাকে আরও যত্নের সহিত লেখাপড়া শিখাইল। বিলাত হইতে ফিরিয়া আসিলেও সে সম্পূর্ণরূপে অর্থাৎ বিশ আনা সাহেবীয়ানায় অভ্যস্ত হইতে পারে নাই। সে জগু ইংরাজী শিক্ষার সঙ্গে সঙ্গে সে ইংরাজী-জানা প্রবীণ সংস্কৃত অধ্যাপকের নিকট ভগিনীকে দেবভাষা শিখিবারও ব্যবস্থা করিয়া দিয়াছিল।

## যমুনাধারা

পিতৃমাতৃহারা ভগিনীকে সে এমনই স্নেহ করিত যে, ঘুণাক্ষরেও একদিনও সে যমুনাকে পিতামাতার অভাব বোধ করিতে দেয় নাই। অর্ধকাশকালে সে, পত্নী মণিমালা ও যমুনাকে লইয়া গল্প করিত, খেলা করিত, নানাবিধ বহি পড়িয়া শুনাইত, অথবা নির্দোষ আমোদ-প্রমোদের ক্ষেত্রে লইয়া যাইত। বন্ধু-বান্ধবদিগের সহিত রহস্যলাপে কদাচিৎ সে সময়ক্ষেপ করিত। এজন্ত নবীন ব্যারিষ্টার-মহলে এবং বাল্যবন্ধু-সমাজে সুশীল স্নেহ ও অসামাজিক আখ্যা লাভ করিয়াছিল; কিন্তু সেজন্ত সুশীল ভ্রমেও কখনও ছুঃখিত বা ক্ষুব্ধ হয় নাই। সে স্ত্রী ও ভগিনীর সুখস্বচ্ছন্দ্যবিধানকেই প্রেয়ঃও শ্রেয়ঃ কর্তব্য বলিয়া মনে করিত।

পঞ্চদশবর্ষ বয়সে যমুনা যখন কূলে কূলে প্রায় ভরিয়া উঠিল, তখন অনেক বাছিয়া সুশীল নসীরামপুরের প্রসিদ্ধ জমীদার পরলোকগত হরকিশোরবাবুর একমাত্র সন্তান মোহিতের সহিত ভগিনীর বিবাহ দিল। মোহিত তখন মেডিক্যাল কলেজ হইতে ডাক্তার হইয়া বাহির হইয়াছে। বিপুল ধন-সম্পত্তির মালিক হইলেও এই খেলালী যুবক অর্থোপার্জনের জন্ত ডাক্তার হয় নাই। পুরুষানুক্রমে নসীরামপুরের জমীদারবংশ দয়া ও পরোপকারের জন্ত প্রসিদ্ধ ছিল। চিকিৎসার অভাবে দরিদ্র পীড়িতগণ অনেক সময় অকালে ইহলোক হইতে বিদায় গ্রহণ করে—তাহাদের দেখিবার কেহ নাই, তাই উদারহৃদয় মোহিত চিকিৎসা-বিজ্ঞা শিক্ষা করিয়াছিল। মোহিতের গুণের ও মহৎ হৃদয়ের পরিচয় পাইয়া সুশীল তাহার অতিপ্রিয় ভগিনীকে তাহারই হস্তে সমর্পণ করিয়াছিল।

## যমুনাধারা

মোহিতকে স্বামিরূপে লাভ করিয়া তরুণী যমুনা যে চরিতার্থ হইয়াছিল, তাহাতে সন্দেহ নাই। যৌবন-নিকুঞ্জে তরুণ দম্পতির দিনগুলি পরম আনন্দে অতিবাহিত হইতেছিল। মোহিতের গৃহে যমুনা সেই বয়সেই গৃহিণীর দায়িত্ব লাভ করিয়াছিল। জমীদার-গৃহে পরিজনের অভাব না থাকিলেও গৃহিণীর সিংহাসনশূণ্য ছিল। বিবাহের পরই যমুনা স্বহস্তে সকল ভার তুলিয়া লইল। মোহিতচন্দ্র বিদ্যুৎ সুন্দরী পত্নীর সাহচর্য্য ও সহায়তায় গ্রামের উন্নতিকল্পে সমগ্র মন নিয়োজিত করিয়াছিল। পরম সুখে তাহাদের অনাবিল প্রেমপূর্ণ জীবনযাত্রা চলিতেছিল। স্বামীর উদার, মহৎ হৃদয়কেও পবিত্র ও স্নিগ্ধ করিতেছিল। এমনই ভাবে প্রায় দুইটি বৎসর তাহাদের পুষ্পাস্তৃত মিলন-পথকে নানা মাধুর্য্যের রসধারায় সিক্ত করিয়া চলিয়া গেল।

সেবার হরিদ্বারে একটা বড় যোগ উপলক্ষে মেলার আয়োজন হইয়াছিল। বহু যাত্রী পুণ্যতীর্থে স্নান করিবার জন্ত ভারতবর্ষের নানা স্থান হইতে সমবেত হইতেছিল। একরূপ স্থলে প্রায়ই রোগের প্রাদুর্ভাব ঘটে। মোহিতের স্বার্থলেশশূণ্য উদার হৃদয় জনসাধারণের সেবার জন্ত ব্যাকুল হইয়া উঠিল। সে চিকিৎসাবিদ্যা আয়ত্ত করিয়াছে—এরূপ ক্ষেত্রে তাহার পরিচয় প্রদান না করিয়া সে স্থির থাকিতে পারিল না। পত্নীকে তাহার জ্যেষ্ঠের নিকট রাখিয়া মোহিত হরিদ্বারযাত্রা করিল। যমুনা স্বামীর অনুগামিনী হইবার জন্ত জিদ ধরিয়াছিল; কিন্তু মোহিত তাহাকে বুঝাইয়া দিল যে, যমুনা যদি সঙ্গে থাকে, তাহা হইলে সে তাহার কর্তব্য

## যমুনাধারা

সম্পূর্ণভাবে পানন করিতে পারিবে না, তীর্থক্ষেত্রের ভীড়ে পত্নীর জ্ঞা অনেক সময় তাহাকে বিব্রত থাকিতে হইবে। তরুণী যমুনা স্বামীর যুক্তি যে না বুঝিল, তাহা নহে, কিন্তু স্বামীর সঙ্গ ত্যাগ করিয়া কিছু দিন যে তাহাকে একাকিনী যাপন করিতে হইবে, এই বেদনাই তাহার হৃদয়কে পীড়িত করিল। বিবাহের পর সে স্বামিসঙ্গ ত্যাগ করিয়া এক দিনও অত্র থাকিতে পারে নাই। ভ্রাতাকে দেখিতে আসিবার সময়ও সে মোহিতকে সঙ্গে করিয়া লইয়া আসিত। তাহার ঈষৎ স্নান আননে উৎকর্ষার ছায়া ঘনাইয়া আসিয়াছে দেখিয়া মোহিত যখন পরম আদরে, তাহাকে ধৈর্য্য ধরিয়া কয়েক দিন থাকিবার জ্ঞা অনুরোধ করিল, তাহার বলিষ্ঠ বাহুযুগলের মধ্যে টানিয়া লইয়া পত্নীর কাণে কাণে অশ্রুট গুঞ্জে নানাকথা শুনাইল, তখন যমুনার অভিমানাহত ক্ষুদ্র হৃদয়ের ব্যথা অন্তর্হিত হইয়া গেল। স্বামীর পদধূলি মাথায় তুলিয়া লইয়া সে মোহিতকে অপেক্ষাকৃত প্রফুল্ল-মুখে বিদায় দিল।

কিন্তু সেই দর্শনই যে তাহার শেষ দর্শন, যমুনা তখনও তাহা কল্পনা করিতে পারে নাই। কেই বা পারে? উৎসাহ, উত্তম ও ভালবাসা-পূর্ণ তরুণ যৌবনের উচ্ছ্বাসভরা জীবন লইয়া স্বামী কয়েক দিনের জ্ঞা কোনও মহৎকার্য্যের উদ্দেশে চলিয়া গেল, সে যে চিরদিনের বিদায়যাত্রা, তাহা কোন্ স্ত্রী কল্পনা করিতে পারে? যমুনা স্বামীর প্রত্যাবর্তনের পথ চাহিয়া দিন গণিতে লাগিল। তাহার পর এক দিন যে ভীষণ লংবাদ আসিল, তাহার ফলে ছিন্নমূল ব্রততীর মত যমুনালতা যেন শুকাইয়া গেল।

## যমুনাধারা

সুশীলচন্দ্র তারযোগে সংবাদ পাইল—সেবা-সজ্জের এক ব্যক্তি তাহাকে জানাইয়াছে—হরিদ্বারের গঙ্গাগর্ভ হইতে জলমগ্ন এক বালককে তুলিতে গিয়া প্রবল স্রোতো-ধারায় মোহিতচন্দ্রের প্রাণবিয়োগ হইয়াছে। এই দুঃসংবাদের কথা সুশীল প্রথমতঃ কাহাকেও জানাইল না। নিজের পত্নীকে পর্য্যন্ত নহে। সংবাদ পাইবামাত্র সে কয়েক জন লোক লইয়া হরিদ্বারে চলিয়া গেল। যমুনা দাদার আকস্মিক হরিদ্বার-গমনের সংবাদে বিচলিত ও শঙ্কিত হইয়া উঠিয়াছিল। সে সঙ্গে যাইবার জন্ত জিদ ধরিয়াছিল; কিন্তু নানাকথায় সহোদরাকে ভুলাইয়া, রাবণের চিতার আশ্রয় বৃকে জালিয়া সুশীল মেলাক্ষেত্রে পৌছিল। অনুসন্ধানে সে জানিতে পারিল, ঘটনা সত্য। কর্তৃপক্ষ শবদেহ তখনও জ্বালাইয়া দিবার অনুমতি দেন নাই। ক্ষত-বিক্ষতদেহ ও জলমগ্নাবস্থায় বিকৃতশরীর হইলেও সুশীল বুঝিল যে, মৃতদেহ মোহিতেরই। শোকে, অবসাদে সে অভিভূত হইলেও ভগিনীপতির মৃতদেহ সে সযত্নে সংকার করাইল। মেলাস্থলের বহু কর্মীর নিকট সে এই ধনী সন্তানের সেবাপরায়ণতা ও আত্মোৎসর্গের কত অবদান-কথাই না জানিতে পারিল! ঘটনার পূর্ব-দিবস প্রচুর বারিপাত হইয়া গঙ্গার কলেবর বৃদ্ধি পাইয়াছিল, জলের খরস্রোতোধারাও যেন শতগুণ শক্তি সঞ্চয় করিয়াছিল! একটি দ্বাদশবৎসর বয়স্ক বালক পদস্থলিত হইয়া খরস্রোতের মধ্যে পড়িয়া যায়। সহস্র সহস্র দর্শক তথায় দণ্ডায়মান ছিল। সেই বালকের প্রাণরক্ষার জন্ত কোনও সাহসীর সাহসে কুলাইল না। মোহিতচন্দ্র কয়েক জন রোগীর সেবা করিবার পর



## যমুনাধারা

সেই মুহূর্তে ঘটনাস্থলে আসিয়া দাঁড়াইয়াছিল । সে কাহারও নিষেধ না শুনিয়া সলিলগর্ভে ঝাঁপাইয়া পড়িল । বালককে স্রোতবেগ হইতে রক্ষা করিয়া কুলে তুলিবার জন্ত সে অপূর্ব কৌশলে তীরের দিকে ফিরিয়া আসিতেছিল, সেই সময়ে আর একটা প্রবল জলোচ্ছ্বাস আসিয়া উভয়কে কোথায় ভাসাইয়া লইয়া গেল । পরে অনেক অনুসন্ধানে মোহিতের মৃতদেহ প্রায় দুই মাইল দূরবর্তী একস্থানে আবিষ্কৃত হয় ।

পরের জন্ত এই আত্মোৎসর্গকর অপূর্ব কাহিনী শুনিয়া সুশীল আর অশ্রুসংবরণ করিতে পারিল না । সার্থক মোহিতের জন্ম । কিন্তু যমুনা—তাহার সহোদরা ? তাহার তরুণ জীবনে এ কি নিদারুণ বজ্রাঘাত ! কেমন করিয়া জীবনের দীর্ঘপথ সে নিরাপদে অতিক্রম করিবে ? নিরবলম্ব জীবনের সহস্র ক্রটি-বিচ্যুতির আশঙ্কা কল্পনা করিয়া সুশীলচন্দ্র শিহরিয়া উঠিল । দুর্ভাবনার বোঝা লইয়া সে যখন গৃহে ফিরিয়া আসিল, তখন কণাটা আর গোপন করিয়া রাখা চলিল না । শুভবসনা, নিরাভরণা ভগিনীর মূর্তি দেখিয়া তাহার হৃদয় শতধা চূর্ণ হইল । তাহার সমস্ত অন্তর বিদ্রোহী হইয়া উঠিল । না—না, সে সহোদরার এ মূর্তি কখনই সহ্য করিতে পারিবে না । কোনও মতেই নহে ।

প্রস্তর-ক্ষোদিত মূর্তির মত যমুনার ভাবলেশহীন আনন দেখিয়া সে ক্ষিপ্তপ্রায় হইল । যমুনার বৈধব্য দূর করিবার কি কোনও উপায় নাই ? এই বয়সে সে কেন এমন জীবন-যাপন করিবে ? সে সামাজিক শাসনকে গ্রাহ্য করে না.; সময়ের প্রয়োজনে যে

## যমুনাধারা

বাবস্থা এক দিন সমাজের আচার্য্যগণ প্রবর্তিত করিয়াছিলেন, চিরদিনই যে তাহা অব্যাহত থাকিবে, ইহার সার্থকতা তাহার বিদ্রোহী মন স্বীকার করিতে চাহিল না। সে মনে মনে স্থির করিল, যমুনার এই অবস্থান্তরের পরিবর্তনসাধন করা তাহার একান্ত কর্তব্য।

অনেক আলোচনা, তর্ক, অভিমান ও অশ্রুবিসর্জনের পর সুশীল যমুনাকে খেত বস্ত্র ত্যাগ করাইল, এবং দাদার মনস্ত্বষ্টির জন্ত সহোদরা গুধু করপ্রকোষ্ঠে মাত্র কয়েকগাছি সোনার চুড়ী ধারণ করিল। কিন্তু একবেলা অনাহার—হবিষ্যান্নভোজন হইতে সুশীলের কোনও যুক্তি যমুনাকে বিচলিত করিতে পারিল না। সুশীলচন্দ্র যমুনাকে বুঝাইয়াছিল যে, মোহিতের মৃতদেহ বিকৃত অবস্থায় পাওয়া গিয়াছিল, সে দেহ যে অলানুভাবে মোহিতেরই, এ বিষয়ে তাহার সন্দেহের নিরসন হয় নাই। সুতরাং পূর্ণমাত্রায় বিধবা সাজিবার অধিকার হিন্দুশাস্ত্র অনুসারে যমুনার নাই।

সমাজের এই যুক্তিতে যমুনা সারও দেয় নাই অথবা প্রতিবাদও করে নাই। তর্ক করিবার মত মানসিক অবস্থা তাহার ছিল না, বিশেষতঃ পরম স্নেহময় জ্যেষ্ঠ ভ্রাতার সহিত সে কোনও দিন তর্ক করিতে শিখে নাই। তাহার বাক্যকে সে আদেশের মতই চিরদিন পালন করিয়া আসিয়াছে। জীবনের অগ্ৰতম সুরূহৎ ব্যাপারেও সে তর্কের ধার দিয়া গেল না। দাম্পত্য-জীবনের সকল সাধ শেষ হইয়া গিয়াছে—স্বামীর সঙ্গে সঙ্গে হিন্দু নারী-জীবনের সুখের আশাপ্রদীপ নিভিয়া গিয়াছে—তবে দাদার মনে তর্কজাল বিস্তার

## যমুনাধারা

করিয়া, ছুঃখের বোঝা ভারী করিয়া তুলিয়া ফল কি ? এইরূপ চিন্তাধারাই কি তাহাকে নীরব রাখিয়াছিল ?

স্বল্পভাষিনী তরুণী ; শান্ত আননে যথাসাধ্য প্রসন্নতার দীপ্তি ফুটাইয়া তুলিয়া, সহোদরের সংসারে আপনাকে বিলাইয়া দিল । গৃহকার্যের সঙ্গে সঙ্গে সাহিত্যচর্চা, শাস্ত্রগ্রন্থপাঠ করিয়া ক্রমে সে অশান্ত মনকে শান্তির পথে পরিচালিত করিতেছিল ।

স্বামীর বিস্তৃত জমীদারীর মালিক সে । প্রাচীন দেওয়ানজীর উপর জমীদারী পরিচালনের ভার দিয়া সে বৎসরের অধিকাংশ সময় দাদার সংসারেই বাস করিত । সে নির্ঝাঁকুব পুরীতে বাস করিতে তাহার হৃদয় হাহাকার করিয়া উঠিবে বলিয়া সুশীল তাহাকে তথায় যাইতে দিত না ।

## ছয়

“শুনছ, একবার এদিকে এস না।”

স্বামীর আহ্বানে মণিমালা তাহার পার্শ্বে আসিয়া দাঁড়াইল।  
অদূরে তুম্বারশুল্ক শয্যার উপর খুকুরাণী ঘুমাইতেছিল। সকালবেলাই  
তাহার জরত্যাগ হইয়াছিল। ডাক্তারের অনুমান সত্য—সামান্য  
সর্দিজ্বর, দুই দাগ ঔষধেই সারিয়া গিয়াছিল।

মধ্যাহ্ন-আহারের পর অগ্ৰক্লে যমুনা বিশ্রাম করিতেছিল।  
গত রাত্রিতে তাহার নিদ্রা হয় নাই। প্রায় সমগ্র রজনী সে  
খুকুরাণীর পার্শ্বে বসিয়াই কাটাইয়া দিয়াছিল।

“কি বল্ছিলে?”

“ব’স না—এখন ত কোন কাজ নেই। একটা কথা আছে।”

স্বামীর মুখের দিকে চাহিয়া মণিমালা পার্শ্বে উপবিষ্ট হইল।

সুশীল পত্নীর দিকে মুখ ফিরাইয়া বলিল, “ললিত ডাক্তারকে  
তোমার কেমন মনে হয়?”

এই আকস্মিক প্রশ্নের কোন অর্থ বুঝিতে না পারিয়া মণিমালা  
প্রশ্নসূচক দৃষ্টিতে স্বামীর পানে চাহিল।

মুহূৰ্ত্তে সে বলিল, “তোমার কথার মানে বুঝলাম না।”

সুশীল বলিল, “ডাক্তার হিসাবে নয়; পাত্র হিসাবে ললিত  
ডাক্তার কি মন্দ?”

## যমুনাধারা

মণিমালা বুকিল, তাহার স্বামীর মনে কোন্ ভাবের ধারা বহিতেছে। সে স্মশীলচন্দ্রের আননে দৃষ্টি নিবন্ধ রাখিয়া বলিল, “দেখতে শুন্তে ত ভালই। ডাক্তারীতে পসার ত হচ্ছে শুন্তে পাই। ঘরের খবর তোমরা জান। পাত্র মন্দ কি!”

স্মশীল কয়েক মুহূর্ত্ত নীরব থাকিয়া বলিল, “আমাদেরই পালটি ঘর। বাপ-মা কেউ সংসারে নেই, তবে ব্যাঙ্কে মোটা টাকা আছে। আমি ভাবছি, যমুনার সঙ্গে চেষ্টা করা যায় না কি?”

মণিমালা বলিল, “বিধবা-বিবাহে ডাক্তারবাবুর মত হবে?”

স্মশীল বলিল, “আমি অনেক দিন থেকে ললিতবাবুর উপর নজর রেখেছি। ওঁর বন্ধু-বান্ধবদের কাছে শুনেছি, বিধবা-বিবাহে কোন আপত্তি নেই। তা ছাড়া যমুনার সম্বন্ধে আমার মনে হয়, ডাক্তারবাবুর বেশ ঝোক আছে।”

মণিমালা হাসিয়া বলিল, “বটে! গোয়েন্দাগিরিও করা হয় না কি?”

স্মশীল বলিল, “তা একটু আধটু না করলে চলে না। বিশেষতঃ যমুনার মত বিধবা বোন ঘর ঘরে আছে, তাকে একটু চোখ খুলে, কাণ খাড়া করে থাকতে হয় বৈ কি।”

“ললিতবাবু যোগ্য পাত্র; কিন্তু ঠাকুরকির মনের সংবাদটা ত নেওয়া দরকার।”

স্মশীল মুহূর্ত্ত কি চিন্তা করিয়া বলিল, “হ্যাঁ, সেটা ত খুবই দরকার। কিন্তু তার কি মত হবে না?”

## যমুনাধারা

মণিমালা দূরে—জানালার বাহিরে দৃষ্টি প্রসারিত করিয়া মৃদুস্বরে বলিল, “কি জানি !”

চিরন্তন সংস্কার তাহার চিত্তকে কি এ বিষয়ে নিরুৎসাহ করিয়া তুলিয়াছিল ?

সুশীল ব্যগ্রকণ্ঠে বলিল, “দেখ, তার মত হবে না ব’লে আমার বিশ্বাস নেই। কেন হবে না? মোহিতের স্মৃতি কি এখনও মনে ক’রে রেখেছে? যাকে পাওয়া যাবে না, তার কথা মনে ক’রে রেখে লাভ ত নেই।”

মণিমালা হাসিল—সে হাস্তে প্রসন্নতা নাই, শুধু একটা করুণ রেখার বিকাশমাত্র। সে নারী—হিন্দুর, বাঙ্গালীর ঘরের কুলবধু। আজন্মের সংস্কার—আবহমানকাল ধরিয়া যে ভাবধারা ভারতবর্ষের অস্থিমজ্জায়, ফল্গুপ্রবাহের গায় প্রবাহিত হইতেছে, তাহার স্নিগ্ধ মাধুর্য্য যে তাহারও অন্তরের সমস্ত স্থানটা অধিকার করিয়া রাখিয়াছে। ভগবান্ না করুন, যদি আজ যমুনার দুর্দশা তাহার পক্ষে, কয়েক বৎসরের মধ্যেই কি সকল স্মৃতি হৃদয় হইতে ধুইয়া মুছিয়া যাইবে ?

সে শিহরিয়া উঠিয়া চক্ষু মুদ্রিত করিল। অন্তরের ভিতর হইতে একটা নির্কেদ যেন মত্তহস্তীর বল ধারণ করিয়া বাহিরে ছুটিয়া আসিল। সে তাড়াতাড়ি চক্ষু চাহিয়া স্বামীর অঙ্গে আপনাকে নিবন্ধ করিয়া দিল।

সুশীল তাহার মনের কথা বুঝিল না। সে বলিয়া উঠিল, “তোমার আবার কি হ’ল ?”

## যমুনাধারা

“কিছু না,” বলিয়া সে সমস্ত হুশ্চিন্তাকে তাড়াইয়া দিয়া সহজভাবে স্বামীর দিকে চাহিল। তাহার সমগ্র চিত্ত তখন যেন ভাষাময় হইরা বলিতে চাহিতেছিল, ভগবান্! এমন হৃদশার পূর্বে সে যেন ইহলোক হইতে বিদায় লইতে পারে।

স্বামী ও স্ত্রী অনেকক্ষণ নীরবে বসিয়া রহিল। অদূরে একটা ত্রিতল অট্টালিকার চিলের ছাদের উপর একজোড়া পাৰাবত বসিয়াছিল। মণিমালা সেই দিকে দৃষ্টি নিবদ্ধ রাখিল।

সুশীল বলিল, “তুমি একবার কৌশলে যমুনার মনের ভাবটা জেনে নিও, মণি। তাকে নিঃসঙ্গ জীবন যাপন করবার দুঃখ থেকে মুক্ত করাই আমার জীবনের একটা প্রধান ব্রত; তা ত তুমি জান।”

মণিমালার সে সম্বন্ধে বিন্দুমাত্র সন্দেহ ছিল না। তাহার সোদরাধিকা ননন্দাকে, কোনও সংসারের গৃহলক্ষ্মীরূপে প্রতিষ্ঠিত হইতে দেখিলে সে-ও আনন্দ লাভ করিবে। স্বামী ও পুত্র-কন্যা-পরিবেষ্টিত সুখের সংসার কোন্ নারীর না কাম্য? কিন্তু—

মণিমালা বলিল, “তা আমি চেষ্টা ক’রে দেখব। বড় চাপা মেয়ে তোমার বোনটি।”

“এখনই তাড়াতাড়ি নেই। ধীরে সুস্থে অবসর বুঝে তুমি ব’লে দেখো। তার মতের বিরুদ্ধে আমি কোন কাজ করব না; কিন্তু তাকে সংসারী করতে না পারলে আমার মনে সুখ হবে না। ভাল কথা, কা’ল সন্ধ্যার পর তোমাদের ছুঁজনকে নিয়ে স্বদেশী

## যমুনাধারা

মেলা দেখতে যাব । ভবানীপুরে—পোড়াবাজারের কাছে বিরাট মেলা বসেছে । যমুনাকে ব'লে রেখ ।”

এমন সময় নিদ্রাভঙ্গে খুকুরানী ডাকিয়া উঠিল, “মা !”

মণিমলা কণ্ঠার কাছে উঠিয়া গেল । তার গায় হাত দিয়া দেখিল, জ্বর আসে নাই । সে কণ্ঠাকে বুকের উপর তুলিয়া লইল ।



## সাত

ভবানীপুর পোড়বাজারের কাছে বর্তমানে যেখানে “আলেকজান্দ্রা” কোর্ট অবস্থিত, সেইখানে পূর্বে বিস্তৃত ময়দান ছিল। সেই উন্মুক্ত ক্ষেত্রে সেবার কংগ্রেসের মণ্ডপ স্থাপিত হইয়াছিল। উহার বিপরীত দিকে রাজপথের পার্শ্বে পূর্বকালে ট্রামের ডিপো ছিল। ঘোড়ার ট্রামগাড়ী বৈদ্যুতিক ট্রামগাড়ীতে পরিণত হওয়ার সেই ডিপো উঠিয়া যায়। এখন সেখানে প্রসিদ্ধ “ক্যালকাটা” ক্লাব অবস্থিত। যে সময়ের কথা বলিতেছি, তখন ট্রাম-ডিপো উঠিয়া গিয়া স্থানটি খালি পড়িয়াছিল। এখনও ক্যালকাটা ক্লাবের পর অনেকটা স্থান শূন্য পড়িয়া আছে—মাঝে মাঝে তথায় সার্কাস ও মেলা বসিয়া থাকে। স্বদেশী যুগের আমলে এখানে বিরাট মেলা বসিয়াছিল। ভারতবর্ষের বিভিন্ন স্থান হইতে নানাবিধ স্বদেশী শিল্পজাতদ্রব্য প্রদর্শনী-ক্ষেত্রে সমানীত হইয়াছিল। দেশনেতৃগণের প্রাণপণ চেষ্টা ফলে সেই মেলাক্ষেত্রে নবজাগৃত ভারতবাসী তাহাদের পরিশ্রমজাত দ্রব্য-সম্ভারে সমগ্র দেশের সম্মুখে আশার স্বর্গ গড়িয়া তুলিবার চেষ্টা করিয়াছিল। তখন সাহিত্য-সম্রাট, মন্ত্রদ্রষ্টা ঋষি বঙ্কিমচন্দ্রের “বন্দে মাতরম্” সঙ্গীত আসমুদ্র-হিমাচলে অনুরণিত হইয়া দেশবাসীর প্রাণে এক উন্মাদনা আনয়ন করিয়াছিল। এই মেলা যাহারা দেখিয়াছিলেন, তেমন লোক বাঙ্গালা দেশে এখনও লক্ষ লক্ষ

## যমুনাধারা

জীবিত আছেন। সেই দৃশ্যে বাঙ্গালী ভাবিয়াছিল, যদি এমনই ভাবে আত্মবিশ্বস্ত জাতি দীর্ঘনিদ্রা-ভঙ্গের জড়তা পরিহার করিয়া, আপন পায় ভর দিয়া উঠিতে পারে, তাহা হইলে নবজীবনের প্রেরণা তাহাকে মানুষ করিয়া জগতের সন্মুখে একদিন গৌরবের আসন প্রদান করিবে না, কে বলিতে পারে ?

এক দিকে কংগ্রেস-মণ্ডপ, অপর দিকে বিরাট মেলা—প্রত্যহ সহস্র সহস্র দর্শক—নর-নারী মেলা দেখিতে আসিতেছিল। প্রশস্ত রাজপথে গাড়ী-ঘোড়ার ভীড় সকল সময়েই লাগিয়া রহিয়াছে। বঙ্গভঙ্গজনিত নিদারুণ ক্ষোভে বাঙ্গালার জাতীয় জীবন তখন ব্যথিত, প্রপীড়িত। সেই বেদনার বাণী সারা ভারতবর্ষকেও আহত করিয়াছিল। তাহারই ফলে কলিকাতায় দেশীয় শিল্পবাণিজ্য-প্রকরণের অপূর্ব সমাবেশ। বাঙ্গালী দর্শক ত জনভূমিজাত পণ্য-সম্ভার দেখিবার জন্য অসীম আগ্রহে সুদূর-পল্লী হইতে আসিয়াছিল—ভারতবর্ষের নানাস্থান হইতেও যাত্রিসমাগম উপেক্ষণীয় ছিল না।

শীতের কুয়াসাচ্ছন্ন সন্ধ্যায় মেলাক্ষেত্র দর্শকে পরিপূর্ণ হইয়াছিল। রাজপথের উভয় পার্শ্বেই গাড়ী-ঘোড়ার অসম্ভব ভীড়। গ্যাসের আলো কুঞ্জাটিকার ঘনাকার সম্পূর্ণরূপে দূরীভূত করিতে পারিতেছিল না।

ষষ্ঠীক্রনাথ ললিত ডাক্তারের সহিত মেলাক্ষেত্র দেখিয়া বেড়াইতেছিল। ডাক্তারের বক্ষোদেশে স্বেচ্ছাসেবকের নিদর্শন-সূচক একটি রেশমের ফুল সংলগ্ন ছিল। চিত্রাগার, বঙ্গাগার প্রভৃতি

## যমুনাধারা

নানা দর্শনীয় স্থান পরিদর্শন করিয়া যেখানে মল্লযুদ্ধের প্রদর্শনী হইবে, উভয়ে তথায় উপস্থিত হইল। পরদিবস যতীন্দ্রনাথকে ভারতবর্ষীয় শ্রেষ্ঠ মল্লগণের সহিত বলপরীক্ষা করিতে হইবে। সে জন্ম মল্লক্ষেত্রটি সে ভাল করিয়া পরীক্ষা করিয়া দেখিল। বস্ত্রাবাসের মধ্যস্থ ব্যায়াম-ক্ষেত্রটি মল্লদিগের বল-পরীক্ষার উপযোগী করিয়া প্রস্তুত হইয়াছিল, দেখিয়া যতীন্দ্র প্রীত হইল। দীর্ঘকাল ধরিয়া শক্তিসাধনায় অবহিত থাকিয়া সে যে বিদ্যা আয়ত্ত করিয়াছে, পরীক্ষাকালে সে কি তাহা প্রয়োগ করিয়া বাঙ্গালীর মুখ রক্ষা করিতে পারিবে না? তাহার বলিষ্ঠদেহের মধ্যে রক্ত যেন ঈষৎ চঞ্চল হইয়া উঠিল। সে ব্রহ্মচারীর গায় সংঘমে অভ্যস্ত, শরীরকে সে কোনও দিন অসংঘমের পথে চলিতে দেয় নাই। পত্নীবিয়োগের পর হইতেই মনকে সে অপবিত্র চিন্তার সংস্পর্শ হইতে সর্বদা দূরে রাখিয়া আসিয়াছে—লৌহ-দৃঢ় শরীরের গায় তাহার চিত্তও অনমনীয়—কোনও প্রলোভন তাহার মনের শক্তিকে এতটুকু আহত করিতে পারে নাই। শক্তিরূপিণী জননী অবশ্যই তাঁহাকে সাফল্য দান করিবেন। ভারতবর্ষের মল্লযুদ্ধ-কৌশল সে নানা ব্যায়াম-বীরের নিকট হইতে আয়ত্ত করিয়াছে, তাহা ছাড়া জাপানী মল্লযুদ্ধের অপূর্ব কৌশল-সমূহ এতদিন ধরিয়া যে সে শিক্ষা করিয়া আসিয়াছে, তাহা কি ব্যর্থ হইবার?

মনে মনে অনন্ত শক্তিরূপা জননীকে প্রণাম করিয়া সে মেলাক্ষেত্রের বাহিরে আসিল। ললিত ডাক্তার তাহাকে মল্লযুদ্ধ সংক্রান্ত নানা বিষয়ের প্রশ্ন করিতেছিল।

## যমুনাধারা

উজ্জ্বললোকে মেলাক্ষেত্রটি পরম রমণীয় দেখাইলেও কুজ্জাটিকার আবরণ তখনও অন্তর্হিত হয় নাই। তোরণের বাহিরে আসিয়া উভয়ে গল্প করিতে করিতে মন্থরগতিতে উত্তরের দিকে চলিল। রাজপথে নভোরেণুর যবনিকা হুলিতেছিল—গ্যাসের আলো যেন ম্লান। দর্শকদিগের জুড়ী, ফিটন প্রভৃতি সারি সারি দাঁড়াইয়া আছে। তখন মোটর-বাসের যুগ নহে। কদাচিৎ দুই একখানি মোটর কোথাও অপেক্ষা করিতেছিল।

ললিত ডাক্তার বলিল, “আমাদের গাড়ীখানা আবার কোথায় দাঁড়াল?”

যতীন্দ্র বলিল, “এত ব্যস্ত কি? আসুন, বাইরে খানিক বেড়ান যাক। এখনও আটটা বোধ হয় বাজেনি।”

উভয়ে অগ্রসর হইল। কুয়াসার অন্ধকারে এ-পার হইতে রাস্তার ওপারের লোক চেনা যায় না।

ললিত ডাক্তার কয় দিনেই যতীন্দ্রনাথের বিশেষ অনুরক্ত হইয়া পড়িয়াছিল। আলোচনাফলে সে জানিতে পারিয়াছিল, এই ব্যক্তিটি শুধু বলের চর্চা করিয়াই অসাধারণ হইয়া উঠে নাই; এই বিশালকার, বলিষ্ঠ যুবকের দেহের অন্তরালে কল্পনাপ্রবণ মধুর হৃদয়টি আরও লোভনীয়। যতীন্দ্রনাথ একাধারে ব্যায়ামবীর, চিত্রশিল্পী এবং সাহিত্যিক। সঙ্গীতবিদ্যাও যতীন্দ্রনাথের অনধিগত নহে।

যুগ্ম ভক্তের সহিত গল্প করিতে করিতে যতীন্দ্রনাথ অগ্রসর হইতে লাগিল। অদূরে সাকুলার রোড ও চৌরঙ্গী রোডের সংযোগ

## যমুনাধারা

শুল। এদিকে গাড়ী-ঘোড়ার ভীড় নাই বলিলেই হয়। শুধু একখানি বাড়ীর গাড়ী কুয়াসায় আচ্ছন্ন হইয়া দাঁড়াইয়াছিল।

সহসা উভয়েই চমকিয়া উঠিল। নারীকণ্ঠের চাপা আর্তনাদ নহে কি? শব্দ লক্ষ্য করিয়া উভয়ে সেই গাড়ীর দিকে দৌড়িল। তাহাদের অনুমান মিথ্যা নহে। যতীন্দ্রনাথ চকিত দৃষ্টিতে দেখিল, এক ব্যক্তি ঘোড়ার মুখরজ্জু ধরিয়া রহিয়াছে। আর একজন গাড়ীর সহিস অথবা কোচম্যানকে ভূমিতলে চাপিয়া ধরিয়া তাহারই পাগড়ী অথবা উত্তরীয় দিয়া তাহার মুখ ও হাত-পা বাঁধিতেছে, তৃতীয় ব্যক্তি গাড়ীর ভিতর মাথা প্রবিষ্ট করিয়া দিয়াছে। গাড়ীর মধ্য হইতে শঙ্কিতা নারীর অস্ফুট চীৎকার! মুহূর্ত্ত দৃষ্টিপাতে যতীন্দ্রনাথ ব্যপারটা বুঝিয়া লইল। বেশভূষায় তাহারা যে জাহাজের গোরা খালাসী, তাহা অনুমান করিতে বিলম্ব হইল না।

একলক্ষ্যে যতীন্দ্রনাথ যে পাখণ্ড গাড়ীর ভিতর প্রবেশ করিতে বাইতেছিল, তাহার স্কন্ধদেশ বজ্রদৃঢ়ভাবে চাপিয়া ধরিল। পর-মুহূর্ত্তে তাহাকে টানিয়া ফুটপাতের উপর নামাইল। খালাসীটা তাহার আক্রমণ হইতে মুক্ত হইবার জগু প্রাণপণ শক্তি প্রয়োগ করিল। কিন্তু চিরদিনের অভ্যস্ত শক্তিসাধনা যতীন্দ্রনাথকে অপৰ্য্যাপ্ত সামর্থ্যের অধিকারী করিয়াছিল। স্বল্পায়সে সে তাহাকে কায়দা করিয়া ফেলিল। কিন্তু দ্বিতীয় গোরা খালাসীটা ব্যপার দেখিয়া বন্ধুর সাহায্যার্থ ছুটিয়া আসিল। গাড়োয়ানকে সে ইতিমধ্যে বাক্ ও চলচ্ছক্তিহীন অবস্থায় বাঁধিয়া ফেলিয়াছিল।

দ্বিতীয় খালাসী যতীন্দ্রনাথের পৃষ্ঠদেশে আপতিত হইয়া বজ্রমুষ্টি

## যমুনাধারা

প্রহার করিয়া বন্ধুকে মুক্ত করিবার চেষ্টা করিতে লাগিল। কিন্তু যতীন্দ্রনাথ তখন প্রথম খালাসীর গলদেশ তাহার দক্ষিণ পদের বন্ধনীর মধ্যে অপূর্ব কোশলে চাপিয়া ধরিয়াছিল। তার পর সে দক্ষিণ বাহু ঘুরাইয়া প্রহাররত গোরাটার একথানা হাত কয়েকবার চেষ্টার পর ধরিয়া ফেলিল। সে প্রচণ্ড মুষ্টিবন্ধন হইতে মুক্ত হওয়া সহজসাধ্য নহে। যুৎসু কোশলে গোরাটাকে সম্মুখে টানিয়া আনিয়া যতীন্দ্রনাথ বহু চেষ্টায় তাহাকে বাম-কুক্ষিদেলে চাপিয়া ধরিল। এদিকে তৃতীয় খালাসী বিপদ দেখিয়া ঘোড়ার মুখ ছাড়িয়া দিয়া যতীন্দ্রের উপর আপতিত হইয়াছিল। দ্বিতীয় খালাসীর সাহিত যখন যতীন্দ্রনাথ ধ্বস্তাধ্বস্তি করিতেছে, সেই অবকাশে সে তাহার শুরমাংসপুষ্ট মুষ্টি যতীনের পৃষ্ঠদেশে নির্দয়ভাবে বর্ষণ করিতে লাগিল। দ্বিতীয় ব্যক্তিকে আরক্ত করিয়া শক্তিশর যতীন, তৃতীয় ব্যক্তিকেও পূর্বরূপ কোশলে সম্মুখে টানিয়া আনিয়া তার পর বহু আয়াসে তাহাকেও দক্ষিণ-কুক্ষিগত করিয়া ভীষণ শক্তিপ্রয়োগ করিয়া চাপ দিতে লাগিল। অসুরবৎ তিনটি গোরা পালোরান তাহার কবল হইতে মুক্তিলাভের বহু চেষ্টা করিল; কিন্তু পারিল না। অবশেষে চাদ্দের প্রভাবে একজনের জিহ্বা প্রায় বাহির হইয়া পড়িল। যতীন্দ্রনাথ তখন তাহাকে ছাড়িয়া দিল। গোরাটা নিজ্জীব কুটপাথের উপর পড়িয়া গেল। অপর দুই জন রুদ্ধশ্বাসে ভাঙ্গা ইংরাজিতে বলিল, “বাবু, ঘাট হয়েছে ছেড়ে দাও।”

যতীন্দ্রনাথ একবার চারিদিকে চাহিয়া দেখিল। ললিত

## যমুনাধারা

ডাক্তার কোথায় গেল ? গোলমাল দেখিয়া সে কি আধুনিক যুগের বাঙ্গালী-নীতি অবলম্বন করিয়াছে ? তেমন অবস্থাতেও দুঃখের হাসি যতীন্দ্রের ওষ্ঠপ্রান্তে বোধ হয়, ভাসিয়া উঠিয়াছিল । অদূরে লোকজনের কলরব শুনা গেল । যে খালাসীটা ফুটপাথে মুহূর্তের জন্ত নিজ্জীবন পড়িয়াছিল, সে মনুষ্য-কলরব শুনিয়া তাড়াতাড়ি উঠিয়া দাঁড়াইল, এবং যতীন্দ্রনাথকে স্থলিত-কণ্ঠে মিনতি জানাইয়া তাহার বন্ধু-যুগলকে ছাড়িয়া দিতে অনুরোধ করিল । তাহারা আর কখনও এমন কুকার্য্য করিবে না ।

যতীন মুহূর্ত কি চিন্তা করিল । ইহাদিগকে পুলিশের হাতে দিতে গেলে গাড়ীর মহিলাদিগকেও জড়াইতে হইবে । কাজটা ভাল হইবে কি ? যতীন তাহার চরণ ও বাহুর বন্ধন শ্লথ করিয়া দিল । মুক্তি পাইয়া গোরা-খালাসীরা টলিতে টলিতে উত্তরদিকে যথাসম্ভব বেগে ধাবিত হইল । পশ্চাতে মানুষের কলরব বন্ধিত হইতেছিল । কথাটা হয় ত কোন কোন চিরবিজ্ঞ ব্যক্তির নিকট গঞ্জিকাসেবীর খেয়ালের কথা মত শুনাইবে । কিন্তু কবি সেকস্পীয়ারের অমর উক্তিটি স্মরণ করিলে তাহারা বৃষ্টিতে পারিবেন, সংসারের অনেক বিষয়ই আমাদের জানার বাহিরে, অথচ সত্য ।

একজন যুবক দ্রুতপদে গাড়ীর কাছে ছুটিয়া আসিল, যতীন বলিল, “এ গাড়ী কি আপনার ?”

ব্যগ্রকণ্ঠে যুবক বলিলে, “আজ্ঞে হ্যাঁ ।” সে দূর হইতে ব্যাপারটা কিছু কিছু লক্ষ্য করিয়াছিল ।

## যমুনাধারা

যতীন বলিল, “মেয়েদের রক্ষা করবার শক্তি নেই, অথচ সাধারণ স্থানে তাদের নিয়ে আসতে লজ্জা হয় না আপনাদের ?”

তাহার চিত্ত তখন অত্যন্ত বিক্ষুব্ধ।

যুবক সঙ্কুচিতভাবে বলিল, “আমি সহস্রকে নিয়ে টিকিট কিনতে গিচ্ছলুম। কোচম্যান গাড়ীর কাছে ছিল। কে জানে এমন বিপদ হবে !”

যতীন বলিল, “ও সব বাজে কথা। আপনি থাকলেই বা কি করতেন ? তিনটে মানোয়ারী গোরা আপনাদের তিনজনকে পিষে ফেলে, মহিলাদের বে-ইজ্জত করত। যত দিন মেয়েদের রক্ষা করবার শক্তি না হবে, এমন ক’রে লুক্ক রাক্ষসদের দৃষ্টির সামনে তাঁদের আনা উচিত হবে না। আগে শক্তিমান হোন, তার পর ওদের নকল করবেন !”

“দাদা !”

যুবক গাড়ীর দিকে ছুটিয়া গেল।

যতীন্দ্রনাথ তখন কোচম্যানের বন্ধন মুক্ত করিয়া দিয়া তাহাকে উঠিয়া দাঁড়াইতে বলিল। লোকটা তখনও কাঁপিতেছিল। সে আভূমি নত হইয়া সেলাম করিতে করিতে স্থলিত-কণ্ঠে বলিল, “আপ্ ভীমজী হায়, হুজুর !”

সহিসটা আসিয়া পড়িয়াছিল। যতীন্দ্রনাথ কোচম্যানকে গাড়ীতে উঠিতে বলিল। সে ধীরে ধীরে খোঁড়াইতে খোঁড়াইতে গাড়ীর উপর চাপিয়া বসিল।

যুবক দ্রুতগতিতে যতীন্দ্রনাথের কাছে আসিয়া তাহার



## যমুনাধারা

যুগলকর চাপিয়া ধরিয়া বলিল, “আজ আপনি আমার ধর্ম, ঈজ্জত সব রক্ষা করেছেন। আমার স্ত্রী ও বোন সংক্ষেপে সব বলেছে। ভগবান আপনার—”

বাধা দিয়া যতীন বলিল, “এখন কি মেলা দেখবার সাধ আছে?”

যুবক বলিল, “না, আজ বাধা পড়েছে, আর যাব না। আপনি কোথায় যাবেন, চলুন পৌছে দিয়ে—”

“থাক, আমার গাড়ী সঙ্গে আছে। আপনারা তবে বাড়ী যান। ঐ দেখুন, অনেক লোক ছুটে আসছে। এখনই নানা কৈফিয়তের হাঙ্গামা হবে। ও সব আমি ভালবাসি না।”

যতীন্দ্রনাথ যুবককে ঠেলিয়া গাড়ীতে উঠাইয়া কোচম্যানকে গাড়ী হাঁকাইতে বলিল

“মশাই! আপনার নামটা—”

“কোন দরকার নেই। গাড়ী হাঁকাও, কোচম্যান!” গড়-গড় শব্দে গাড়ী উত্তরদিকে ধাবিত হইল।

“এই যে, যতীনবাবু!”

যতীন্দ্র দেখিল, দশ বারো জন স্বেচ্ছাসেবকসহ ললিত ডাক্তার দ্রুতগতিতে ছুটিয়া আসিতেছে। না, তাহা হইলে এই ডাক্তারটি ঠিক সে দলের নহে!

ললিত ডাক্তারের শ্বাসপ্রশ্বাস দ্রুতবেগে বহিতেছিল। সে বলিল, “ব্যাপার সঙ্গীন দেখে আমাদের আপিসে ছুটে গেলুম। লোকজন সংগ্রহ করে আসতে একটু দেরী হয়েছে। তার পর কি হ'ল বলুন ত?”

## যমুনাধারা

ঈশৎ হাসিয়া যতীন বলিল, “সে সব চুকে বুকে গেছে। মানোয়ারী গোরা তিনটেকে ছেড়ে দিয়েছি।”

“এটা ভাল করেন নি, যতীন বাবু। তাদের পুলিশে দিলে ভাল হ’ত।”

যতীন্দ্রনাথ দীপ্তকণ্ঠে বলিয়া উঠিল, “ভদ্রমহিলাদের এ ব্যাপারে জড়ালে খুব পৌরুষ বাড়ত?”

ললিত বলিল, “দুষ্টিদের শাস্তি হওয়া দরকার।”

“হু’ দশ টাকা জরিমানা বা বড় জোর দুই-এক মাস জেল, দেখুন, ডাক্তার বাবু, ওসব দুর্বলের যুক্তি। এ রকম অণ্ডায় যারা করে, তাদের শাস্তি পদাঘাত। শক্তি সঞ্চয় করুন, নারীকে শক্তিরূপা ক’রে গ’ড়ে তুলুন। খালি আইন-আদালত নিয়ে প’ড়ে থাকলে চলবে না। বুঝেছেন?”

স্বৈচ্ছাসেবকদলের এক জন বলিল, “ঠিক বলেছেন আপনি। নারীর মর্যাদা-রক্ষার জন্য আমাদের প্রচুর শক্তি সঞ্চয় করা দরকার।”

ললিত বলিল, “যাক্, ব্যাপারটা যখন মিটে গেছে, তোমরা ভাই আফিসে ফিরে যাও। আমি এঁকে নিয়ে বাড়ী চলুম।”

গম্ভীরভাবে যতীন্দ্রনাথ ললিতের সহিত গাড়ীর সন্ধ্যানে চলিল।

## আট

রৌদ্রকরোজ্জ্বল প্রভাতে সুশীল বাহিরের ঘরে বসিয়া সংবাদ-  
পত্র পড়িতেছিল।

“নমস্কার, সুশীলবাবু।”

“আস্থন ডাক্তারবাবু, আমি আপনারই প্রতীক্ষা করছিলাম।”

একখানা চেয়ার টানিয়া লইয়া ললিত ডাক্তার তাহাতে  
উপবেশন করিল।

“আবার কার অসুখ?”

সুশীল গৃহ হাসিয়া বলিল, “অসুখ কারও নেই। খুকীর জন্ম  
একটা টনিক ব্যবস্থা করবেন বলেছিলেন। বাড়ীর ভিতর থেকে  
তারই তাগাদা। তাই আপনাকে আনবার জন্ম কাল থেকে লোক  
যাচ্ছে।”

“ওঃ!—এর জন্ম ভাবনা নেই। খুকীর আর কোন অসুখ  
করেনি ত?”

সুশীলচন্দ্র বলিল, “না, সেই জ্বর ছেড়ে গেছে, আর জ্বর  
আসে নি। তবে সামান্য একটু কাসি আছে। আমার বোন  
তাতেই অস্থির। সে এর জন্ম অন্ততঃ কাল তিন বার আপনার  
ডিসপেনসারীতে লোক পাঠিয়েছিলো। কিন্তু সে আপনার দেখা  
পায়নি।”

## যমুনাধারা

ডাক্তারের মুখমণ্ডল সহসা উজ্জ্বল হইয়া উঠিল। সে মাথার টুপিটা হাঁটুর উপর হইতে টেবলের উপর রাখিয়া বলিল, “খুকীকে একবার দেখতে হবে।”

সুশীলচন্দ্রের আদেশে ভৃত্য ভিতরে চলিয়া গেল।

“কাল-পরশু কোথায় ছিলেন ; খুব কন্ ছিল বুঝি ?”

“ডাক্তারের জন্ত নয়—একটা মুষ্কিলে পড়েছিলাম—”

এমন সময় খুকুরাণীকে লইয়া ভৃত্য কক্ষমধ্যে প্রবেশ করিল।

কথাটা তখন চাপা পড়িয়া গেল। খুকুরাণীকে পরীক্ষা করিয়া ডাক্তার বলিল, “না, বেশ ভাল আছে। কাঁসিটা কিছু নয়—গলার। একটা ঔষধ লিখে দিচ্ছি, আনিয়া নেবেন।”

ডাক্তার ব্যবস্থাপত্র লিখিয়া দিল।

“মুষ্কিলের কথা কি বলছিলেন, ডাক্তারবাবু ?”

ললিত ডাক্তার বলিল, “ও! হ্যাঁ—আমাদের এক বন্ধুর প্রদর্শনীতে কুস্তী খেলার প্রতিযোগিতা করবার কথা ছিল। আজ মেলায় সেই খেলা হবে ; কিন্তু বন্ধুটি সেখানে যেতে পারবেন না।”

সুশীল বুঝিতে পারিল না, বন্ধুর মল্লযুদ্ধের প্রতিযোগিতার সহিত ডাক্তারের মুষ্কিলের সম্বন্ধ কোথায় ? সে বলিল, “কেন, তাঁর কি হয়েছে ?”

“সেদিন গোটা কয়েক গোরা খালাসীর সঙ্গে লড়াই ক’রে তিনি বড় কাবু হ’য়ে পড়েছেন।”

সুশীল চকিতভাবে চেয়ার ছাড়িয়া দাঁড়াইল। অন্তঃপুরে

## যমুনাধারা

ইবার দরজার উপর যে যবনিকা লম্বিত ছিল, তাহাও যেন  
লিয়া উঠিল।

বিস্মিতভাবে, উৎকণ্ঠাভরে স্মশীল বলিল, “কি রকম?”

ডাক্তারও স্মশীলচন্দ্রের ঔৎসুক্যের পরিমাণ দেখিয়া একটু  
বিস্মিত হইয়াছিল। সে বলিল, “সেদিন কয়জন মহিলা একথানা  
বাড়ীতে ক’রে মেলা দেখতে গিয়েছিলেন। গোরা খালাসীরা  
স্বাস্থ্য অরক্ষিতা মহিলাদের সম্মুখমহানি করবার চেষ্টায় ছিল, কিন্তু  
সেই সময় এই বীরবন্ধুটি একা তাদের আটকে রেখেছিলেন।  
যখন তাঁর পিঠে এমন প্রহার করেছিল—তখন কিছু বুঝতে  
পারেন নি—বাড়ী আসবার পর দেখা গেল, সারা পিঠ ফুলে  
ঠাছে। আজ দু’দিন নানা ঔষধ দেওয়া গেছে; কিন্তু লড়াবার মত  
বস্থা তাঁর এখনও হয়নি। এ যাত্রা এই বাঙ্গালী বীরের  
কীর পরিচয় দেশের লোক পেলো না। ক’দিন তাঁর কাছেই  
লাম।”

পর্দাটা ঘন ঘন ছলিয়া উঠিল।

স্মশীলচন্দ্র ডাক্তারের পার্শ্বে আসিয়া দাঁড়াইল। তাহার দুই  
হাত উজ্জল হইয়া উঠিয়াছিল।

“এই বাঙ্গালী পালোয়ানের নাম কি, ডাক্তারবাবু?”

“যতীন্দ্রনাথ বসু। কেন বলুন ত?”

“তিনিই আমার স্ত্রী ও বোনের ইজ্জত রক্ষা করেছিলেন।”

“বলেন কি স্মশীলবাবু? সে বাড়ীতে গুঁরাই ছিলেন?”

ডাক্তার চেয়ার ছাড়িয়া উঠিয়া দাঁড়াইয়াছিল।

## যমুনাধারা

“হ্যা, আমি তখন টিকিট কিনতে গিয়েছিলুম।”

মুহূর্ত নিমীলিতনেত্রে ডাক্তার কি ভাবিয়া শিহরিয়া উঠিল। যদি যতীন্দ্রনাথ সেই সঙ্কট-মুহূর্তে উপস্থিত না হইত, নারীদিগের কি লাঞ্ছনা ঘটিত, সেই কথা স্মরণ করিয়াই কি তাহার দেহ টলিয়া উঠিল?

“ডাক্তারবাবু, তিনি এখন কেমন আছেন? আমি তাঁকে একবার দেখতে যাব।”

“অন্য বিষয়ে ভালই আছেন। তা বেশ ত, আমার সঙ্গে চলুন না। আমি এখান থেকে সেখানেই যাব।”

এই বলিয়া সে যতীন্দ্রনাথ সম্বন্ধে যাহা কিছু জানিত, সমস্তই সংক্ষেপে বিবৃত করিল।

“সেদিন নাম জান্বার অনেক চেষ্টা করেছিলুম; কিন্তু তিনি কিছুতেই বলেন নি। কোথায় থাকেন, তাও জানতে পারি নি। আপনি বসুন, ডাক্তার বাবু, আমি এখনই আসছি।”

সুশীলচন্দ্র ভিতরে চলিয়া গেল। মণিমলা ও যমুনাকে সম্মুখে দেখিয়া সে সোৎসাহে সংক্ষেপে বলিল, “তাঁর নাম ও ঠিকানা জানতে পেরেছি। আমি ডাক্তারের সঙ্গে সেখানে যাচ্ছি।”

যমুনা ধীরকণ্ঠে বলিল, “তাঁকে আমাদের কৃতজ্ঞতা জানিয়ে বলো, দাদা, দয়া ক’রে যদি তিনি একবার এখানে আসেন। আমরা তাঁকে দেখব।”

## যমুনাধারা

মণিমালা বলিল, “হ্যাঁ, তাঁকে এখানে আনাই চাই। তাঁর স্বাধীনতা শোধ করা যাবে না। তবে ভক্তি ও কৃতজ্ঞতা জানিয়ে যদি কিছু তৃপ্তি পাওয়া যায়।”

সুনীল উপরে উঠিতে উঠিতে বলিল, “অন্ধকারে তাঁর চেহারাও ভাল ক’রে দেখা হয় নি। চক্ষু সার্থক করতে হবে।”

## নয়

যমুনা ঘড়ীর দিকে চাহিয়া দেখিল, বেলা প্রায় বারোটা বাজে ।  
দাদা কেন এখনও আসিতেছেন না ? তিনি কি তবে তাহাদের  
সেই রাত্রির রক্ষাকর্তা যতীন্দ্রবাবুকে সঙ্গে লইয়া আসিতেছেন ?

কথাটা মনে পড়িতেই তরুণীর দেহ শিহরিয়া উঠিল । উঃ !  
সেই মানোয়ারী গোরাটার শূকর-মাংসপুষ্ট প্রকাণ্ড হাতখানা প্রথমে  
তাহার দিকেই ত বিস্তৃত হইয়াছিল ! আর মুহূর্ত্ত বিলম্ব হইলেই ত  
সেই পাষাণ তাহাকে স্পর্শ করিত !—যমুনা বিকৃতমুখে নয়নযুগল  
নিম্নীলিত করিল ।

সস্তাবিত লাঞ্চার চিত্র যেন তাহার নেত্রপথে বীভৎস মূর্ত্তি  
ধরিয়া সমুদিত হইল ।

অসীম-শক্তিশালী বাঙ্গালী ভদ্রলোকটি যদি সে সময় না আসিয়া  
পড়িতেন ? নাঃ, নারীজন্ম সার্থক ও সুন্দর হইলেও দানব-শক্তির  
নিকট চিরকালই নারী লাঞ্ছিতা, ধর্মিতা হইতে থাকিবে ! ইহার  
কি কোন প্রতিকার নাই ?

ক্রোধ, ক্ষোভ, আশঙ্কা ও নৈরাশ্রে কল্পনাপ্রবণা সুন্দরী তরুণীর  
নয়নে একটা আলোকশিখা প্রদীপ্ত হইয়া উঠিল । হ্যাঁ, এ কথা  
অবশ্যই স্বীকার্য্য, নারী সকল বিষয়ে পুরুষের সমকক্ষতা করিতে  
পারিলেও, সাধারণভাবে পুরুষের শারীরিক শক্তির কাছে নারী অতি



## যমুনাধারা

তুচ্ছ। পুরুষ স্বল্পায়াসে নারীর মর্যাদাহানি ঘটাইতে পারে। ইহা ত জীয়াস্ত সত্য! কিন্তু ভারতবর্ষের পুরাণ, ইতিহাস কি প্রমাণ করে? হিন্দু নারীকে মহাশক্তিস্বরূপিণীরূপে কল্পনা করিয়াছে। পুরুষের প্রচণ্ড দানবীশক্তি নারীর দ্বারা বিধ্বস্ত। তাই অপরিমেয় শক্তিশালী মহা অশুরের পরাজয়বার্তা দশভুজা এবং কালিকা-মূর্তির পূজায় পরিস্ফুট। এমন কত আছে। তবে?’

যমুনা ভাবিতে লাগিল। পরলোকগত দয়িতের ব্যায়াম-পুষ্ঠ বলিষ্ঠ দেহ কি তখন তাহার স্মৃতিপথে সমুদিত হইয়াছিল? স্বামী তাহাকে ব্যায়াম করিবার জন্ত কিরূপ আগ্রহের সহিত অনুরোধ করিত; কিন্তু লজ্জা ও সঙ্কোচের মায়া কাটাইয়া সে কোনও দিন স্বামীর এই অনুরোধ রক্ষা করিতে পারে নাই—ব্যায়ামে মন দিতে পারে নাই, সেই কথাই কি আজ তাহার চিত্তকে পীড়িত করিতেছিল?

যমুনা ক্লান্ত দৃষ্টি তুলিয়া বাহিরে দৃষ্টিপাত করিল। রৌদ্র-করোজ্জ্বল নীল আকাশে দুই একটা পাখী উড়িয়া যাইতেছিল। তরুণী সেই দিকে চাহিয়া স্থিরভাবে বসিয়া রহিল।

“পিতামা!”

শিশুকণ্ঠের কলধ্বনি তরুণীর কর্ণে প্রবেশ করিবারাত্র সে ফিরিয়া চাহিল। দেখিল, তাহার আদরিণী খুকুরাণী দরজার কপাট ধরিয়া হাসিতেছে। আর তাহার পশ্চাতে ভ্রাতৃজায়া মণিমালা।

যমুনা ব্রহ্ম-চঞ্চল-চরণে ছুটিয়া গিয়া ব্যগ্রভাবে খুকুরাণীকে বুকের উপর তুলিয়া লইল।

## যমুনাধারা

“এর মধ্যে ঘুম থেকে উঠেছিস্?”

শিশু তাহার পিসীমার কণ্ঠদেশ কমণীয়, শুভ্র, কোমল বাহুলতার দ্বারা বেষ্টন করিয়া ধরিল।

ভরুণীর আননে স্নেহের যে অপূর্ব দীপ্তি বিকশিত হইয়া উঠিল, তাহা শ্রেষ্ঠ চিত্রকরের তুলিকায় চিত্রিত হইবার যোগ্য। শ্যামসুন্দরকে কোলে লইয়া মা যশোদার মুখে বোধ হয় এইরূপই একটা মধুর দীপ্তি উজ্জ্বল হইয়া উঠিয়াছিল। শিশু-খুঁট-ক্রোড়ে ম্যাডোনার চিত্র তাই বোধ হয় জগতের সর্বশ্রেষ্ঠ চিত্রশিল্প।

মণিমালা, নন্দার দিকে একদৃষ্টিতে চাহিয়া সম্ভবতঃ সেই অপূর্ব চিত্রের কথাই ভাবিতেছিল। তাহার নেত্র সহসা সজল হইয়া উঠিল। সে নারী—জননী। সুতরাং তাহার কাছে মাতৃত্বের মাধুর্য্য কি পবিত্র এবং সুন্দর, তাহা অত্যন্ত সুস্পষ্ট। ভরুণ যৌবনে যাহার সর্বস্ব চিরদিনের জন্ত অনন্ত অন্ধকার গহ্বরে হারাইয়া গিয়াছে, মাতৃত্বের বিকাশ ঘটবার পূর্বে যাহার জীবনে ব্যর্থতার অমানিশা যবনিকা নিষ্ক্ষেপ করিয়াছে, তাহার জন্ত মমতাময়ী নারীর প্রাণ কাঁদে না?

ধীরে ধীরে মণিমালা যমুনার পার্শ্বে আসিয়া দাঁড়াইল।

যমুনা বলিল, “দাদার এত দেবী হচ্ছে কেন, ভাই? বেলা দুপুর হ’য়ে গেল!”

মণিমালা বলিল, “পথ ত অনেক দূর। প্রায় নয়টার সময় গেছেন, তাতে ভদ্রলোকের সঙ্গে খানিক কথাবার্তাতেও সময় যায়। এই এলেন ব’লে।”

## যমুনাধারা

যমুনা খুকুরাণীকে আদর করিতে লাগিল। চুম্বনে চুম্বনে শিশুর  
চাঁদ-মুখ ছাইয়া দিল।

ননন্দার কাছে আসিয়া মণিমালা কয়েক মুহূর্ত স্থিরভাবে  
দাঁড়াইয়া রহিল। এই শুভ মুহূর্তে তরুণীর মনের গতি পরীক্ষার  
চেষ্টা করিলে কেমন হয়? সমস্ত অন্তর যখন মেহরসে পরিপূর্ণ  
হইয়া উঠিয়াছে, তখন কোশলে প্রসঙ্গের আভাস দিলে সম্ভবতঃ  
মনের অবস্থার গতি কোন্ দিকে, তাহা ধরা যাইতে পারে।

মণিমালা বলিল, “ঠাকুরঝির কোলে খোকাখুকী এমন সুন্দর  
মানায়!”

যমুনা প্রশান্ত দৃষ্টিতে ভ্রাতৃবধুর হাস্যপ্রফুল্ল আননের দিকে  
নেত্রপাত করিল। মধুর হাসি হাসিয়া বলিল, “তার মানে?—  
তোমার কোলে তেমন মানায় না কি, বৌদি?”

মণিমালা উচ্ছ্বসিতভাবে হাসিয়া বলিল, “আমার কথার অর্থ কি  
ঐ রকমই হয়? আর কিছু হয় না?”

যমুনা খুকুরাণীকে দুই হাতে তুলিয়া ধরিয়া নাচাইতে নাচাইতে  
বলিল, “একটা কথার মানে হয় ত নানারকম হ’তে পারে, কিন্তু  
আমার ব্যাখ্যাটাও কি মাঠে মারা যাবার মত, বৌদি?”

“ওরে বাবা! তা কি বলতে পারি! তুমি বিড়ম্বী—তোমার  
কথার ভুল ধরবার শক্তি আমার নেই, ভাই!—আমি বলছিলুম,  
খুকুকে কোলে নিলে তোমাকে ঠিক মা যশোদার মত দেখায়।  
এমনি একটি খোকা—”

মণিমালা সহসা আপনাকে সংবরণ করিয়া লইল। না,

## যমুনাধারা

এ ভাবে প্রসঙ্গ উত্থাপন করিলে যমুনার চিত্তে হয় ত আঘাত লাগিতে পারে।

কিন্তু যমুনা হয় ত সে দিক্ দিয়া কথাটার অর্থ বুঝিতে চেষ্টা করে নাই। সে সহজভাবে বলিল, “দাদার মেয়ে আমার সে অভাব ত পূর্ণ করেছে, বৌদি।”

“নিশ্চয়, নিশ্চয়! ও ত তোমারই, ভাই।”

মণিমলা সে প্রসঙ্গ ঐ ভাবে উত্থাপন করা আর সঙ্গত বলিয়া মনে করিল না। সে ভিন্নপথে আলোচনার উৎসমুখ খুলিয়া দিল।

খুকুরাণীর পীড়ার কথা তুলিয়া ক্রমে ললিত ডাক্তারের চিকিৎসা-নৈপুণ্যের প্রসঙ্গ উত্থাপিত করিয়া মণিমলা বলিল, “ডাক্তার বাবুটি বেশ! সুন্দর চিকিৎসা করেন।”

কিন্তু যমুনার তরফ হইতে বিশেষ উৎসাহ বা নিরুৎসাহের লক্ষণ প্রকাশ পাইল না। মণিমালার নারী-হৃদয় ইহাতে যেন একটা স্বস্তির নিশ্বাস পরিত্যাগ করিল।

এমন সময় বাহিরে জুতার চিরপরিচিত শব্দ যমুনা ও মণিমালার কর্ণে প্রবেশ করিল।

“এই যে দাদা এসেছেন!”

সুশীল ঘরের মধ্যে প্রবেশ করিয়া বলিল, “না, যতীনবাবুকে আনতে পারলাম না। তিনি আজকের গাড়ীতেই দেওঘরে ফিরে যাচ্ছেন, কিন্তু কি চমৎকার লোক এই যতীনবাবু!”

মণিমলা ও যমুনা প্রত্যাশিত দৃষ্টিতে সুশীলের দিকে চাহিয়া রহিল।

## যমুনাধারা

সুশীল বলিল, “বাস্তবিক এমন মিষ্ট কথা, এমন মধুর ব্যবহার এমন শক্তিশালী মানুষের পক্ষে যে সম্ভবপর, তা জান্তাম না। পালোয়ান যাঁরা, প্রায় তাঁরা রক্ষস্বভাব হ’য়ে থাকেন, এই ধারণা আমার ছিল। কিন্তু যতীনবাবুর সঙ্গে এতক্ষণ আলাপ ক’রে আমার সে ধারণা বদলে গেছে। সত্যি, এমন চমৎকার লোক আমি খুব কমই দেখেছি। তোমাদের কথাও বেশ যত্ন ক’রে জিজ্ঞাসা করলেন। খুব ভয় পেয়েছিলেন কিনা, সে বিষয়েও খোঁজ নিলেন।”

যমুনা প্রীতি-বিষ্ফারিত-নেত্রে জ্যেষ্ঠের দিকে চাহিয়া বলিল, “তাঁকে একবার আধঘণ্টার জন্ত সঙ্গে আনতে পারলে না, দাদা?”

“অনেক চেষ্টা করেছিলুম; কিন্তু ভাবে বুঝলুম, তিনি নারীর সঙ্গে এড়িয়ে চলতে চান বলেই এলেন না। ভাল কথা, যতীন বাবু বিপত্নীক। তাঁর একটি ছোট ছেলে আছে। আর বিয়ে করেন নি।”

সুশীল কথাটা বলিয়াই পত্নীর দিকে একবার কটাক্ষ-পাত করিল।

যমুনার শাস্ত্র আননে একটা মধুর দীপ্তি উজ্জ্বল হইয়া উঠিল। সে বলিল, “বাড়ীতে তাঁর আর কে আছে, দাদা?”

জামা খুলিতে খুলিতে সুশীল বলিল, “তাঁর এক বৃদ্ধা পিসীমা আছেন। তিনিই সংসার দেখছেন। যতীনবাবু বোধ হয় ছেলোটিকে অত্যন্ত স্নেহ করেন। দেখলুম, তার কথা বলতে বলতে যেন ব্যস্ত হ’য়ে পড়লেন। তাই কারও কোন অনুরোধ না শুনে

## যমুনাধারা

আজই দেওঘরে চ'লে যাচ্ছেন। মহারাজার অহুরোধ পর্যন্ত রাখতে পারলেন না।”

যমুনা গভীর আগ্রহ সহকারে সকল কথা শুনিতেছিল। সে মৃদুস্বরে বলিল, “এমন লোককে একবার প্রণাম করতে না পারলে মনে শাস্তি পাওয়া যাবে না।”

মণিমালা বলিল, “সত্যি কথা। তাঁকে আমারও প্রণাম করবার জন্য মন ব্যাকুল হয়েছে।”

সুশীলচন্দ্র বলিল, “তা বেশ ত, খুকীর শরীরটা এখনও খুব ভাল হয়নি। দিনকতক আমাদের দেওঘরের বাড়ীতে গিয়ে থাকলে মন্দ হয় না।”

মণিমালা ও যমুনা উৎসাহ ভরে সমস্বরেই বলিয়া উঠিল, “তাই চল।”

## দশ

তাহার সাধ—কামনা কি পূর্ণ হইবে না? তরুণী যমুনা শুধু সুন্দরী বলিয়া নহে, ক্ষণিক দৃষ্টিপাতে তাহার আননে বৈধব্যের যে স্নানছায়া সে দেখিয়াছে, তাহাতে এই নারীর অন্তরের সমস্ত বেদনা সে মুছাইয়া দিয়া তাহাকে সুখী করিতে পারিলেই তাহার জীবন সার্থক হইবে। এমন অনবদ্য কুসুম তাহার শ্রী ও সুবাসে যদি সযত্নে রচিত উদ্ভানের শোভা ও মাধুর্য্য বৃদ্ধি না করিয়া অযত্নে শুকাইয়া যায়, তাহা হইলে সে অপরাধের কি মার্জনা আছে?

ললিত ডাক্তার মধ্যাহ্নে নিজের বসিবার ঘরে বিজলী পাথার নীচে বসিয়া এমনই একটি চিন্তার স্রোতে ভাসিয়া চলিয়াছিল। এই যমুনা তাহার সতীর্থের পরিণীতা পত্নী, কিন্তু দুই বৎসরের দাম্পত্য-জীবনের পর মোহিত ইহলোক হইতে অকালে অস্তহিত হইয়াছে। এত্বের প্রতীকার নাই। কিন্তু এই সুন্দরী তরুণী কেমন করিয়া এই প্রলোভন-পূর্ণ সংসারের মোহজাল হইতে আত্মরক্ষা করিয়া চলিবে? বাস্তব জগতে—বিশ্বস্রষ্টার বিচিত্র রচনার অমোঘ প্রভাবকে অতিক্রম করিয়া অগ্রসর হইবার মত কি পাথেয় এই নবীনা সুন্দরী সঞ্চয় করিতে পারিয়াছে? ভোগ সযত্নে নানা উপচার-পূর্ণ অর্ঘ্য সাজাইয়া সবে তাহার সম্মুখে আবির্ভূত হইয়াছিল; আলোকমালা-প্রদীপ্ত জীবন-রঙ্গমঞ্চে সবে

## যমুনাধারা

প্রথম অঙ্কের অভিনয় আরম্ভ হইয়াছিল ; ইমন-কল্যানের বাঁশী সবে গানের প্রথম কলি গাহিতে আরম্ভ করিয়াছিল—সহসা প্রলয়-ঝঞ্ঝার উৎসবানন্দের আলোকমালা নিভিয়া গেল, বাঁশী ভাঙ্গিয়া পড়িল, রঙ্গমঞ্চ ধূল্যাবলুণ্ঠিত। কিন্তু জীবনের মুকুলিত পুষ্পগুলি যখন সহস্রদলে বিকশিত হইয়া উঠিতেছে, তখন তাহার সার্থকতা না ঘটিলে স্রষ্টার সৌন্দর্য্যের অবমাননা করা হয় না কি ?

ডাক্তার উঠিয়া একটা বাতায়নের ধারে আসিয়া দাঁড়াইল।

সুশীলবাবু যদি অনুমতি দেন, যমুনার যদি অভিমত পাওয়া যায়, তাহা হইলে সে সর্বস্ব পণ করিয়া এই সুন্দরীকে সুখী ও তৃপ্ত করিবার চেষ্টা সর্বান্তঃকরণে করিতে প্রস্তুত। যমুনাকে সে ভাল করিয়া দেখে নাই, তাহার সহিত একটিমাত্র বাক্যালাপের সুযোগ পর্য্যন্ত সে এখনও পায় নাই ; কিন্তু তাহাতে কি আসে যায় ? যমুনার জীবন-নাট্যের বিয়োগান্ত কাহিনীই তাহার সমগ্র চিত্তকে অভিভূত করিয়া রাখিয়াছে। একটিমাত্র ব্যর্থ জীবনকেও যদি সে সার্থকতার দ্বারা পরিপূর্ণ করিয়া তুলিতে পারে, তবেই তাহার শিক্ষা, দীক্ষা—মনুষ্যজন্ম সার্থক হইবে।

সংসারে তাহার কেহ নাই। মাতার স্মৃতি তাহার মনে পড়ে না, পিতা সংসার-সংগ্রামে জয়লাভ করিবার উপযোগী অর্থ ও কিছু সম্পত্তি তাহার জন্ম রাখিয়া কয়েক বৎসর হইল, ইহলোক হইতে সরিয়া গিয়াছেন। ভ্রাতা বা ভগিনী বলিবার কেহ তাহার নাই। এক মাতুল আছেন ; কিন্তু সংসার ও সম্পত্তি লইয়া তিনি দেশে এমনই ভাবে কায়ম মোকাম হইয়া আছেন যে, ভাগিনেয়ের প্রতি



## যমুনাধারা

তেমন ভাবে দৃষ্টি দিবার সুযোগ ও সময় তাঁহার নাই। সুতরাং তাহার সম্বন্ধে দুর্ভাবনায় পীড়িত হইবার কেহ নাই বলিলেই চলে।

ডাক্তার ভাবিতে লাগিল।

বিধবা-বিবাহ হিন্দুসমাজে তেমন ভাবে প্রচলিত নাই। কিন্তু হিন্দুর ধর্মশাস্ত্র তাহার বিরোধী নহে। তবে সে কেন এই সুন্দরী তরুণীকে বিবাহ করিবে না? হিন্দুসমাজ তাহাকে এক পার্শ্বে ঠেলিয়া রাখিবে? হাঁ, তাহাতে সে দুঃখিত হইবে সন্দেহ নাই; কিন্তু তাই বলিয়া—

ললিতচন্দ্রের আনন ও ললাট রেখাঙ্কিত হইল।

সমাজের কেহ কেহ এখন বিধবা-বিবাহ করিতেছে। আপত্তি থাকিলেও এক দল লোক ইহার বিশেষ সমর্থক। সুতরাং সে একবারে হিন্দুসমাজে অপাঙ্ক্তের হইয়া থাকিবে না। তাহার প্রতি সহানুভূতিসম্পন্ন লোকের অভাব নিশ্চয়ই ঘটিবে না। সে ধর্মাস্ত্রের গ্রহণের বিরোধী। সুতরাং হিন্দু বলিয়া পরিচয় দিবার গৌরব হইতে বঞ্চিত হইতে না হইলেই তাহার আর কোন দুঃখ থাকিবে না।

গৃহমধ্যে পদচারণা করিতে করিতে ডাক্তার বোধ হয় শ্রান্তি অনুভব করিতেছিল। সে একখানি আরাম-কেদারায় দেহ বিছাইয়া দিল। চিন্তার সূক্ষ্মতন্ত্রী উর্গনাভের রচিত গোলকধাঁধার স্থায় জালচক্র রচনা করিয়া চলিল। ললিতচন্দ্রের নয়ন ভাবাবেশে নিমীলিত হইল। তাহার মানস দৃষ্টির সম্মুখে ঈষৎ অবগুণ্ঠনাবৃত্ত তরুণীর চিত্র সমুজ্জ্বলভাবে উদ্ভাসিত হইল।

## যমুনাধারা

বিজ্ঞানের শিষ্য হইলেও মনস্তত্ত্ব-সংক্রান্ত দর্শনের সহিত তাহার অপরিচয় ছিল না। মহারাজ ভবতোষের সহিত তাহার এ বিষয়ে মাঝে মাঝে আলোচনা হইয়া থাকে। ভবতোষ দর্শন, ইতিহাস ও কাব্যের একান্ত অনুরাগী। তাঁহার সাহিত্যিক প্রতিভার সংশ্রবে আসিয়া ললিতের অনেক বিষয়ে চিন্তা করিবার অধিকার জন্মিয়াছিল।

সে ভাবিতে বসিল, তাহার মনের এই অবস্থার নামই কি প্রেম বা অগ্নি কিছু? সুন্দরী তরুণী নারী দেখিলে পুরুষের মন সাধারণতঃ বিচলিত হয়, ইহা বৈজ্ঞানিক এবং দার্শনিক সিদ্ধান্ত। পুরুষের বহুমুখী চিন্তের সাধারণ অবস্থা এইরূপ হইতেই হইবে। তবে শিক্ষা, দীক্ষা, জ্ঞান ও সংযমের দ্বারা পুরুষ মনের এই প্রকার উচ্ছৃঙ্খল গতিবেগকে সংবরণ করিতে পারে।

যমুনার প্রতি তাহার চিন্তের এই প্রচণ্ড আকর্ষণ কি বহুমুখী চিন্তেরই একটা বিকাশ মাত্র? না, সত্যই সে এই তরুণীকে ভালবাসিয়া ফেলিয়াছে? শকুন্তলাকে দেখিয়া দুঃস্বপ্নের মনে যে অনুপ্রেরণার উদ্ভব হইয়াছিল, জুলিয়েটের সহিত প্রথম দৃষ্টি-বিনিময়ের ফলে যে ভাবধারা রোমিওকে অধীর করিয়া তুলিয়াছিল, সুভদ্রার বিচিত্র সৌন্দর্য্য দর্শনে অর্জুনের চিন্তে যে প্রেমের সমুদ্র উথলিয়া উঠিয়াছিল, তাহার এই প্রেম কি সেই জাতীয়?

কিন্তু সে ত এই ভাগ্যবিড়ম্বিতা তরুণীর সমগ্র মুখকান্তি, দেহসৌষ্ঠব ও লাবণ্যের স্বরূপ দর্শনের অবকাশ পায় নাই—

## যমুনাধারা

যমুনা শুধু কণিকদৃষ্টা—আবছারামাত্র। তবে তাহার মনের এই অবস্থার প্রকৃত পরিচয় কি ?

“সখি ! কেঁবা শুনাইল শ্রাম নাম !  
কাণের ভিতর দিয়া  
মরমে পশিল গো,  
আকুল করিল মোর প্রাণ।”

সাধক কবি শুধু নাম-মাহাত্ম্যের অন্তরালে প্রেমাম্পদকে প্রেমিকার চিত্তক্ষেত্রে যে আসনে প্রতিষ্ঠিত করিয়াছেন, সেই আসনে কি ললিত, যমুনাকে প্রতিষ্ঠিত করিয়াছে বলিয়াই, তাহার সমগ্র চিত্ত এই তরুণীর প্রতি প্রধাবিত হইয়াছে ?

ললিত আবার উঠিয়া দাঁড়াইল। তাহার স্মৃষ্ণ, সবল দেহের অন্তরালে চিত্ত এমন দুর্বল, এমন কল্পনাপ্রবণ হইয়া উঠিয়াছে দেখিয়া সে সত্যই যেন একটু লজ্জা অনুভব করিল। পৌরুষের সে আজীবন ভক্ত। এজন্য পুরুষের জীবনে নারীজনোচিত মৃদুতা এবং অপৌরুষের মনোবৃত্তির প্রকাশকে সে কোনও দিনই ক্ষমা করিতে পারে নাই। নিজের মনে এই নারীমূলভ অধীরতা অনুভব করিয়া সে মনের উপর রক্তচক্ষু দেখাইল।

“ডাগ্দার সাব !—”

ললিতের চিন্তাসূত্র সহসা ছিন্ন হইয়া গেল। সে দরজার বাহিরে চাহিয়া দেখিল, সুশীল বাবুর দ্বারবান্ তাহাকে

## যমুনাধারা

কুর্গীশ করিয়া একখানা পত্র তাহার দিকে আগাহিয়া দিতেছে ।

মুহূর্ত্ত মাত্র । তার পর আপনাকে সংঘত করিয়া ললিত ডাক্তার চিঠিখানা গ্রহণ করিল ।


কিন্তু এ কি দুর্কলতা ! সুশীলচন্দ্রের বাড়ীর দ্বারবান, অথবা চিঠি দেখিয়াই তাহার সমগ্র চিত্ত এমন অসম্ভববেগে আন্দোলিত হইতেছে কেন ?

খাম খুলিয়া সে পড়িল, সুশীলচন্দ্র লিখিয়াছেন—

“বিশেষ জরুরী পরামর্শ আছে, একবার আসিলে সুখী হইব । আজই আসিবেন ।”

কয়েক মুহূর্ত্ত স্তব্ধভাবে দাঁড়াইয়া ললিতচন্দ্র যখন কাগজ কলম তুলিয়া লইল, তখন তাহার লেখনী বিন্দুমাত্র স্পন্দিত হইল না । সে সংক্ষেপে লিখিয়া দিল, আজ অপরাহ্নে সে অবশ্যই যাইবে ।

দ্বারবান চলিয়া গেল, সে টেবলের উপর মাথা রাখিয়া নীরবে কি ভাবিতে লাগিল ।



## এগার

হাওয়ার বন্দুক উর্দ্ধে তুলিয়া সতু ঘোড়া টিপিয়া দিল। ধপ্ করিয়া একটা শব্দ হইল, কিন্তু গাছের পাখী মাটিতে লুটাইয়া পড়ার পরিবর্তে উড়িয়া গেল।

হতাশভাবে সতু পিতার দিকে ফিরিয়া বলিল, “বাবা পাখী উড়ে গেল!”

যতীন্দ্রনাথ হাসিয়া বলিল, “তুমি ভাল ক’রে তাগ্ করতে পার না কি না, তাই পালিয়ে গেল। ভাল ক’রে শেখ, তখন আর পালাতে পারবে না।”

সতু তখন চারিদিকে চাহিয়া দেখিল, কিন্তু একটা পাখীও আর দেখিতে পাইল না। তখন তরঙ্গায়িত মুক্ত প্রান্তর অন্তগামী সূর্যের রক্ত-আলোকধারায় অবগাহন করিতেছিল। স্বাস্থ্যকামী প্রবাসী নর-নারী, বালক-বালিকা প্রান্তরের বক্ষোবিসর্পিত পথের উপর দিয়া হাস্য-কলোচ্ছ্বাস তুলিয়া চলিতেছিল।

পিতার পার্শ্বে বন্দুকটি রাখিয়া দিয়া সতু প্রান্তরে আপন মনে ছুটাছুটি করিয়া বেড়াইতে লাগিল। মুগ্ধ দৃষ্টিতে যতীন্দ্রনাথ পুত্রের দিকে চাহিয়া রহিল।

মাতৃহারা সন্তানকে মানুষ করিয়া তুলিতে হইবে। পুরুষের পক্ষে এ-কার্য্য যে কত কঠিন, কয় বৎসরে যতীন্দ্রনাথ তাহা কি বুঝে

## যমুনাধারা

নাই? জননীর স্নেহ-সতর্ক দৃষ্টি, প্রাণভরা-ভালবাসা, যত্ন ও সেবা সন্তানকে সকলপ্রকার অকল্যাণ হইতে যেরূপ অনায়াসে রক্ষা করিয়া থাকে, পুরুষের পক্ষে সে জন্ত বহু আয়াস স্বীকার করিতে হয়। শৈশবে যে মায়ের এই স্নেহ হইতে বঞ্চিত, তাহার মত দুঃখী কে? যতীন্দ্রনাথ স্বয়ং বাল্যকালে মাতা ও পিতা উভয়কেই হারাইয়াছিল। তাই মাতৃহারা সন্তানের দুঃখ ও বেদনা যে কি অসীম, তাই সে মর্মে মর্মে অনুভব করিয়া আসিয়াছে। গভীর দুঃখ, বেদনা বা আনন্দের কোনও সংবাদ সে কোনও বিশ্বস্ত হৃদয়ের কাছে প্রকাশ করিয়া তৃপ্তি ও শান্তি লাভ করিতে পার নাই; অবশ্য পিসীমার স্নেহশীতল হৃদয়তলে সে আশ্রয়লাভ করিয়াছিল বটে, কিন্তু দীর্ঘ দিনের জন্ত সে সুযোগ তাহার ভাগ্যে ঘটে নাই। অধ্যয়নের জন্ত কলিকাতায় বাসকালে সে পিসীমাতার সাহচর্য্য পাইত না। নিজের সংসার ছাড়িয়া—স্বামীর পরিচর্যা ত্যাগ করিয়া ভ্রাতৃপুত্রের গৃহে বাস করিবার সুবিধা তখন তাঁহার ছিল না। অনেক বৎসর পরে, বৈধব্যের দুর্দশা ঘটিবার পর, তবে তিনি ভ্রাতৃপুত্রকে আবার কাছে পাইয়াছিলেন।

যতীন্দ্রনাথের নাসাপথে একটা দীর্ঘশ্বাস নির্গত হইল।

হাঁ, সতুকে মানুষের মত গড়িয়া তুলিতে হইবে। কল্যাণীর বড় সাধের সতুকে সে তাহার হাতে সমর্পণ করিয়া গিয়াছে। বত্রিশ নাড়ী-বন্ধন ছিন্ন করিয়া যে তাহার ক্রোড়ে আসিয়াছিল, তাহাকে কি ভাবে বাঙ্গালা মায়ের সুসন্তান-রূপে গড়িয়া তুলিবে, যতীন্দ্রের বিদ্যুৎ পত্নী স্বামীর সহিত সে বিষয়ে যে সকল আলোচনা

## যমুনাধারা

করিত, এই পাঁচ বৎসরে সে কি তাহার একটি শব্দও বিস্মৃত হইয়াছে ?

বিস্মৃত হইবে ? প্রত্যেকটি শব্দ, পত্নীর বাক্যধারার মধ্যে যে হৃদয়াবেগের স্পন্দন, নয়ন ও আননে ভাবের যে অভিব্যঞ্জনা সে প্রত্যক্ষ করিয়াছিল, তাহা কি তাহার সমগ্র অস্তর প্রভাবিত করিয়া রাখে নাই ? প্রতিদিন, প্রতি কার্য্যে দিগ্‌দর্শন যন্ত্রের গায় তাহার মনকে সেই সকল কথা ও ভাব পথ দেখাইয়া দিতেছে না কি ?

সূর্য্য মাঠের শেষে, পাহাড়ের অন্তরালে অদৃশ্য হইয়া গেল । চঞ্চল আলোক দীপ্তিকে পশ্চিমাকাশের প্রান্তে ঠেলিয়া দিয়া, পূর্বদিক্‌চক্রবাল হইতে সন্ধ্যার অঞ্চল নামিয়া আসিতেছিল ।

সতু লাফাইতে লাফাইতে ছুটিয়া আসিল । তাহার কুঞ্চিত কৃষ্ণ কেশগুলি আন্দোলনের তালে তালে নাচিতেছিল । সে পিতার গলদেশ তাহার ক্ষুদ্র বাহুর সাহায্যে আলিঙ্গনবদ্ধ করিয়া বলিল, “বাবা, চল, বাড়ী যাই ।”

“চল”, বলিয়া যতীন্দ্রনাথ উঠিয়া দাঁড়াইল ।

মাঠ হইতে রাজপথে আসিয়া উভয়ে গৃহের দিকে ফিরিল । সতু তখন হাওয়ার বন্দুকটি শিকারীদিগের গায় পৃষ্ঠে ঝুলাইয়া লইয়াছিল ।

পুলের হাত ধরিয়া চলিতে চলিতে যতীন্দ্র কিছু অগ্রমনস্ক হইয়া পড়িয়াছিল । অন্ধকার তখনও ঘনীভূত হয় নাই । ত্রয়োদশীর চাঁদের আলো তখনও ভাল করিয়া ফুটিয়া উঠে নাই ।

“যতীন বাবু না ?”

## যমুনাধারা

যতীন্দ্রনাথ থমকিয়া দাঁড়াইল ।

এক দল স্ত্রী ও পুরুষ তাহার সম্মুখে ।

নিরীক্ষণ করিয়া দেখিতেই পুরোবর্তী যুবকের আকৃতি তাহার পরিচিত বলিয়া মনে হইল ।

“সুশীল বাবু ?”

সুশীলচন্দ্র সহাস্ত্রে বলিয়া উঠিল, “তা হ’লে চিনতে পেরেছেন ?”

“নিশ্চয় !—এই যে ডাক্তার বাবু, আপনিও দেওঘরে হাজির !”

ললিত ডাক্তার নমস্কার করিয়া প্রসন্ন হাস্তে বলিল, “আপনার বাড়ীর খোঁজেই আমরা বেরিয়েছিলুম । বাড়ী বার করেছি । আপনার চাকর বন্লে, এই দিকে আপনি বেড়াতে গেছেন । তাই আমরাও চলেছিলুম ।”

যতীন্দ্রনাথ সবিস্ময়ে বলিল, “বহু ভাগ্য । আপনারা আমার সন্ধান নিয়েছেন ! আপনারা কবে এখানে এলেন ?”

সুশীল বলিল, “আমরা আজ সকালেই এসেছি । উইলিয়ামস্ টাউনে আমাদের একখানা বাড়ী আছে । এখানে আসার প্রধান উদ্দেশ্য তা হ’লে বলি ?”—

বলিয়া সুশীল, পত্নী ও সছোদরার দিকে ফিরিয়া মূহু হাসিল ।

মণিমলা ও যমুনা ঈষৎ মুখ ফিরাইয়া দাঁড়াইল ।

সুশীল বলিল, “ইনি আমার বোন, আর ইনি আমার স্ত্রী । আপনি এঁদের সে দিন রক্ষা করেছিলেন । আপনাকে দেখবার সাধ এঁদের এত বেশী যে, শেষফালে দেওঘরে ছুটে আসতে হ’ল ।”

যতীন্দ্রনাথে মুখে স্মিতহাস্তেরথা উদ্ভাসিত হইল । সে সম্ভ্রমভরে



## যমুনাধারা

বলিল, “আমার সৌভাগ্য, তাতে সন্দেহ নেই। কিন্তু আমি এমন একটি অদ্ভুত জীব নই যে, আমার জন্ম এঁদের এতখানি কষ্টস্বীকারের প্রয়োজন ছিল। যাক, যখন এ দিকে এসেছেন, আমাদের বাড়ীতে একটু পায়ের ধূলা না দিলে ছাড়ছি না।”

• ললিত বলিল, “এটি কি আপনার ছেলে, যতীন বাবু?”

সকলেরই দৃষ্টি তখন সতুর দিকে কেন্দ্রীভূত হইল।

“চমৎকার ছেলে!”

মৃদু গুঞ্জে কণাটা বলিয়াই যমুনা সতুকে দুই হাত বাড়াইয়া কোলে তুলিয়া লইল।

• সতু হাস্যস্মুরিতাধরা, প্রতিমার তুল্য আনন্দময়ী যমুনার কোলে উঠিয়া বিম্বিত দৃষ্টিতে তাহাকে দেখিতে লাগিল।

জোৎস্নাধারা তখন যমুনার কমনীয় মুখে লীলায়িত হইতেছিল। সে সতুর মুখে চুম্বনরেখা মুদ্রিত করিয়া দিল। সেই স্নেহ-চুম্বনে বালক সতু যেন অভিভূত হইয়া যমুনার স্বক্বেশে মস্তক রক্ষা করিল।

ললিত ডাক্তারও অভিভূতের মত এই দৃশ্য দেখিতেছিল। যমুনাকে এত কাছাকাছি এমন ভাবে দেখিবার অবকাশ আজিকার পূর্বে তাহার কখনও হয় নাই।

যমুনার ক্রোড় হইতে মণিমাল্য সতুকে টানিয়া লইয়া বলিল, “আমি তোমার মাসী হই, চল তোমাদের বাড়ী যাই।”

এতক্ষণে সতুর মুখে কথা ফুটিল। সে উৎসাহভরে বলিল, “চলুন, মাসীমা!”


## যমুনাধারা

যতীন্দ্র কয়েক মুহূর্ত স্তব্ধভাবে এই সম্পূর্ণ অপরিচিত দুইটি তরুণীর পরমাত্মীয় ভাবের পরিচয় লক্ষ্য করিতেছিল। তারপর সহসা সে বলিয়া উঠিল, “সুশীল বাবু, চলুন, আসুন, ডাক্তার বাবু আমাদের বাড়ী বেশী দূরে নয়।”

সতু বাবু এইবার মণিমালার ক্রোড় হইতে নামিয়া অগ্রে চলিতে চলিতে বলিল, “বাবা, আমি এঁদের পথ দেখিয়ে নিয়ে যাই?”

যতীন বলিল, “নিশ্চয়।”

“আসুন”, বলিয়া মণিমালা ও যমুনাকে লইয়া সে অগ্রে চলিল। যতীন্দ্রনাথ, সুশীল ও ললিত ডাক্তারের সহিত আলোচনা করিতে করিতে মন্থরপদে পশ্চাতে আসিতে লাগিল।



## বার

“ঠাকুরমা! ঠাকুরমা!”

“কি দাদা?” বলিয়া বৃদ্ধা বারান্দায় আসিয়া দাঁড়াইলেন।  
নবাগতা দুইটি তরুণীর সহিত সতুকে দেখিয়া তিনি বিস্মিত  
হইয়াছিলেন

“দেখ ঠাকুরমা, মাসীমাদের এনেছি।”

মণিমালা ও যমুনা বিস্মিতা বৃদ্ধার চরণে প্রণাম করিল।

“এস মা, এস।

যমুনা বলিল, “আপনি আমাদের চেনেন না। আপনার  
ভাইপো যতীন বাবু আমাদের মান-ইজ্জৎ বাঁচিয়েছিলেন।”

পিসীমার মুখ হর্ষোৎফুল্ল হইল। ভ্রাতৃপুত্রের এই বীরত্ব-  
কাহিনী তিনি জানিতেন না। যমুনা সংক্ষেপে সকল কথা  
বিবৃত করিল। পিসীমার আহ্বানে মণিমালা ও যমুনা গৃহের  
ভিতর প্রবেশ করিল।

সতু উৎসাহভরে তাহার নবলক্ক মাসীমাদিগকে পিতার কক্ষে  
লইয়া ~~গৃহের~~ গৃহের মধ্যে বিলাসোপকরণের কোনও প্রকার  
প্রাচুর্য্য নাই। তরুণপোষের উপর একখানি কম্বল বিস্তৃত। ধূপ-  
ধূনার গন্ধ ঘরের বাতাসকে তখনও প্লাবিত করিতেছিল। ~~প্রাচুর্য্য~~  
গাত্রে একখানি রুহৎ ব্যাঘ্রচর্ম্ম ছলিতেছে। উৎসাহভরে সতু বলিল

## যমুনাধারা

যে, তাহার বাবা কিছুদিন আগে ঐ চর্মের অধিকারী শাদুলরাজকে স্বহস্তে শিকার করিয়াছিলেন। তাহার পিতা শিকারব্যাপারে বিরূপভাবে ব্যাঘ্র-কবলে বিপন্ন হইয়াছিলেন, তাহার ব্যাদিত মুখবিবরের করাল দংষ্ট্রারাজি বিরূপে পিতার মস্তক-চর্মে উদ্ভূত হইয়াছিল, বিরূপে তাহার অসীম শক্তিপ্রভাবে বন্দুকের আঘাতে, খাদের মধ্যে আহত ব্যাঘ্র গড়াইয়া গড়িয়াছিল, তাহার বিবরণ দিবার সময় পুত্রের আয়ত নয়ন-যুগল উত্তেজনা ও পিতৃগর্বে সমুজ্জল হইয়া উঠিল। পিতার দেহে ব্যাঘ্রনখরের চিহ্ন এখনও মিলায় নাই।

শুনিতে শুনিতে তরুণীযুগল অন্তরে শিহরিয়া উঠিতেছিল। গৃহের এক কোণে একজোড়া সুবৃহৎ, ভারী ডাম্বেল দেখাইয়া বালক জানাইয়াছিল, তাহার পিতা অনায়াসে প্রত্যহ ঐ ভারী ডাম্বেল লইয়া অর্ধঘণ্টা ব্যায়াম করেন। বড় হইলে সেও বাবার মত শক্তির চর্চা করিবে।

গৃহপ্রাচীরের অপর দিকে একখানি তৈলচিত্র হুনিতেছিল। তাহার প্রতি অঙ্গুলি-নির্দেশ করিয়া সতু বলিল, “ঐ আমার মা’র ছবি।”

মণিমালা ও যমুনা চাহিয়া দেখিল, আলেক্সাচিত্রিত মূর্তি যেন তাহাদের দিকে চাহিয়া হাসিতেছে। দীর্ঘায়ত কৃষ্ণতার নয়ন-যুগলে যেন প্রেম ও করুণার বহু বহিয়া চলিয়াছে। ললাট ও সীমন্ত-দেশকে সিন্দূররাগ যেন মহিমাময় শোভায় উজ্জল করিয়া তুলিয়াছে! কি ভাগ্যবতী এই নারী, যিনি এমন স্বামীর পত্নী, এমন পুত্রের

## যমুনাধারা

জননী ! কিন্তু এমন অসময়ে তিনি কেন সতুকে ছাড়িয়া চলিয়া গেলেন ?

যমুনা একটা দীর্ঘশ্বাস ত্যাগ করিল। তাহার নয়নযুগল সমবেদনার ব্যথায় যেন ছল-ছল করিয়া উঠিল। বোধহয় মণিমালার অন্তরেও সেই একই ভাবের সমুদ্র উথলিয়া উঠিয়াছিল। সে তাড়াতাড়ি অশ্রুদিকে মুখ ফিরাইয়া অঞ্চলে নেত্রযুগল মার্জনা করিল।

ঘরের প্রত্যেক বস্তু সযত্ন-মার্জিত, ধূলি-বর্জিত। অনবদ্য পবিত্র বায়ুর প্রবাহ যেন কক্ষটিকে অনুক্ষণ স্নিগ্ধ করিয়া বহিতেছিল।

সতু বলিল, “জানেন, মাসীমা ! বাবা রোজ মা’র ছবির কাছে চোখ বুজে দাঁড়িয়ে থাকেন। তখন—”

পিসীমা ডাকিলেন, “সতু, তোর মাসীমাদের জন্ম পাণ নিয়ে যা।”

লঘু গতিতে বালক ঘরের বাহিরে চলিয়া গেল।

মণিমলা যমুনার দিকে চাহিল।

যমুনা তখন নিবিষ্ট-মনে প্রাচীরগাত্রবিলম্বিত তৈল-চিত্রখানির দিকে চাহিয়াছিল। তাহার অন্তরে এখন কি ভাবের বন্যা বহিতেছিল, তাহা তাহার মুখে বা দৃষ্টিতে প্রকাশ পাইল না। সে যেন কোন স্বপ্নলোকে আপনাকে নির্বাসিত করিয়া দিয়াছিল।

মণিমলা ডাকিল, “ঠাকুরঝি !”

যেন স্বপ্নঘোর হইতে জাগ্রত হইয়া যমুনা বাস্তব জগতে ফিরিয়া আসিল।

## যমুনাধারা

এমন সময় বাহিরে পদশব্দ ও সুশীলের কর্ণস্বর শোনা গেল।

মণিমালা বলিল, “চল, আমরা পিসীমার কাছে যাই।”

তাহারা নিষ্ক্রান্ত হইবার সঙ্গে সঙ্গে যতীন্দ্রনাথ সুশীল ও ললিতকে লইয়া ঘরের মধ্যে প্রবেশ করিল।

মাদুর বিছাইয়া দিয়া যতীন বলিল, “হিন্দু বাঙ্গালীর ঘরে চেয়ার-টেবলের বালাই নেই। আপনাদের হয় ত অসুবিধা হবে, সুশীল বাবু।”

সুশীলচন্দ্র প্রসন্ন হাস্তে বলিল, “বলেন কি, যতীন বাবু? আমরাও ত বাঙ্গালী হিন্দু। আজই না হয় চেয়ার-টেবলের রেওয়াজ হয়েছে; কিন্তু আমাদের পূর্বপুরুষরা চিরদিনই মাদুর-সতরঞ্চিতে ব’সে এসেছেন।”

যতীন হাসিয়া বলিল, “কিন্তু আমাদের সে মন কি এখন আছে, সুশীলবাবু? ডাক্তারবাবু কি বলেন? মনটা আমরা কি পশ্চিম উপকূলে নিক্ষেপিত ক’রে দেই নি?”

ললিত বলিল, “সে কথা অস্বীকার করা চলে না। বাঙ্গালার শিক্ষিত জনসাধারণ বাঙ্গালীর বিশিষ্টতা হারিয়ে ফেলেছে বৈ কি। অন্ততঃ বেশীর ভাগ লোকই সে অপরাধে অপরাধী, স্বীকার করতে বাধ্য নেই।”

আলোটা বাড়াইয়া দিয়া যতীন্দ্রনাথ বলিল, “আপনারা আমাকে কি ভাবেন জানিনে; কিন্তু একটা কথা বলতে আমার কোন নক্কোচই হয় না—আমার দেশের সকল প্রকার বৈশিষ্ট্যকে আঁকড়ে ধ’রে থাকতে আমার বড় ভাল লাগে। বিত্তে আমার আছে,

## যমুনাধারা

এ অহঙ্কার করবার যোগ্যতা আমার নেই ; কিন্তু তবু মনে হয়, আমাদের দেশের সভ্যতা পশ্চিমের সভ্যতার চাইতে অনেক বড়, অনেক উন্নত। সুশীলবাবু, আপনি ত পণ্ডিত লোক। আপনার কি ধারণা ?”

ললিত সহসা বলিয়া উঠিল, “যতীনবাবু, মহারাজের কাছে শুনেছি, আপনি দর্শন-শাস্ত্রে এম্, এ পাশ করেছিলেন না ?”

যতীন্দ্র বিনীতভাবে হাসিয়া বলিল, “পাশ ক’রে ডিগ্রী পেয়েছি বটে, কিন্তু তাতে জ্ঞান যে কিছু হয়েছে, সে বিশ্বাস আমার নেই।”

সুশীল তখন কাচের আলমারীর মধ্যে সমস্ত রক্ষিত বাঁধান বইগুলি দেখিতেছিল। পাঁচটি আলমারীপূর্ণ ইংরাজী, সংস্কৃত এবং বাঙ্গলা ভাষার মূল্যবান গ্রন্থগুলি যতীন্দ্রনাথের রুচি এবং পাঠস্পৃহার পরিচয় দিতেছিল। সে বলিয়া উঠিল, “যতীনবাবু, আপনার সংগ্রহ ত কব নয় !”

যতীন্দ্রনাথ বলিল, “সতুর মা চ’লে যাবার পর, ওরাই আমার নিত্য সহচর।”

কণ্ঠস্বরে একটা আপ্নত ব্যঞ্জনা যেন রূপ গ্রহণ করিল। ডাক্তার ললিত মুখ তুলিয়া বলিষ্ঠ যুবকের ‘দিকে’ চাহিল। সে ভবতোষের নিকট গুনিয়াছিল, যতীন্দ্রনাথ পত্নীবিয়োগের পর সংসারের সকল প্রকার ভোগবিলাস হইতে আপনাকে শুধু বঞ্চিত রাখে নাই, স্ত্রীর চিন্তা অনুক্ষণ তাহাকে নিরত রাখে।

সে প্রাচীরবিলম্বিত তৈল-চিত্রের প্রতি অঙ্গুলি নির্দেশ করিয়া বলিল, “আপনার স্ত্রীর তৈল-চিত্র ?”

## যমুনাধারা

“হ্যাঁ, উনিই আমার সহধর্মিণী।”

“বাবা!”—

সতুর দুই হাতে দুইখানি রেকাবী। সে ধীরে ধীরে সন্তুর্পণে অগ্রসর হইতেছিল।


সুশীল বলিয়া উঠিল, “আবার এ সব কি, যতীনবাবু?”

যতীন মৃদু হাসিয়া বলিল, “পিসীমা পাঠিয়েছেন। আমার স্ত্রীর জীবনের একটা ব্রত ছিল, বাড়ীতে যখনই যিনি আসবেন, তাঁকে কিছু না খাইয়ে যেতে দেবেন না। পিসীমা সেটা জানেন, তাই—” যতীন সহসা থামিয়া গেল।

গভীর শ্রদ্ধাভরে ললিত বলিল, “তাঁর ব্রতের স্মৃতির অমর্যাদা আমরাও করব না, যতীন বাবু।”

সতুর হাত হইতে খাবারের রেকাবী দুইখানি হইয়া মাদুরের পার্শ্বে রাখিয়া ডাক্তার সতুকে কোলের মধ্যে আকর্ষণ করিল।





## ভের

প্রভাত সূর্যের আলোক সমুজ্জ্বল হইয়া উঠিয়াছিল। “দেব-নিবাসের” প্রশস্ত উद्याনে ললিত ডাক্তার পদচারণা করিতেছিল। প্রায়-বিশ বিঘা জমীর উপর বাড়ী ও উद्याন রচিত। সুদৃশ্য একতল অট্টালিকার সম্মুখে ফুলের বাগান। গোলাপ হইতে আরম্ভ করিয়া দেশীয় বিবিধ প্রকার ফুলের গাছ সম্বলে রোপিত। মাঝে মাঝে কঙ্করাকীর্ণ নাতিপ্রশস্ত পথ বৃক্ষবীথির মধ্য দিয়া বিসর্পিত। বাড়ীর পশ্চাৎগে আম্র, কাঁঠাল প্রভৃতি ফলের বাগান। শাকসজীর শ্রামল ক্ষেত্রগুলি নয়ন-তৃপ্তিকর।

সুশীলচন্দ্রের পিতা বৎসরের মধ্যে সমগ্র শীতকাল এইখানে প্রায়ই যাপন করিতেন ; এ জগৎ গৃহস্থালীর প্রয়োজনীয় যাবতীয় ব্যবস্থা তিনি করিয়া রাখিয়াছিলেন। পিতার মৃত্যুর পর সুশীল বড় একটা দেওঘরে আসিবার সুবিধা করিতে না পারিলেও বাড়ী ও উद्याনটিকে সম্বলে রক্ষা করিবার ব্যবস্থা করিয়াছিল। নিজে আসিতে না পারিলেও জমীদারীর ভারপ্রাপ্ত প্রবীণ ম্যানেজারকে সে প্রায়ই তাহার জগৎ পাঠাইয়া দিত। পিতার সাধের এবং প্রিয় পদাঙ্ক রাখিবার জগৎ তাহার শ্রদ্ধা ও নিষ্ঠার ভাব ছিল না।

ডাক্তার উद्याন ভ্রমণের অবকাশে এক একবার বাড়ীর

## যমুনাধারা

দিকে আগ্রহভরা দৃষ্টি নিক্ষেপ করিতেছিল। কয়দিন সে দেওঘরে আসিয়াছে। যমুনাকে দেখিবার অবকাশ মাঝে মাঝে পাইলেও, ভ্রমণকালে একত্র বাহির হইবার সুবিধা ঘটিলেও এ পর্য্যন্ত যমুনার সহিত তাহার কোন প্রকার আলোচনার সুযোগ হয় নাই। এই আত্মস্থা তরুণী হাশ্চঞ্চলা এবং প্রিয়ভাষিণী হইলেও অনাত্মীয় পুরুষের সহিত আলোচনার সুযোগ পরিহার করিত। ললিত ডাক্তার দাদার সুহৃদস্থানীয় এবং পরিবারের হিতকামী জানিয়াও সে তাহার সংসর্গ এড়াইয়া চলিত। এ জন্ম ললিতের মনে গভীর হুঃখ ছিল; কিন্তু আকারে ইঙ্গিতেও সে তাহার মনের ভাব প্রকাশ পাইতে দিত না।

এই ভাগ্য-বিড়ম্বিতা সুন্দরী তরুণীর প্রতি তাহার শ্রদ্ধার অভাব ছিল না। সতীর্থের পত্নী তরুণবয়সে বৈধব্যের গুরুভার বহন করিয়া চলিয়াছে, এই বয়সেই ব্রহ্মচারিণীর গায় সংঘমের কঠোরতা অবলম্বন করিয়া বিচিত্র ভোগোপকরণ-পূর্ণ সুন্দরী ধরুণীর বাবতীয় ভোগের আনন্দ হইতে আপনাকে বঞ্চিত করিয়া রাখিয়াছে, ইহা ললিতের প্রাণে বেদনার সঞ্চার করিত। সে সুশীলের সহিত আলোচনা-প্রসঙ্গে জানিতে পারিয়াছিল, সহোদরাকে পুনরায় সুপাত্রে বিবাহ দিতে তাহার একান্ত অভিলাষ। এই তরুণবয়সে যমুনাকে যোগিনীর গায় দিনযাপন করিতে হইতেছে, ইহা সুশীলের ~~জীবনে~~ যেন ভীষণ অভিসম্পাত। যমুনা যদি ঘোর আপত্তি প্রকাশ না করে, তাহা হইলে তাহাকে সংসার-জীবনে সুপ্রতিষ্ঠিত করিবে, ইহা সুশীলের আন্তরিক অভিলাষ।

## যমুনাধারা

ললিতের মনে এ জন্ম আশা ছিল, সে প্রার্থী হইলে সুশীলচন্দ্র তাহাকে অযোগ্য বলিয়া প্রত্যাখ্যান করিবে না। বিশেষতঃ সুশীলের ভাবভঙ্গীতে সে এমন একটা আশ্বাস পাইয়াছিল—যাহাতে আশার আলোক তাহার মনের একাংশকে আলোকিত করিয়াছে।

যমুনার কথা মনে পড়িলেই ললিতের অন্তররাজ্যে যে আনন্দ-শিহরণ জাগিয়া উঠিত, তাহাতে সে কিছুক্ষণের জন্ম অভিভূত হইয়া পড়িত। তাহার মনে হইত, এই নারী জন্মান্তরে নিশ্চয়ই তাহার অত্যন্ত প্রিয়জন ছিল; নহিলে এমন অনুভূতির অর্থ তাহার বিজ্ঞান-আলোক-উদ্ভাসিত আধুনিক মনও কল্পনা করিতে সমর্থ হইত না। ললিতচন্দ্র ধর্মশাস্ত্র-সম্বন্ধে বিশেষ কিছু অবগত ছিল না—জানিবার সুযোগ সে এত দিন পায় নাই, কিন্তু তথাপি সে পুনর্জন্ম বিশ্বাস করিত। প্রতীচ্য শিক্ষার প্রভাবে, তাহার প্রাচ্য মন সম্পূর্ণরূপে বিমূঢ় হইতে পায় নাই। সম্ভবতঃ সুপণ্ডিত মহারাজ ভবতোষের সহিত ঘনিষ্ঠ সাহচর্য্যই তাহাকে স্বদেশের আচার-ব্যবহার, রীতিনীতি এবং ধর্ম-বিশ্বাসেঃ অনুরাগী করিয়া তুলিয়াছিল।

পুরাতন পরিচারক নিতাই ডাকিল 'ডাক্তার বাবু!'

ললিত চমকিতভাবে ফিরিয়া চাহিল। সত্যই সে অত্যন্ত অগ্রমনস্ক হইয়া পড়িয়াছিল।

নিতাই বলিল, "চা তৈরী। দিদিমণি আপনাকে ডাকতে বললেন।"

দিদিমণি তাহাকে ডাকিতেছে? এই কয় দিনের মধ্যে যমুনা তাহার সম্বন্ধে এতটুকু সচেতন হইয়াছে, এপরিচয় ললিত পায় নাই!

## যমুনাধারা

পুলকিত অন্তরের স্পন্দনবেগ সংযত করিয়া ডাক্তার বলিল,  
“চল, যাচ্ছি।”

বাহিরের বসিবার ঘরে একটা শ্বেতপাথরের 'গোলটেবলের চারিপার্শ্বে কেদারাগুলি সজ্জিত। সুশীল একখানি আরাম-কেদারায় হেলান দিয়া বসিয়াছিল। টেবলের উপর দুইখানি রেকাবীতে গরম সিঙ্গাড়া ও গৃহজাত গজা সজ্জিত। সিঙ্গাড়াগুলি তখনও ধূম নির্গত করিয়া যেন ভোগীকে আহ্বান করিয়া বলিতেছিল, আর দেৱী করিও না—শীঘ্র সদ্যবহার কর।

“আম্বন ললিতবাবু! যমুনা বলছিল, ‘ডাক্তারবাবু এখানে, যেন মনমরা হ’য়ে আছেন; সারা দিন কি যেন ভাবেন। ঐ দেখ না, বাগানে উদাস-দৃষ্টিতে চেয়ে আছেন।’ সত্যি কি এখানে আপনার অসুবিধা হচ্ছে, ডাক্তারবাবু?”

ললিত বলিল, “অসুবিধা? এত আদর-যত্ন, এমন রসনা-তৃপ্তিকর আহাৰ্য—কলকাতায় এমন যত্ন কে করত বলুন ত?”

সুশীল জানিত, ত্রিসংসারে ললিতের আপনার বলিবার কেহ নাই। মাতা, পিতা, সহোদর, সহোদরা যাহাদের নাই, তাহারা শুধু নিঃসঙ্গ জীবনের ভারে কাতর আছে; সংসারের আদর-যত্ন, স্নেহ-ভক্তির সংস্রবচ্যুত হইয়া তাহারা মরুপথের যাত্রীর গায় ক্লান্তচরণে পথ চলিতে থাকে।

সুশীলচন্দ্র বলিল,—“আচ্ছা, বসুন। চা এলো ব’লে, ততক্ষণ—” বলিতে বলিতেই সুশীল একখানা রেকাবী ডাক্তারের দিকে আগাইয়া দিয়া নিজে অপরখানি টানিয়া লইল।

## যমুনাধারা

গরম সিঙ্গাড়া শীতের প্রভাবে মুখরোচক। ডাক্তার পরিতোষ সহকারে উহার সদ্যবহার করিতে লাগিল।

চা আগিল, কিন্তু যমুনার করধৃত আধারে নহে—নিতাই উহার বাহক।

ভিতরদিক্ হইতে যে পথে নিতাই আসিয়াছিল, সেই দিকে ললিত একবার দৃষ্টিপাত করিল। তাহার নাসাপথে কি দীর্ঘশ্বাস নির্গত হইল ?

সুশীল চা'র পেয়ালায় চুমুক দিয়া বলিল, “দেওঘরটা কেমন লাগছে আপনার ?”

ডাক্তার বলিল, “বেশ যায়গা। তবে এখানে এলে মনে হয় না যে, বাঙ্গালা দেশ ছেড়ে এসেছি। চারিদিকেই বাঙ্গালার ছেলে-মেয়ের মুখ! সেই ধানের ক্ষেত, আম-কাঁঠাল-গাছের প্রাচুর্য। তফাতের মধ্যে সমতল ক্ষেত্র নেই—চেউ-খেলান দেশ।”

“আর একটা জিনিষ লক্ষ্য করবার। মেয়েরা এখানে অবাধে চলাফেরা করে। এটা আমার বড় ভাল লাগে।”

ললিত বলিল, “ভারী সুন্দর। খোলা মাঠ—অবাধ বাতাস ও সূর্যের আলো স্বাস্থ্যের পক্ষে কত প্রয়োজন, বাঙ্গালা দেশের সহরের লোক তা বোঝে না। কিন্তু, আপনার বাড়ীর মেয়েরা এমন সকালবেলা ঘরে বসে থাকেন কেন? এই সময় একটু বাইরে বেড়িয়ে আসা ভাল।”

সুশীল বলিল, “ওরা ত রোজই বেড়াতে যায়। আমাদের চায়ের ব্যবস্থা ক'রে দিয়েই চ'লে গেছে।”

## যমুনাধারা

ললিত একটু বিস্মিত হইল। কৈ, সে ত কাহাকেও বাহিরে যাইতে দেখে নাই। তবে বাগানের অপর দিক্ দিয়া আর একটা ফটক আছে। কিন্তু যে দেশে অবরোধের বালাই নাই, সেখানে এমন ভাবে সম্মুখের পথ বর্জন করিবার প্রয়োজন কি? তাহার সান্নিধ্য এড়াইবার জন্মই কি এই ব্যবস্থা?”

ডাক্তার মনের চাঞ্চল্যকে সবলে দমন করিয়া বলিল, “আপনি কি বেরোবেন, না ঘরে বসেই থাকবেন?”

শূণ্ণ চাঁর পেয়লা টেবলের উপর রাখিয়া দিয়া সুশীলচন্দ্র বলিল, “আজ একবার মীনাবাজারের দিকে যাবার ইচ্ছা আছে। বাজারটা একবার ঘুরে আসব। আপনি কোন্ দিকে যাবেন?”

উঠিয়া দাঁড়াইয়া ললিত বলিল, “বাজারের দিকে গেলেও চলে, কিন্তু দাড়োয়ার দিকে যাবার জন্মই মন টানছে।”

সহাস্ত্রে সুশীল বলিল, “মন যে দিকে টানে, সেই দিকে যাওয়াই ভাল। দার্শনিকগণ বলেন যে, মন ভবিষ্যদশী। নিষ্ঠাভরে তার কথা শুনে কায করলে লভ্যই হয়, লোকসান ঘটে না। “শিবাস্তে পশ্চানঃ”।”

ললিত ধীরে ধীরে নিজের ঘরে চলিয়া গেল। আলোয়ানখানা গায় জড়াইয়া, একখানি ভ্রমণ-যষ্টি হাতে লইয়া সে বাহির হইয়া পড়িল।



## চৌদ্দ

দলে দলে নর-নারী—বালক-বালিকা অসঙ্কেচে শীতের রৌদ্র-করোজ্জল বায়ু সেবন করিয়া বেড়াইতেছে, কিন্তু তাহার নয়ন যাহার দর্শনপ্রার্থী, মন যাহাকে দেখিবার জন্ত ব্যগ্র, উন্মুগ্ন, তাহার কোন চিহ্নই নাই। ললিত নিতাই-প্রমুখাৎ অবগত হইয়াছিল, মণিমালা যমুনা, সোনার মার কোলে থুকুরাণীকে চাপাইয়া, দ্বারবান্ হিন্দুপাল সিংয়ের সঙ্গে বেড়াইতে বাহির হইয়াছে।

ললিত ভাবিয়াছিল, দাড়োয়ার দিকে সকালবেলা তাহার নিশ্চয়ই বেড়াইতে যাইবে। কারণ, কয় দিন ধরিয়া সে দেখিতেছে যে, স্বাস্থ্যান্বেষী প্রবাসীরা প্রায়ই এই দিকে বেড়াইতে আইসে। তাই সে এই দিকেই আসিয়াছিল।

সুশীলের কথার ইঙ্গিতটা যে নিজের মনের অভিপ্রায় অনুসারে গ্রহণ করিয়াছিল। সে ভাবিয়াছিল, সুশীল তাহার মনের কথা না জানিয়াই সাধারণ দার্শনিকের ত্রুটি যে মস্তব্য করিয়াছিল, তাহার মধ্যে যেন সত্যের ইঙ্গিত প্রচ্ছন্ন রহিয়াছে।

কিন্তু কৈ, সে যাহার সন্ধান বাহির হইয়াছে, তাহার ত দেখা নাই!

সহসা ললিতের মনে হইল, তাহার মনের এই কাঙ্গাল-পনা, ইহা কি সমর্থনযোগ্য? একটি তরুণী বিধবার প্রতি তাহার মনের এমন প্রচণ্ড আকর্ষণ, ইহা কি সঙ্গত?

## যমুনাধারা

সঙ্গত নহে কেন? অল্পবয়সে যমুনা স্বামী হারাইয়াছে। তাহার সম্মানও নাই—স্বশুরালয়ে আপনার জন বলিয়া দাবী করিবারও কেহ নাই। এই তরুণী বিধবার জ্যেষ্ঠ সহোদর পুনরায় ভগিনীর বিবাহ দিবার জন্ত উদগ্রীব। ললিত যদি প্রার্থী হয়, তবে খুব সম্ভব তাহার আবেদনে সুনীলচন্দ্র কোন আপত্তিই করিবে না। ললিত স্বয়ং যমুনার প্রতি শ্রদ্ধাপূর্ণ প্রীতির অঞ্জলি নিবেদন করিবার জন্ত উন্মুখ। সে সমগ্র অন্তর দিয়া তরুণীকে—হাঁ, ভালবাসে। সুতরাং তাহার অন্তরের এই দর্শনপিপাসা কিরূপে সমর্থনের অযোগ্য হইতে পারে?

না, সে কোনও অপরাধ করে নাই। ভারতীয় হিন্দুর মনোরুদ্ধির দিক্ দিয়া বিচার করিলে কোনমতেই তাহার মনের এই নির্দোষ অভিসারকে নিন্দা করা চলে না।

ললিত যুগ্মগতিতে চলিতেছিল। যে যুক্তিজাল রচনা করিয়া সে আপনার মানসিক আবেগের সমর্থন করিতেছিল, গতির তালে তালে তাঁহা আন্দোলিত হইতে লাগিল।

সহসা তাহার গতিবেগ বন্ধিত হইল।

সত্যই কি তাহার যুক্তিজাল অমোঘ, অব্যর্থ? তবে ভিতর হইতে সম্পূর্ণ অনুমোদন আসিতেছে না কেন? কে যেন প্রতিবাদ করিয়া যুগ্ম অথচ দৃঢ়কণ্ঠে বলিয়া উঠিতেছে, না—ঠিক হইতেছে না।

সে আরও দ্রুত চলিতে লাগিল।

সবই সত্য। কিন্তু এই তরুণী—এই বিধবা হিন্দুর অন্তঃপুরচারিণীর দিক্ দিয়া বিষয়টি কি বিবেচনা করা হইয়াছে?



## যমুনাধারা

যমুনা ঠিক বালিকা-বয়সে পরিণীতা হয় নাই, তাহার স্বামীকে সে অল্পদিনের মধ্যেই হারাইয়াছে সত্য ; কিন্তু সে দাম্পত্য-জীবনের রসাস্বাদ করিয়াছে। অবশ্য সাধ ভাল করিয়া চরিতার্থ হইবার পূর্বেই সে যৌবনের প্রথম পাদেই স্বামিহারা হইয়াছে।

হিন্দু-স্ত্রী যেরূপ নিষ্ঠা ও শ্রদ্ধা-সহকারে স্বামীর স্মৃতে-দুঃখে আপনাকে বিলাইয়া দেয়, তাহা ত ছেলেখেলার মত উপেক্ষণীয় নহে। পুনরায় 'অন্তের পত্নী হইবার মত মনোবৃত্তি যমুনার পক্ষে কতদূর সত্য, তাহা যতক্ষণ প্রকাশ না পাইতেছে, ততক্ষণ এই তরুণীকে পরপত্নী হিসাবে গণনা করা কি হিন্দুর পক্ষে একান্ত বাঞ্ছনীয় নহে ?

ললিতের মার্জিত মনোবৃত্তি এই সত্যকে অস্বীকার করিতে পারিল না। তাহার অন্তরতম প্রদেশ হইতে কে যেন বলিয়া উঠিল, না, তোমার এমন ভাবে পরস্ত্রীর প্রতি লোলুপতা সহস্র সহস্র বৎসরের পুরাতন, সনাতন সভ্যতার অনুযায়ী নহে। পৃথিবীর সর্বশ্রেষ্ঠ সভ্যতা মনের এই সহজ ও স্বাভাবিক গতিবেগকে সংযত করিবার ব্যবস্থাই দিয়াছে। ইউরোপের সভ্যতা, প্রতীচ্যের দর্শন শাস্ত্র, সাহিত্য ও দ্বৈততত্ত্বশাস্ত্র, যাহাই উচ্চকণ্ঠে ঘোষণা করুক না কেন, ভারতীয় হিন্দু-শাস্ত্র, হিন্দু-দর্শন, হিন্দুর নীতিবিজ্ঞান কোনও মতেই তাহা সমর্থন করিবে না।

ললিত শান্তভাবে দাড়োয়ার সিকতা-ভূমির উপর বসিয়া পড়িল। মনের প্রবল আবেগ এবং চিরন্তন সংস্কার—উভয়ের মধ্যে তুমুল সংগ্রাম বাধিয়া গেল।

বহুক্ষণ ধরিয়া মানসিক তর্কদ্বন্দ্বের পরও ললিত কোনও

## যমুনাধারা

মীমাংসায় উপনীত হইতে পারিল না। অগ্রমনস্কভাবে সে একবার তাহার বাম হস্তের মণিবন্ধের দিকে চাহিল। ঘড়ির কাটার দিকে দৃষ্টি পড়িতেই সে বাস্তব-জগতে নামিয়া আসিল।

নয়টা বাজিয়া গিয়াছে। সে প্রায় সওয়া ঘণ্টা এখানে বসিয়া আছে। না, আর বিলম্ব করা চলে না। সে উঠিল—দাড়োয়ার বৃকের উপর দিয়াই চলিল। নদীর বক্ষ শুধু বালুকাময়। জলের রেখা কদাচিৎ কোথাও দেখা যাইতেছে। গৃহস্থ বালি খনন করিয়া পানীয় জল সংগ্রহ করিয়া লইয়া গিয়াছে। সেই খনিত অংশে কিছু জল জমিয়া রহিয়াছে।

ললিত নত হইয়া জল তুলিয়া উত্তপ্ত ললাট ও মুখ ধোত করিল। শীতল, স্নিগ্ধ সলিলস্পর্শে তাহার ললাটদেশ যেন জুড়াইয়া গেল।

খানিকদূর এইভাবে চলিয়া সে মাঠ ভাঙ্গিয়া সদর-রাস্তায় উঠিল। মিশনগৃহের সম্মুখে উপস্থিত হইয়া সে কয়েক মুহূর্ত্ত কি ভাবিয়া স্থির হইয়া দাঁড়াইল। একদল নর-নারী দক্ষিণদিক্ হইতে আসিতেছে দেখিয়া সে দক্ষিণ-দিকেই চলিতে আরম্ভ করিল।

অকস্মাৎ তাহার জংপিণ্ড দ্রুততালে নৃত্য করিয়া উঠিল।

হাঁ, তাহার অনুমান সত্য। মণিমালা ও যমুনা আসিতেছে। সোণার মার কোলে খুকুরাণী। হিন্দপালসিং দীর্ঘ যষ্টি হস্তে সকলের পশ্চাতে। তাহার প্রকাণ্ড এবং শুভ্র গুম্ফ বাতাসে ঈষৎ আন্দোলিত হইতেছে দেখা গেল।

মুহূর্ত্তের জন্ত সংশয়-দোলায় তাহার চিত্ত আলোড়িত হইল। এ অবস্থায় সে কি করিবে? অগ্রসর হইবে, না ফিরিয়া যাইবে?

## যমুনাধারা

তাহাদিগকে দেখিয়া ফিরিয়া যাওয়া কিন্তু সম্ভব হইবে না। উহারা নিশ্চয়ই তাহাকে লক্ষ্য করিয়াছে। সুতরাং এখন ফিরিতে গেলেই তাহার অর্থ অগ্নিরূপ দাঁড়াইবে না কি ?

ললিত ডাক্তার সোজা অগ্রসর হওয়াই সমীচীন মনে করিল। কারণ, সে বেড়াইতে বাহির হইয়াছে—তাহাদিগকে দেখিবার উদ্দেশ্যে নহে—সোজা, অসঙ্কোচে অগ্রসর হইলে উহাই প্রমাণিত হইবে।

ডাক্তার সম্মুখের দিকে অগ্রসর হইল। কাছে আসিতেই হিন্দপালসিং ডাক্তারকে সেলাম করিল। অভিবাদন ফিরাইয়া দিয়া ললিত অপাঙ্গে যমুনার দিকে চাহিয়া লইল। তাহার পর সে সোজা চলিতে লাগিল।

যমুনার আননে প্রসন্নতার দীপ্তি পলক দৃষ্টিপাতে সে দেখিয়া লইল। কথা কহিবার প্রবল বাসনা সত্ত্বেও সে সাহস করিয়া সম্ভাষণ জানাইতে পারিল না। কারণ, এই তরুণীযুগল সেরূপ কোনও লক্ষণ প্রকাশ না করায়, ডাক্তারও পথের মাঝে আত্মীয়তা-জ্ঞাপনের প্রয়াস প্রকাশ করিতে পারিল না।

চলিতে চলিতে ললিত একটু অগ্রমনস্ক হইয়াছিল। সহসা কাহার আহ্বানে সে পার্শ্বে ফিরিয়া চাহিল। দেখিল, যতীন্দ্রনাথ পুত্রের হাত ধরিয়া গেটের পাশে দাঁড়াইয়া তাহাকে আহ্বান করিতেছে।

যমুনারা কি তবে যতীন বাবুর বাড়ীতেই বেড়াইতে আসিয়াছিল ?

## যমুনাধারা

ললিতের মুখমণ্ডলে কি ছায়া ঘনাইয়া উঠিল? কিন্তু সে যখন সহাস্তমুখে যতীনের সন্মুখে উপস্থিত হইল, তখন তাহার ভাবপরিবর্তনের কোনও আভাস মুখমণ্ডলে প্রকাশ পাইল না।

যতীন্দ্রনাথ বলিল, “বেড়াতে বেরিয়েছেন বুঝি? একটু আগে ওঁরা চ’লে গেলেন।”

ডাক্তার কিন্তু চমকিয়া উঠিল না। পূর্বাহুই এ অনুমান তাহার হইয়াছিল। সে বলিল, “আপনার এ অঞ্চলটা আরও সুন্দর। দিগড়িয়া পাহাড়টা এখান থেকে বেশ দেখা যাচ্ছে। আপনি সকালে বেড়াতে যান নি, যতীন বাবু?”

যতীন হাসিয়া বলিল, “আমার বেড়ান বেলা আটটার মধ্যেই শেষ হয়ে গেছে। আপনি এখন ফিরবেন, না গরীবের কুটীরে পায়ের ধুলো দেবেন?”

লজ্জিতভাবে ডাক্তার বলিল, “কি যে বলেন আপনি। কিন্তু এখন বাসার দিকে ফেরাই ভাল। বেলা সাড়ে নয়টা হয়ে গেছে। বাসায় পৌঁছতে দশটা বেজে যাবে।”

নমস্কারের আদান-প্রদানের পর ললিতচন্দ্র পূর্বাপেক্ষা দ্রুতপদে ফিরিয়া চলিল।

## পনের

“শোন, শোন, তোমার চিঠি আছে।”

স্বামীর আহ্বানে মণিমলা কাছে আসিল। সুশীল তাহার হাতে একখানা খামে আঁটা পত্র দিল। মীনাবাজারে যাইবার সময় ডাকঘরে গিয়া সে ডাকের চিঠিপত্র চাহিয়া লইয়াছিল। ডাকঘর হইতে প্রতাহ হিন্দপালসিং ডাক লইয়া বাইত। আজ সে মণিমলাদের সঙ্গে বাহির হওয়ার, সুশীল নিজেই বাজারের পথে সে কাষটা সমাধা করিয়া লইয়াছিল।

চিঠি দেখিয়াই মণিমলা বুঝিতে পারিল, তাহার কনিষ্ঠা ভগিনী লিখিয়াছে। সুখমা তাহার সহোদরা নহে, মাতৃসমা মাসীর একমাত্র কন্যা। মণিমলা খাম খুলিয়া পড়িল—

“শ্রীচরণেষু

দিদি,

এখানে আসিয়াই গুনিলাম, তোমরা দেওঘরে গিয়াছ। বৃন্দাবন হইতে আজ সাত দিন আসিয়াছি। দাদা মাঝেও লইয়া আসিয়াছেন। প্রেম মহাবিদ্যালয়ের পড়া একরকম শেষ হইয়াছে। সুতরাং আর সেখানে থাকিবার প্রয়োজন হইবে না। মা বৈষ্ণনাথজী দেখিতে যাইবেন বলিতেছেন। কাষেই আমরা সঙ্গে যাইব। দাদা জ্বামাদিগকে ওখানে পৌছাইয়া দিয়াই পাটনায়

## যমুনাধারা

চন্দ্রিয়া যাইবেন। বৌদিরা সেখানে আছেন। মা ও আমি তোমাদিগকে দেখিবার জন্যই কলিকাতার বাড়ীতে আসিয়াছিলাম। তোমার মেয়েটিকে ছয় মাসের দেখিয়া গিয়াছিলাম। খুকুরাণী এখন বড় হইয়াছে। কেমন দেখিতে হইয়াছে, দিদি? সুনীল বাবু কেমন আছেন? তুমি ও জামাইবাবু আমার প্রণাম লইও। যাওয়ার দিন এখন ও স্থির হয় নাই। তোমাদের ওখানেই উঠিব। জামাইবাবুকে বলিও। ইতি—

তোমার স্নেহের বোন,  
সুধমা।”

মণিমালার মুখ আনন্দে উৎফুল্ল হইয়া উঠিল। এই মাসীমাই তাহাকে শৈশবে লালনপালন করিয়াছিলেন। মণিমলা অল্পবয়সেই মাকে হারাইয়াছিল। মাসীমাই তাহাকে বুকে-পিঠে করিয়া নিজের মেয়ের মত লালনপালন করিতেন। তাঁহার কন্যা ছিল না। একটি পুত্র। মণিমালাকে পাইয়া, তাঁহার কন্যা-স্নেহ সার্থক হইয়াছিল। তার পর যখন সুধমা জন্মগ্রহণ করিল, তখন দুই জনকেই সমান আদরে পালন করিয়াছিলেন। সুধমা মণিমালার অপেক্ষা চার বৎসরের ছোট। দুই ভগিনী বাল্যবয়সে জানিতেই পারে নাই, তাহারা সহোদরা নহে। পরম-স্নেহাস্পদা ভগিনী ও মাতৃসমা মাসীমাতা আসিতেছেন, জানিয়া মণিমালার হৃদয় আনন্দে পূর্ণ হইল।

স্বামীর হাতে ভগিনীর পত্র অর্পণ করিয়া মণিমলা পাঠরত

## যমুনাধারা

স্বামীর দিকে চাহিয়া রহিল। সুশীলচন্দ্র পড়া পাঠ করিয়া বলিল,  
“আজই টেলিগ্রাম ক’রে দেই, ওঁরা শীঘ্র আসুন। কি বল?”

মণিমালা ইহাই চাহিতেছিল। সে তখনই সম্মতি জানাইল।

যমুনা ভ্রাতৃবধূর সন্মানে আসিতেছিল। তাহার ক্রোড়  
খুকুরাণী শীলা অধিকার করিয়াছিল।

দাদা ও বৌদিদির হাসিমুখ দেখিয়া সে বলিল, “তোমরা এত  
খুসী যে? কোন সুখবর আছে না কি?”

মণিমালা হাসিয়া বলিল, “সুখমারা আসছে, ভাই।”

“তাই না কি? সে বেশ হবে, বৌদি। মাসীমাও আসছেন?”

“হাঁ ভাই, তিনিও আসছেন। দু’বছর তাঁকে দেখি নি।”

সুশীলচন্দ্র টেলিগ্রাম পাঠাইবার জন্ত বাহিরে চলিয়া গেল।  
তখনও আহারের বিলম্ব ছিল।

মণিমালা ও যমুনা কোন্ ঘরে মাসীমা ও সুখমা থাকিবেন,  
তাহার ব্যবস্থা করিতে গেল। বাড়ীতে ঘরের অভাব ছিল না।

সুশীল যে ঘরে শয়ন করিত, তাহার পার্শ্বের ঘরে যমুনা  
সোণার মাকে লইয়া শয়ন করিত। তাহার পার্শ্ব আরও দুইখানি  
প্রশস্ত ঘর ছিল। একখানিতে মণিমালা ও ... দিয়া পড়াশুনা  
অথবা গল্পগুজব করিত; তাহার পার্শ্বস্থ ঘরাটি অতিগিদিগেব জন্ত  
নির্দিষ্ট ছিল। পশ্চিমের অবাধ বায়ু সে ঘরে প্রবেশ করিত। এই  
আলোকিত ঘরখানিই সুখমাদের জন্ত নির্দিষ্ট হইল। ঘরের দুই  
পার্শ্ব দুইখানি খাট। মা ও মেয়ে স্বচ্ছন্দে আরামে এই ঘরে  
থাকিতে পারিবেন।

## যমুনাধারা

ননদ ও ভাজ তখনই চাকরদিগকে ডাকিয়া পরিচ্ছন্ন ঘরটিকে অতিথিদিগের উপযোগী করিয়া সাজাইল। মাঁসীমা স্বহস্তে পাক করেন। যমুনার হবিষ্য-গৃহে তাঁহার আহারের অসুবিধা হইবে না।

বেলা বারটার মধ্যে সকল কাৰ্য সারিয়া দুই জনে স্নান-ঘরে গিয়া শুচিন্মতা হইয়া আসিল। প্রত্যহ এই সময়েই তাহাদের আহারের আয়োজন হয়।

সুশীল ও ললিত আহারার্থে ভোজন-কক্ষে আহূত হইল। প্রত্যহ মণিমালা আহারাদির সময় উপস্থিত থাকিয়া স্বামী ও ডাক্তারের আহাৰ্য্য পরিবেষণে সহায়তা করিত। যমুনা কখন কখন সেখানে উপস্থিত থাকিত না, এমন নহে।

আজ মধ্যাহ্ন-ভোজনকালে মণিমালা লক্ষ্য করিল, ডাক্তার ললিতের আননে একটা গাঙ্গীৰ্য্য-রেখা পড়িয়াছে। নারীর দৃষ্টি অত্যন্ত তীক্ষ্ণ। পুরুষ বাহা সাধারণতঃ লক্ষ্য করে না, নারীর দৃষ্টিপথ হইতে তাহা এড়ায় না। সামান্য হইতে অসামান্য পরিবর্তন, কিছুই নারীর দৃষ্টি অতিক্রম করিতে পারে না।

আহারাদির পর বিশ্রাম-কক্ষে মণিমালা স্বামীকে ডাকিয়া বলিল, “ডাক্তার বাবুর মুখ অত গাঙ্গীৰ্য্যকন, বস্তুতে পার?”

সুশীল বলিল, “তাই না কি? কৈ, আমি ত কিছু লক্ষ্য করি নি!”

মণিমালা একটা পাণ মুখে ফেলিয়া বলিল, “মুখখানা খুব গাঙ্গীৰ্য্য দেখলুম।”

সুশীল হাসিয়া বলিল, “ডাক্তার বাবুর সম্বন্ধে তোমার দরদ



## যমুনাধারা

প্রশংসনীয় ! তাঁর মুখের ভাব কখন প্রসন্ন, কখন স্তান হন, তাও পর্যন্ত তোমার লক্ষ্য আছে দেখছি ।”

স্বামীর মুখের চাপা হাসি মণিমালার দৃষ্টি অতিক্রম করিল না : সে ঈষৎ আরক্ত মুখে বলিল, “তোমার বন্ধু বলেই দৃষ্টি রাখাটা অসম্ভব মনে করিনি । কিন্তু তোমাদের পুরুষ জাতের মনটা যেমন মনে কর, মেয়েমানুষকে তা ভাবা বে ভুল, এ জ্ঞানটা তোমাদের নেই ।” .

সুশীলচন্দ্র হো হো করিয়া হাসিয়া উঠিল । হাসির শব্দে আকৃষ্ট হইয়া পার্শ্বের ঘর হইতে যমুনা দ্রুতপদে আসিয়া বলিল, “দাদা, অত হাস্ছ যে, কি হয়েছে ?”

সহোদরাকে দেখিয়া সুশীল হাসি থামাইল ।

মণিমালা বলিল, “অত হাসির কি ঘটেছে, শুনি ?”

সে কথার কোনও উত্তর না দিয়া সুশীল বলিল, “তোমার বৌদি ললিত ডাক্তারের গম্ভীর মুখ আজ দেখেছেন । তাই তাঁর ছবিবনা হয়েছে, কেন এমন হ’ল ।”

যমুনা হাসিয়া বলিল. “এক জন ভদ্রলোক সব ছেড়ে ছুড়ে আমাদের এখানে আছেন, তাঁর সুখস্বাস্থ্যের দিকে দৃষ্টি রাখা ত বাড়ীর গিন্নীর কর্তব্য । তা সে জ্ঞাত তোমার এত হাসি পাবার কোন কারণ ত, দেখছি না, দাদা !”

মণিমালা বলিল, “তাই বল ত, ঠাকুরনি । পুরুষমানুষের মন বড় নোংরা । লেখা-পড়াই শিখন আর বিলেত ঘুরেই আসুন—স্বভাব বদলায় না ।”

## যমুনাধারা

সুশীল আবার উচ্চহাস্য করিয়া উঠিল।

অপরাহ্নের সূর্যালোক ঘরের মধ্যে আসিয়া পড়িয়াছিল।

মণিমালা ও যমুনা সুশীলের হাসি দেখিয়া আর কোন উত্তর করিল না।

যমুনা বলিল, “চল বৌদি, তোমার চুল বেঁধে দি। বেড়াতে যাবার সময় হবে আসছে।”

বাহিরের দ্বারপ্রান্তে দাঁড়াইয়া বৃদ্ধ দ্বারবান হিন্দপালসিং বলিল, “হুজুর, তার আয়া।”


সুশীল ঘরের বাহিরে গিয়া তার লইয়া ফিরিল।

মণিমালা বলিল, “কে তার পাঠালে?”

পড়িতে পড়িতে সুশীল বলিল, “তোমার দাদা পাঠিয়েছেন। আজই তাঁরা রওনা হবেন। কা’ল সকালে এসে পৌছুবেন।”

যমুনা ও মণিমালার মুখে আনন্দের জ্যোৎস্না-ধারা খেলিয়া গেল। সুখমা আনিতোছে। কা’লই আসিবে। দুই বৎসর পরে আবার দেখা হইবার গুভক্ষণ আসিয়াছে!

মণিমালা তাড়াতাড়ি ঘর হইতে চলিয়া গেল। যমুনাও ভ্রাতৃজায়ার অনুসরণ করিল।



## ষোল

বৈষ্ণনাথধাম ষ্টেশনে গাড়ী থামিতেই সুশীল দ্বিতীয় শ্রেণীর কামরার দিকে দ্রুত অগ্রসর হইল। মণিমালা ও যমুনা ষ্টেশনে আসিয়াছিল। তাহারাও সেই দিকে দ্রুতপদে চলিতেছিল। সহসা পশ্চাৎ হইতে ডাক আসিল, “সুশীল বাবু!”

তিন জনই পশ্চাতে চাহিয়া দেখিল।

একখানি তৃতীয় শ্রেণীর কামরা হইতে দীর্ঘাকার, সুদর্শন এক জন পুরুষকে নামিতে দেখিয়া তাহারা বিস্মিত হইল। তিনি বিমলচন্দ্র, মণিমালার দাদা। এই ধনি-সন্তান, পাটনার এক জন বিশিষ্ট ব্যবহারাজীব যে, তৃতীয় শ্রেণীর গাড়ী হইতে নামিবেন, ইহা তাহারা কল্পনাও করে নাই।

কিন্তু সে বিষয়ে চিন্তা করিবার অবকাশ ছিল না। মাসীমার সঙ্গে সুধমাকে নামিতে দেখিয়া মণিমালা ও যমুনা তাহাদের কাছে সহাস্রমুখে অগ্রসর হইল। প্লাটফর্মের উপর মণিমালা ও যমুনা পোতা মাসীমাতার চরণ-ধূলি গ্রহণ করিল। সুশীলও স্বশ্রমাতার চরণ বন্দনা করিল।

সঙ্গের ভৃত্য, কুলীর সাহায্যে জিনিষ-পত্র নামাইয়া লইল।

বিমলচন্দ্র সহাস্র-দৃষ্টিপাতে সুশীলকে বলিলেন, “তৃতীয় শ্রেণীতে আসতে দেখে একটু চমকে গেছ বুঝি, সুশীল বাবু? কি করি,

## যমুনাধারা

সুধমা কিছুতেই ছাড়লে না। সে বলে, দেশের কোটি কোটি লোক  
মাতে ক'রে যেতে পারে, সেই শ্রেণীতে যাওয়া'কিসে অসম্মানকর,  
তা বুঝিনে। তবে গাড়ী রিজার্ভ ক'রে আস্তে তার আপত্তি  
হয়নি।”

জিনিষ-পত্র লইয়া কুলীরা অগ্রসর হইয়াছিল। সকলে ষ্টেশনের  
বাহিরে আসিলেন। পক্ষিরাজ-ঘোটক-বাহিত গাড়ীগুলি মাল ও  
যাত্রীবহনের জন্ত বাহিরে দাঁড়াইয়াছিল। তাহারই একস্থানিতে  
জিনিষ-পত্র তুলিয়া দেওয়া হইল।

সুধমা বলিল, “দেওঘর বেড়াবার যারগা। এখানে গাড়ী চ'ড়ে  
যাবার সার্থকতা কি, সুশীল বাবু? আমরা হেঁটেই যাব।”

মণিমালা ও যমুনা হাঁটিয়াই ষ্টেশনে আসিয়াছিল। সুশীলচন্দ্রেরও  
ইহাতে অমত কিছুমাত্র ছিল না। তখন গাড়ীর মধ্যে ভৃত্যকে  
বসাইয়া দিয়া গাড়ী ছাড়িয়া দেওয়া হইল। গল্প করিতে করিতে  
সকলে পদব্রজে চলিলেন।

কাঁকা মাঠের ধারে “দেবনিবাস” দেখা গেল। গাড়ী পূর্বেই  
মালপত্র লইয়া পৌছিয়া গিয়াছিল। পুষ্পিতলতা-শোভিত ফটকের  
ভিতর প্রবেশ করিয়া কঙ্করাস্ত্রত পথের উপর দিয়া সুশীলচন্দ্র  
সকলকে লইয়া যখন অগ্রসর হইতেছিল, ললিতচন্দ্র তখন বারান্দায়  
বেড়াইতেছিল। মণিমালা ও যমুনার সহিত নবাগতা মহিলাদিগকে  
দূর হইতে আসিতে দেখিয়া ডাক্তার বারান্দা ত্যাগ করিয়া বাহিরের  
বসিবার ঘরে প্রবেশ করিল।

কিছুক্ষণ আগে সে বেড়াইয়া গিয়াছিল। গাড়ী হইতে তখন

## যমুনাধারা

মালপত্র নামান হইতেছিল। সে শুনিয়াছিল, মণিমালার ভগিনীর ও মাসী-মাতা আসিতেছেন। অপরিচিত পুরুষের পক্ষে নবাগতাদিগের সম্মুখে দাঁড়াইয়া থাকা শোভন ও সঙ্গত হইবে না মনে করিয়া সে ঘরের মধ্যে চলিয়া গেল।

কিন্তু কৌতূহল মানবের স্বভাবসিদ্ধ ধর্ম। ঘরের মধ্য হইতে সে দেখিতে পাইল, স্মীলের সহিত এক দীর্ঘাকার, গৌরবর্ণ পুরুষ দীর্ঘপদবিক্ষেপে আসিতেছেন। নবাগত পুরুষটির প্রসন্ন মুখমণ্ডলের ভ্রমরকৃষ্ণ গুম্ফযুগল দেখিয়া সহসা ললিত চমকিয়া উঠিল।

এ মূর্তি তাহার সুপরিচিত। সহস্র মানুষের মধ্য হইতেও এই পুরুষটিকে বাছিয়া লইতে এক মুহূর্ত্ত বিলম্ব হয় না। পুরুষটির আকৃতিতে এমন বৈশিষ্ট্য আছে যে, একবার মাত্র দেখিলেও, বহুদিন পরেও চিনিতে কষ্ট হয় না।

ললিতচন্দ্র একবার চক্ষু মার্জ্জনা করিয়া লইল। না, চার বৎসর পূর্বে দৃষ্ট হইলেও বিমল বাবুর মূর্তি ভুলিবার নহে। সেই সঁদানন্দ পুরুষের গম্ভীর কণ্ঠের সরস বাক্যালাপ সে কোন দিন ভুলিবে না। হাঁ, সেই সুপরিচিত কণ্ঠস্বর।

স্মীল বাবুর সহিত বিমল বাবুর কি ঘনিষ্ঠ সম্বন্ধ আছে? কৈ, ইতিপূর্বে কোনও দিনই ত সে তাহা জানিতে পারে নাই!

ললিতচন্দ্র একখানি কেদারাঘ বসিয়া পড়িল।

“বাঃ স্মীল! তোমার বাগীখানা সত্যি চমৎকার। তোমার বাবার পছন্দ ছিল বটে! চমৎকার বাগান! ভারী সুন্দর লাগছে।”

## যমুনাধারা

কণ্ঠস্বর বারান্দা অতিক্রম করিয়া নিকটবর্তী হইল। পদশব্দ  
ক্রমে ঘরের মধ্যে প্রবেশ করিল।

ললিতচন্দ্র সহসা উঠিয়া দাঁড়াইল।

বিমলচন্দ্র ঘরের মধ্যে প্রবেশ করিয়াই বলিয়া উঠিলেন,  
“এ কে? ললিত বাবু? আপনি এখানে আছেন?”

ললিত ততক্ষণ প্রকৃতিস্থ হইয়াছে। স্বরের কুণ্ঠা অনেকটা  
সংযত করিয়া সে নমস্কার করিয়া বলিল, “আজ্ঞে হ্যাঁ, দিন  
পাঁচ ছয় এখানে এসেছি।”

সুশীল বলিল, “উনি আমাদের পারিবারিক চিকিৎসক।  
এখানে যখন আসি, গুঁকে নিয়ে এসেছি। খুঁকীর ধাত উনি  
ভালই বোঝেন। তা ছাড়া উনি মোহিতের সতীর্থ ছিলেন!”

“বেশ! বেশ! অনেক দিন পরে দেখে খুব খুসী হলাম।”

সুশীল বলিল, “ডাক্তার বাবুকে আপনি চেনেন?”

হা হা করিয়া হাসিতে হাসিতে প্রসন্ন-কণ্ঠে বিমল বলিলেন,  
“খুব চিনি গুঁকে। পাটনার উনি বেড়াতে গিয়েছিলেন, সেই  
সময় আলাপ হয়।”

ললিতচন্দ্র বেন অত্যন্ত কুণ্ঠিত হইয়া পড়িল।

কিন্তু বিমলচন্দ্র সে দিকে দৃষ্টিপাত না করিয়া বলিলেন, “আপনি  
বিলেত গিয়েছিলেন ত?”

ললিতচন্দ্র অমুত্তর করিল, পোষের প্রচণ্ড শীতেও তাহার ললাট  
যেন ঘর্ম্মসিক্ত হইয়া উঠিয়াছে। সে সংক্ষেপে কোন রকমে উত্তর  
দিল, “না, বিলেত যাওয়া আর ঘ'টোওঠে নি।”

## যমুনাধারা

সুশীল বলিল, “ওঁর এর মধ্যেই কলকাতায় বেশ পসার হয়েছে। বিলেতে গেলে কি আর এমন বেশী হ’ত? ভাল চিকিৎসকের বিলেত যাবার দরকার আছে ব’লে আমার মনে হয় না।”

“তাই না কি? তুমি বিলেত ফেরত হয়ে এ কথা বলছ?”

বিমলচন্দ্রের কণ্ঠে প্রসন্ন হাস্য যেন তরঙ্গায়িত হইয়া উঠিল।

পাছে অণু প্রশ্ন উত্থাপিত হয়, এ জণ্ড যেন ললিতচন্দ্র আপনাকে কিছু বিক্রম বলিয়া মনে করিতেছিল। তাহার মুখমণ্ডলের উদ্বেগচিহ্ন তাহাই প্রকটিত করিয়া তুলিল। কিন্তু বিমলচন্দ্র বা সুশীলের তাহার দিকে তেমন লক্ষ্য ছিল না।

সুশীল বলিল, “বিলেতে গেলে বিদ্যে বেশী হয়, এ ধারণা এখন আমার নেই। বিশেষতঃ উদ্দাম যৌবনকালে ও দেশে উন্নতির তুলনায় অনেকের অনেক বিষয়ে অবনতি ঘটেছে, তার প্রমাণ আছে।”

বিমলচন্দ্র বলিলেন, “তোমার মতের সঙ্গে আমার বিরোধ মোটেই নেই। আমার বহু বন্ধু বিলেত থেকে ফিরে এসেছেন। তাঁদের যে সকল সদগুণ ছিল, দেখতে পাচ্ছি, ও দেশের হাওয়ার তার রূপ-পরিবর্তন হয়ে গেছে। অনেকে এমন বাদরাম শিখে এসেছেন, বাইরের জৌলুষেও তা ঢাকা পড়ে না।”

“খুব সত্যি কথা, দাদা। আমি যদি ওখানকার ভদ্র পরিবারে না থেকে অণুভাবে থাকতাম, তবে আমারও হৃদশার সীমা থাকত না। ভগবান্ আমাকে রক্ষা করেছেন।”

বিমলচন্দ্র গায়ের মোটা আলোরানখানা আলনায় রাখিয়া, গরম জামা খুলিয়া ফেলিলেন।

## যমুনাধারা

সুশীলবলিল, “একটু চা হবে কি, দাদা?”

বিরাটকায় পুরুষটি হাসিয়া বলিলেন, “ওরে বাপ্ রে, চা খাবার জো আছে না কি? সুধি আমাকে চা ছাড়িয়ে দিয়েছে। ওর জ্বালার নিয়মিত চা-র পাঠ বাড়ী থেকে উঠে গেছে।”

ললিত তখন অগ্রমনস্কভাবে কি চিন্তা করিতেছিল। সে সহসা চমকিয়া উঠিল।

“সুধমা কি চা ছেড়ে দিয়েছে?”

“অনেক দিন। প্রেম মহাবিদ্যালয়ে পড়া আরম্ভ করবার পর থেকেই ও নিজে ত চা ছেড়েই দিয়েছে, বাড়ীতেও সব বন্ধ। এখন সকালবেলা তার বদলে গরম দুধের ব্যবস্থা।”

সুধমা!—তবে কি যে নবাগতা তরুণীকে সে মণিমালার পাশে পাশে অন্তরে প্রবেশ করিতে দেখিয়াছে, সে কি সুধমা? সুধমা কি মণিমালার ভগিনী?

তাহার চিন্তায় বাধা পড়িল। সুশীল বলিয়া উঠিল, “দাদা, তা হ’লে এখন স্নানের যোগাড় করা বাক্। আপনার ত প্রাতঃস্নানের স্বভাব। আজ বেলা হয়ে গেছে।”

“হাঁ, ভাই। ভোরবেলা স্নান না করলে আমার মন ও শরীর মোটেই ভাল থাকে না। দুই বেলা স্নান—শীত, গ্রীষ্ম সকল ঋতুতেই আমার চাই।”

“তবে চলুন, আর দেরী ক’রে কাঁচ নেই!”



## • সতের

পঞ্চদশী কিশোরী এখন যৌবন-লাবণ্যে পরিপূর্ণ-দেহা। চারি বৎসরের ব্যবধানে সে কি তাহাকে সত্যই চিনতে পারে নাই? সুসমা পরিপূর্ণ দৃষ্টিতে তাহার দিকে চাহিয়াছিল; কিন্তু পূর্ন-পরিচয়ের কোনও আভাস তাহার আকার ভঙ্গিতে ত প্রকাশ পায় নাই! সে যে ললিত, তাহা ত একাধিকবার বিমলচন্দ্র জানাইয়া দিয়াছেন, কিন্তু সুসমার স্বভাবগম্ভীর অথচ প্রসন্ন আননে কোনও রেখাপাত করিয়াছিল বলিয়া সে ত বুঝিতে পারে নাই!

দাড়োয়ার বালুকারাশি উত্তীর্ণ হইয়া ললিতচন্দ্র একা যশিদির অভিমুখে চলিতেছিল। তখনও সূর্যের আলোক-দীপ্তি বৃক্ষশিরে ঝলমল করিতেছিল—পশ্চিম-গগন কুম্ভ-রাগে সমুজ্জল। দলে দলে নর-নারী ভ্রমণ করিতেছে, ললিতের কোনও দিকে দৃষ্টি ছিল না।

সত্যই কি সে অপরাধ করিয়াছিল?

চিন্তাটা মনে উদ্ভিত হইবামাত্র সে আপনার অন্তরকে বিশ্লেষণ করিতে আরম্ভ করিল।

চারি বৎসর পূর্বে এম, বি পরীক্ষা দিয়া সে পাটনাবাসী বন্ধুর গৃহে আতিথ্য গ্রহণ করিয়াছিল। ক্ষুদ্র পরিবারের মধ্যে তাহার দিনগুলি আনন্দেই কাটিতেছিল। কঠোর পরিশ্রম সহকারে পরীক্ষা দিতে শরীর ক্লান্ত হইয়া পড়িয়াছিল।

## যমুনাধারা

নিরবচ্ছিন্ন বিশ্রাম, ভ্রমণ ও বন্ধু-সাহচর্যে শরীরে পূর্নস্বাস্থ্য ফিরিয়া আসিতেছিল।

যথাসময়ে সে সংবাদ পাইল, পরীক্ষায় সে দ্বিতীয় স্থান অধিকার করিয়া উত্তীর্ণ হইয়াছে। বন্ধুর অনুরোধে আরও কিছুদিন পাটনার থাকিয়া বাইতে হইল। সে সুখের দিনগুলির স্মৃতি ললিত এখনও ভুলিতে পারে নাই।

হঠাৎ বন্ধুর কাশীবাসিনী মাতামহীর অসুখের সংবাদ পাইয়া বন্ধু তাহার বিধবা জননীকে লইয়া কাশী চলিয়া গেল। বন্ধুর নির্বন্ধাতিশয়ে ললিত পাটনার রহিয়া গেল। কয়দিন পরেই বন্ধু ফিরিয়া আসিবে। বাড়ীতে পুরাতন পাচক ও চাকর রহিল, তাহার পরিচর্যার কোনও অসুবিধা হইবে না। সুতরাং ললিত বন্ধুর প্রত্যাবর্তন-প্রতীক্ষার রহিয়া গেল।

সে দিন সন্ধ্যায় ভ্রমণকালে অকাল-জলদৌদয়ে বেহারের আকাশ সমাচ্ছন্ন থাকিলেও ললিত ভবিষ্যজীবনের একটা ছক ভাবিতে ভাবিতে অনেক দূর অগ্রসর হইয়াছিল। বিলাতে গিয়া চিকিৎসাবিভাগের জ্ঞান আরম্ভ করিয়া ফিরিয়া আসিতে পারিলে ভালই হইবে। অর্থের অভাব তাহার নাই। সুতরাং বিলাতের ব্যয়সাধ্য পরীক্ষা দিবার কোনও অসুবিধা তাহার হইবে না। স্বাধীন দেশের আবহাওয়ার পরিচয় লইয়া ফিরিবার আগ্রহ তাহার মনের এক প্রান্তে বহুদিন হইতেই সঞ্চিত ছিল।

অসময়ে শীতের দিনে বারিপাতের আশঙ্কা তাহার মনে একবারও উদ্ভিত হয় নাই। চিন্তার সূক্ষ্মতম উর্নাত-জালের সূত্র

## যমুনাধারা

ধরিয়া মন যখন আবর্তিত হইয়া ফিরিতেছিল, সেই সময় অকস্মাৎ  
বৃষ্টিধারা নামিয়া আসিল। মুক্তপ্রান্তরের মধ্যে কোনও আশ্রয়  
মিলিল না—সংহর হইতে বহুদূরে সে আসিয়া পড়িয়াছিল। বৃষ্টি  
পড়িতে দেখিয়া সে দ্রুতপদে ফিরিল।

সারা পথ ভিজিতে ভিজিতে সে যখন বাসায় ফিরিল, তখন  
ওভারকোট ভিজিয়া সর্বাঙ্গ দিয়া জল গড়াইতেছে। সিন্ধুবন্ধ  
ত্যাগ করিয়া সে শয়নকক্ষে আশ্রয় গ্রহণ করিল। প্রচণ্ড শীতে  
তাহার দেহের অভ্যন্তর পর্য্যন্ত কাঁপিয়া কাঁপিয়া উঠিতে লাগিল।  
টুক্কের মধ্যে কুইনিনের বড়ী ও ব্রাণ্ড ছিল। ঔষধ হিসাবে সে  
এক ডোজ সেবন করিল। কিন্তু লেপের মধ্যেও যে প্রচণ্ড শীত  
সে অনুভব করিল, তাহাতে রাত্ৰিকালে আহ্বারের স্পৃহা রহিল না।

বায়স্কোপের ছবির মত চারি বংসর পূর্বের দৃশ্যাবলী তাহার  
মানস-দৃষ্টির সম্মুখে আবির্ভূত—তিরোহিত হইতে লাগিল।

পরদিন সমস্ত শরীরে বেদনা ও সর্দির প্রকোপ সে অনুভব  
করিল। শরীরে উত্তাপও মন্দ নহে। মাথার যন্ত্রণায় অস্থির হইয়া  
সে শয্যায় এ-পাশ ও-পাশ করিতে লাগিল। একটা তন্দ্রাচ্ছন্ন  
ভাব ক্রমেই তাহার চেতনাকে যেন বিলুপ্ত করিতেছিল।

পরে সে শুনিয়াছিল, দুই দিন এই ভাবে চলিবার পর পার্শ্বের  
বিমল বাবুর বাড়ীতে বন্ধুর পুরাতন ভৃত্য সংবাদ দিয়াছিল। তখন  
সে এক প্রকার অচেতন অবস্থায়। বন্ধু তাহার মাতাকে লইয়া  
ফিরিয়া আসিতে পারে নাহি। সেখানেও বৃদ্ধার জীবন ও মৃত্যু  
লইয়া সংগ্রাম চলিতেছিল।

## যমুনাধারা

বিমলবাবু ডাক্তার ডাকিয়া তাহার চিকিৎসার ব্যবস্থা করিয়াছিলেন। নিয়মিত পরিচর্যা ও গুশ্ৰুধারাজ্ঞ্য বিমল বাবুর মাতা, পত্নী ও সহোদরা পালা করিয়া তাহাকে মৃত্যুর মুখ হইতে কাড়িয়া লইয়া-ছিলেন। অনেক দিন এই ভাবে তাহার কাটিয়াছিল। সাংঘাতিক নিউমোনিয়া রোগ হইতে, এমন প্রাণঢালা, অক্লান্ত গুশ্ৰুধা ব্যতীত, তাহার পরিত্রাণের কোন উপায়ই ছিল না, ইহা সে পরে বিজ্ঞ চিকিৎসকের নিকট অবগত হইয়াছিল।

তখন সুষমার মাত্র পঞ্চদশ বর্ষ বয়ঃক্রম। মাতা ও কন্যা অধিকাংশ সময় তাহার রোগশয্যা-পার্শ্বে থাকিতেন। বিমল বাবু সহোদরার সহিত রাত্ৰিকালে তাহার সেবা করিতেন।

তিন সপ্তাহ পরে যখন রোগমুক্ত হইয়া সে পথ্য পাইয়াছিল, সেই সময় তাহার বন্ধু কাশীধাম হইতে ফিরিয়া আসিয়াছিল। ভাল করিয়া শরীরে বলাধান হইতে আরও এক মাস সময় লাগিয়াছিল।

এই সময়ে বিমল বাবু ও তাঁহার পরিবারবর্গের সহিত ললিতের ঘনিষ্ঠ পরিচয় ঘটে। বিমল বাবু তাহারই স্বজাতি ও স্বশ্রেণীর লোক। ভগিনীর জ্ঞ্য তিনি সুপাত্রে সন্ধান করিতেছেন।

ললিত বাঞ্ছনীয় সুপাত্র। বিমল বাবু ললিতের বন্ধুর মারফৎ তাহার কাছে সুষমার বিবাহের প্রস্তাব উত্থাপন করিয়াছিলেন। সুষমা গোরী না হইলেও তাহার চক্ষু, কর্ণ, নাসিকা এবং অঙ্গপ্রত্যঙ্গের গঠন-পারিপাট্য তাহাকে সুন্দরী বলিয়া নিশ্চয়ই ঘোষণা করিবে।

## যমুনাধারা

কিন্তু ললিতের মন তখন পশ্চিম উপকূলে—সাগরপারে যাইবার জন্ত উন্মুখ। সেখান হইতে সে যখন উচ্চতম উপাধি লইয়া ফিরিবে তখন তাহার 'গৃহ-লক্ষ্মীর পদ যিনি অলঙ্কৃত করিবেন, শিক্ষায় ও দীক্ষায় তিনি তাহার উপযুক্ত হইবেন, ইহাই ছিল তাহার কল্পনা।

সুখমা তাহার মাতা ও ভ্রাতার কাছে লেখাপড়া করিতেছিল। সে শিক্ষা বর্তমান যুগের উপযোগী বলিয়া ললিত অনুমান করিতে পারে না। অল্পশিক্ষিতা পত্নী লইয়া তাহার গার্হস্থ্য জীবন সুখকর হয় ত হইবে না। অবশ্য এই তরুণীর প্রাণপাত সেবা তাহাকে মুগ্ধ ও কৃতজ্ঞ করিয়াছিল। কিন্তু কৃতজ্ঞতার ঋণ শোধের জন্ত সমস্ত জীবনকে আড়ষ্ট ও বিপন্ন করা যে যুক্তিসঙ্গত, ইহা সে কোনমতেই স্বীকার করিয়া লইতে পারে নাই। তাই বন্ধুর কাছে সুখমার সাধারণ শিক্ষার অল্পতার ইঙ্গিত করিয়াছিল। বিশেষতঃ শীঘ্রই সে বিলাতে যাইবে বলিয়া বিবাহ করিতে প্রস্তুত নহে, তাহাও জানাইয়াছিল। তাহার মনের কথা আভাসে ইঙ্গিতে বিমলবাবুর নিকট প্রকাশ পাইবার পর, সে পক্ষ হইতে আর কোনও উচ্চ-বাচ্য হয় নাই। তবে এইটুকু সে লক্ষ্য করিয়াছিল, ইহার পর হইতে স্বল্পভাষিনী, কিশোরী সুখমা তাহার সান্নিধ্য সম্পূর্ণভাবে এড়াইয়া চলিতে আরম্ভ করিয়াছিল। পূর্বে ললিত যখন বিমলবাবু ও তাঁহার জননীর সঙ্গে বসিয়া নানা কথার আলোচনা করিত, তখন মাঝে মাঝে সুখমা সেখানে উপস্থিত হইত; কিন্তু কথাটা প্রকাশ পাইবার পর হইতে একবারও সুখমা তাহার নেত্রপথে পড়ে নাই।

## যমুনাধারা

তার পর সে সুস্থশরীরে কলিকাতায় ফিরিয়া যায়। সেই সময়ে মহারাজ ভবতোষের সহিত তাহার পরিচয় ঘটে। তাঁহার পারিবারিক চিকিৎসকের পদলাভও ঘটে। তিনিই ললিতকে বুঝাইয়া দিয়াছিলেন, অকারণ বিলাতে গিয়া সময় ও অর্থ ব্যয় করার অপেক্ষা ভাল করিয়া এ দেশেই চিকিৎসা করিলে সে উন্নতি করিতে পারিবে। তাই সে বিলাত-গমনের সংকল্প ত্যাগ করে।

চলচ্চিত্রের দৃশ্যগুলি মানসনেত্রের সম্মুখ হইতে মিলাইয়া গেল। ললিত চাহিয়া দেখিল, মাঠ ও পথ প্রদোষাক্রমকারে অস্পষ্ট হইয়া উঠিয়াছে। অদূরে বশিদির ষ্টেশন দেখা যাইতেছে। চলিতে চলিতে সে ষ্টেশনে আসিয়া পৌঁছিল। আর কিছুক্ষণ পরে আকাশে চন্দ্রোদয় হইবে। চন্দ্রালোকিত পথে সে বাসায় ফিরিবে।

কিন্তু চারি বৎসর পূর্বের স্মৃতি আজ তাহার মনকে এমনভাবে বেদনা দিতেছে কেন? সুষমাকে সে সুশিক্ষিতা নহে বলিয়া প্রত্যাখ্যান করিয়াছিল, ইহা কি তাহারই প্রতিক্রিয়া? কিন্তু সত্যি এই তরুণীর জন্ত সে কোনও দিন, যৌবনধর্মের উন্মদ আগ্রহ অনুভব করিতে ত পারে নাই! যমুনার জন্ত তাহার সমগ্র চিত্ত বেরূপ অধীর আগ্রহের উন্মাদনার চঞ্চল হইয়া উঠে, কোনও দিন সুষমার জন্ত তেমন আবেগ সে মুহূর্তের জন্তও অনুভব করিয়াছে কি?

ষ্টেশনে তখন অনেক নর-নারী প্লাটফর্মের উপর পাদ-চারুণা করিতেছিল। একখানি কলিকাতাগামী গাড়ী তখনই আসিবে। গুভারব্রিজের উপর সে উঠিয়া গেল। সেখানে দাঁড়াইয়া সে দিগড়িয়া পাহাড়ের মসীকৃষ্ণ স্তূপের দিকে চাহিয়া রহিল। বিমল বাবু,

## যমুনাধারা

সুশীলচন্দ্র ও মেয়েদের লইয়া যখন একটু বেলা থাকিতে বেড়াইতে বাহির হইয়াছিলেন, তখন ললিত আপনার ঘরে একখানি উপগ্রাস লইয়া পড়িবার ভাণ করিতেছিল। সুশীল যখন তাহাকে বেড়াইতে বাহির হইবার কথা বলিয়াছিল, সে জানাইয়াছিল, আরও খানিক পরে সে বাহির হইবে, এখন নহে।

সুখমার সঙ্গ এড়াইবার জন্মই কি তাহার মন, যমুনার সঙ্গ-লাভের গোপন প্রলোভনকেও পরাজিত করিয়াছিল? ওভার বিজের উপর দাঁড়াইয়া এই প্রশ্নটি পুনঃ পুনঃ তাহার মনের মধ্যে সমুদিত হইতে লাগিল। কেন? এই তরুণীকে এড়াইবার জন্ম এই যে তাহার সঙ্কোচ, ইহার হেতু কি? লজ্জা? দুর্ভাগ্য, না অন্য কিছু?

তাহাকে প্রকারান্তরে সে উপেক্ষাভরে প্রত্যাখ্যান করিয়াছিল, তাহার সম্মুখে দাঁড়াইতে কি সত্যই তাহার মন শঙ্কিত ও কুণ্ঠিত হইয়া পড়িতেছে না? এই তরুণী তাহাকে অনগ্রমনে সেবা-পুশ্রুষা করিয়া কঠিন ব্যাধি হইতে মুক্ত করিয়াছিল। ভদ্র, সম্ভ্রান্ত ঘরের এই তরুণী যে কোনও শিক্ষিত ধনী সুপাত্রেয় স্পৃহণীয়, ; কিন্তু তথাপি সে তাহাকে বিবাহ করিতে অনুরুদ্ধ হইয়াও স্বীকার করিতে পারে নাই। এত কাল পরে সেই তরুণীর সহিত আকস্মিকভাবে তাহাকে একই গৃহে অবস্থান করিতে হইতেছে। সুশীলচন্দ্রের কাছে সে আজই জানিতে পারিয়াছে যে, বাড়ীতে পড়িয়া ম্যাটিকুলেশন পরীক্ষায় উত্তীর্ণ হইয়া, সুখমা বৃন্দাবনের প্রেম মহাবিদ্যালয় হইতে দর্শন শাস্ত্রে উচ্চ উপাধি অর্জন করিয়াছে।

## যমুনাধারা

কলিকাতা বিশ্ববিদ্যালয়ের বি,এ, উপাধির অপেক্ষা সে উপাধির মূল্য  
অল্প নহে। অশিক্ষিতা বলিয়া বাহাকে সে মনে মনে উপেক্ষা  
করিয়াছিল, বিদ্যায় সে ত তাহার অপেক্ষা হয় নহে।

শুধু প্রত্যাখ্যানের লজ্জাই কি তাহাকে সুধমার সঙ্গ এড়াইয়া  
চলিবার পথে চালিত করিতেছে? কিন্তু যমুনা? তাহার সঙ্গলাভের  
অবকাশ মুহূর্তের জন্ত পাইলেও যে সে ধন্ত হইয়া যায়! যমুনা হয়  
ত কথাপ্রসঙ্গে জানিতে পারিবে, সুধমার সহিত এক দিন তাহার  
বিবাহের প্রস্তাব হইয়াছিল। তখন—তখন—

“ও কে—ললিত বাবু না কি?”

সুশীলের কণ্ঠস্বরে চমকিত হইয়া ললিত মুখ ফিরাইল।

পূর্বগগনে তখন চন্দ্রোদয় হইয়াছিল। বিমলচন্দ্র বলিলেন,  
“এখানে দাঁড়িয়ে কি হচ্ছে, ললিত বাবু?”

“এমনি দাঁড়িয়ে দেখছিলাম। আপনারা কোথায় গিয়েছিলেন?”

“চ্যাটার্জির ফুলের বাগানে। ফুলের গাছ বায়না দিয়ে  
এলাম।”

ললিতচন্দ্র দেখিল, দুই জন তরুণী তাহাদিগকে অতিক্রম করিয়া  
অগ্রসর হইয়াছে। তাহাদের কেহই একবারও তাহার দিকে দৃষ্টিপাত  
করিল না। শুধু পশ্চাদ্বর্তিনী মণিমালা একবার ফিরিয়া চাহিয়া  
যমুনা ও সুধমার অনুবর্তিনী হইল। তাহার মাসীমাতা সকলের  
পশ্চাতে আসিতেছিলেন।

একটা চাপা দীর্ঘশ্বাস ফেলিয়া ললিত বলিল, “এখন বাসায়  
ফিরবেন ত?”



## যমুনাধারা

সুশীল বলিল, “হাঁ, ট্রেনেই যাব। আপনিও আসুন।”

ললিতা বলিল, “আপনারা গাড়ীতে যান। চার মাইল পথ এই চাঁদের আলোতে আমি হেঁটে যেতে চাই।”

বিমল বলিলেন, “সুশীল, চল না, আমরাও হাঁটা পথে চলি।”

সুশীল বলিল, “আমার আপত্তি নেই। আচ্ছা ওদের মতটা জেনে নেওয়া যাক্।”

সুশীল. একটু দ্রুতপদে চলিয়া অগ্রবর্তিনী মহিলা-দিগের সন্নিহিত হইল। তার পর ফিরিয়া দাঁড়াইয়া বলিল, “যমুনা ও সুযমা ট্রেনেই যেতে চায়, দাদা। মাসীমাও তাই বলছেন।”

বিমল হাসিয়া বলিলেন, “তা হ'লে আর উপায় নেই। ললিতাবাবু, চলুন না গাড়ীতে!”

ললিতাচন্দ্র মৃদুকণ্ঠে বলিল, “আপনারা পরিশ্রান্ত, গাড়ীতেই যান। আমি হেঁটেই যাব, মুক্ত আকাশ বড় ভাল লাগছে।”

আর বাক্যব্যয় না করিয়া তাঁহারা চলিয়া গেলেন। ললিতাচন্দ্র ষ্টেশন হইতে নামিয়া হাঁটা-পথ ধরিল।

## আঠার .

প্রতিদিনের গ্রাম ললিত একাই বেড়াইতে বাহির হইয়াছিল। সুশীল অবশ্য প্রত্যহই তাহাকে আহ্বান করিত ; কিন্তু সে বুঝিয়াছিল যে, যমুনা ও সুধমা, তাহার সঙ্গে এড়াইবার জন্ত কি না, তাহা বলা যায় না, তাহার সান্নিধ্যে আসিবার তেমন আগ্রহ প্রকাশ করে না। সম্ভবতঃ দীর্ঘযুগের সংস্কার, এখনও অনাত্মীয় পুরুষের সহিত মেলামেশা করিবার পথে ব্যবধান রচনা করিয়া রাখিয়াছিল। এক দিন সে তাহাদের সঙ্গে ভ্রমণে বাহির হইয়াছিল, কিন্তু যমুনা ও সুধমা দ্রুতপদে দল ছাড়াইয়া অগ্নিদিকে বেড়াইতে চলিয়া গিয়াছিল, মণিমালার জন্তও অপেক্ষা পর্য্যন্ত করে নাই। এ দৃশ্য অণ্ণে লক্ষ্য না করিলেও ললিতের দৃষ্টি এড়ায় নাই। তাহার পর হইতে ললিত কোন দিনই মেয়েদের সহিত বেড়াইতে যায় নাই। অবশ্য তাহার মনের মধ্যে এজন্ত প্রবল সংঘর্ষ উপস্থিত হয় নাই, এমন নহে। কিন্তু ললিত ধৈর্য্য ধারণ করিতে জানিত।

বিমল বাবু দুই দিন পরেই পাটনা চলিয়া গিয়াছিলেন। তাহার কোনও অতিরিক্ত প্রশ্নে ললিত আর আপনাকে বিপন্ন মনে করে নাই। সে বিবাহ করিয়াছে কি না, এ বিষয়ে কোনও প্রশ্ন তাহার কাছে উত্থাপনের অবকাশও বিমল বাবু গ্রহণ করেন নাই।

## যমুনাধারা

পূরণদহের দক্ষিণ সীমায় একটি প্রস্তর-স্তূপের উপর অনেকক্ষণ বসিয়া থাকিবার পর ললিতচন্দ্র সেখান হইতে উঠিয়া দাঁড়াইল। আর দুই দিন পরই ত্রীষ্টমাসের উৎসব আরম্ভ হইবে, এ জন্ত প্রচণ্ড শীতও পড়িয়াছিল। আজ দশ দিন সে কলিকাতা ছাড়িয়া আসিয়াছে কিন্তু যে আশা তাহাকে প্রলুব্ধ করিয়া এখানে আকর্ষণ করিয়া আনিয়াছে, সে আশা কি কোনও দিন সার্থক হইবে না ?

যমুনাকে গৃহলক্ষ্মীর পদে বরণ করিয়া লইবার জন্ত তাহার সমগ্র চিত্ত কত অধীর, তাহা অন্তর্যামীই জানেন। অথচ সে কথাটা প্রকাশ করিয়া বলিবার মত কোনও সুযোগ এ পর্য্যন্ত আসিল না। বলি বলি করিয়াও সুশালচন্দ্রকে সে তাহার একাগ্র কামনার কথা জানাইতে পারে নাই। ভগিনীকে পুনরায় পরিণীতা হইতে দেখিলে সুশীল আনন্দ ও তৃপ্তি লাভ করিবে, তাহার আভাস সে বহুবারই পাইয়াছে, কিন্তু পাত্র সম্বন্ধে কোনও ইঙ্গিতই সুশীলের নিকট হইতে সে পায় সাই।

পথ চলিতে চলিতে সে যতীন বাবুর বাড়ীর কাছে আসিয়া দাঁড়াইল। বাহিরের ঘরে উজ্জ্বল আলো জলিতেছে, বাতায়নের ফাঁক দিয়া তাহার রশ্মি নির্গত হইতেছে। একটি গানের স্বর বাতাসে ভাসিয়া আসিতেছে। স্বর সুস্পষ্ট এবং সুন্দর। পুরুষের কণ্ঠ ?

যতীন বাবু কি গান করিতেছেন ? সে মহারাজের নিকট শুনিয়াছিল, যতীন বাবু কণ্ঠ ও যন্ত্রসঙ্গীতে বিশেষ নিপুণ। কিন্তু যতীন্দ্রনাথের গান, সে কোনও দিন শুনে নাই।

## যমুনাধারা

ফটক খোলাই ছিল। সে বিস্মৃত উত্তানপথ অতিক্রম করিয়া বাড়ীর কাছে আসিল। লীলায়িত কণ্ঠস্বরে “কি মধুই করিয়া পড়িতেছে!—

“মাঝে মাঝে তব দেখা পাই

চিরদিন কেন পাই না!”

গমক, মীড় ও মূর্ছনার পরিপূর্ণ কণ্ঠ হইতে সুদাস্রোত নির্গত হইতেছিল। ললিত নিঃশব্দে বাহিরে দাঁড়াইয়া দাঁড়াইয়া সেই গীতধ্বনি শুনিতে লাগিল। গায়ক যেন গানের সুরে সুরে ভাবরাজ্যের দ্বার মুক্ত করিয়া শ্রোতার চিত্তেও অনুরূপ স্পন্দনানুভূতি জাগাইয়া তুলিতেছিল।

“কেন মেঘ আসে হৃদয়-আকাশে—

তোমাতে দেখিতে দেয় না!”

এ সঙ্গীত সে কত বার পাঠ করিয়াছে, অথচ কণ্ঠে গীত হইতেও শুনিয়াছে। কিন্তু এমন অনুভূতি ত কোনও দিন তাহার অন্তরে আন্দোলন তুলে নাই! গায়ক যেন তাহারই অন্তরের ভাবকে রূপ ও মূর্তি দিতেছে!

গানের সুরে মুগ্ধ হইয়া সে নিশ্চল মূর্তির মত দাঁড়াইয়া রহিল। তাহার মানসদৃষ্টির সম্মুখে যেন নূতন জগৎ ভাসিয়া উঠিতেছিল। গান ক্রমে শেষ হইয়া আসিতেছিল, ললিতও এক এক পা করিয়া ঘরের দিকে অগ্রসর হইতেছিল। ঘরের মধ্যে অথ কেহ আছে, এমন অনুমান ললিতের হইল না। কারণ, সমগ্র কক্ষটি শুধু সঙ্গীত-শব্দ-তরঙ্গ ব্যতীত অথ কোনও প্রকার শব্দের সংস্রববর্জিত। শীতের

## যমুনাধারা

প্রচণ্ডতায় জানালাগুলি বন্ধ ছিল, দরজার উপর মোটা পর্দা  
ছলিতেছিল।

ধীরে ধীরে পর্দা তুলিয়া সে যখন ঘরের মধ্যে প্রবেশ করিল, তখন  
গান থামিয়া গিয়াছিল। কিন্তু গৃহের বাতাস তখনও সঙ্গীতের ছন্দ  
ও সুরের ঝঙ্কার বহন করিয়া আনন্দে যেন শিহরিয়া উঠিতেছিল।

ঘরের মধ্যে প্রবেশ করিয়াই সে উচ্ছ্বসিত-কণ্ঠে বলিয়া উঠিল,  
“যতীনবাবু, এত চমৎকার আপনি গাইতে পারেন, সে অভিজ্ঞতা  
আমার ছিল না।”

বলিতে বলিতে চকিত দৃষ্টিপাতে সে দেখিতে পাইল, অন্তঃপুরে  
খাইবার দ্বার-সন্নিধানে তিনটি নারী-মূর্তি, তরুণী উপবিষ্ট। তাহাদের  
আনন্দ-বিস্ময়-বিহ্বল দৃষ্টিতে সুরের রূপ যেন মূর্তি ধরিয়া রহিয়াছে।

যতীন্দ্রনাথ ললিতকে আসন গ্রহণ করিতে বলিল। সূশীলের  
পার্শ্বে উপবেশন করিয়াই সে অপাঙ্গে দ্বার অভিমুখে চাহিয়া দেখিল।

তিনটি তরুণীর মধ্যে মণিমালার প্রস্থানপথবর্তিনী মূর্তি সে  
দেখিতে পাইল। অপর দুইজন ইতিমধ্যে কখন যে উঠিয়া গিয়াছে,  
তাহা সে লক্ষ্য করিতে ও পার নাই।

একটা অসহ্য বেদনা তাহার সুমন্ত ধমনীর শোণিত-ধারাকে  
ব্যগিত মথিত করিয়া দিল। তাহার অন্তর যেন বাথার যন্ত্রণায়  
কাটিয়া পড়িবার উপক্রম করিল।

এতক্ষণ যাহা সহজসাধ্য ছিল, অনার্যীয় পুরুষের সান্নিধ্য  
অবাঞ্ছনীয় বলিয়া মনে হয় নাই, তাহার আগমন মাত্রই সে ব্যবস্থা  
রূপান্তর গ্রহণ করিল! কিন্তু কেন?

## যমুনাধারা

চিত্তার সূত্র ধরিয়া অগ্রসর হইতে তাহার মন যেন তাহাকে নিষেধবাণী শুনাইতেছিল। যতীন বাবু ও সুলীলচন্দ্রের সন্মুখে তাহার শোচনীয় মানসিক ব্যথার কোন ইঙ্গিতই প্রকাশ পাইতে দেওয়া শোভন হইবে না। ব্যবহারিক জগৎ তাহার নিকট যাহা পাইবার প্রত্যাশা করে, সামাজিক মানুষ হিসাবে তাহা তাহাকে দিয়াই চলিতে হইবে। অন্তর ব্যথায় বিদীর্ণ হইতে চাহিলেও মুখে হাসি ফুটাইয়া অবস্থার উপযোগী আলোচনায় যোগ দেওয়া দরকার। সামাজিক মানুষকে অদৃষ্টের এই বিড়ম্বনা সহ্য করিতেই হইবে। উপায় নাই, উপায় নাই!

সুলীল বলিল, “আপনার কণ্ঠ এত মিষ্ট, গানের রাগ-রাগিণীর উপর আপনার এমন অধিকার আছে জানতাম না, যতীন বাবু! সার্থক আপনার সাধনা!”

আপনাকে সংযত করিয়া লইয়া ললিত মুখে হাসি ফুটাইয়া বলিল, “রাস্তা দিগে চলেছিলুম। হঠাৎ গানের মধুর ঝঙ্কার আমাকে টেনে নিয়ে এল। বাইরে দাঁড়িয়ে দাঁড়িয়ে শুন্লাম। সত্যি তখন এমন শক্তি ছিল না, ঘরের মধ্যে ঢুকে পড়ি।”

হাসিয়া যতীন্দ্রনাথ বলিল, “এক জন সন্ন্যাসীর কাছে কয়েকটা রাগিণী আদায় করবার সুযোগ ও সৌভাগ্য আমি পেয়েছিলুম, ললিত বাবু। অবশু ছেলেবেলা থেকে গান আর ব্যায়াম এই দুটির উপর ঝোঁক ছিল। বাবা যদি হঠাৎ মারা না যেতেন, তা হ’লে গানের চর্চাটা আশ মিটিয়ে করতে পারতুম।”

## যমুনাধারা

..সুশীল বলিল, “সন্ন্যাসীর কাছে গান শিখেছিলেন বলছেন, কোথায় তাঁকে শেখিয়েছিলেন ?”

“এইখানে—এই দেওঘরে। তখন আমার বয়স আঠার। অনেক কষ্টে, তাঁকে ত্রিকূট পাহাড় হ’তে আমার বাড়ীতে ধ’রে এনেছিলাম। তাঁর কাছে শুনেছিলাম, ইন্দ্রিয়জয়ী না হ’তে পারলে সঙ্গীত-লক্ষ্মীর চরণ-দর্শন মেলে না। কঠোর সংযম না থাকলে দেবীর রূপাও লাভ করা চলে না।”

সুশীল অবাক-বিস্ময়ে যতীন্দ্রনাথের দীপ্ত মুখমণ্ডলে দৃষ্টি নিবদ্ধ করিল।

• ললিত এতক্ষণ মাথা নত করিয়া কি ভাবিতেছিল। সে বলিল, “আপনি সত্যই সঙ্গীত-লক্ষ্মীর দয়া লাভ করেছেন।”

কিন্তু সে অনুভব করিল, এত দিন যতীন্দ্রনাথ সম্বন্ধে কোনও কিছু আলোচনা করিতে হইলে সে যেকোন আন্তরিক অনুরাগ, উৎসাহ এবং আগ্রহ অনুভব করিত, আজ যেন তাহার একান্ত অভাব ঘটিয়াছে। অত্যন্ত মৌখিক, আন্তরিকতা-বর্জিত লোকাচার রক্ষা করিয়াই সে আজ মস্তব্য প্রকাশ করিতেছে।

কথাটা মনে হইবামাত্র সে অন্তরে শিহরিয়া উঠিল।

এমন সময় সতু ঘরের দ্বারপথে দাঁড়াইয়া বলিল, “মাসীমারা এখন বাড়ী যাবেন বলছেন।”

সুশীল ঘড়ীর দিকে চাহিয়া বলিল, “তা হ’লে আজ উঠি, যতীন বাবু। ভাল কথা, কা’ল আমাদের ওখানে পায়ের ধুলো দেবেন? আমার বোন যমুনা নিজে রেখে আপনাকে খাওয়াতে চায়।”

## যমুনাধারা

যতীন্দ্র বলিল, “ওভাবে ব’লে আমাকে অপরাধী করবেন না ।  
কিন্তু আমি নিরামিষাণী ।”

“যমুনা তা জানে । সে নিজেও—”

বাধা দিয়া যতীন্দ্রনাথ বলিল, “জানি । আচ্ছা, আমি  
নিশ্চয় যাব ।”

“থোকাকেও নিয়ে যাবেন ।”

“আচ্ছা” বলিয়া সঙ্গে সঙ্গে যতীন্দ্রনাথও উঠিয়া দাঁড়াইল ।





## উনিশ

নির্জন দ্বিপ্রহর রজনীতে ললিত তখনও শয়্যালীন হইতে পারে নাই।

টেবলের উপর আলো জলিতেছিল। পড়িবার চেষ্টা করিয়াও সে কোনও মতে গ্রন্থের পাতায় মন নিবিষ্ট করিতে পারে নাই। খোলা বই তেমনই ভাবে টেবলের উপর অযত্নে পড়িয়া রহিয়াছে।

ঘরের মধ্যে পাদচারণা করিতে করিতে ললিত থমকিয়া দাঁড়াইল। তাহার ললাটের শিরাগুলি ঈষৎ স্ফীত হইয়া উঠিল। একটা অসহনীয় যন্ত্রণা চাপিয়া রাখিবার চেষ্টা তাহার ভাবভঙ্গিতে প্রকাশ পাইতেছিল বৈ কি।

মানুষ শিষ্টাচারে আপনাকে যতই অভ্যস্ত করিয়া তুলুক ; শিক্ষা ও জ্ঞানের আলোক তাহার মনকে যতই উদ্ভাসিত করিয়া রাখুক ; উদারতা, মহত্ত্ব এবং উচ্চ জীবন-যাপন-প্রণালীর সহিত যতই ঘনিষ্ঠভাবে পরিচিত হউক ; মনুষ্য-জন্মের সঙ্গে সঙ্গে তাহার জন্মগত প্রকৃতির দুর্বলতাকেও মানুষ অগ্রত রাখিয়া আসিতে পারে কি ?

কঠোরতম সংযম—প্রকৃতির বিরুদ্ধে অভিযান করিয়া, দীর্ঘ তপস্যায় যাহা অর্জন করিতে হয়, সাধারণ ভোগবিলাসের জীবনযাত্রায় তাহা সম্ভবপর নহে। ললিতচন্দ্রও মনুষ্য-প্রকৃতির

## যমুনাধারা

সহজাত প্রভাব হইতে মুক্ত হইতে পারে নাই। তজ্জগৎ কি সে অপরাধী হইবে ?

যমুনার প্রতি তাহার অন্তরের যে প্রবল আগ্রহ পরিপুষ্ট হইয়া উঠিয়াছিল, প্রথম হইতেই তাহাতে কোনও বাধা উপস্থিত হয় নাই ; বরং স্মৃশীলের কথার আভাসে তাহার মনে আশারই সঞ্চার হইয়াছিল—তাহার আগ্রহ অনুকূল অবস্থার অবলম্বন পাইয়া আরও উদগ্ৰ হইয়া উঠিয়াছিল।

কিন্তু দেওঘরে আসিবার পর হইতেই সে ঘটনাপরম্পরায় বৃদ্ধিতে পারিয়াছে, যমুনা সর্বপ্রথমে তাহাকে এড়াইয়া চলিয়াছে, অথচ যতীন্দ্রনাথ সম্বন্ধে সে আদৌ উদাসীন নহে। অপরিচিত এই যুবকের কাছে আসিতে তাহার যে পরম আগ্রহ আছে, তাহার পরিচয় এই কয় দিনের মধ্যে সে কি বহুবার পায় নাই ?

সে বহু গ্রন্থে পড়িয়াছে, নারী বলিষ্ঠপ্রকৃতি পুরুষের অনুরাগিনী হইয়া থাকে। যতীন্দ্রনাথ অসাধারণ শক্তিশালী, তাহার দৈহিক সৌন্দর্য্যও সমধিক, তাহা ছাড়া সে উচ্চশিক্ষিত, পণ্ডিত, সাহিত্যিক এবং সুকণ্ঠ সঙ্গীতশাস্ত্রলিখারদ। যমুনা তাহাকে সে দিন স্বয়ং রাঁধিয়া সম্বন্ধে নিজের হাতে পরিবেষণ করিয়া থাওয়াইয়াছে। তাহার কাছে বসিয়া গান শুনিতে—আলাপ আলোচনা করিতে যমুনার তীব্র আগ্রহ সম্বন্ধে ভ্রান্ত ধারণার কোনও অবকাশ আছে কি ?

এই সকল দৃষ্টান্ত কি প্রমাণ করে ? যমুনা কি যতীন্দ্রনাথের অনুরাগিনী নহে ?

চিন্তামাত্রেরই ললিত অধীরভাবে পদচারণা আরম্ভ করিল।

## যমুনাধারা

যতীন্দ্রনাথ কি তাঁহার প্রতিযোগী? বিপত্তীক যুবক তাহার  
পুলের জগু কি হাতীর সন্ধান করিতেছে?

অসহ! অসহ!—

যাহার একবার বিবাহ হইয়াছিল, পুত্র বিঘ্নমান রহিয়াছে,  
পুনরায় বিবাহ করিবার তাহার কি অধিকার আছে? দ্বিতীয়বার  
পরিগ্রহ কি বর্তমান যুগের সভ্য মানবের পক্ষে সম্ভব ব্যবহার?  
যমুনার মত সুন্দরী তরুণী কেমন করিয়া দোজবরে আত্মসমর্পণ  
করিতেই বা পারে? সুশীলচন্দ্রই বা ইহাতে কি প্রকারে অনুমোদন  
করিবে?

অকস্মাৎ ললিত স্তম্ভভাবে দাঁড়াইল। তাহার অন্তরতম প্রদেশ  
হইতে কে যেন বলিয়া উঠিল, চমৎকার যুক্তি ত! যমুনা যদি  
পরলোকগত স্বামীকে বিস্মৃত হইয়া দ্বিতীয়পতি গ্রহণের যত্ন ব্যস্ত  
হইয়া থাকে, তবে যতীন্দ্রনাথের পক্ষেই বা তাহা অস্বাভাবিক ও  
অসম্ভব হইবে কেন?

ঠিক কথা। যুক্তির দিক দিয়া ইহাতে প্রতিবাদ করিবারই বা  
কি আছে?

নারী যদি দ্বিতীয়বার বিবাহ করিতে পারে, পুরুষই বা তাহা  
পারিবে না কেন?

তুই বাহু টেবলের উপর রাখিয়া ললিত তাহার বেষ্ঠনের মধ্যে  
মস্তক রাখিল। গভীর নৈরাশ্রে তাহার হৃদয় পূর্ণ হইয়া গেল।

বহুক্ষণ এইভাবে অবস্থান করিবার পর সে সহসা সোজা হইয়া  
বসিল।

## যমুনাধারা

না—এমন ভাবে থাকিলে চলিবে না। যমুনাকে সে অস্ত্রের অঙ্কলক্ষী হইতে কখনই অবকাশ দিবে না। যমুনা শক্তি প্রয়োগ করিয়া সে ইহাতে বাধা দিবে।

আদিম প্রবৃত্তি বহু সহস্র বৎসরের প্রভাবেও সম্ভ্রান্তরূপেই মানব-মনে আত্মপ্রকাশ করে। কি বিরাট ইহার প্রভাব! কি অপরিবর্তনীয় ইহার রূপ!

পৌষের প্রচণ্ড শীত অগ্রাহ করিয়া ললিত পশ্চিমদিকের একটা বাতায়ন খুলিয়া দিল। শরীরের উত্তাপ রুদ্ধগৃহের মধ্যে যেন তাহাকে অতিষ্ঠ করিয়া তুলিয়াছিল।

বাতায়নপথে তুষারশীতল নৈশবায়ু তাহার ললাটকে স্নিগ্ধ প্রলেপে শীতল করিয়া দিল। অল্পক্ষণ পরেই সে শীত বোধ করিতে লাগিল। জানালা বন্ধ করিয়া দিয়া সে শয্যার উপর আসিয়া বসিল।

ধীরে ধীরে তাহার বিচারবুদ্ধি ফিরিয়া আসিতে লাগিল।

দীপ্ত আলোকাধারের দিকে চাহিয়া চাহিয়া একটা দীর্ঘশ্বাস তাহার নাসারন্ধ্র পথে বাহির হইয়া গেল।

যমুনা যদি যতীন্দ্রনাথের পত্নী হইতে চাহে, যতীন্দ্র যদি যমুনাকে গ্রহণ করিতে অভিলাষী হয়, সুশীল যদি এ বিবাহে অনুমোদন করে, তবে কি করিয়া সে তাহাতে বাধা দিবে?

দৃষ্টবুদ্ধি মানুষ মিথ্যার আশ্রয় লইয়া, মানুষের মনে বিদ্বেষ ও ঘৃণার নরককুণ্ড রচনার জন্ত যে প্রণালীতে চেষ্টা করে, ভদ্রসন্তান হইয়া তাহাকে কি সেই পথ অবলম্বন করিতে হইবে?

বাঃ! চমৎকার শিক্ষা এতদিনে সে আয়ত্ত করিয়াছে ত!

## যমুনাধারা

শয্যার উপর লালিত দেহ এলাইয়া দিল ।

কিন্তু বিহ্বিত রজনীতে সে যে আশঙ্কা করিয়া শ্রান্ত হইয়া পড়িয়াছে, তাহা যদি তাহার শুধু অনুমানমাত্রই হয় ? বৃথা সন্দেহে সে যে অশ্রু হইয়া উঠে নাই, তাহাই বা কে বলিল ?

অতি মৃদু আশার আলোক আবার তাহার অন্তরকে যেন আলোকিত করিয়া তুলিল ।

হাঁ, তাহাই যেন সত্য হয় । সে যদি যমুনাকে না-ও পায়, যমুনা যেন যতীন্দ্রকে বিবাহ না করে—যতীন্দ্রও যেন যমুনাকে লাভ করিবার চেষ্টা না করে ।

মানুষ যাহাকে কামনা করে, সে যদি তাহার পক্ষে দুর্বলই হয়, তবে যাহাতে সে আর কাহারও না হয়, ইহাই কি সাধারণ মানবাত্মার মনোগত অভিপ্রায় ?

পার্শ্বের বৈঠকখানা-ঘরে ঘড়ীতে টং টং করিয়া দুইবার শব্দ হইল । লালিত সচকিত হইয়া উঠিল । না, আর এমন ভাবে জাগিয়া থাকা সম্ভব নহে । সকালবেলা তাহার আননে সমস্ত রাত্রি-জাগরণের ক্লান্তি দেখিয়া যদি সুশীল কোনও প্রশ্ন জিজ্ঞাসা করে, তাহা হইলে তাহাকে মিথ্যার আশ্রয় লইয়া কৈফিয়ৎ দিতে হইবে । না, তাহা সে পারিবে না । মিথ্যাভাষণে সে কোনও দিন অভ্যস্ত নহে । সে তাহা পারিবে না ।

কুঁজা হইতে এক গ্লাস জল ঢালিয়া লালিত পান করিল । তার পর আলো নিভাইয়া দিয়া সে শয্যায় শয়ন করিল । আর কোনও চিন্তার প্রশ্ন সে দিবে না, সঙ্কল্প করিয়া সে নয়ন নিম্নীলিত করিল ।

## কুড়ি

“বা ! আজকের আকাশটা কি চমৎকার, ভাই !”

নন্দন পাহাড়ের উপর তখন রোদ্দ বড় মিঠা লাগিতেছিল ।  
নির্মল আকাশে কোথাও মেঘের চিহ্নমাত্র নাই, শুধু গাঢ় নীলিমা-  
বিস্তার ।

সুষমা বলিল, “কিন্তু ভাই যমুনাধারা, এটাকে পাহাড় বলা,  
পাহাড়ের অপমান নয় কি ?”

যমুনা হাসিয়া বলিল, “ঠিক বলেছ, ভাই ।”

আজ সকালে উঠিয়াই দুইটি তরুণী বৃদ্ধ হিন্দপাল সিংকে সঙ্গে  
লইয়া বেড়াইতে বাহির হইয়াছিল । মণিমালা স্বামীর চা-র পর্ব  
শেষ হয় নাই বলিয়া তাহাদের সঙ্গিনী হইতে পারে নাই ।

কিছু দূরে উপবিষ্ট বৃদ্ধ দারবানের সুপক্ক গুন্ফ এবং প্রকাণ্ড  
পাগড়ী-শোভিত মুখমণ্ডলের প্রতি দৃষ্টিপাত করিয়া সুষমা বলিল,  
“তোমাদের এই দরোরনজীর সম্বন্ধবোধ আছে । পাছে আমাদের  
আলোচনা কাণে ধায়, তাই অনেকটা দূরে গিয়েই বসেছে ।”

যমুনা বলিল, “বাবার বড় প্রিয় পাত্র ছিল । দাদাকে আমাকে  
কোলে পিঠে ক’রে মানুষ করেছে । আমরা ওকে হিন্দপাল জ্যেষ্ঠা  
বলেই ডাকি । বাবা হিন্দপাল জ্যেষ্ঠার চেয়ে দশ বছরের ছোট  
ছিলেন, মার কাছে শুনেছিলুম ।”

## যমুনাধারা

হিন্দপাল আপন মনে এক দিকে চাহিয়া বসিয়াছিল। বাতাস তাহার পাগড়ীর খাঁড়ি প্রান্তটুকু লইয়া খেলা করিতেছিল।

সুখমা ডাকিল, “যমুনাধারা !”

যমুনাকে সেই ধারা সংযুক্ত করিয়া সম্বোধন করিত।

তরুণী সুখমার দিকে ফিরিয়া চাহিল। তাহার কণ্ঠস্বরে যেন একটা পরিবর্তনের সুর যমুনা অনুভব করিল।

সুখমা বলিল, “মানুষের জীবনটা যদি ঐ নীল আকাশের মত অনাবিল হ’ত !”

যমুনা হাসিয়া বলিল, “তুমি এত লেখ-পড়া শিখেছ, দর্শনশাস্ত্র পড়েছ; গুনলুম, গীতা উপনিষদ, ছুবছর ধ’রে সন্ন্যাসীর কাছে ব্যাখ্যা ক’রে পড়েছ। তবে এরকম অসম্ভব কল্পনা মনে এল কেন ?”

সুখমা বলিল, “সে কথা হচ্ছে না, তা হয় না “আমি জানি . কিন্তু যদি হ’ত, তাই বলছিলাম !”

সুখমা একটা দীর্ঘশ্বাস ত্যাগ করিল।

যমুনা বলিল, “লেখাপড়া ত শেখা হ’ল, এখন কি করবে বল ত, ভাই ?”

সুখমা দূরে দিগড়িয়া পাহাড়ের দিকে দৃষ্টি নিবদ্ধ করিয়া বলিল, “লেখাপড়া শেখবার কি শেষ আছে, যমুনাধারা !”

যমুনা সুখমার একখানি হাত নিজের করপুটে চাপিয়া ধরিয়া বলিল, “মাসীমা বলছিলেন, এবার তোমাকে সুপাত্রে বিয়ে দিতে পারলে তিনি নিশ্চিন্ত হ’তে পারেন, ভাই।”

## যমুনাধারা

সুষমা সে প্রশ্নের কোনও উত্তর না দিয়ে নীরবে সম্মুখের দিকে চাহিয়াই রহিল।

নন্দন পাহাড়ে সে দিন সকালে অল্প কোনও নরনারীর সমাগম হয় নাই। কাজেই দুই সখীর নিভৃত আলোচনায় কোনও বাধা পড়ে নাই। সুষমাকে নীরব দেখিয়া যমুনা তাহার দিকে ভাল করিয়া চাহিয়া দেখিল। সুষমা যমুনার গায় সুন্দরী নহে ; কিন্তু তাহার দীর্ঘায়ত নয়নে এমন একটা মাধুর্য্য-শ্রী ছিল, মুখমণ্ডলে এমন একটা কমনীয় দীপ্তি ছিল, যাহার প্রভাব অতিক্রম করা সহজ-সাধ্য নহে।

সুষমার অবিচলিত কেশরাজি বাতাসে লুপ্তিত হইতেছিল। তাহার নয়নের এমন গভীর দৃষ্টি যমুনা পূর্বে কখনও দেখে নাই। বিবাহের প্রসঙ্গে তরুণী বাঙ্গালী নারীর মুখমণ্ডল আরক্ত হইয়া উঠা প্রকৃতি-বিরুদ্ধ নহে ; কিন্তু এই আত্মস্থা তরুণীর গাভীর্য্য সহসা যমুনার চিত্তে একটা প্রশ্ন জাগাইয়া তুলিল। অবশ্য সুষমা স্বভাবতঃই বহুভাষিনী বা প্রগল্ভা নহে ; কিন্তু সমবয়স্কা সখীর সহিত আলোচনায় তাহার রসনা অর্গল-মুক্ত হইয়া থাকিত।

যমুনা বলিল, “ভাই, বিয়ের কথায় তুমি এত গভীর হয়ে উঠলে কেন ?”

সুষমা দিগন্তে নির্বাসিত দৃষ্টিকে ফিরাইয়া আনিয়া যমুনার প্রতি চক্ষু করিল। তার পর ধীর অথচ মধুর কণ্ঠে বলিল, “মার হুশিচিন্তা দূর করতে পারলে সত্যি আমি খুসী হতুম। কিন্তু মন আমার বর্তমান বেচাকেনার যুগে বিয়ে করতে বিদ্রোহ ঘোষণা করে।



## যমুনাধারা

যমুনা কয়েক সূঁহুঁহুঁ নীরবে চিন্তা করিয়া বলিল, “তুমি ঠিক বলেছ, ভাই। দেশের মানুষ আগের চেয়ে শিক্ষিত হয়ে উঠেছে বলে গর্ব প্রকাশ করে; নারীজাতিকে বিশেষ সম্মান করে থাকে বলে বড় গলায় চীৎকারও করে থাকে, কিন্তু সত্যি এ যুগে নারীকে তারা যত হের দৃষ্টিতে দেখে, আগের যুগে এ দেশে তা ছিল না। মেয়ে বেন মাছ বা তরকারী। যাচাই করে, দর করে তবে বাস্ফালার মেয়ের পাণিগ্রহণ ব্যবসটা চলছে।”

কথা বলিতে বলিতে যমুনা উত্তেজিত হইয়া উঠিয়াছিল, তাহার আরক্ত ওষ্ঠাধর-যুগল কম্পিত হইতেছিল, কালো চোখের দৃষ্টি প্রথর ও উজ্জ্বল হইয়া উঠিয়াছিল, আরক্ত গণ্ডদেশ তাহার মানসিক উত্তেজনার পরিচয় দিতেছিল।

সুখমা বলিল, “ঠিক তাই, ভাই যমুনাধারা। নারী যেখানে এত অনাদৃত, সেখানে বার বার পরীক্ষা দিয়ে বিয়ে করার ইচ্ছে আমার নেই। পুরুষের বিচারে—পাত্র-পক্ষের ইচ্ছা অনিচ্ছার উপর নারীজাতির, পাত্রীপক্ষের বিবাহ নির্ভর করছে। অথচ নারীর ইচ্ছা অনিচ্ছার কোন মূল্যই নেই! না ভাই, এমন হয় অবস্থায় নিজেকে নিষ্ফেপ করবার কোন অধিকার ভগবান আমাকে দেননি।”

পাহাড়ের পশ্চিমদিক দিয়া ভ্রমণার্থী কেহ পাহাড়ের উপর তখন উঠিয়াছিল। তরুণী-যুগল এমন নিবিষ্টচিত্তে আলোচনার মগ্ন ছিল যে, অগ্ৰদিকে তাহাদের কোন লক্ষ্যই ছিল না।

একটা আল্গা পাথর ভ্রমণকারীর পদস্পর্শে স্থানচ্যুত হইয়া সশব্দে নীচে গড়াইয়া পড়িতে লাগিল। লোকটিও টাল সামলাইতে

## যমুনাধারা

না পারিয়া পতনোন্মুখ হইয়াছিল। বৃদ্ধ হিন্দপাল সিং উহা দেখিতে পাইয়া একটা শব্দ করিয়া সেই দিকে ছুটিয়া যাইতেই তরুণীদিগের দৃষ্টি সেই দিকে নিষ্ফিণ্ড হইল।

না, লোকটি সামলাইয়া লইয়াছে। কিন্তু মানুষটির প্রতি চাহিতেই উভয়ে উঠিয়া দাঁড়াইল। সে ব্যক্তি ললিত ডাক্তার। সকালের দিকে সে-ও নন্দন পাহাড়ের দিকে বেড়াইতে আসিয়াছিল। তরুণীরা এখানে আসিয়াছে জানিলে সে কখনই এদিকে আসিত না। কিন্তু সে ত অন্তর্যামী নহে।

টাল সামলাইয়া লইয়া ললিত দেখিল, যমুনা ও সুষমা অপর দিক দিয়া পাহাড় হইতে নামিয়া যাইতেছে। সে আহত হইয়াছে কি না, তাহা জানিবার প্রয়োজন পর্য্যন্তও ইহাদের মনে রেখাপাত করে নাই!

হিন্দপাল সিং জিজ্ঞাসা করিল, ডাক্তারবাবুর কোথাও আঘাত লাগে নাই ত! না, শরীরের কোথাও তাহার আঘাত লাগে নাই। তবে এইরূপ উপেক্ষার আঘাত মনকে আহত করে নাই, একথা সে জোর করিয়া বলিতে পারে না।


যমুনা ও সুষমাকে নামিয়া যাইতে দেখিয়া হিন্দপাল সিং ডাক্তারবাবুকে সেলাম করিয়া দ্রুতপদে সেই দিকে চলিয়া গেল।

ললিত স্থাগুর মত দাঁড়াইয়া সেই দিকে চাহিয়া রহিল। সে পাহাড়ের উপর হইতে দেখিল, পাহাড় হইতে নামিয়া তরুণী-যুগল “উইলিয়ম্‌স্ টাউন” অভিমুখে মৃদুচরণে চলিয়াছে। মুহূর্তের জন্তও কেহ পশ্চাতে ফিরিয়া চাহিল না।

## যমুনাধারা

যমুনার সহিত এ পর্য্যন্ত ললিতের কোনও বাক্যালাপ ঘটে নাই ;  
কিন্তু সুষমা ? সে ত বহুদিন তাহার সম্মুখে আসিয়াছে ; বহু  
সপ্তাহ ধরিয়া কঠিন রোগে তাহার গুশ্রমা করিয়াছে । সে-ও কি  
একটা মুখের কথা ললিতকে জিজ্ঞাসা করিতে পারিত না ?

ললিত পাহাড়ের উপর ধীরে ধীরে বসিয়া পড়িল ।



## একুশ

“বাঃ ! বেশ যারগাটি ত !”

সুখমা মুগ্ধ-দৃষ্টিতে ত্রিকূটনাথের ক্ষুদ্র ঝরণার দিকে চাহিয়া রহিল। এই ঝরণার কোনও বৈশিষ্ট্য নাই। জলধারাও ক্ষীণ ; কিন্তু একটি শিবলিঙ্গের উপর ঝরণাধারা নিঃসৃত হইতেছে,—ইহাতেই সে মুগ্ধ হইয়া গেল।

ত্রিকূটনাথের অদূরে একটা প্রকাণ্ড সমতল প্রান্তর-চত্বর। সকলে সেইখানে গিয়া উপস্থিত হইল। দাস-দাসী, দ্বারবান্ আহার্য্য দ্রব্যাদির মোট, বস্তাদি সেইখানে বিচ্যুত করিল।

পূর্বেই প্রস্তাব ছিল, ত্রিকূটপাহাড়ে আসিয়া একদিন চড়িতাতি করিতে হইবে। স্ত্রীশীল, মণিমালা ও যমুনার অনুরোধে যতীন্দ্র তাহার পুত্র ও পিসীমাতাকে এই নিশ্চল আনন্দসম্মেলনে যোগ দিতে প্রতিশ্রুত হইয়াছিল। কথা ছিল, পিসীমা ও মণিমালার মাসীমা সেদিন সকলের জগ্নু খিচুড়ী রাঁধিবেন, পাহাড়ের উপর উঠিতে পারিবেন না। পিসীমা ও মাসীমা উপযাচিকা হইয়া এই ভার স্বয়ং গ্রহণ করিয়াছিলেন।

অতি প্রত্যবেই দুইটি পরিবার দেওঘর হইতে অশ্ববানে রওনা হইয়াছিলেন। ছেলে-মেয়ের তত্ত্বাবধানের জগ্নু দাস-দাসী, দ্বারবান্ সঙ্গে আসিয়াছিল। রোদ্দ প্রবল হইবার বহু পূর্বেই বার মাইল

## যমুনাধারা

পথ অতিক্রম করিয়া যাত্রিদল ত্রিকূটনাথে পৌঁছিয়াছিল। গাড়ী ছাড়িয়া মাঠ পার হইতে অল্প সময় লাগে নাই। সকলেরই ক্ষুধার উদ্রেক হইয়াছিল।

ত্রিকূটনাথের ঝরণার জল এক কুণ্ডাকৃতি স্থানে সঞ্চিত হইয়া কূল ছাপাইয়া আবার নিম্নে বহিয়া যাইতেছিল। এই কুণ্ডের স্নিগ্ধ জলে একে একে সকলে স্নান সারিয়া লইয়া ত্রিকূটনাথের পূজা দিন। পূজারী নিত্য এই গ্রাম হইতে আসিত। যাত্রিদল দেখিয়া স্বেচ্ছাভাৱে প্রত্যাশায় হাজির ছিল।

পূজা শেষ হইলে চত্বরে সকলে ফিরিয়া গেল। মাসীমা সকলের জন্ত গৃহপ্রস্তুত মিষ্টান্নাদি ভাগ করিয়া দিলেন। নানাবিধ ফলমূলও সঙ্গে ছিল। মণিমালা, যমুনা ও সুধমা একটু অন্তরালে গিয়া জলযোগ শেষ করিল। যতীন্দ্রনাথ, সুশীল ও ললিত পরিতোষ সহকারে আহার শেষ করিয়া পাহাড়ে উঠিবার কল্পনা করিতেছিল। সঙ্গে এক জন গ্রামবাসী আসিয়াছিল; সে পাহাড়ের বিভিন্ন অংশের সহিত সুপরিচিত। যাত্রীগণকে পাহাড় দেখাইয়া সে বৎকিঞ্চিং উপার্জন করিয়া থাকে।

সে জানাইল, মাঝের পাহাড়টি সর্বোচ্চ। শীর্ষদেশে প্রকাণ্ড ছাদের মত সমতল স্থান আছে। সেখানে মাঝে মাঝে নানাপ্রকার বিচিত্র দৃশ্য দেখিতে পাওয়া যায় বলিয়া জনপ্রবাদ।

জলযোগের পর স্থির হইল, সতু ও খুকী শীলাকে ঝি, চাকর ও দারবানের কাছে রাখিয়া সকলে পাহাড়ে উঠিবে। কিন্তু যতীন্দ্রনাথের মাসীমা তাহাতে সম্মত হইলেন না। তিনি বলিলেন যে, আর সকলে

## যমুনাধারা

পাহাড়ে উঠুক, তিনি রন্ধনব্যাপার লইয়া থাকিবেন। পাহাড়ে উঠিবার সখ এবং শক্তি তাঁহার নাই। মণিমালার মাসীও থাকিতে चाहিলেন ; কিন্তু যতীনের পিসী জোর করিয়া তাঁহাকে পাহাড়ে উঠিবার জন্ত অনুরোধ করিলেন। অগত্যা প্রোঢ়া উমাশশী সম্মত হইলেন।

‘গাইড’ বা পথিপ্রদর্শক হাজির ছিল। উৎসাহভরে সুধমা, মণিমালা, যমুনা পাহাড়ে উঠিবার উপযোগী ভাবে বেশবিগ্ৰাস করিয়া লইল। মাসীমাও প্রস্তুত হইলেন। যতীন্দ্র সুশীল এবং ললিত ডাক্তার এক একখানি মোটা লাঠি পাহাড়ের বাঁশ কাটিয়া প্রস্তুত করিয়া লইরাছিল।

পথিপ্রদর্শকের নির্দেশমত উৎসাহভরে সকলেই চলিতে লাগিল ; —সর্বাগ্রে ললিত, তাহার পশ্চাতে সুশীল ও মণিমালা। মাসীমার পরেই সুধমা ও যমুনা চলিতেছিল। সর্বপশ্চাতে যতীন্দ্রনাথ।

বনভূমির ভিতর দিয়া পাহাড়ে উঠিবার পথ—প্রস্তর-খণ্ডবন্ধুর পথে চলিতে বেশ উৎসাহের সঞ্চার হইতে লাগিল। মণিমালা ও মাসীমাতা যেমন দ্রুত চলিতেছিলেন, আলাপরতা যমুনা ও সুধমা ততটা দ্রুতগতিতে অগ্রসর হইতেছিল না ; তাহারা আশ-পাশের দৃশ্যগুলি উপভোগ করিতে করিতে চলিতেছিল। কোনও বৃক্ষডালে একটা নূতন পাখী দেখিয়া সুধমা ক্ষণিক দাঁড়াইয়া পড়িতেছিল। যমুনা ও সখীর সহিত তাল রাখিয়া চলিতেছিল। একটু দূরে যতীন্দ্রনাথ সর্বপশ্চাৎগ রক্ষা করিয়া চলিতেছিল।

আগের দল দৃষ্টিপথের বাহিরে চলিয়া গিয়াছে। খানিক পরে উপর হইতে শব্দ আসিল, “যতীন বাবু!”

## যমুনাধারা

যতীন্দ্রনাথ তাহার উত্তরে গম্ভীর-কণ্ঠে জানাইল, তাহারা আসিতেছে। পাহাড়ে উঠিবার সময় এইভাবে পরস্পর পরস্পরের সংবাদ লইয়া চলিতে লাগিল।

পাহাড়ের কিছু দূর উপরে উঠিয়াই সুষমা দেখিল, দক্ষিণ পার্শ্ব দিয়া একটা পথ, বাম পার্শ্ব দিয়া আর একটা পথ চলিয়াছে। সম্ভবতঃ দক্ষিণের পথ ধরিয়াই অগ্রগামী দল চলিয়াছে। তাহাদের কণ্ঠস্বর মাঝে মাঝে উপর হইতে ভাসিয়া আসিতেছিল।

যমুনা দক্ষিণের পথ ধরিয়াই চলিল। সে পূর্বে মসৌরী ও দেৱাছন পাহাড়ে দাদার সঙ্গে বেড়াইতে গিয়াছিল। পাহাড়ে চড়ার আনন্দ অভিজ্ঞতা তাহার যথেষ্টই ছিল।

কিছু দূর চলিতে চলিতে দক্ষিণের পথটি উপরে থানিক দূর গিয়া আবার বিপরীত দিকে রেখাপাত করিয়া নামিয়া গিয়াছে। সুষমা বুঝিল, তাহারা পথ ভুল করিয়াছে। এ পথে পাহাড়ের উপরদিকে উঠা যায় না। যমুনা বলিল, “এ দিক দিগে যাওয়া যাবে না।”

উত্তরে ফিরিয়া দাঁড়াইতেই যতীন্দ্রনাথ বলিল, “চলুন, বায়ের পথ দিগে উঠতে হবে।”

এবার যতীন্দ্র পথ দেখাইয়া চলিল। বহু দূর হইতে চীৎকার আসিল। যতীন্দ্রনাথও তাহার উত্তর দিল।

চলিতে চলিতে সহসা যতীন্দ্র থমকিয়া দাঁড়াইল। বামদিকের পথটি দুই ভাঙে বিভক্ত হইয়া গিয়াছে। এখন কোন্ দিকে যাওয়া যায়? দীর্ঘকাল দেওঘরে বাস করিলেও এই পাহাড়টিতে সে কোনও দিন উঠে নাই। ত্রিবৃটনাথে অনেকবার সে আসিয়াছিল বটে, কিন্তু

## যমুনাধারা

মাঝের পাহাড়টির উপরে উঠিবার প্রয়োজন সে কোনও দিন অনুভব করে নাই—কৌতূহলও ছিল না।

যাহা হউক, বুদ্ধি করিয়া উহারই মধ্যে একটা পথ ধরিয়া সে চলিতে লাগিল। কিছু দূর গিয়া সে বৃষ্টিতে পারিল, যে পথটি ধরিয়া সে চলিতেছে, তাহা ক্রমেই ঢালুর দিকেই চলিয়াছে। কারণ, সম্মুখে একটা বিশ পঁচিশ হাত উচ্চ প্রস্তরখণ্ড জঙ্গলে আচ্ছন্ন হইয়া পথরোধ করিয়া দাঁড়াইয়া রহিয়াছে। সে যমুনা ও সুষমাকে উদ্দেশ্য করিয়া বলিল, আবার তাহারা ভুল পথে চলিয়াছে। পাহাড়ে একবার পথ হারাটিলে আর ঠিক পথ আবিষ্কার করা চলে না। জীবনের পথে চলিতে গিয়া মানুষও বৃষ্টি এমনই ভাবে পথ হারাইয়া বিভ্রান্ত হয়।

হাতের ঘড়ী দেখিয়া যতীন্দ্রনাথ বৃষ্টি, প্রায় এক ঘণ্টা ধরিয়া তাহারা এমনই ভাবে ভুল পথে ঘুরিয়া বেড়াইতেছে। যতীন্দ্র উচ্চৈঃস্বরে চীৎকার করিয়া সূশীল ও ললিতের নাম ধরিয়া ডাকিল। পাহাড়ে পাহাড়ে তাহার প্রতিধ্বনি উঠিল, কিন্তু কোনও উত্তর আসিল না।

তখন যমুনা বলিল, “চলুন, আমরা ফিরে যাই। আর উপরে উঠে কাজ নেই।”

যমুনার মুখে শান্তির চিহ্ন, সুষমার ললাটেও শীতের দিনে স্বেদবিন্দু দেখিয়া যতীন্দ্রনাথ বৃষ্টি, এমন ভাবে পাহাড়ে উঠিবার ব্যর্থ পরিশ্রম তরুণীদিগের উৎসাহ-বহ্নিকে নির্বাপিত করিয়া দিয়াছে সে বলিল, “সেই ভাল।”

তাহারা তখন নামিতে আরম্ভ করিল।



## যমুনাধারা

কোন পথ ধরিয়া নামিতেছে, সে দিকে বিশেষ লক্ষ্য করিবার চেষ্টা না করিয়া তাহারা কিরূপে তাড়াতাড়ি জঙ্গলাকীর্ণ পাহাড় হইতে বাহিরে আসিতে পারে, তাহারই দিকে লক্ষ্য রাখিল। চলা পথের রেখা ধরিয়া নামিতে নামিতে একটা স্থানে আসিয়া তাহারা অনুমান করিল, প্রায় সমতলভূমির কাছেই তাহারা আসিয়া পড়িয়াছে। বামদিগের চলাপথ ধরিয়াই তাহারা নামিতেছিল। অকস্মাৎ তাহারা দেখিল, তাহারা একটি প্রায় সমতল উপত্যকাভূমিতে নামিয়া আসিয়াছে; তাহার চারিদিকেই উচ্চ পাহাড়ের প্রাচীর। দক্ষিণদিক ধরিয়া তাহারা সেই উপত্যকাভূমি পার হইতে লাগিল। বৃক্ষলতাবহুল দক্ষিণের পাহাড়ের পার্শ্ব দিয়া নির্গমনের পথ রহিয়াছে।

যতীন্দ্রনাথ বুঝিল, তাহারা যে পথে এখানে নামিয়া আসিয়াছে, পাহাড় হইতে নামিবার সোজাপথ তাহা নহে। কিন্তু এখন আর ফিরিয়া যাওয়া সম্ভব নহে। এই পথ ধরিয়া নিশ্চয়ই বাহিরে যাওয়া যায়। কাঠুরিয়ারা কাঠ সংগ্রহের জন্ত এ দিকেও আসিয়া থাকে, যতীন্দ্রনাথ তাহা অনুমান করিল।

কিন্তু একটা উৎকট গন্ধ যেন বাতাসে ভাসিয়া আসিতেছিল। দক্ষ শিকারী যতীন্দ্রনাথ সহসা থমকিয়া দাঁড়ইয়া সন্নিহিত গুহার অভ্যন্তরে দৃষ্টিপাত করিল। তার পর অতি সতর্ক, অতি মৃদুস্বরে যমুনা ও সুষ্মাকে বলিল, “আমার বিনীত অনুরোধ, এখন কোন কথা আপনারা বলবেন না। আমার পেছনে পেছনে কোন শব্দ নক’রে আসুন।”

## যমুনাধারা

সুখমা ও যমুনা বুকিল, যতীন্দ্রনাথের মনে কোনও কারণে বিশেষ উদ্বেগ জন্মিয়াছে। তাহারা দেখিল, যতীন্দ্রনাথ তাহার মোটা বাঁশের লাঠিটা দক্ষিণ হস্তে দৃঢ়ভাবে ধারণ করিয়াছে। উভয়কে তাহার বামদিকে যাইতে ইঙ্গিত করিয়া যতীন্দ্রনাথ অগ্রসর হইল।

দক্ষিণদিকে আরও একটা গুহা রহিয়াছে। তাহাকে অতিক্রম করিয়া আরও একটু দক্ষিণদিকে একটা নির্গমনের পথ দেখা যাইতেছিল। যতীন্দ্রনাথ সেই দিকে যমুনা ও সুখমাকে দ্রুত অগ্রসর হইতে ইঙ্গিত করিল।

অজ্ঞাত আশঙ্কার উভয় তরুণী অনেকটা বিহ্বল হইয়া পড়িয়াছিল। কিন্তু যতীন্দ্রনাথের নীরব আদেশ প্রতিপালন করিবার জন্ত তাহারা কম্পিত-চরণে নির্দিষ্ট পথে অগ্রসর হইল। যতীন্দ্রনাথ তাহাদের পাশে পাশে চলিতে চলিতে চারিদিকে সতর্ক দৃষ্টি নিক্ষেপ করিতে লাগিল।

তরুণীযুগলের স্থলিত, কম্পিত চরণক্ষেপ একটা অজ্ঞাত আশঙ্কার চিহ্ন প্রকাশ করিতেছিল। যতীন্দ্রনাথ রুদ্ধনিশ্বাসে পুনঃ পুনঃ পশ্চাঙ্গাগ ও আশে-পাশে দৃষ্টি নিক্ষেপ করিতেছিল। তাহার ললাটের শিরা স্ফীত এবং ওষ্ঠযুগল দৃঢ়বদ্ধ। সমস্ত অঙ্গ যেন কোনও অভাবনীয় ব্যাপারের প্রতিরোধের জন্ত প্রস্তুত হইয়া রহিয়াছে।

সুখমা ও যমুনা কোনও দিকে না চাহিয়া সোজা সামুখের দিকে চলিতে লাগিল। সমগ্র পার্কৃত্যভূমি স্থির, অচঞ্চল—মাঝে মাঝে মনুষ্যপদত্যাড়িত উপলখণ্ডের শব্দ হইতেছিল মাত্র।

## যমুনাধারা

বাতাসে যে উৎকট গন্ধ অনুভূত হইতেছিল, তাহা ক্রমে  
অস্বহিত হইল। উৎকর্গ যতীন্দ্রনাথ সঙ্কীর্ণ পথে চলিতে চলিতে  
তখনও পশ্চাতে সতর্ক দৃষ্টিপাত করিতেছিল।

সহসা বনভূমির শেষে শূণ্য প্রান্তর ও তাহার অপর প্রান্তে  
রাজপথের রেখা তাহাদের দৃষ্টিপথে পড়িল।

“আর ভয় নেই, চলুন!”

যতীন্দ্রনাথের কণ্ঠস্বরে যুগল তরুণীই যেন চমকিয়া উঠিল।  
কিসের ভয়? এতক্ষণ কেহ সে বিষয়ে প্রশ্ন করিতেও সাহসী হয়  
নাই। শুধু যতীন্দ্রনাথের ভাবভঙ্গীতে তাহারা বুঝিয়াছিল, নিশ্চয়ই  
কোনরূপ বিপদের আশঙ্কা রহিয়াছে। পাহাড়ে ভল্লুক, বাঘ, সপ  
প্রভৃতি তীষণ হিংস্রজন্তু থাকে, ইহা তাহারা জানিত। কিন্তু ত্রিকূট  
পর্বতে সেরূপ কোন আশঙ্কা আছে, এমন সংবাদ তাহারা কাহারও  
কাছে শুনে নাই।

মাঠের উপর দিয়া ক্ষীণ জলস্রোতোধারা বহিয়া বাইতেছিল।  
তাহা পার হইয়া চলিতে চলিতে যমুনা বলিল, “কি দেখেছিলেন  
আপনি বলুন ত?”

তখনও তাহার জিহ্বায় পূর্ণভাষে রসসঞ্চারণ হয় নাই। দেহের  
কম্পন-বেগ তখনও প্রশান্ত হয় নাই।

যতীন্দ্র বলিল, “দেখেছিলুম খুব ভাল জিনিস। গুহার মধ্যে ছুটি বাচ্চা  
নিয়ে ব্যাঙ্-গৃহিণী নিদ্রা যাচ্ছিলেন। তাঁর ঘুম ভাঙেনি, তাই রক্ষে।”

সুধমা শিহরিয়া উঠিয়া পাংশু-মুখে বলিল, “এখানে বাঘ আছে  
না কি?”

## যমুনাধারা

যতীন্দ্রনাথ আর একবার পশ্চাতের দিকে চাহিয়া বলিল, “থাকে না বলেই ত জানতুম। এখন ত চোখে দেখলুম। বোধ হয়, নতুন এসেছে।”

যমুনা উৎকণ্ঠা-বাকুলকণ্ঠে বলিল, “দাদারা যদি—”

তাহার কথা শেষ করিতে না দিয়া যতীন্দ্র বলিল, “তঁারা যে পথে গিয়েছেন, সে দিকে উনি ত নেই। আমরা পথ ভুলে বিপথে গিয়ে পড়েছিলাম। দেখছেন না, আমরা কত ঘুরে আসছি। তবে আমাকে আর এক দিন আসতে হবে। বাঘিনী যখন আছেন, তাঁর কর্তাটিও হয় ত এসে থাকবেন। আমাকে ঙ্গদের সঙ্গে প্রস্তুত করে দুলাকাত করতে হবে দেখছি।”

যমুনা বলিল, “আপনি বাঘ মারতে আসবেন না কি?”

“হ্যাঁ, ঐ একটা মস্ত নেশা আমার আছে। আজ বন্দুকটা সঙ্গে থাকলে—”

সুবমা বলিয়া উঠিল, “গুলী চালাতেন বুঝি?”

হাসিয়া যতীন্দ্র বলিল, “আপনাদের নিরাপদ স্থানে না রেখে এসে অবশ্য সেটা করতাম না। আপশোধ হয়ে গেল।”

তখন তাহারা ত্রিকূটনাথের প্রথম পাহাড়টির কাছে আসিয়া পড়িয়াছে। পূর্বপরিচিত পথ ধরিয়া তাহারা ঝরণার দিকে চলিল।

## বাইশ

“কৈ, ঠাৱা ত আস্ছেন না?”

ললিতের প্রশ্নের উত্তরে এক স্থানে দাঁড়াইয়া নিশ্বাস গ্রহণ করিতে করিতে সুশীল বলিল, “বোধ হয়, হাঁপিয়ে পড়েছে। অভ্যাস ত নেই। যতীন বাবু সঙ্গে আছে, ভাবনার কোন কারণ নেই।”

ললিত বলিল, “মাসীমা বুড়ো মানুষ, তিনি ত বেশ উঠে যাচ্ছেন, বৌদিও ত বেশ স্ফুর্তির সঙ্গে চলেছেন। একটু দাঁড়িয়ে ঠাঁদের জন্ত অপেক্ষা করা ভাল নয় কি?”

সুশীল তখন যতীন্দ্রনাথের নাম ধরিয়া চীৎকার করিল। কিন্তু প্রতিধ্বনি পাহাড়ে পাহাড়ে শব্দ-তরঙ্গ তুলিয়া মিলাইয়া গেল—কোন প্রত্যুত্তর এবার আসিল না।

এক মিনিট অপেক্ষা করিবার পর গাইড বলিল, “এখানে দাঁড়িয়ে থেকে লাভ নেই। আর দু’ মিনিটের মধ্যেই আমরা চূড়ার উপর উঠবো। ঠাৱা ঠিক আসছেন। এর পর শীতের দিনেও রৌদ্র বড় চড়া লাগবে, হুজুর।”

মাসীমা একটু উদ্বিগ্ন হইয়া বলিলেন, “তাৱা আস্ছে না কেন? কোন বিধ্বদ ত হয় নি?”

সুশীল হাসিয়া বলিল, “তাদের সঙ্গে যিনি আছেন, তিনি আমাদের চেয়েও ঠাঁদের রক্ষা করবার অনেক বেশী শক্তি রাখেন,

## যমুনাধারা

মাসীমা। আমার মনে হচ্ছে, যমুনা হয় ত বলেছে, আর ওপরে উঠে কাজ নেই। তাই হয় ত ওরা নেমেই গেছে।”

মণিমালা বলিল, “তাই সম্ভব। চল, আমরা তাড়াতাড়ি ওপরে উঠে দেখে-শুনে নেমে যাই। এখানে দাঁড়িয়ে থেকে লাভ নেই।”

সকলে সেই প্রস্তাবেই সম্মত হইল। ললিতের মনের উৎসাহ যেন অনেকখানি কমিয়া গেল।

অল্পদূরে উঠিয়া একটা বাঁক ফিরিতেই তাহারা পাহাড়ের শীর্ষদেশে প্রশস্ত চত্বরাকার স্থানে পৌঁছিল। রৌদ্র-দীপ্তি প্রবল হইলেও সঞ্চরণমান বায়ুপ্রবাহে সমস্ত ক্লান্তি যেন মুহূর্তমধ্যে অন্তর্হিত হইয়া গেল।

কিন্তু যে বিচিত্র কাহিনীর কথা পল্লবিত আকারে তাহারা শুনিরাছিল, তাহার কিছুই কাহারও কোতূহলী দৃষ্টিকে চরিতার্থ করিল না। উপলব্ধি ব্যতীত একটি ভগ্ন ও পর্কিত-শীর্ষকে অলঙ্কৃত করে নাই। কোনও বিচিত্রদর্শন পক্ষীর অস্তিত্ব পর্য্যন্ত সেখানে ছিল না। অত উল্লে সাধারণ কোনও পক্ষী পর্য্যন্ত আসিয়া থাকে, এমন নিদর্শনের পর্য্যাপ্ত অভাব দেখা গেল।

“সব ফাঁকি” বলিয়া সুশীল একবার গাইডের দিকে দৃষ্টিপাত করিল। সে তখন একটা বিড়ি ধরাইয়া পরম নিশ্চিন্তভাবে ধূমপান করিতেছিল।

দেখিবার বিশেষ কিছু নাই দেখিয়া অলক্ষণ পরে সকলেই অবতরণ করিতে লাগিল।

## যমুনাধারা

চলিতে চলিতে মাসীমা গাইডকে ডাকিয়া জিজ্ঞাসা করিলেন,  
“পাহাড় কোন হিংস্র জানোয়ার আছে না কি ?

গাইড বাঙ্গালী না হইলেও বাঙ্গালা বলিতে পারিত। সে  
মিশ্রিত বাঙ্গালায় বলিল, “না, মায়িজি, এখানে ও সব ডর কুচ নেই।”

ললিত বলিল, “বাঘ-ভালুক নেই ?”

গাইড হাসিতে হাসিতে বলিল, “না, বাবুজি ! ভালুক নেই।  
তবে গরম কালে কভি কভি সের আসে।”

সুশীল বলিল, “বাঘ মাঝে মাঝে আসে না কি ?”

গাইড বলিল যে, পাঁচ ছয় বৎসর পূর্বে একবার এইখানে বাঘ  
আসিয়াছিল, তবে বেশী দিন থাকিতে পারে নাট।

মণিমালা ও মাসীমার মুখে উদ্বেগের চিহ্ন প্রকটিত হইল।  
যমুনা ও সুধমার সংবাদ এতক্ষণের মধ্যে জানিতে না পারিয়া  
উভয়েরই চিত্ত অজ্ঞাত আশঙ্কার চঞ্চল হইয়া উঠিল।

মাসীমা বলিলেন, “এ বছর এসেছে কি না, ডান বাছা ?”

সকলেই দ্রুতপদে অবতরণ করিতেছিল। গাইড বন্ধিয়া উঠিল,  
“মায়িজী, কুচ ডর নেই। শীতকালে সের আসে না। এ বরষমে  
সেরের কথা শুনি নি। রোজ বখত পাহাড় চড়ি, সের কথা ?”

কিন্তু তথাপি সকলেরই অন্তরে একটা অজ্ঞাত আশঙ্কার ছায়া  
যেন ভারী হইয়া ছলিতে লাগিল।

সুশীল এতক্ষণ নিরীকভাবে দ্রুত চলিতেছিল। সে বলিল,  
“আর কতক্ষণে নীচে নাম্ব ?”

“বেশী দেরি নেই, বাবুজী।”

## যমুনাধারা

ললিত বলিল, “আচ্ছা, আমরা যে পথে এসেছি, এ দিকে বাঘ কখনও এসে থাকে বলে শুনেছ?”

তরুণবয়স্ক গাইড ঈষৎ হাস্য করিয়া বলিল, “না বাবুজী। সের যখন আসে, উত্তরদিকের জঙ্গলেই থাকে। সে দিকে অনেক গুহাভি আছে। এ দিকে মানুষজন হামেসা চলে, সের এ দিকে আসবেই না।”

ললিত অপেক্ষাকৃত নিশ্চিতভাবে নিশ্বাস ত্যাগ করিল।

পাহাড়ের তিন-চতুর্থাংশ ততক্ষণ অতিক্রান্ত হইয়াছিল। গাইড দক্ষিণের একটা চলাপথ দেখাইয়া বলিল যে, এই পথে পাহাড়ের উত্তরদিকে যাওয়া যায়। কাঠুরিয়ারা কাঠ ভাঙ্গিবার জন্ত ঐ দিক দিয়া বেশী চলাফেরা করে। জঙ্গল সে দিকে আরও ঘন, অনেক কাঠ সে দিকে পাওয়া যায়। শত শত কাঠুরিয়া মাথায় বা বাঁকে করিয়া যত কাঠ একবারে লইতে পারে, তাহার জন্ত জমীদারকে প্রতিবার এক পয়সা মূল্য দিতে হয়। সর্বদা মানুষ যাতায়াত করে বলিয়া এই পাহাড়ে কদাচিত্ হিংস্র জন্তু আশ্রয় লইয়া থাকে।

মণিমলা ও মাসীমাতা কোন কথা কহিতেছিলেন না। নারীসদয় সত্যই উৎকণ্ঠায় পূর্ণ হইয়াছিল। পাহাড়ের পাদদেশে নামিয়া যখন সকলে মাঠে পড়িল, তখন সুশীল প্রাণপণে চীৎকার করিয়া ডাকিল, “বতীন বাবু!”

প্রতিধ্বনি পাহাড়ে তরঙ্গায়িত হইয়া মিলাইবার পূর্বেই উত্তর আসিল, “হাঁ, আপনারা আসুন।”



## যমুনাধারা

সে কণ্ঠস্বর যে যতীন্দ্রনাথের, তাহাতে কাহারও সন্দেহ হইল না। মণিমালা ও মাসীমাতার মুখ হইতে হৃদয়ান্তর ছায়া মিনাইয়া গেল।

সুশীল বলিল, "আমি ঠিক বলেছি। যতীন্দ্র বাবু যখন সঙ্গে আছেন, আমি ওদের জন্ত ভাবিনে। যতীন বাবুর গলা শুন্নে ত, ললিত বাবু?"

ললিত তরুণীদিগের সম্বন্ধে নিশ্চিত হইলেও, বোধ হয় নিজের সম্বন্ধে আরও উদ্বিগ্ন হইয়া উঠিয়াছিল। না, সে ক্রমেই বুদ্ধিতে পারিতেছে, যমুনা যতীন্দ্রনাথের পক্ষপাতিনী হইয়া উঠিতেছে। কিন্তু সে কি করিবে? মানুষের মনের উপর জোর করিবার অধিকার কাহার আছে? আর যদিও বা কেহ তাহা করে, তাহাতে ফল কি হইতে পারে?

মুখ তুলিয়া যখন সে চাহিল, তখন ত্রিকূটনাথের করণার পাশে তাহার আসিয়া দাঁড়াইয়াছে। যতীন্দ্রনাথের মিষ্ট কণ্ঠস্বর তাহাকে আহ্বান করিয়া বলিতেছে, "কি দেখে এলেন, ডাক্তার বাবু?"

মণিমালা ও মাসীমাতা তখন চত্বরের দিকে চলিয়া গিয়াছেন।

কুণ্ড হইতে অঞ্জলি ভরিয়া জল-পানোত্তম সুশীলকে নিরস্ত করিয়া ডাক্তার বলিল, "ও কি করছেন, সুশীল বাবু?"

"বড় পিপাসা!—"

"একটু থামুন। এখন এই কমলাগুলি খান ত" বলিয়া যতীন্দ্রনাথ কয়েকটি কোম কমলালেবু সুশীলের মুখবিবরে নিক্ষেপ করিল।

পিপাসার তীব্রতা হ্রাস পাইলে সুশীল সেইখানে বসিয়া পড়িল।

## যমুনাধারা

পৌষের প্রচণ্ড শীতেও এমন পিপাসা সে পূর্বে কখনও অনুভব করে নাই।

ললিতচন্দ্র যতীন্দ্রনাথের দিকে দৃষ্টি গুস্ত করিয়া বলিল, “আপনারা পাহাড়ে উঠলেন না যে?”

যতীন্দ্র বলিল, “পথ হারিয়ে ফেলেছিলুম। আপনারা কোন্ দিক দিবে উঠে গেলেন, শেষে আর বাহির হ’ল না। আমাদের অবশ্য খুবই দেরী হয়ে গিয়েছিল। কারণ, গুরা পথের মাঝে দাঁড়িয়ে দাঁড়িয়ে এটা ওটা দেখছিলেন। শেষে অনেক ডাকাডাকিতেও আপনাদের ডবান পেলাম না।”

সুশীল বলিল, “তাই শেষে নেমে এলেন বুঝি?”

“হাঁ, আপনার ভগিনী আর উঠতে চাইলেন না। ফিরবার পথে—পথ ত আমরা হারিয়েই ছিলাম—একটু বিপদের সম্ভাবনাও ঘটেছিল।”

সুশীল ও ললিত উভয়েই ব্যগ্র হইয়া উঠিল। যতীন্দ্রনাথ সংক্ষেপে কথাটা বিবৃত করিল।

সুশীল শিহরিয়া উঠিল। বিপদ অবশ্যই সাংঘাতিক আকারে দেখা দিয়াছিল, সে বিষয়ে সন্দেহ নাই। কিন্তু ইহাতে যতীন্দ্রনাথের প্রতি তাহার সম্মমবোধ ও কৃতজ্ঞতা সহস্রগুণ, বৃদ্ধি পাইল। কল্পনাবলে সে অনুমান করিয়া লইল, সে একরূপ অবস্থায় কখনই এমন দীর্ঘতা ও সতর্কতার পরিচয় দিতে পারিত না।

বাস্তবিক নিদ্রিতা বাঘিনী যদি জাগিয়া উঠিত।—

কিন্তু তাহার কল্পনার সূত্র অকস্মাৎ ছিন্ন হইয়া গেল।

## যমুনাধারা

যতীন্দ্র তখন সহস্র-মুখে বলিতেছিল, “কালই আবার আসতে হবে।”

“কেন?”

বিস্মিত সূশীলের দিকে চাহিয়া যতীন্দ্রনাথ বলিল, “এমন শিকারের সম্ভাবনাটা কি ছাড়া যায়, সূশীল বাবু?”

ললিত বলিল, “আপনি এ পর্যন্ত কতগুলি বাঘ মেরেছেন?”

তখনও খিচুড়ী নামে নাই। যতীন্দ্র বলিল “সাতটা। তবে বছর দশেক আগে বাঘ মারতে গিয়ে প্রাণ বাবার যো হয়েছিল।”

সূশীল বলিল, “কি রকম?”

যতীন্দ্রনাথ গাত্রবস্ত্র উন্মোচন করিয়া দেখাইল, তাহার পৃষ্ঠদেশের বাম ভাগে বাঘনখরাঘাতের চিহ্ন বিলুপ্ত হয় নাই।

সূশীল ও ললিতের অনুরোধে যতীন্দ্রনাথ তাহার বাঘ-শিকার-কাহিনী যখন বলিতে আরম্ভ করিল, তখন মণিমালা, যমুনা, সুধমাকে সঙ্গে লইয়া মাসীমাতা ঝরণার সন্নিহিত কুণ্ডের অপর পাশে আসিয়া দাঁড়াইয়াছিলেন।

ছইটি কলিকাতার বন্ধুর অনুরোধে যতীন্দ্রনাথ দেওঘর হইতে দশ মাইল দূরবর্তী একটি পাহাড়ে বাঘ শিকারের জন্ত গিয়াছিল। বন্ধুগণ শিকারে অভ্যস্ত এবং বাঘ মারিবার জন্ত অত্যন্ত ব্যাকুল, ইহাই প্রকাশ করিয়াছিল। দেশীয় কয় জন শিকারী সন্ধান দিরাছিল পূর্বের ঐ পাহাড়টায় একটা বাঘ আসিয়াছে। সদলবলে সেখানে গিয়া যতীন্দ্রনাথ শিকারীদিগকে পাহাড়ের সন্নিহিত জঙ্গলের অপর দিকে পাঠাইয়া দিয়াছিল। তিন বন্ধুতে একটা খোলা

## যমুনাধারা

যায়গায় দাঁড়াইয়াছিল। একপ্রান্তে মাত্র একটি বড় গাছ। তাহার নিয়ে গভীর খাদ। অপর দিকে জঙ্গল।

সে ফাঁকা উচ্চ যায়গায় দাঁড়াইয়া অনেকবার বাঘ মারিয়াছিল। তাহার লক্ষ্য অভ্রান্ত, শরীরেও অশুরের গায় শক্তি। হাতে বন্দুক থাকিতে সে যমকেও ডরাইত না।

জঙ্গলের অবস্থা দেখিয়া তাহার মনে হইয়াছিল, সেখানে বাঘ থাকা সম্ভবপর নহে। কাজেই অতিরিক্ত সতর্কতা অবলম্বন করার প্রয়োজনীয়তা সে অনুভব করে নাই। বিশেষতঃ তিন জন শিকারী উপস্থিত থাকিতে বিস্তৃত খাদের অপর পারে যদি বাঘ দেখাও দেয়, তাহা হইলে অনাগ্রাসে সে শাদুলের পরপারযাত্রার ব্যবস্থা করিতে পারিবে।

কিন্তু ঘটনাস্থলে আসিয়া কলিকাতার বন্ধুযুগলের দেহ বেরূপভাবে আন্দোলিত হইতেছিল, তাহাতে যতীন্দ্র বুঝিল, ইহারা ইতিহাসপ্রসিদ্ধ বাক্যবীরই বটে—জীবনে কখনও বন্দুক ধরিয়া বড় জন্তু মারিয়াছে কি না সন্দেহ। বাঙ্গালী বীরযুগল বৃক্ষটিতে আরোহণ করিবার জন্ত অসীম ব্যগ্রতা প্রকাশ করিতে লাগিল। কিন্তু শেষে দেখা গেল, গাছে চড়িবার অভ্যাসও তাহাদের নাই। তাহাদের কাতর মুখ, কম্পিত দেহ দেখিয়া অবশেষে দয়াদ্রু-চিত্তে যতীন্দ্রনাথ তাহাদিগকে কোনও মতে গাছে চড়াইয়া দিল। বন্দুক সহ গাছে চড়িবার পর, দুইবার তাহাদের হস্ত হইতে বন্দুক স্থলিত হইয়া নীচে পড়িয়া গেল।

অবশেষে যতীন্দ্রনাথের উপদেশে তাহারা বৃক্ষদেহের সঙ্গে

## যমুনাধারা

গাত্রবস্ত্র দ্বারা আপনাদিগকে আবদ্ধ করিয়া রাখিল। যতীন্দ্র তাহার পর একটু উদ্বিগ্নভাবে চারিদিকে তীক্ষ্ণ দৃষ্টিপাত করিতে লাগিল। বেলা তখন অপরাহ্নের, দিকে গড়াইয়া পড়িতেছিল। দূরে দলবদ্ধ গ্রামবাসী ও সঙ্গী শিকারীদিগের চীৎকারধ্বনি শুনা যাইতেছিল।

বাঘ মারা বন্দুকে গুলী ভরিয়া যতীন্দ্র ইতস্ততঃ চাহিতেছে, এমন সময় তাহার মনে হইল, খাদের ওপারের জঙ্গল ঈষৎ নড়িয়া উঠিল। পর-মুহূর্ত্তে বিড়ালাকৃতি দীর্ঘকায় একটি জানোয়ার একলক্ষ্যে বিস্তৃত খাদটি অতিক্রম করিয়া এপারের ক্ষুদ্র জঙ্গলে প্রবেশ করিল।

যতীন্দ্র বুঝিল, সন্ধ্যাকাল আসন্ন। সে বৃক্ষারোহী বন্ধু-যুগলকে সতর্ক হইতে বলিল। তাহার ব্যাঘ্রটিকে দেখিয়াছিল—একটা অক্ষুট শঙ্কিত আর্তনাদ তাহাদের কণ্ঠ হইতে বাহির হইয়া গেল। যতীন্দ্র দেখিল, বাঘটি তাহার ঠিক সম্মুখভাগে প্রায় ৬০৭০ হাতদূরে জঙ্গলের মধ্যে একটি বড় পাথরের অন্তুরালে থাবা পাতিয়া বসিয়াছে। শুধু তাহার প্রকাণ্ড মুখমণ্ডল দেখা যাইতেছিল।

কোনও দিকে পলায়নের পথ নাই। সম্মুখে স্বয়ং কাল সম্প্রদানের জঘ্ন উন্মুখ। সে যে খুবই বুদ্ধিহীনতার পরিচয় দিয়াছে—বন্ধুযুগলের বাক্যচ্ছটার মুগ্ধ হইয়া, তাহাদিগকে শিকারী ভাবিয়া, তাহাদিগের সাহায্যের আশায় কঁাকা যায়গায় দাঁড়াইয়াছে, ইহা মনে করিয়া মুহূর্ত্তের জঘ্ন তাহার মনে অনুতাপ জাগিল। কিন্তু প্রত্যাৎপন্নমতির বলে সে কর্তব্য অবধারণ করিয়া ফেলিল। অপেক্ষাকৃত নিরাপদ স্থানেই সে আছে। এখনই লক্ষ্য করিয়া গুলী

## যমুনাধারা

নিষ্ফেপ না করিলে রক্ষার উপায় নাই। সে ব্যাঘ্রের মুখমণ্ডলের দুর্বল অংশটি লক্ষ্য করিয়া বন্দুকের ঘোড়া টিপিল।

এ পর্য্যন্ত কখনও তাহার লক্ষ্য ভ্রষ্ট হয় নাই। এনারও হইবে না, ইহাই তাহার ধ্রুব বিশ্বাস ছিল। পরমুহূর্ত্তেই একটা ভীষণ ধাক্কায় তাহার দেহ টলিয়া উঠিল। কিন্তু এইরূপ একটা আশঙ্কা করিয়া সে প্রস্তুত হইয়াই ছিল। কাজেই প্রচণ্ড শক্তিবলে সে দাঁড়াইয়াই রহিল। কিন্তু তখনই দেখিল, একটা ব্যাদিত, দংষ্ট্রাবহুল ভীষণ বদন তাহার মস্তকের উপর নামিয়া আসিতেছে। তাহার পৃষ্ঠদেশে যে চাপ পড়িয়াছিল, তাহা অসহ্য হইয়া উঠিয়াছে।

নিমেষমধ্যে যতীন্দ্র বন্দুকের কুঁদা দুই হস্তে ধারণ করিয়া প্রভূত শক্তি-প্রয়োগ সহকারে ব্যাঘ্রের উদরে আঘাত করিল। সে আঘাত-বেগ সহ্য করিতে না পারিয়া ব্যাঘ্র বিপরীত দিকে পড়িয়া গেল। বন্দুক হস্ত হইতে স্থলিত হইয়া, খাদে গড়াইয়া গেল। সে-ও টাল সামলাইতে না পারিয়া খাদের মধ্যে গড়াইতে গড়াইতে নামিয়া গেল।

একটু প্রকৃতিস্থ হইয়া সে বন্দুকটি তুলিয়া লইল। তার পর হামা দিয়া ধীরে ধীরে খাদ বাহিয়া উপরে উঠিল। ব্যাঘ্রের কোনও চিহ্ন নাই। বৃক্ষের উপরে বন্ধুগল মৃতকল্প হইয়া রহিয়াছে। সহসা সে দেখিল, রক্তধারা তাহার পৃষ্ঠদেশ প্রাবিত করিয়া ভূমিতল সিঁকু করিতেছে। পুক সোয়েটার ও ওভারকোট ছিন্ন-ভিন্ন—পৃষ্ঠদেশের মাংসও ব্যাঘ্রনখরে বিদীর্ণ।

মাগার সে একটা দীর্ঘ শালের উড়ানি পাগড়ী করিয়া বাধিয়া-

## যমুনাধারা

ছিল। উহা সংঘর্ষের সময় খুলিয়া পড়িয়া গিয়াছিল। তাহা খুলিয়া সে বন্ধুদিগকে তাড়াতাড়ি গাছ হইতে নামিতে অনুরোধ করিল। তাহারা প্রথমে নামিতে চাহে নাই। শেষে কঠোর তিরস্কারবাক্য শুনিয়া তাহারা নামিয়া আসিল। যতীনের নির্দেশমত সেই শালের উড়ানির দ্বারা তাহার ক্ষতস্থান খুব জোরে বাঁধিয়া দিল।

এ দিকে শিকারীরা দলবল সহ তখন ঘটনাস্থলে আসিয়া পৌঁছিয়াছে। বাঘটার কোন চিহ্ন না দেখিয়া একটু অগ্রসর হইতেই রক্তের দাগ দেখা গেল। উহার অনুসরণ করিয়া সকলে কিছু দূর গিয়া দেখিল, পাহাড়ের একটা স্বল্পবিস্তৃত গুহাদ্বারে বাঘটি মরিয়া পড়িয়া আছে। একই গুলিতে তাহার ইহলীলা সাক্ষ হইয়াছিল।

সকলে রুদ্ধশ্বাসে এই বিচিত্র কাহিনী শুনিতেছিল। সুশীল রুদ্ধনিশ্বাসে বলিল, “তার পর?”

যতীন্দ্রনাথ হাসিয়া বলিল, “তার পর, বাঘে ছুঁলে আঠারো মাস। প্রায় দেড় বছর ঘা শুকুতে লেগেছিল। আমার বাইরের ঘরে বাঘের ছালটা হয় ত দেখে থাকবেন।”

“ও! সে ত মস্ত বড় বাঘ! ওটাকেই আপনি মেরে ছিলেন?”

ললিত একবার চাহিয়া দেখিল, তিনটি তরুণীর নয়ন বিষয়ে বিস্ফারিত হইয়া উঠিয়াছে।

এমন সময় পিসীমার ডাক আসিল, “ওরে তোরা সব আয়, খিচুড়ি নেমেছে।”

সকলে তাড়াতাড়ি চত্বরের দিকে অগ্রসর হইল।

## তেইশ

“মাসীমা !”

মাসীমা উমাশনী তখন পাটীসাপটা ভাজা শেষ করিয়া ক্ষীরের পুনির, পায়স চড়াইয়া দিয়াছিলেন। হাত দিয়া কড়াইয়ের ঢধ নাড়িতে নাড়িতে তিনি বলিলেন, “কিছু কথা আছে, মনি মা ?”

মনিমালা বলিল, “হাঁ, ক’দিন ধ’রে নিরিবিলিতে তোমার সঙ্গে কথা কহিতে পারি নি। ঠাকুরঝি ও সুধি পাশের বাড়ীতে বেড়াতে গেছে। এখন তাই ছুটে এলাম।”

ত্রিকূট পাহাড় হইতে বেড়াইয়া আসিবার দুই দিন পরে, মাসীমাতা পুলি-পিঠার আয়োজন লইয়া আজ ব্যস্ত ছিলেন। সম্পন্ন যতীন্দ্রনাথ ও তাহার পিসীমাকে জল-যোগের জন্ত আজ তিনি রাত্রিতে নিমন্ত্রণ করিয়াছিলেন। যমুনা, সুধমা, মনিমালা তাঁহাকে সাহায্য করিতে চাহিলেও তিনি কাহারও সাহায্য গ্রহণ করেন নাই। একাই তিনি নিরামিষ ঘরে কাজে বসিয়াছিলেন।

মনিমালা বলিল, “সুধির বিয়ে দেবার কি করছেন, ‘বয়স ত অনেক হয়ে গেল, মাসীমা।”

উমাশনী বলিলেন, “তা ত বুঝি। তোর দাদা চেঁচাও কচ্ছে কিন্তু সুধি বিয়েতে মত দিতে চায় না।”

“কেন, মাসীমা ?”



## যমুনাধারা

মণিমালা সুষমার ধীর প্রকৃতির কথা অবগত ছিল। লেখাপড়া যথেষ্ট শিখিলেও, সে যে কোন দিক দিরাই আধুনিক যুগের প্রতীচ্য মনোরুত্তির পক্ষপাতিনী নহে, তাহা মণিমালা খুব ভাল করিয়াই জানিত। প্রাচ্য ভাবধারার বিশেষ অনুরাগিনী, মনে প্রাণে হিন্দু নারী বলিয়া সুষমা অনেক সময় প্রতীচ্য শিক্ষা-দীক্ষার দোষ কীৰ্ত্তন করিত। কাজেই প্রতীচ্য ভাবের মোহে সে যে বিবাহে অনিচ্ছা প্রকাশ করিয়াছে, ইহা মণিমালার বিশ্বাস হইল না।

মাসীমা বলিলেন, “তা ঠিক বলতে পারি না। বিয়ে করা দরকার, তা সে জানে, কিন্তু তবু তার অনিচ্ছা যে কেন, তা আমি অনেক চেষ্টা করেও জানতে পারি নি। তবে মনে হয়—”

মাসীমাকে থামিতে দেখিয়া মণিমালা বলিল, “কি বলছিলেন, থেমে গেলেন কেন, মাসীমা?”

“না, সেটা আমার অনুমানমাত্র। বলছিলাম কি, তোমার বোঁবাঁটা উয়ানক অভিমানিনী। উপেক্ষা, অনাদর, বেচা-কেনার ব্যবস্থা—এ সব ও সহিতে পারে না। পুরুষের তরফ থেকে খালি পরীক্ষা চলবে, মেয়েছেলে যেন কেনা-বেচার জিনিষ, এই উপেক্ষা বা অনাদর সূষি সহ করতে পারে না। তাই বোধ হয়, কনে দেখা দেবার ব্যবস্থা যদি না হয়, বিয়ে করতে সূষির অমত হবে না কিন্তু আমাদের দেশে সে ব্যবস্থা ত হ’তে পারে না, তাই ও বিয়েব কথা কাণে তুলতে চায় না।”

মণিমালা নিঃশব্দে কয়েক মুহূর্ত্ত বসিয়া রছিল। তার পর বলিল, “কিন্তু সূষি কি ক’রে জানলে, সব ষায়গাতেই কেনা-বেচার ব্যবস্থা

## যমুনাধারা

হবে? ও লেখাপড়া শিখেছে, দেখতে চমৎকার, তাতে ওর ভাল বিয়ে হবে না, কে বললে?”

মাসীমা পুলিপিঠের কড়াইটা নামাইয়া রাখিয়া বলিলেন, “ওরে মনি, ওর একবার বিয়ের কথা হয়েছিল—চার বছর আগে।”

“কার সঙ্গে, মাসীমা?”

কণ্ঠস্বর নামাইয়া তিনি বলিলেন, “পাটনার তখন বেড়াতে গিয়েছিল, তোমাদের এই ললিত ডাক্তার—”

মনিমালা চমকিয়া উঠিল। বাধা দিয়া বলিল, “ডাক্তার বাবুর সঙ্গে ওর বিয়ের কথা হয়েছিল না কি?”

“শোন না বলি। বন্ধুর বাড়ীতে থাকত। বন্ধু কাশী চলে গেলে ললিত ওখানেই রইল। তখন ডাক্তারি পরীক্ষা—শেষ পরীক্ষা দিয়েছিল, পাশও হয়েছিল। সেই সময় ডবল নিউমোনিয়া হয়। খবর পেয়ে আমরা দেখা-শুনা করতে লাগলাম। আহা, বিদেশে এসেছে, আপনার জন কেউ নেই। সূষি সেবার ওকে যে রুম ক’রে শুশ্রূষা করেছিল, আমি ত দেখে অবাক!”

মনিমালা সবিস্ময়ে বলিল, “এ কথা ত শুনিনি, মাসীমা!”

উমশনী বলিলেন, “শোনবার সময় পেলাম কোথায়, মা! কিছুদিন বাদে খবর নিয়ে জানা গেল, ললিত আমাদের স্বঘর, বিয়েও হয় নি। তোর দাদা, ললিতের বন্ধুকে দিয়ে প্রস্তাব করালে—ছেলোটিকে সত্যি আমার পছন্দ হয়েছিল। বিধুও ওর খুব সখ্যাতি করত। কিন্তু ললিত তখন বিলেতে যাবে বলে স্থির ক’রে রেখেছিল। তাই রাজি হ’ল না। আসল কথা, সূষি পাশ-টাশ

## যমুনাধারা

করে নি ব'লে ললিতের বোধ হয় পছন্দ হয় নি। ঐ রকম একটা কথাও যেন বলেছিল।”

মণিমালা বলিল, “এতদূর গড়িয়েছিল, মাসীমা! স্মৃতি কি এ সব কথা শুনেছিল?”

একটা নিশ্বাস ত্যাগ করিয়া তিনি বলিলেন, “শুনেছিল বৈ কি। তার পরই সে আমাকে বলেছিল, তোমরা উপযাচক হয়ে কেন অপমান হ'তে গেলে, মা? আর কখনও আমার বিয়ের নাম করতে পাবে না বলছি। ও কত বড় অভিমানিনী, তা ত তোমার অজানা নেই, মা। তার পরই মাটিক পাশ ক'রে ও প্রেম-মহাবিছালবে পড়তে গিয়েছিল। সে ক'বছর আমি বৃন্দাবনেই ছিলাম।”

“তা জানি, কিন্তু ললিত ডাক্তারের কথা জানতাম না।”

মণিমালা নীরবে কি ভাবিতে লাগিল।

এমন সময় সুষমা ও যমুনা রান্নাঘরের দরজার কাছে আসিয়া টাঁড়াইল। তাহাদের প্রসন্ন আননে শান্তির বিমল দীপ্তি দেখিয়া মণিমালা একটা স্বস্তির নিশ্বাস ত্যাগ করিল। তার পর বলিল, “বেড়ান হ'ল ভাই!”

সুষমা বলিল, “দিদি, ওদের বাড়ীতে অনেক বই আছে। নতুন বই, বেশ পড়া যাবে।”

মণিমালা হাসিয়া বলিল, “এতক্ষণ কি বই পড়া হচ্ছিল?”

“না দিদি, খানিক তাস খেলা হ'ল। তার পর—”

আরক্তমুখে ভগিনীকে থামিতে দেখিয়া মণি বলিল, “থামলি যে?”

যমুনা হাসিতে হাসিতে বলিল, “তার পর জিজ্ঞাসা করলে,

## যমুনাধারা

আমরা ব্রাহ্ম কি না। মাথায় সিঁদুর নেই, শাঁখা-লোহা নেই, অথচ ছোটটি আমরা নইত ! আমি তখন বললাম, আমরা রীতিমতই হিন্দু, তবে সুষমার কুমারীব্রত এখনও শেষ হয়নি 'ব'লে—সিঁদুর, শাঁখা লোহার খাড়ুর সঙ্গে অসহযোগ চলছে।”

সকলেই যমুনার কথার ভঙ্গীতে হাসিয়া উঠিল। যমুনা বলিল, আমার কথা শুনে ওরা আমার সম্বন্ধে কোন প্রশ্নই তুললে না, আমিও বেঁচে গেলুম।”

এবার কিন্তু কাহারও মুখে হাসির রেখা ফুটিয়া উঠিল না। মণিমালার গম্ভীরমুখে বসিয়া রহিল। মাসীমা খুব মনোযোগ দিয়া মুগের পুলি ভাজিতে লাগিলেন।

সুষমা একবার সখীর মুখের দিকে স্থিরদৃষ্টিতে চাহিল। মণিমালারও নন্দার দিকে না চাহিয়া পারিল না। কিন্তু যমুনার মুখে অন্য কোনও ভাবের অভিব্যক্তি দেখা গেল না। সাধারণ নিস্পৃহতার রেখা তাহার আননে মুদ্রিত থাকিত, তাহার অতিরিক্ত—অন্য কোনও ভাব-রেখা তাহার সমগ্র মুখমণ্ডলে দেখা গেল না।

“ও মণি—তোরা দেখ না, পুলিগুলো ঠিক ভাজা হলো কি না। যমুনা মা,—তুইও ছোটো পুলি চেখে দেখ না, মা !”

যমুনা হাসিয়া বলিল, “মাসীমা যেন কি ? আমি কি এখন গাই ? হাঁ বোদি, তুমিই বল ?”

কথাটা চাপা দিয়া মণিমালার বলিল, “সুখি খুব ভাল চাখে মাসীমা। ওরে সুখি, তুই চেখে দেখ, ভাই !”

## চব্বিশ

বেলাবাগান হইতে সুধমা একা বাড়ী ফিরিতেছিল।

পাটনার কলিকাতাবাসী একটি পরিবারের সহিত তাহার পরিচয় হইয়াছিল। তাহারই প্রায় সমবয়স্কা একটি তরুণীর সহিত পাটনার তাহার ঘনিষ্ঠ পরিচয়—প্রায় বন্ধুত্ব দাঁড়াইয়াছিল। তিন বৎসর পরে সেই তরুণী এবার স্বামিপুল্লসহ দেওঘরে—বেলাবাগানে বায়ু-পরিবর্তনে আসিয়াছিল। আজ পরিচিতা তরুণীর বাড়ীতে মধ্যাহ্ন আহারের পর বেড়াইতে গিয়াছিল। যখন তাহার সঙ্গিনী হইতে পারে নাই।

তখনও আকাশে দিনের আলো ছিল। বেলাবাগানের পর পুরণদেহের পার্শ্ববর্তী পথ দিয়া সে উইলিয়ম্ টাউনের দিকে চলিতেছিল। পথটি অপেক্ষাকৃত নির্জন এবং বৃক্ষচ্ছায় মনোরম। কিছু দূরে বাম পার্শ্বে নন্দন পাহাড় দেখা যাইতেছিল। সুধমার মনটি আজ বেশ প্রফুল্ল ছিল। শীতের আর্দ্রতাশূন্য অপরাহ্নের বাতাস তাহার গরমবস্ত্রাচ্ছন্ন দেহে ঈষৎ কম্পন তুলিলেও, বেশ সস্ত্র বোধ হইতেছিল।

সখীস্থানীয়া তরুণীর সহিত রহস্যলাপে আজ সে অত্যন্ত লঘুচিত্তে পথ চলিতেছিল। দেওঘরে মহিলারা অসঙ্কোচে এবং নিরাপদে, সঙ্গী বা সঙ্গিনীশূন্য হইয়া ভ্রমণ করিয়া থাকেন। ছুট লোকের লুক দৃষ্টি কাহারও সম্মুখস্থানি ঘটায় না।

## যমুনাধারা

সুধমার মনে একটা গানের সুর জাগিতেছিল। সে ভালই গাইতে পারিত ; কিন্তু পথে ঘাটে গান করা সম্ভব নহে মনে করিয়া সে মনে মনেই সুরটিকে উপভোগ করিয়া চলিতে লাগিল।

তাহার মনে এক একবার 'যমুনার কথা জাগিয়া উঠিতেছিল। যে তরুণী সখীর গৃহ হইতে সে ফিরিতেছিল, সে যমুনারই সমবয়স্কা। তাহার গৃহপ্রাঙ্গণ বালকবালিকার কলহাশ্রে কেমন মুখরিত হইয়া উঠিয়াছে। স্বামী-প্রেমের অনাবিল আনন্দরসে তরুণীর জীবন কি মধুর ও পবিত্র হইয়াই উঠিয়াছে! কিন্তু যমুনা এই বয়সে যোগিনী, ব্রহ্মচারিণী। যমুনার মনের গতির সহিত এই কর দিনে সে আরও পরিচিত হইয়াছে। নিদারুণ দুঃখকে সে স্বীকার করিয়া লইয়াছে সত্য; কিন্তু ঐশ্বর্যা ও মৌন্দর্য্যের অধিকারিণী এই তরুণীর ভাবী জীবন কি নৈরাশ্রপূর্ণ নহে?

চিন্তা করিতে করিতে সহসা সুধমা আপন মনে একটু হাসিল। তাহার জীবনও কি প্রায় যমুনার অনুরূপ নহে?

“আজ আপনি একলা বেরিয়েছেন যে?”

ঈষৎ চমকিত হইয়া সুধমা সম্মুখে চাহিয়া দেখিল। তাহার চিন্তাসূত্র ছিন্ন হইয়া গিয়াছিল।

ললিত ডাক্তারের সহিত এখানে আসিয়া অবধি এক দিনও তাহার কথা কহিবার সুযোগ অথবা প্রয়োজন হয় নাই। প্রত্যহই দেখা হইবার সুযোগ ঘটিলেও সুধমা যে তাহাকে এড়াইয়া চলিত, ইহা কি ললিতচন্দ্র বুঝিতে পারিত না?

পথের মাঝে প্রায় জনবিরল স্থানে অকস্মাৎ ললিতচন্দ্রের এই

## যমুনাধারা

প্রকার প্রশ্নের উত্তর সে দিবে কি না, মুহূর্ত্ত চিন্তায় তাহা স্থির করিয়া লইয়া সুধমা বলিল, “একটু দরকার ছিল।”

সে বাসার দিকে চলিতে আরম্ভ করিতেই ললিত বলিয়া উঠিল, “আপনাকে একটা কথা বলব?”

তাহার দিকে না চাহিয়াই চলিতে চলিতে সুধমা বলিল, “বলতে পারেন।”

“চার বছর আগে আপনি আমাকে চিন্তেন। কিন্তু এখানে দেখা হবার পর থেকে আপনি আমাকে চিন্তেই পারেন নি! সত্যিই কি আপনি চিন্তে পারেন নি, না আমার কোন দোষের জন্ম—”

সুধমা গম্ভীরভাবে বলিল, “অপনাকে নিশ্চয় চিন্তে পেরেছি। কিন্তু আমি হিন্দু বাঙ্গালীর মেয়ে, সেটা আপনি ভুলে গেলেন কেন?”

ললিত সহসা যেন কণাহত হইল। বাস্তবিক এ কথাটা তাহার বিস্মৃত হওয়া সম্ভব হয় নাই। বালিকার পক্ষে যে অসঙ্কোচ ব্যবহার চলিতে পারে, হিন্দু বাঙ্গালী তরুণীর পক্ষে তাহা সম্ভব নহে, প্রচলিত রীতিরও বিরোধী। সত্য, অতি সত্য। কিন্তু—

ললিতের তখনই মনে পড়িল, তাহার সম্বন্ধে সুধমা যে ব্যবস্থা অবলম্বন করিয়াছে, যতীন্দ্রনাথ সম্বন্ধে তাহা ত করে নাই। সে এই কয় দিনেই অনেকবার লক্ষ্য করিয়াছে, যতীন্দ্রনাথের সহিত আলাপ ব্যবহারে সুধমার বিশেষ কোন সঙ্কোচ দেখা যায় নাই। অথচ দেওঘরে আসিবার পূর্বে এই ব্যক্তি তাহার সম্পূর্ণ অপরিচিত ছিল।

এই পার্থক্যের অনুভূতি তীব্রভাবে ললিতচন্দ্রের হৃদয়কে আহত

## যমুনাধারা

করিল। সে ঈষৎ উত্তেজিতভাবে বলিল, “আপনি সেবার অসুখের সময় আমার জীবন রক্ষা করেছিলেন। সে জন্য আমি কৃতজ্ঞ।”

দ্রুত চলিতে চলিতে সুধমা বলিল, “কিন্তু পথটা এখন নির্জন। আমাকে একা যেতে দিন। এমনভাবে আপনার সঙ্গে পথ চলায় মানুষের সমালোচনার—”

বাধা দিয়া লজ্জিতভাবে ললিত বলিল, “মাপ করুন। অতটা আমি বুঝতে পারি নি। আমি চ’লে যাচ্ছি।”

ললিত মুহূর্তে ঘুরিয়া দাঁড়াইয়া বিপরীত দিকে চলিল। একটু গিয়াই সে একটা আম্রবৃক্ষতলে দাঁড়াইল।

সুধমা দ্রুত, দৃঢ় চরণে ঐ ত বাড়ীর দিকে চলিয়াছে! তাহার শাড়ীর চওড়া লালপাড় তখনও দেখা যাইতেছিল। স্বচ্ছন্দ গতিভঙ্গীতে মাধুর্যা নাই কি? আনুলায়িত দীর্ঘ কেশরাজি শাদা শালের উপর লুটাইয়া পড়িয়াছিল।

ললিতচন্দ্র স্থায়ী ঞায় দাঁড়াইয়া ভাবিতে লাগিল।

এই তরুণী যখন কিশোরী ছিল, তখন ইহার সহিত তাহার বিবাহের প্রস্তাব হইয়াছিল। নিতান্ত উপেক্ষার সহিতই সে তখন সুধমার দিক হইতে আপনাকে ফিরাইয়া লইয়াছিল। কিন্তু এই তরুণীর সুস্থ সবল দেহের ঞায় মনটিও যে সুস্থ এবং সবল, তাহার জন্য গবেষণার প্রয়োজন আছে কি? প্রগল্ভা সে নহে অথচ দ্বিধাহীন, কুণ্ঠাহীন কণ্ঠে, সে সত্যকে প্রকাশ করিতে বিলম্ব করে না।



## যমুনাধারা

স্ফীর্ণিত আলোকে তরুণীর সঞ্চরণমান দেহ ক্রমেই দূরে সরিয়া যাইতেছিল। একবারও সে পশ্চাতের দিকে ফিরিয়া চাহিল না। সামান্য কোতূহলও পর্য্যন্ত তাহার নাই! আশ্চর্য্য!

মোড়ের বাঁকে যখন তাহার দেহ অদৃশ্য হইল, তখন একটা গভীর দীর্ঘশ্বাস ললিতের নামাপথে নির্গত হইল। সে শব্দে ললিত নিজেই চমকিয়া উঠিল।

কেম, কেন এই দীর্ঘশ্বাস?—

তরুণীর শূন্য গতিপথের দিকে চাহিয়া চাহিয়া অবশেষে সে দৃষ্টি ফিরাইয়া লইল। তারপর ধীরে ধীরে সে পথ চলিতে লাগিল।

ট্রান্সরোডের উপর তখন বায়ুসেবনের জন্ত নর-নারী বালক-বালিকা হাশ্ব প্রফুল্লমুখে চলিতেছিল।

কি সুখী এই সকল পথচারী নর-নারী! তাহাদের আননে স্বচ্ছন্দ ও আনন্দপূর্ণ গৃহস্থালী—দাম্পত্য-জীবনের আভাস যেন সুস্পষ্ট হইয়া উঠিয়াছে। ললিতের মনে হইল, তাহার এই আটশ বৎসরের জীবনে এমন পূর্ণতার কোনও ইঙ্গিত কখনও রেখাপাত করে নাই! বাল্যকালের স্মৃতি হইতে যৌবনের উপকূলে কোনও শাস্তির বার্তা পৌঁছে নাই। নিঃসঙ্গ জীবনে সতীর্থ বা পরিচিত ব্যক্তিগণের নিয়মিত বা অনিয়মিত আগমন, বা সাময়িক আলোচনার ভিড় ছাড়া, অণুবিধ স্ররণযোগ্য অথবা নির্ভরযোগ্য কোনও অবস্থার পরিচয় কি সে পাইয়াছে?

অর্থ তাহার আছে; জীবন-সংগ্রামে জয়লাভ করিয়া প্রতিষ্ঠা অর্জনের প্রধান সুযোগ তাহার করায়ত্ত; কিন্তু তাহাদের জন্ত

## ষমুনাধারা

সে সংগ্রামের প্রয়োজন ঘটিয়া থাকে, ললিতের তেমন কেহ ত নাই। তাহার জীবন বন্ধনহীন। সন্ন্যাসী হইতে পারিলে, তাহার পক্ষে হয় তৈরুপ অবস্থা বাঞ্ছনীয় হইতে পারিত। কিন্তু তেমন কোন স্পৃহা ললিতের নাই। সে গৃহী হইতে চাহে—দাম্পত্য-জীবনের রসাস্বাদ করিয়া সে-জীবনকে সার্থক করিয়া তুলিবার জন্য সম্পূর্ণ আগ্রহান্বিত। সে কুনিয়াছে, দাম্পত্য-জীবনে অবিশ্রান্ত সুখ ও আনন্দ নাই। মান-অভিমান, বিরহ-মিলন, আঘাত-প্রতিঘাত সে জীবনকে উত্তাল তরঙ্গ-সঙ্কুল সমুদ্রের ঞায় উদ্বেল চঞ্চল করিয়া তুলে। কিন্তু তথাপি জীবনের বৈচিত্র্য তাহাতে অনুভব করা ত চলে। আলোক ও অন্ধকার—সুখ ও দুঃখ মানব-জীবনের সহিত অনুসৃত হইয়া থাকে। তাহাকে এড়াইয়া বাহারা চলিতে চাহে, তাহারা সৰ্বত্যাগী সন্ন্যাসী ; গৃহীর তাহা কাম্য নহে।

ললিত গৃহীর জীবন যাপন করিতে চাহে। দুঃখ বা অশান্তিকে ভয় করিয়া চলিতে সে রাজী নহে। কিন্তু আজ পর্য্যন্ত এই আকাঙ্ক্ষিত গৃহস্থ-জীবন যাপনের সুযোগ তাহার ঘটিল না।

চলিতে চলিতে সে সোজা অনেক দূর অগ্রসর হইয়া গেল। পুরণদেহের শেষাংশে উপস্থিত হইয়া সে দেখিল, প্রত্যহ সে যেখানে আসিয়া খানিকক্ষণ পশ্চিম-দিগন্তের দিকে চাহিয়া থাকে, সেইখানেই আসিয়া উপস্থিত হইয়াছে। দীর্ঘ প্রায়ের অতিক্রম করিলে, পশ্চিমের দিকে রোহিণীতে যাওয়া যায়।

তখনও আকাশে সূর্যাস্ত-দীপ্তি ম্লান হইয়া পড়ে নাই। সে নিমিট পনের স্তব্ধভাবে দাঁড়াইয়া থাকিয়া কিরিয়া চলিল। অতি

## যমুনাধারা

মুহূর্ত্তরূপে সে চলিতে লাগিল। এই পথের ধারেই যতীন্দ্রনাথের বাড়ী। ত্রিকুট পাহাড় হইতে বেড়াইয়া আসিবার পর আর পাঁচ দিনের মধ্যে সে একবারও যতীন্দ্রনাথের বাড়ী যায় নাই। সে ইচ্ছা করিয়াই এই কয় দিন সাধ্যমত যতীন্দ্রনাথকে এড়াইয়া চলিয়া আসিতেছে। এই রূপবান্, অসীম-বলশালী এবং বহু গুণে গুণবান্ যুবককে সে যেন সহ্য করিতে পারিতেছিল না। সে মনে মনে দৃঢ়-সিদ্ধান্ত করিয়াছিল, যতীন্দ্রনাথ তাহার প্রতিযোগী, তাহার ভাগ্যাকাশে শনিগ্রহস্বরূপ এই যুবক সমুদিত হইয়াছে।

• হাঁ, এবিষয়ে তাহার মনে সংশয় নাই। যমুনা সূনিশ্চিত ভাবে যতীন্দ্রনাথের প্রতি অনুরক্তা, ইহা তাহার দৃঢ় ধারণা। সেই জন্যই যমুনা তাহাকে এড়াইয়া চলে; তাহার সম্মুখে পর্য্যন্ত আসিতে চাহে না।

গভীর দীর্ঘশ্বাস ত্যাগ করিয়া সম্মুখের দিকে চাহিতেই সে থমকিয়া দাঁড়াইল।

সে দেখিল, যতীন্দ্রনাথের বাড়ীর সম্মুখেই সে আসিয়া পড়িয়াছে বাহিরে ফটক খোলা। ভিতরে চারিটি নারী-মূর্ত্তি। মণিমালা, যমুনা, সুষমা এবং মাসীমাতাকে চিনিতে তাহার মুহূর্ত্ত বিলম্ব হইল না। • যমুনার ক্রোড়ে যতীন্দ্রনাথের পুত্র সতু। যমুনা পরম স্নেহভরে পুণঃ পুনঃ সতুর মুখে চুমা দিতেছে। অদূরে যতীন্দ্রনাথ দাঁড়াইয়া।

যেন অকস্মাৎ কেহ ললিতের পৃষ্ঠে কশাঘাত করিল। সে আর দাঁড়াইল না; • দ্রুতবেগে সম্মুখের দিকে চলিতে লাগিল।

## পাঁচিশ

“মাসীমা, তুমি বড় সুন্দর !”

সতুকে বৃকের উপর তুলিয়া লইয়া তাহার সুন্দর কচি মুখে অজস্র চুমা দিয়া যমুনা বলিল, “তুমি আমার ভালবাস, সতু ?”

“খু-উ-ব ভালবাসি তোমায় ।”

ঘরের মধ্যে তখন কেহ ছিল না । যমুনা সতুর দীর্ঘায়ত, উজ্জল হাশুপ্রফুল্ল চোখের দিকে চাহিয়া চাহিয়া তাহাকে বৃকের উপর চাপিয়া ধরিল । আঃ, কি সুন্দর, কি মধুর, কি পবিত্র ও স্নেহ এই স্পর্শ ! এ সন্তান তাহার নহে ; তথাপি সমগ্র অন্তর, সমগ্র দেহ যেন মাতৃস্নেহের রসে পরিপূর্ণ, উজ্জল হইয়া শিশুকে বেড়িয়া বেড়িয়া স্বপ্নস্বর্গ রচনা করিতে থাকে । দাদার খুকুরাণীকে বৃকে ধরিলে যেমন আনন্দ-শিহরণ জাগে, পরের সন্তান সতুকে কোলে লইয়া ঠিক সমান অনুভূতি প্রবল হইয়া উঠে ।

যমুনার দিকে চাহিয়া সতু বলিল, “মাসীমা, তুমি এতদিন কোথায় ছিলে ? এত দিন তোমায় দেখিনি কেন ?”

তাহাকে কোলে চাপিয়া পশ্চিমের একটা গোলা জানালার ধারে সরিয়া গিয়া যমুনা বলিল, “এতদিন কলকাতায় ছিলাম কি না, তাই তুমি দেখনি ।”

“আচ্ছা মাসীমা, মাকে আমি ছবিতে দেখেছি । বাবার বরে

## যমুনাধারা

মা'র খুব বড় ছবি আছে দেখেছ? তোমাকে কিন্তু মা'র মতই দেখতে।”

মাতৃহীন বালকের কণ্ঠে যে সুর বাজিয়া উঠিল, তাহাতে তাহার প্রাণের তন্ত্রীতেও যেন ঝঙ্কার তুলিল। যমুনা বলিল, “তা ত হবেই, বাবা! তিনি যে আমার দিদি ছিলেন।

আজ সকালবেলা সে সতুকে আনাইয়া লইয়াছিল। ইহাকে দেখিলেই ভালবাসিতে আগ্রহ হয়। সতুও কর দিনে যমুনার এমন অনুরক্ত হইয়া পড়িয়াছিল যে, মাসীমার কাছে থাকিতে পাইলে তাহার আনন্দের সীমা থাকিত না। যমুনা সতুকে স্নান করাইয়া খাওয়াইয়া দিয়া জনহীন দ্বিপ্রহরে তাহাকে লইয়া সোহাগ করিতেছিল। তখন সকলেই যে যাহার ঘরে বিশ্রাম করিতেছিল, কাষেই যমুনার বিশ্রান্তালাপে সে বাধা পাইল না।

“মাসীমা!”

বালকের আহ্বানে যমুনা বলিল, “কি, সতু?”

“আচ্ছা, তুমি মা'র মত চওড়া লালপাড় শাড়ী পর না কেন? তোমার সী'থেয় সিঁদুরও নেই দেখছি। ছবিতে দেখেছি, মা আমার চওড়া লালপাড় শাড়ী প'রে রয়েছেন। তাঁর সী'থেয় সিঁদুর! তোমার নেই কেন, মাসীমা?”

মুহূর্ত্তের জন্ত যমুনার সমগ্র অন্তর ছলিয়া উঠিল। সাত বৎসরের শিশুর মনে যে সংশয় জাগিয়াছে, যুক্তি দিয়া তাহার নিরসন করিবার মত মনের ভাষ যমুনার নাই। শিশুটিরও কৌতূহল-নিবৃত্তির যুক্তি কি?

## যমুনাধারা

যমুনা হাসিমুখে বলিল, “কেন সতু, তোমার মাসীমাকে এমনি ভাল লাগে না?”

“না, তুমি ভাল। তুমি আমার ভাল মাসীমা।”

সতু তাহার দুই ক্ষুদ্র বাহুর দ্বারা যমুনার কণ্ঠদেশ জড়াইয়া ধরিল।

এমন সময় মণিমালা হাস্ত-মুখে ঘরের মধ্যে প্রবেশ করিল। সে ননন্দের দিকে মুগ্ধ দৃষ্টিতে চাহিয়া বলিয়া উঠিল, “ঠাকুরঝি, তোমার কোলে ছেলে-মেরে কি সুন্দর মানায়! ঠিক যেন মা যশোদা!”

যমুনা ভ্রাতৃবধুর দিকে চাহিল, তার পর হাসিমুখেই বলিল, “আর তোমাকে যে গণেশ-জনীর মত দেখায়, সেটা ত দেখতে পাও না, বৌদি!”

তখন মণিমালা ও যমুনা উভয়েই হাসিতে লাগিল।

সতু মণিমালার দিকে মুখ ফিরাইয়া বলিল, “বড় মাসী, শীলা কি করছে?”

সুশীল তাহার নামের মধ্য অক্ষর এবং পত্নীর নামের শেষ অক্ষর মিলাইয়া কণ্ঠার নাম রাখিয়াছিল শীলা।

“সে এখনও ঘুমুচ্ছে বাবা।”

“দিনের বেলা শীলু ঘুমোয়? আমি ঘুমুই না, বড় মাসী। বাবা বলেন, দিনের বেলা ঘুমুনো ভাল নয়।”

“তুমি বাবার সব কথা শোন, সতু?”

মণিমালার প্রশ্নে সতু বলিল, “বাবা আমার বড় ভালবাসেন। তাঁর কথা আমি নিশ্চয় শুনি। তিনি আমায় বড়াইছিলেন, ছ’মাসের

## যমুনাধারা

মধ্যে ফাষ্টবুক আর শিশুশিক্ষা তৃতীয় ভাগ আমাকে শেষ করতে হবে। আমি তাঁর কথামত শেষ করেছি, মাসীমা। জানুয়ারী মাস থেকে আবার বড় বড় নতুন বই পড়ব। বাবার কথা না শুনে আমি পারি ?”

সাত বৎসরের বালকের পিতৃভক্তির প্রবৃত্তির পরিচয় পাইয়া যমুনা ও মণিমালায় অন্তর ভাবাবেগে পূর্ণ হইয়া উঠিল। এখন হইতেই পিতার প্রতি সতুর এত ভক্তি, শ্রদ্ধা, ভালবাসা ! সে যে পুত্ররত্ন, তাহাতে সন্দেহ থাকিতে পারে কি ?

• মণিমালা বলিল, “তুমি খুব ভাল ক’রে লেখাপড়া শিখো, সতু। তোমার বাবা খুব পণ্ডিত ব’লে শুনেছি।”

যমুনা বলিল, “আর তোমার বাবার মত গায়ে জোর করতে পারবে ত ?”

সতু বলিল, “হ্যাঁ, মাসীমা। আমি এখন থেকেই ডায়েল ভাঁজতে যাই; কিন্তু বাবা বলেন, না, আরও একটু বড় না হলে, তিনি আমাকে ওসব করতে দেবেন না। আচ্ছা মাসীমা, কেন বাবা আমায় এখন বারণ করেন, জানেন ?”

“না বাবা, ঠিক জানিনে। তবে তুমি এখন ছোট বলেই ব্যায়াম করতে দেন না।”

“ঠিক, মাসীমা ! আপনি জানেন দেখছি। বাবা বলেন, আমার হাড় আর একটু শক্ত হলেই তিনি নিজে আমাকে শেখাবেন।”

“মা !”

## যমুনাধারা

সকলে চাহিয়া দেখিল, শীলারানী দরজার কবাট ধরিয়া দাঁড়াইয়া ।  
তাহার নয়নে তখনও দিবানিদ্রার ঘোর কাটে নাই ।

সতু যমুনার কোল হইতে তাড়াতাড়ি নামিয়া শীলার কাছে  
দৌড়িয়া গেল । তাহার দুই হাত ধরিয়া সে তাহাকে ঘরের মধ্যে  
ধীরে ধীরে টানিয়া আনিল ।

“খাট থেকে তোকে কে নামিয়ে দিলে রে, শীলু ?”

মাতার প্রশ্নে শীলা বলিল, “বাবা ।”

সতু তখন শীলার হাত ধরিয়া খোলা জানালার ধারে গিয়া  
দাঁড়াইল । তাহাদের নিষ্কলঙ্ক শুভ্রলাটে, আনন ও নয়নে শিশুসুলভ  
সারল্য । সতু তাহার জামার পকেট হইতে খেলানা বাহির করিয়া  
শীলার হাতে দিল । কিছু আগে যমুনা এই খেলানাগুলি সতুকে  
দিয়াছিল ।

উভয়ে আলোক-প্রাবিত ঘরের মেঝের বসিয়া পড়িয়া খেলা  
করিতে আরম্ভ করিল । আর সকলের উপস্থিতির কথা তাহারা  
ভুলিয়া গেল ।

মুগ্ধ দৃষ্টিতে মাতা ও পিসী শীলার সহিত সতুর খেলা দেখিতে  
লাগিল । যমুনার মুখ ক্রমেই যেন গভীর পরিতৃপ্তির আনন্দে হাস্ত-  
প্রকুল হইয়া উঠিল । মণিমালা নিবিষ্টদৃষ্টিতে নন্দার দিকে  
চাহিয়া রহিল ।



## ছাব্বিশ

স্বামীও স্ত্রীতে কথা হইতেছিল ।

শীতের রাত্রি, চারিদিক সুষুপ্ত, শান্ত, স্থির । মধ্যরাত্রি—তখনও মণিমালা ও সুশীল জাগিয়াছিল । ঘরে আলো জলিতেছিল । কিছু আগে উভয়েই একখানি উপন্যাস পড়িতেছিল । সুশীল স্ত্রীকে পড়িয়া শুনাইতেছিল । নূতন উপন্যাসখানিতে মানব-জীবনের একটা কঠিন সমস্যা লইয়া আলোচনা ছিল ।

পড়া শেষ করিয়া উভয়ে কয়েক মুহূর্ত চুপ করিয়াই ছিল । সম্ভবতঃ নিপুণ লেখকের রচনার প্রভাব, গভীর মনস্তত্ত্বের ঘাত প্রতিঘাত তাহাদিগের অন্তরেও আলোড়ন তুলিয়াছিল ।

একপাশে শীলা লেপ গায় দিয়া ঘুমে অচেতন । তাহার শ্বাস-প্রশ্বাসজনিত শব্দ নিস্তরক কক্ষমধ্যে একটা ছন্দোবদ্ধ সুর তুলিতেছিল ।

সহসা সুশীল পত্নীর দিকে ফিরিয়া বলিল, “কিছু দিন থেকে একটা কথা বন্ব ব’লে ভাবছি ।”

মণিমালা বলিল, “কি কথা ?”

“দেখ আমি লক্ষ্য করেছি, যমুনা-যতীন বাবুর কাছে অসঙ্কোচে যায়, কুণাও বলে । কিন্তু ডাক্তার বাবুর সঙ্গে কথা বলা দূরে থাকুক, সামনে থাকতেও রাজি নয় ! তুমি লক্ষ্য করেছ কি ?”

স্বামীর দিকে চাহিয়া মণিমালা বলিল, “শুধু ঠাকুরাঝি কেন, সুধমাও ত ঠিক তাই করে ।”

সুশীল বলিল, “আমি যমুনার ব্যবহারেই লক্ষ্য ক’রে চলেছি ।

## যমুনাধারা

সুখমার কথাটা তেমন ক'রে ভেবে দেখিনি। কিন্তু একটা কথা মনে হয়, যমুনা যতীন বাবুকে খুব শ্রদ্ধা করে।”

মণিমালা হাসিয়া বলিল, “তা করে।”

সুশীল বলিল, “মনস্তত্ত্ববিদ পণ্ডিতরা বলেন, শ্রদ্ধা থেকে প্রেম বা ভালবাসার জন্ম হয়।”

মণিমালা বলিল, “তোমার মনস্তত্ত্ববিদের কথা জানি নে। তা না হয় মেনে নিলাম যে, ওটা সম্ভবপর। কিন্তু তাতে কি?”

সুশীল কর্ণস্বর পূর্কোপেক্ষা মৃদু করিয়া বলিল, “আমার বলবার উদ্দেশ্য, যতীন বাবুর প্রতি এই শ্রদ্ধা থেকে যমুনার মনে ভালবাসার সঞ্চার হয় ত হয়েছে।”

মণিমালা এবার প্রাণ ভরিয়া হাসিতে লাগিল। তবে সে হাস্য স-রব নহে। পত্নীকে এমন ভাবে হাসিতে দেখিয়া সুশীল বলিল, “এত হাস্ছ কেন, মণি?”

অতি কষ্টে হাস্যবেগ সংবরণ করিয়া মণিমালা বলিল, “তোমার যুক্তির বহর দেখলে আপনিই হাসি আসে।”

গম্ভীরভাবে সুশীল বলিল, “কিন্তু যুক্তির মধ্যে ক্রটি কোথায়?”

স্বামীর ঞায়ই গম্ভীর হইতে চেষ্টা করিয়া মণিমালা বলিল, “ভক্তি বা শ্রদ্ধা হ'তে যদি প্রেম বা ভালবাসার জন্ম হয়, ধ'রে নেওয়া যায়, তা হ'লে আমিও ত যতীন বাবুকে খুব শ্রদ্ধা করি। সুখমাও যে সে বিষয়ে কারুর চাইতে কম, এও ত মনে হয় না। তা হ'লে তোমার যুক্তি যে, আমি ও সুখমা ও যতীন বাবুর প্রেমে প'ড়ে গিয়েছি?”

সুশীল শব্যায় নড়িয়া চড়িয়া লেপখানা ভাল করিয়া গায়ের

## যমুনাধারা

উপর টানিয়া দিল, তার পর বলিল, “আরে, তোমার কথা হচ্ছে না। তোমার ত ভালবাসার পাত্র রয়েছে। যাদের তা নেই, তাদের মনে একটা আকর্ষণ হয় না?”

মণিমলা বলিল, “তা তোমার যুক্তিই যদি মানতে হয়, তা হ’লে সুখমারও ত ঐ এক অবস্থা। তা হ’লে সেও যতীন বাবুর প্রেমানুরাগিনী হয়েছে, এই কথাই কি তুমি বলতে চাও।”

সুশীলচন্দ্র কয়েক মুহূর্ত্ত কি চিন্তা করিয়া বলিল, “নারী-চরিত্র যখন দুজ্জের ব’লে সকল দেশের পণ্ডিতগণই বলেছেন, তখন সেটা আশ্চর্য্য নাও হ’তে পারে। শক্তিমান বা বীরকে নারীমাত্রেই ভালবাসে। সুখমা যে বাসে না, তাই বা কে বলতে পারে?”

মণিমলা হাসিয়া বলিল, “নারী-চরিত্র যখন বুঝতেই পার না, তখন সে বিষয়ে কথা কহিতে যাও কেন? অনধিকারচর্চা ত ভাল নয়।”

সুশীলচন্দ্র বলিল, “ও কথা ছেড়ে দাও। আমি সত্যি বলছি, ভারী দুর্ভাবনার পড়ে গেছি। যমুনা যদি যতীন বাবুকেই পছন্দ ক’রে থাকে, আর যদি যতীন বাবুর অমত না থাকে, তবে তাঁর সঙ্গেই আমি আবার ওর বিয়ে দিই। সত্যি, এমন ভাবে ওর জীবনটা ব্যর্থ হবে, এ আমি দেখতে পারছি না।”

মণিমলা স্বামীর দক্ষিণ হস্তের করাস্থলি তাহার কোমল করপল্লবের মধ্যে গ্রহণ করিয়া বলিল, “তোমার ধারণা কিন্তু আমি সত্যি ব’লে মেনে নিতে পারছি না। ললিত বাবুকে দেখে স’রে যাওয়া এবং তাঁকে এড়িয়ে চলবার চেষ্টা, আবার যতীন বাবুর সঙ্গে

## যমুনাধারা

ঠিক বিপরীত আচরণ লক্ষ্য করেই যে তুমি ঠিক করেছ, যমুনার মনে ভালবাসা জন্মেছে, তা ঠিক নয়।”

কৌতূহল বৃদ্ধি পাইবারই কথা। সুশীলচন্দ্র আগ্রহভরে বলিল, “তোমার মনে কি হয়?”

একটু থামিয়া মণিমালী বলিল, “দেখ, মেয়েমানুষ অল্পেই অনেক কথা বুঝতে পারে; তোমরা সে দিকটা বোধ হয় ভাবতেই পার না। পুরুষমানুষের মনে কোন নারীর সম্বন্ধে ভাবান্তর যদি জন্মে, মেয়েরা তা বুঝতে পারে। কেমন ক’রে পারে, তা তোমাকে বোঝাতে পারব না। তবে পারে, এটা খুব সত্যি কথা। ললিত বাবু যে যমুনার জন্ম পাগল, যমুনাকে লাভ করবার যে প্রবল ইচ্ছা তাঁর আছে, মুখ ফুটে তার আভাস না জানালেও, সেটা আমাদের কাছে স্পষ্ট হয়ে উঠেছে। তাঁর মনের এই ভাবান্তর স্পষ্টভাবে বুঝতে না পারলেও যমুনার প্রকৃতি সেটা তার অজ্ঞাতসারেও অনুমান ক’রে নিয়েছে। যে পুরুষের মনে এমন ভাব আসে, মেয়েরা প্রকৃতির সহজ জ্ঞানের সাহায্যে, সে রকম পুরুষকে এড়িয়ে চলে।”

সুশীল এবার হাসিতে লাগিল। তার পর বলিল, “তুমি দেখছি ললিত বাবুর ওপর গোয়েন্দাগিরি আরম্ভ ক’রে দিয়েছ।”

মণিমালী মধুর হাস্ত করিয়া বলিল, “এটা মেয়ে জাতের স্বভাব যে! এ সকল ব্যাপারে তাদের দৃষ্টি ভারী তীক্ষ্ণ। মনে ভেব না, যদি তোমার কোন দিন সে রকম ভাবান্তর ঘটে, আমাদের দৃষ্টি থেকে তা এড়িয়ে যাবে!”

“আচ্ছা গো আচ্ছা সে তখন দেখা যাবে। কিন্তু ললিত

## যমুনাধারা

বাবুর ব্যাপারটা না হয় বুঝলুম। তুমি বলতে চাও, যতীন বাবুতে সে রকম কিছু নেই?”

দৃঢ়স্বরে মণিমালা বলিল, “না, নিশ্চয় নয়। যে পুরুষ নারী সম্বন্ধে নির্বিকার, তাঁর কাছে বয়েসের মেয়েরা অসঙ্কোচে যেতে পারে, যায়ও। যতীন বাবুর মন স্বচ্ছ নির্মল। তাঁর কাছে যেতে, তাঁর সঙ্গে গল্প করতে আমাদের মোটেই বাধে না।”

সুশীল অনেক্ষণ ধরিয়া চূপ করিয়া রহিল। নারীজাতির সহজাত বুদ্ধির এই দিকটা এত দিন তাহার জ্ঞানের অতীত ছিল। সত্যই পুরুষজাতিকে নারী যত সহজে বিশ্লেষণ করিয়া দেখিয়া তাহার স্বরূপ জানিতে পারে, পুরুষ নারীজাতি সম্বন্ধে তাহার কতটুকু জানে? পত্নীর কথায় তাহার দৃঢ় প্রত্যয় ছিল। নারীর সম্বন্ধে পুরুষের ধারণা অধিকাংশ ক্ষেত্রেই ভ্রমাত্মক, ইহা তাহার মাঝে মাঝে মনে হইত বটে; কিন্তু পুরুষজাতি যে সত্যই নারী সম্বন্ধে এমন অজ্ঞ, তাহা সে কোন দিনই কল্পনা করিতে পারে নাই। এত দিন পুরুষ লেখক, পুরুষ গবেষক নারী সম্বন্ধে যে সকল অভিমত গঠন করিয়া গিয়াছেন, তাহা একদেশদর্শিতা-দোষে দুষ্ট। সকল পুরুষের পক্ষে নারীজাতি সম্বন্ধে প্রকৃত জ্ঞানসঞ্চয় করা সম্ভবপর নহে। পুরুষ, তাহার নিজের মনের গতিপ্রকৃতির অনুসরণ করিয়া অনেক সময় নারীর মানসিক অবস্থা এবং কার্যকলাপের বিশ্লেষণ করিয়া থাকে; কিন্তু মণিমালার কথা মত তাহা কত ভ্রান্ত!

স্বামীকে, নীরব দেখিয়া মণিমালা বলিল, “কি ভাব্ছ?”

সুশীল বলিল, “তোমার কথা ভেবে দেখছিলাম। সত্যি, মণি,

## যমুনাধারা

তোমার কথাই দাম আছে। আমরা অনেক সময় নিজেদের মনের দিক দিয়ে নারীর বিচার করি ; কিন্তু তাতে সত্যকে জানা যায় না। অধিকাংশ ক্ষেত্রে পুরুষরা নারীকে ভুল বুঝে আসছে।”

“সে কথা মিথ্যে নয়। পুরুষের লেখা এমন অনেক বই আছে, যা পড়ে মনে হয়, তাঁরা মেয়েমানুষের সম্বন্ধে যা লেখেন, তা কত মিথ্যে। অবশ্য সকলের সম্বন্ধে নয়। যারা অনেক দেখেছেন এবং শক্তিশালী, তাঁরা প্রায় অভ্রান্ত। মনে হয়, তাঁরা নারী-চরিত্রকে বিশ্লেষণ করবার জন্য অনেক সাধনা করেছেন। মেয়েদের মন সঠিকভাবে জানবার জন্য খুব বেশীরকম চেষ্টা না করলে ভুল হবারই কথা। অল্পবয়সের পুরুষরা সে অবকাশ পান না বলে তাঁরা বা তা লিখে থাকেন।”

সুশীল হাসিয়া বলিল, “তুমি যে দেখছি শেষকালে সাহিত্যের আলোচনা এনে হাজির করলে!”

মণিমালার যে অনেক দিন ধরিয়৷ সাহিত্য-চর্চা করিতেছে, সুশীল তাহা জানিত। এ জন্য তাহার বাড়ীর পাঠাগারে অসংখ্য গ্রন্থের সমাবেশ ঘটিয়াছিল। তবে মণিমালার সাহিত্যমণ্ডল্যপ্রার্থিনী ছিল না। সে শুধু পাঠিকাই ছিল।

মণিমালার বলিল, “কথাটা উঠলো বলেই বললাম। তুমিও ত বই পড়তে খুব ভালবাস। অনেক লোকের ঞ্চাকামি—মেয়েদের সম্বন্ধে যা ইচ্ছে তাই লিখে তাঁদের অজ্ঞতার প্রকাশ কি তুমি লক্ষ্য করনি? আমি ত তোমাকে জানি।”

সুশীল বলিল, “খুব সত্যি কথাই তুমি বলেছ। আমি স্বীকার

## যমুনাধারা

করছি, স্ত্রীজাতির মনস্তত্ত্ব আমাদের কাছে সম্পূর্ণ না হোক, বেশীর ভাগ রহস্যময়। আমরা সত্যি তোমাদের বুঝতে পারি না।”

প্রাচীর-বিগম্বিত ঘটিকাঘন্ড্রে একটা বাজিয়া গেল।

মণিমালা বলিল “অনেক রাত হয়েছে। ঘুমোও।”

দীর্ঘ নিশ্বাস ত্যাগ করিয়া সুশীল বলিল, “কিন্তু যমুনার একটা গতি করতে না পারলে আমার মনে শান্তি আসবে না।”

“আচ্ছা, আরও কিছুদিন বেতে দেও। ললিত বাবু বিয়ে করতে রাজি, তা বুঝতেই পারছি। এখন ঠাকুরঝির মন তাঁর প্রতি আকৃষ্ট হয়েছে কি না, সেটা দিনকতক পরে বোঝা যাবে। কিন্তু ললিত বাবু কি তাঁর প্রাকটিস্ ছেড়ে বেশী দিন এখানে থাকবেন?”

সুশীল বলিল, “তাঁর কাছ থেকে সে রকম কোন কথা শুনিনি। আমরা আরও মাসখানেক এখানে থাকুব বলেছি। তাতে তিনি যেন খুসীই হলেন। যদি ডাক্তার বাবুর সঙ্গে না হয়, যতীন বাবুর সঙ্গে বিয়ে দিতে পারি, তাতেও আমি খুব খুসী হব। তুমি খুব বুদ্ধিমতী। যমুনা ও যতীন বাবুর দিকে একটু বেশী ক’রে লক্ষ্য রেখ। সহজেই তুমি সব বুঝতে পারবে।”

মণিমালা হাই তুলিয়া বলিল, “সে তোমার বলতে হবে না। যতীন বাবুর ছেলের দিকে ঠাকুরঝির মেহ দিন দিন বাড়ছে। এটা শুভ লক্ষণ। আজ আমি সতু ও ঠাকুরঝির কথাবার্তা আড়াল থেকে শুনেছি। তাতে আশা হচ্ছে, উভয়ের মধ্যে অনুরাগসঞ্চার হবার সুযোগ যেন এগিয়ে আসছে। দেখি কি হয়!”

“ভগবান্ তাই করুন” বলিয়া সুশীল পাশ ফিরিল।

## সাতাশ .

দুই সপ্তাহের অধিককাল সে এখানে রহিয়াছে, কিন্তু এ পর্য্যন্ত কোনও আশার লক্ষণই সে দেখিতে পাইল না ! আজ পর্য্যন্ত যমুনার সহিত সামান্য আলোচনা করিবার সুযোগ পাওয়া দূরে থাকুক, যমুনা তাহার সাক্ষাতেই বাহির হয় না । অথচ ঘোর অবরোধবাসিনী সে নহে । সুশীল বাবুর বাড়ীতে পুরুষমানুষের সহিত নারীর অবাধ মেলা-মেশার ব্যবস্থা কোনও দিনই নাই সত্য ; কিন্তু সে ত দুই বৎসরের অধিককাল ধরিয়া দেখিতেছে যে, এ বাড়ীর মেয়েরা মুক্ত বায়ু, অবাধ আলোক, খোলা মাঠ ভালবাসেন । পথে ঘাটে বাহির হইতে অবগুণ্ঠনের অনাবশ্যক আড়ম্বরের ভক্ত কেহই নহেন । বতীন্দ্রনাথ অনাত্মীয় হইলেও তাঁহার সহিত এ বাড়ীর মেয়েরা যেমন অসঙ্কোচে কথা বলেন, ব্যবহার করেন, সে তাহা হইতে বঞ্চিত কেন ?

শুধু যমুনা কেন, সুখমাও তাহাকে এড়াইয়া চলে । মণিমালা অবশ্য সম্মুখে আসেন, তাহার সহিত দুই একটা কথা বলিয়া গৃহিণীর কর্তব্য-পালন করেন ; কিন্তু সে বেশ লক্ষ্য করিয়াছে, প্রবাসে— দেওঘরের মত স্থানে, আরও মেলা-মেশার যে সহজ সম্ভাবনা আছে, তাহার সম্বন্ধে যেন কিছু কুপণতা চলিতেছে । কিন্তু কেন ?

ললিতচন্দ্রের ললাটে চিন্তার রেখা সুস্পষ্ট কুটিয়া উঠিল ।



## যমুনাধারা

তাহার ব্যবহার কি ভদ্রজনোচিত শিষ্ট আচারের সীমা অতিক্রম করিয়াছে? নারী-জাতির প্রতি সহজ সম্ভ্রমবোধ—যাহা প্রত্যেক ভদ্রসন্তানের সহজাত সংস্কার, সে কি তাহার বিপরীত কোনও আচরণ করিয়াছে?

বেড়াইতে বাহির হইয়া সে চলিতে চলিতে বৈষ্ণনাথজীর মন্দির সম্মুখে আসিয়া পড়িয়াছিল। এদিকে সে বড় একটা আসেনা। দেবদর্শনের আগ্রহ বিশেষভাবে কোনও দিনই তাহার ছিল না। কি মনে করিয়া সে মন্দির-চত্বরে প্রবেশ করিতে উত্তত হইল? জুতা পায় দিয়া মন্দির-প্রাঙ্গণে প্রবেশ করিবার নিয়ম নাই। সে নিকটবর্তী একটি দোকানে জুতা রাখিয়া ভিতরে প্রবেশ করিল।

চিন্তা তখনও তাহার সমগ্র মানসরাজ্য আচ্ছন্ন করিয়া রাখিয়াছিল। দেবতার প্রাঙ্গণে বহু দর্শনার্থী নর-নারীর ভিড়। কিছুক্ষণ অন্তমনস্কভাবে সে সেই ভিড় দেখিতে লাগিল। ভক্তকণ্ঠোচ্ছিত জয়ধ্বনি মন্দির-প্রাঙ্গণ অনুরণিত করিতেছিল। প্রত্যেকের আননে আগ্রহ ও ভক্তির একটা মধুর শ্রী সমুজ্জ্বল হইয়া উঠিয়াছিল।

এবলা বাড়িতেছিল, সে দিকে ললিতচন্দ্রের কোন খেয়ালই ছিল না। সে প্রাঙ্গণের এক প্রান্তে দাঁড়াইয়া মন্দিরে প্রবেশোত্তত এবং মন্দিরনির্গত নর-নারীগণকে দেখিতে লাগিল। তাহাদের মুখে ক্ষোভ, দুঃখ বা বিষাদের চিহ্ন নাই ত! দেবতা-দর্শনে সত্যই এমন শান্তি পাওয়া যায়?

## যমুনাধারা

হিন্দুর গৃহে জন্মগ্রহণ করিয়াও এ পর্য্যন্ত ললিত কখনও দেবতা-প্রীতি বা ঈশ্বর-ভক্তি সম্বন্ধে কোনওরূপ প্রেরণা তেমন ভাবে পায় নাই। বাল্যকালে দেব-দর্শন বা প্রতিমার নিকট সে প্রণাম করিয়া থাকিবে; কিন্তু বিশ্বনিষ্ঠালয়ের সঙ্গে পরিচয় আরম্ভের পর, সে কোনও দিন এমন ভাবের প্রেরণা অনুভব করে নাই। বর্তমান শিক্ষাপদ্ধতি কি সাধারণতঃ মানুষকে ঈশ্বর-বিশ্বাস-হীন করিয়া তুলে না? এমন ভাবের প্রশ্ন সতীর্থদিগের মধ্যে আলোচনার সূত্রে অনেকবার উঠিয়াছে, তাহা সে শুনিয়াছে। কিন্তু প্রতীচা শিক্ষাপদ্ধতির ছাপ, পিতামাতা, আত্মীয়-বান্ধবহীন জীবনে এমন, অসঙ্কোচে গভীর হইয়া উঠিয়াছিল যে, এ সকল ব্যাপারে যাহারা অনুরাগী, তাহাদিগকে সে স্নায়বিক বিকারগ্রস্ত মানুষ বলিয়াই এত দিন উপেক্ষা করিয়া আসিয়াছে।

চিন্তা ভারাক্রান্ত মনে, বৈद्यনাথজীর প্রাঙ্গণতলে সে যখন দাঁড়াইয়াছিল, তখন চারিদিকের আবেষ্টন তাহার চিত্তকে পীড়িত করিতে লাগিল। সত্যই কি ইহাতে মানুষ শাস্তি পায়? যদি তাহা সম্ভবপর না হইত, তাহা হইলে সহস্র-সহস্র নর-নারী প্রত্যহ কেন দেবদর্শনে আসে? কে জানে?

“ডাক্তার বাবু মশাই, আপুনি?”

চমকিত হইয়া ললিত চাহিয়া দেখিল, নগ্নগাত্র, বলিষ্ঠদেহ ব্রাহ্মণ তাহার সম্মুখে হাস্তবদনে দাঁড়াইয়া। সে চিনিল, ইনি সুনীলের পাণ্ডা। ব্রাহ্মণের ললাটে ত্রিপুর ক। বলক্ষীত বাহুযুগল স্বাস্থ্য ও সৌন্দর্যের ছোতক।

## যমুনাধারা

ললিতকে নিরুত্তর দেখিয়া পাণ্ডাজী বলিলেন, “বৈজনাগজীউর দর্শন হোবে?”

ডাক্তার কি ভাবিয়া মন্দির-প্রবেশের ইচ্ছা প্রকাশ করিল। সে প্রত্যহ অভ্যাসমত ভোরবেলা স্নান সারিয়া লয়। এই প্রচণ্ড শীতেও প্রাতঃস্নান সে শেষ করিয়া লইয়াছিল। শীতের বস্ত্রগুলি সে খুলিয়া ফেলিল। পাণ্ডাজী তাহার পরিচিত ব্যক্তির নিকট বস্ত্রাদি জিন্সা করিয়া দিলেন।

ললিত তখন পাণ্ডাজীর হাতে একটা টাকা দিয়া পূজা দিবার অনুরোধ জানাইল। মন্দির-প্রাঙ্গণে প্রবেশের পর আজ তাহার মনের এই আকস্মিক পরিবর্তনে সে নিজেই এক একবার বিস্ময়বোধ করিতেছিল। পাণ্ডাজী পেঁড়া কিনিয়া আনিয়া ডাক্তারকে সঙ্গে লইয়া মন্দিরমধ্যে প্রবেশ করিতে চলিলেন।

ললিত বলিল, “মন্দিরের মধ্যে কি খুব ভিড় আছে, পাণ্ডাজী?”

“না ডাক্তার বাবু, মায়ীজীরা এক পাশে দাঁড়িয়ে পূজা-অর্চনা করছেন। আপনার কুছু অসুবিধা হোবে না।”

পাণ্ডাজী ললিতকে পথ দেখাইয়া গর্ভগৃহের দিকে চলিল। মন্দিরদ্বারে জনতা অল্প নহে। কিন্তু দরজার কাছে যে পাণ্ডা দাঁড়াইয়াছিলেন, তিনি তখন কাহাকেও ভিতরে প্রবেশ করিতে দিতেছিলেন না।

ললিতকে সঙ্গে লইয়া পাণ্ডাজী উত্তরের ক্ষুদ্র দ্বারপথে গর্ভগৃহে প্রবেশ করিলেন। প্রথমতঃ অন্ধকারে ললিত কিছুই দেখিতে পাইল না। বাতাসনবিহীন গর্ভগৃহের এক পাশে একটা প্রকাণ্ড প্রদীপের

## যমুনাধারা

আলো ঘনাকারে যে ক্ষীণ দীপ্তি বিকীর্ণ করিতেছিল, তাহাতে মন্দিরমধ্যস্থ মানুষগুলিকে ছায়ামূর্তি বলিয়া মনে হইতেছিল।

পুরোহিত-কণ্ঠে উদাত্ত ধ্বনিতে সুরে লয়ে ঝঙ্কত হইতেছিল—

“ধ্যায়েন্নিত্যং মহেশং রজতগিরিনিভং চারুচন্দ্রাবতংসং—”

পূজার্থীগণ অনাদিলিঙ্গের উদ্দেশ্যে পুষ্প ও বিল্বপত্র অঞ্জলি দিতেছিল। অনেকের কণ্ঠে স্তবমন্ত্ৰ উচ্চারিত হইতেছিল।

ললিতের মন সত্যই তখন এক বিচিত্র ভাবাবেশে পূর্ণ হইয়া উঠিয়াছিল। পাণ্ডাজীর নির্দেশমত সে মন্ত্রপাঠ করিয়া পুষ্পাঞ্জলি বৈষ্ণনাথজীর উপর বর্ষণ করিতে লাগিল। অথু কোনও দিকে তখন তাহার লক্ষ্য ছিল না। সে শুধু ধ্যানমগ্নচিত্তে আশুতোষের দিকে চাহিয়া মনে মনে বলিল, পৃথিবীতে সে বড় অভাগা। তাহার ঐশ্বর্যা, যশঃ, মান থাকিতেও সে অসুখী। হে অন্তর্যামি শঙ্কর, তাহার কামনা যেন সার্থক হয়—সে যেন এমন ভবঘুরে জীবনের দুঃখ-ভোগ হইতে পরিত্রাণ লাভ করে।

পাণ্ডাজী তাহাকে লিঙ্গমূর্তির চারিপার্শ্বে পরিক্রমণের জন্ত আহ্বান করিলেন। কিন্তু মানুষের ঘাড়ের উপর দিয়া চলিবার প্রবৃত্তি তাহার ছিল না। সে আবিষ্ট চিত্ত লইয়া প্রধান দ্বারপথে পাণ্ডাজীর সহিত গর্ভগৃহ হইতে বাহিরে আসিল। তাহার অগ্রে ও পশ্চাতে বহু যাত্রী বাহির হইতেছিল।

সূর্যালোকিত প্রান্তনে আসিয়া তাহায় শীতবোধ হইতে লাগিল। বাতাস জোরে বহিতেছিল। পাণ্ডাজীর নির্দিষ্ট লোকটির নিকট হইতে সে গাত্রবস্ত্রাদি ফিরাইয়া লইয়া পরিধান করিল।

## যমুনাধারা

পাণ্ডাজী বলিলেন, “ডাক্তার বাবুর কুছ তক্লিফ ত হয় নি ?” ,  
না, সে ভালভাবেই দেবতা-দর্শন ও তাঁহার অর্চনা করিয়াছে ।  
সত্যই তাহার মনে একটা অহেতুক আনন্দ অনুভূত হইতেছিল ।  
এতদিন সে কেন এখানে আসে নাই ?

অস্ফুট স্বরে তাহার নাম উচ্চারিত হইতে শুনিয়া ললিত  
পশ্চাতে ফিরিয়া চাহিল ।

এ কি ! বাড়ীর মেয়েরা সকলেই যে অদূরে দাঁড়াইয়া !  
পাণ্ডাজীর কনিষ্ঠ ভ্রাতা তাঁহাদের সঙ্গে । ললিত দেখিল, যমুনা  
পটুবাস-পরিহিতা । সকলেই গরদ বা তসরের শাড়ী পরিয়া  
আসিয়াছিল । কিন্তু আলুলায়িতকুস্তলা যমুনার সমগ্র মূর্তিতে এমন  
একটা তন্ময়তা সে দেখিল যে, তাহাতে সত্যই ললিত বিশ্বয় অনুভব  
করিল । কোনও দিকে তাহার দৃষ্টি নাই । বাহিরের কোলাহল  
অথবা বৈচিত্র্য সমস্তই যেন তাহার অন্তরের ধ্যান-মূর্তিকে জাগ্রত  
করিবার চেষ্টায় ব্যর্থ হইয়া গিয়াছে ।

সুখমার দীর্ঘায়ত নয়নের দৃষ্টি মুহূর্তের জন্ত ললিতের উপর  
নিপতিত হইল । মণিমলাও তাহাকে দেখিতে পাইয়াছিল ।  
সম্মুখেই মাসীমাতা ছিলেন । তিনি বলিলেন, “তুমিও বাবাকে  
দেখতে এসেছ না কি ?”

ললিত একটু অপ্রতিভ হইল । সে এ পর্য্যন্ত কোন দিনই  
বৈষ্ণনাথজীর মন্দিরে আসে নাই ; তাহা বাসার সকলেই জানে ।  
এসকল ব্যাপারে তাহার বিশেষ শ্রদ্ধা নাই, ত্রিকূটনাথের পূজার  
সময় সকলেই লক্ষ্য করিয়াছিল । মাঝে মাঝে সূশীলের সহিত

## যমুনাধারা

আলোচনা-প্রসঙ্গে তাহার মনের ভাবও প্রকাশিত হইয়া পড়িয়াছিল।

মণিমালা বলিল, “ডাক্তার বাবু এখানে আজ এসেছেন, এর চেয়ে অসম্ভব ব্যাপার আর কিছু নেই।”

অবশ্য সে সরাসরি ললিতকে লক্ষ্য করিয়া কথাটা বলে নাই। যেন সঙ্গিনীদিগকে উদ্দেশ্য করিয়াই বলিতেছিল। সুখমা শুধু একটু মৃদু হাসিলা যমুনা যে কথাটা শুনিতে পাইয়াছে, এমন লক্ষণ প্রকাশ পাইল না। সে শুধু মণিমালাকে বলিল, “বৌদি, এখন বাড়ী গেলে হয় না?”

“চল ভাই, যাই।”

সঙ্গে বৃদ্ধ দ্বারবান্ হিন্দপাল সিং ও সোনার মা ছিল। শীলা সঙ্গে আসে নাই। দল পশ্চিমের দ্বার দিয়া মন্দির-প্রাঙ্গণ অতিক্রম করিল।

বড় পাণ্ডাজী বলিলেন, “ডাক্তার বাবু, আইয়ে।”

ললিত বলিল যে, সে আরও একটু ঘুরিয়া বাসায় ফিরিবে।

আসল কথা, সে উহাদের খুব প্রার্থনীয় সঙ্গী নহে, এমন একটা সন্দেহ বহুদিন হইতে ললিতের মনে ছায়াপাত করিয়াছিল। তাহার আত্ম-সম্মান কি সে ত্যাগ করিতে পারে?

মন্দির-প্রাঙ্গণে প্রবেশের পূর্বে যে চিন্তাসূত্র অর্ধপথে ছিল হইয়াছিল, শিব-গঙ্গার দিকে চলিতে চলিতে আবার তাহার স্মৃতিতম তন্তু ধরিয়া তাহার মনে কল্পনার লীলা চলিতে লাগিল।

কিন্তু কি আশ্চর্য্য! যমুনা, সুখমা আজই, এমন সময়ে দেব-

## যমুনাধারা

মন্দিরে আসিবে, ইহা ত সে ঘূণাক্ষরেও পূর্বে জানিত না ! সেও বেঁ  
বৈষ্ণনাথজীর মন্দিরে আসিবে, এমন কল্পনা পূর্বমূহূর্ত্তেও তাহার  
মনে সমুদিত হয় নাই ! অথচ কি অভাবনীয়রূপে সাক্ষাৎ !  
সেখন দেবতার অর্চনা করিতেছিল, সেই সময়ে যমুনা, সুসমা,  
মণিমালা, মাসীমাও অঞ্জলি দিতেছিলেন । অথচ সে কাহাকেও  
লক্ষ্য করিতে পারে নাই !

এমন হইল কেন ? সে ত ভগবান্কে কোনও দিন ডাকে নাই  
—অবশ্য তাহা বলিয়া তাঁহার অস্তিত্ব সম্বন্ধেও সে নিশ্চিতভাবে  
কোনও সন্দেহ কখনও প্রকাশ করে নাই—অথচ আজ তাঁহাকে  
হৃদয়মধ্যে অনুভব করিবার জন্ম এমন ব্যাকুলতা আসিল কোথা  
হইতে ? ইহা কি দুর্বলতার লক্ষণ ? সত্যই কি সে ক্রমেই অন্তরে  
দুর্বল ও দরিদ্র হইয়া পড়িতেছে ?

বাস্তবিক অনেক দিন বৃথা আশায় সে এখানে কাটাইয়া দিল ।  
ইহা হয় ত অন্তের আলোচ্য বিষয়ও হইয়া থাকিবে । সে কে ?  
সুশীলের সহিত তাহার কি সম্বন্ধ ? সে চিকিৎসক এবং সুশীলের  
বাড়ীর কোন কোন ব্যক্তি তাহার রোগী । ইহা ছাড়া অণু কোন  
সম্বন্ধই ত নাই ! তবে, তবে কোন্ অধিকারে সে আর দণ্ডঘরে  
থাকিতে পারে ?

তাহার মনের কাঙ্গালপনা সত্যই কথা ও কাজে প্রকাশ  
পাইতেছে কি ? যমুনার প্রতি তাহার তীব্র আকর্ষণ আছে, ইহা ঠিক  
সত্য । কিন্তু সে পক্ষ হইতে এ পর্য্যন্ত যখন কোনও অনুকূল ইঙ্গিতই  
প্রকাশ পাইল না, তখন আর এখানে থাকা শোভন হইবে কি ?

## যমুনাধারা

শিবগঙ্গার তীরে দাঁড়াইয়া সে দেখিল, অসংখ্য লোক স্নান করিতেছে, স্তোত্রপাঠ করিতেছে, তার পর দেবদর্শনে চলিয়াছে। এত দিন সে মানুষের এই ভক্তিকে মানসিক দুর্বলতা বলিয়া মনে করিত। মানুষ তাহার মনের দুর্বলতা গোপন করিবার অন্য পথ না দেখিয়া ভগবানের প্রতি, দেবতার প্রতি ভক্তি আখ্যা দিয়া চলিয়া আসিতেছে। মানুষ আপনার বুদ্ধি, বিবেচনা, জ্ঞান ও শক্তির প্রতি যখন বিশ্বাস হারায়, তখনই ভগবান্ বা ধর্মের শরণাগত হইয়া পড়ে। প্রকৃত শক্তিমান কখনই তাহা করিবে না। ইহাই ছিল ললিতচন্দ্রের শিক্ষা। কিন্তু আজ অন্তরতম প্রদেশ হইতে সে যেন আর একটা নূতন বাণী শুনিতেছে—মানুষ অতি দুর্বল, অতি অসহায়, তাহার কোন ক্ষমতাই নাই। ভগবান্ আছেন, তাঁহার উপর নির্ভর করিলে, একান্ত শ্রদ্ধা ও বিশ্বাস রাখিলে, মানুষ কষ্ট পায় না, অসাধ্যসাধন করিতে পারে, গতকল্য একখানি পুস্তকে সে এই ভাবের কথা পড়িয়াছিল—আজ যেন অন্তর হইতে সেই বাণীই কে তাহাকে শুনাইতেছিল।

কাহার বাণী? কে সে? বিবেক? যদি তাহাই হয়, এত দিন এ বাণী সে শুনিতে পায় নাই কেন? আজই বা অকস্মাৎ অন্তরের রুদ্ধদ্বার মুক্ত করিয়া বিবেকের বাণী তাহাকে নূতন কথা শুনাইতেছে কেন?

সহসা মন্দিরের দৃশ্য তাহার মনে পড়িল। চেলাস্বরী তরুণীদের প্রত্যেকেরই মুখে অপূর্ণ দীপ্তি সে দেখিয়াছে, এমনও ত সহসা দেখিতে পাওয়া যায় না। হিন্দু-গৃহের শিক্ষিতা তরুণীরাও যে ধর্মকে



## যমুনাধারা

আঁকড়িয়া ধরিয়া থাকে, ঈশ্বরনির্ভরতা প্রতীচ্য শিক্ষার প্রভাবেও বিলুপ্ত হয় নাই, এই তিন জন আধুনিকাকে দেখিয়া তাহা সৰ্ব্বমুঃ-করণেই বিশ্বাস করিতে হয়। ধারাবাহিকভাবে যে বিশ্বাস, দে নির্ভরতা তাহাদের শোণিত-মজ্জায় ওতপ্রোত হইয়া আছে, ঈশ্বর-বিশ্বাস-হীন প্রতীচ্যশিক্ষা এখনও হিন্দুনারীকে সে প্রভাব হইতে হইতে বিচ্যুত করিতে পারে নাই।

যমুনা, সুষমা, মণিমাল্য তিন জনেরই মূর্তিতে কি অনিবৰ্চনীয় শোভা সে দেখিয়াছে! বিশেষতঃ যমুনার কি বিচিত্র রূপই সে দেখিয়াছে। সুষমা? তাহারও আননে কি অপূৰ্ণ শোভাই না ফুটিয়া উঠিয়াছিল! না—কেহই কম নহে।

চিন্তাস্রোতে বাধা পড়িল। সে দেখিল, বাসার ফটকের কাছেই সে আসিয়া পড়িয়াছে। বারান্দায় ও কে দাঁড়াইয়া? স্মশীল বাবু? হাঁ, তিনিই ত! কাহার সঙ্গে কথা বলিতেছেন?

ললিত দ্রুত ফটক উত্তীর্ণ হইল।

## আটাশ

“এ কি! মহারাজ, আপনি কবে এলেন? এই যে যতীন বাবুও এসেছেন!”

বাস্তবিক ললিত কল্পনাও করিতে পারে নাই যে, মহারাজ ভবতোষ দেওঘরে আসিবেন এবং স্মৃশীলের বাড়ীতে বেড়াইতে আসিবেন।

প্রসন্নহাস্যে ভবতোষ বলিলেন, “কেন, আমার কি এখানে আসতে নেই নাকি, ডাক্তার?”

কুণ্ঠিতভাবে ললিত বলিল, “আজ্ঞে না, সে কথা বলছি না।”

যতীন্দ্রনাথ বলিল, “মহারাজের যে দেওঘরে বাড়ী আছে, তা দেখেন নি বুঝি, ডাক্তার বাবু? বাড়ী আছে, তবে দশ বছরের মধ্যে এখানে আসেন নি।”

ভবতোষ গড়গড়ার নল তুলিয়া ধরিয়া বলিলেন, “এবার তুমিই আমাকে এখানে টেনে এনেছ, যতীন ভাই!”

মহারাজ ভবতোষ অত্যন্ত তামাকু-ভক্ত। স্মৃশীলচন্দ্রের দেওঘরের বাড়ীতে রৌপ্য-নির্মিত গড়গড়া পিতার আমল হইতেই ছিল। তাঁহার মৃত্যুর পর উহা কদাচিৎ ব্যবহৃত হইত। তবে কোনও অতিথির সেবার জন্য ব্যবহারের প্রয়োজন হইতে পায়ে বলিয়া উহা ব্যবহারোপযোগী করিয়া রাখা হইত।

## যমুনাধারা

ভবতোষ বলিলেন, “সুশীল বাবুর সঙ্গে আগে আলাপ ছিল না, ডাক্তার। যতীনের বাড়ী ব’সে শুনলাম, সে এই দিকেই আসছে। তাই ভাবলাম, গুঁর সঙ্গে আলাপটা ক’রে যাওয়া যাক।”

সুশীল বলিল, “এ আপনার মহানুভবতা, মহারাজ। আপনার পায়ের ধূলো—”

বাধা দিয়া তাড়াতাড়ি ভবতোষ বলিলেন, “ঐটে বাদ দিন, সুশীল বাবু! মানুষের বাড়ী মানুষই যায়, মানুষের সঙ্গেই মানুষ আলাপ ক’রে থাকে। আমি যদি না আসতাম, তবে সেটা আমারই অপরাধ হ’ত। যতীন আমার বাল্যবন্ধু, ভাই। তার সঙ্গে যাদের বন্ধুত্ব, তাঁরা ত আমার আপনজন।”

বেলা তখন এগারটা বাজিয়া গিয়াছে। সুশীলচন্দ্র এত বেলায় মহারাজকে শুধু মুখে ফিরাইয়া দিতে নারাজ ছিল; কিন্তু আহারের কথা মুখ ফুটিয়া বলিবার সঙ্কোচ সে এড়াইতে পারিতেছিল না। ভবতোষ বোধ হয়, সে কথা অনুমানে বুঝিলেন। তিনি বলিলেন, “সুশীল বাবু, আজ বেলা হয়েছে এখন ওঠা যাক।”

সুশীল তখন বলিয়া ফেলিল, “কিন্তু এত বেলায় হিন্দুর বাড়ী থেকে—”

উচ্চহাস্য করিয়া মহারাজ বলিলেন, “বুঝেছি। কিন্তু আমি ত বেশী দূরে নেই। পাঁচ মিনিটেই বাড়ী ফিরব। বেশ ত, এর পর এক দিন সুবিধামত, আমি এখানেই খাব। ও ব্যপারে আমার লজ্জা বা সঙ্কোচ নেই, সুশীল বাবু! তবে যতীন ত নিরামিষাণী, ওকে নিয়ে একসঙ্গে আহার আর চল্লো না।”

## যমুনাধারা

মহারাজ তখনও প্রাণখোলা হাসি হাসিতেছিলেন।

‘সুশীল বলিল, “যতীন বাবুর সঙ্গে আমাদের আলাপ হ’ল কি ক’রে, সে খবর কি মহারাজ জানেন!”

“না। আমি ত ভাই তাই ভাবছিলাম, যে লোক মানুষের সঙ্গে এড়িয়ে চলতেই চায়, তার সঙ্গে আপনাদের এত মাথামাথি অল্পদিনের মধ্যেই কি ক’রে ঘটলো, তাই ভাবছি।”

সুশীল তখন সংক্ষেপে কিন্তু উচ্ছ্বসিত ভাবাবেগে মেলার রাত্রির ঘটনা বিবৃত করিল। সে দিন এই বীর বাঙ্গালীর সাহায্য না পাইলে তাহার পত্নী ও সহোদরার ইজ্জৎ রক্ষা হইত না। সে জন্ম সপরিবারে সুশীল যতীন বাবুর নিকট অনন্তকালের জন্ম কৃতজ্ঞ হইয়া আছে।

ভবতোষ বলিলেন, “যতীন ভাই, এ কথা ত তোমার কাছে শুনিনি। কি একটা ব্যাপারে গোরা নাবিকদের সঙ্গে তোমার মারামারি হয়েছিল, এই কথাই বলেছিলে। ডাক্তার, তুমিও ত সেখানে ছিলে, তুমিও এত বড় ঘটনার কথা আমার কাছে চেপে গিয়েছিলে!”

ললিত আরক্ত-মুখে বলিল, “যতীন বাবু আমাকে বিশেষ ক’রে বারণ ক’রে দিয়েছিলেন। আমার অপরাধ নেবেন না, মহারাজ।”

যতীন্দ্রনাথ প্রশান্ত-মুখে বলিল, “ভদ্র ঘরের এ সকল কথা কি আলোচনার যোগ্য, মহারাজ? নানারকম কথা কি উঠতো না?”

## যমুনাধারা

“আবার মহারাজ! তুই কিছুতেই আমাকে তোর কাছে—তোর প্রাণের দ্বারে পৌঁছুতে দিবিনি, ভাই! আমাদের কাছে বাইরের খেতাব, জৌলুষ যেন না আসতে পারে। আমরা তুই বন্ধু ছেলেবেলা থেকে যে ভাবে বেড়ে উঠেছি, তার মাঝে অভিজাত্যের এই খোলস ভারী বে-মানান, যতীন! না, এবার যদি শুনি, সত্যি আমি রাগ করবো।”

মহারাজ ভবতোষের সমগ্র আননে একটা কোমল মধুর ভাবের ব্যঞ্জনা দেখিয়া সকলের মনে হইল, তিনি কেতাদুরস্তভাবে মাথুলী বিনয় প্রকাশ করিতেছেন না। সমগ্র অন্তর দিয়া তিনি যাহা উপলব্ধি করিয়াছেন, তাহাই তাঁহার কণ্ঠে ফুটিয়া উঠিয়াছে।

বাঙ্গালার শ্রেষ্ঠ অভিজাত সম্প্রদায়ের এক জন পুরোবর্তী, মহাশয় ব্যক্তির এমন উদার, সরল এবং সঙ্কোচহীন মধুর ব্যবহারের সহিত সুশীলচন্দ্র পরিচিত ছিল না। কাজেই সে অত্যন্ত চমৎকৃত ও মুগ্ধ হইল। এমন একজন মহানুভব ব্যক্তির সহিত পরিচিত হইবার সৌভাগ্যলাভে সে আপনাকে ধন্য মনে করিল।

এমন সময় পরিচারক আসিয়া সুশীলচন্দ্রকে জনাস্তিকে কি বলিয়া গেল। সে তখনই আসিতেছে বলিয়া ভিতরে প্রবেশ করিল পরমুহূর্তে সে ফিরিয়া আসিয়া বলিল, “মহারাজ, আপনার পরিচিত এক জন এখানে আছেন। তিনি আমার স্ত্রীর মাসীমা।”

ভবতোষ সপ্রশ্ন দৃষ্টিতে সুশীলের পানে চাহিলেন। সুশীল বলিল, “পাটনার উকীল বিমল-দাকে আপনি চেনেন কি? তাঁরই মা।”

## যমুনাধারা

“ওঃ, বিমল-দার মা ? তিনি ত আমারও মা ! তিনি এখানে  
আছেন না কি ? বটে !”

ভবতোষের আনন উৎকল হইয়া উঠিল।

“আর আমার ছোট বোনটি, সুষমা ? সেও আছে না কি  
এখানে ?”

“হাঁ, সবাই আছেন।”

“সুশীল বাবু, তবে ত আপনি আমার পরমাত্মীয়। আপনি  
জানেন না, বিমল-দা কত প্রিয়জন। মার কাছে আমি পাটনার  
অনেকবার গিয়ে থেকে এসেছি। চলুন, মাকে দেখে আসি।”

শ্রেষ্ঠ ব্রাহ্মণ অভিজাত বংশের পুরুষরত্নটি উঠিয়া দাঁড়াইলেন।

সুশীলচন্দ্র তাঁহাকে সঙ্গে লইয়া ভিতরে প্রবেশ করিল।

মহারাজ ডাকিলেন, “এস যতু, তোমরাও এস।”

যতীন্দ্রনাথ তাঁহাদের অনুগামী হইল ; কিন্তু ললিতচন্দ্র প্রথমে  
পা বাড়াইরাছিল। তার পর কি ভাবিয়া সে নিজের শয়নকক্ষের  
দিকে চলিয়া গেল।

ভবতোষ প্রবেশ করিয়াই উমাশশীকে দেখিতে পাইলেন।

“মা গো, আমি এসেছি।”

“এস বাবা, সব ভাল ত ? বৌমাকে সঙ্গে এনেছ ?”

“হ্যাঁ মা, সবাই এসেছেন। সুশীল বাবু আপনার জামাই, তা  
আগে জানতুম না, মা। আজ বড় আনন্দ বোধ হচ্ছে। হ্যাঁ,  
আমার বোনটি কোথায় ?”

“সে আসছে, বাবা। ঐ যে !”

## যমুনাধারা

আনন্দ-প্রকল্প আননে সুষমা ভবতোষের সন্মুখে নত হইয়া প্রণাম করিল। আশীর্ষচন দ্বারা সুষমাকে অভিবিক্ত করিয়া ভবতোষ বলিল, “দিদি আমার পণ্ডিত হয়ে ফিরেছ, বিমলদার পত্রে জেনেছি। বড় ভাল। হ্যাঁ রে, কত দিন তোকে দেখিনি বল ত, সুধি?”

“ছ’বছর আগে আপনি পাটনার গিয়েছিলেন। তার পর আর দেখা হয়নি, দাদা।”

“ঠিক বলেছি। কিন্তু ছ’বছর আমি পাটনার যাইনি, সে কথাটা সত্য নয়। তুই তখন সেখানে ছিলি না। প্রেম মহাবিদ্যালয়ে পড়ছিলি।”

এমন সময় মণিমালা ও তাহার পশ্চাতে যমুনা ধীরে ধীরে সেখানে আসিল। সম্ভবতঃ সুশীল ইতিমধ্যে তাহাদিগকে কোনও উপদেশ দিয়া আসিয়াছিল।

মণিমালা ও যমুনা প্রণাম করিতেই ভবতোষ যেন একটু তটস্থ হইয়া উঠিলেন।

সুষমা বলিল, “আমার দিদি, মণিমালা, সুশীল বাবুর স্ত্রী।”

“আর ইনি?” বলিয়া যমুনার দিকে প্রসন্ন দৃষ্টিপাত করিতেই, সুশীলচন্দ্র বলিল, “ওটি আমারই ছোট্ট স্ত্রী, যমুনা।”

“দিদিমণীরা, তোমাদের সুস্থ দেহ, সুস্থ মন থাকুক। হিন্দুর মেয়ের সুস্থ মন নিয়ে সকলের কল্যাণ কর।”

যমুনা সত্যই বিস্মিত হইল। মণিমালারও মুখে বিস্ময়রেখা দেখা দিল। এমন ভাবের আশীর্ষচন তাহারা পূর্বে শুনে নাই। সুস্থ দেহ ও সুস্থ মন! চমৎকার! চমৎকার!

## যমুনাধারা

“মা, আমার স্মৃতি দিদির বিয়ে দেওয়া দরকার।”

সুসমা অচ্যুতিকে মুখ ফিরাইল। উমাশশী বলিলেন, “তোমরা একটা ভাল পাত্র দেখে দাও না, বাবা!”

কণ্ঠার বিবাহের অনিচ্ছার কথা তিনি এ ক্ষেত্রে প্রকাশ করা সম্ভবত বলিয়া মনে করিলেন না।

যমুনা তখন অচ্যুত দ্বার দিয়া গৃহান্তরে চলিয়া যাইতেছিল। ভবতোষ একবার সে দিকে চাহিয়া দেখিলেন। সুসমা তখনও নতনেত্রে মুখ ফিরাইয়া দাঁড়াইয়াছিল।

ভবতোষ বলিলেন, “সুশীল বাবু, আপনার বোনের বিয়ে, দেন নি এখনও?”

এ প্রশ্নে সকলেরই একটা অনির্ভর্য অস্বস্তি অনুভূত হইল।

সুসমা মৃদুস্বরে বলিল, “দাদাবাবু, যমুনার বিয়ে ত হয়েছিল!”

বুদ্ধিমান ভবতোষ আর প্রশ্ন করিলেন না। ভাগ্যহতা যমুনার স্মৃতি সুরুপাড় বস্ত্র, সিন্দূরবর্জিত ললাট ও সীমন্তদেশ তাঁহাকে বুঝাইয়া দিল, এই বয়সেই যমুনার দাম্পত্য-জীবনের অবসান ঘটিয়াছে। তাঁহার সহৃদয় মন ইহাতে বিশেষভাবে বিচলিত এবং বেদনা-হত হইল। এই অপূর্বদর্শনা শ্রুতী নারী কণ্ঠের বৈধব্যব্রত পালন করিয়া চলিয়াছে। সে জগৎ স্বভাবতই মানুষের মন আর্দ্র হইয়া উঠে।

উমাশশী বলিলেন, “বাবা, এত বেলায় গেরস্তর বাড়ী থেকে যেতে নেই।”

সুশীল বলিল, “আমিও সেই কথা বলেছি, মাসীমা!”



## যমুনাধারা

ভবতোষ বলিলেন, “আমরা ত পাশাপাশিই রয়েছি। এতে অতিথি ব’লে আমায় বোঝায় কি, মা ? এর পর এক দিন খুব ভাল ক’রে খেয়ে যাব। আপনার হাতের সন্দেশ বড় চমৎকার ! সে দিন তার ব্যবস্থা রাখবেন। আচ্ছা, আজ আসি।”

ভবতোষ বাহিরে চলিলেন। যতীন্দ্রনাথ ও সুশীল সঙ্গে সঙ্গে আসিল। বাহিরে আসিয়া ভবতোষ বলিলেন, “ডাক্তারটা কোথায় গেল ?” সে বড় লাজুক দেখ্ছি। মেয়েদের কাছে আসতে তার লজ্জা এখনও বেশ আছে, না সুশীল বাবু ?”

সুশীল মৃদু মৃদু হাসিতে লাগিল।

সম্ভবতঃ এ আলোচনা ললিতের কর্ণগোচর হইয়া থাকিবে। সে তাড়াতাড়ি শয়নকক্ষ হইতে বাহির হইল।

“কি হে, ডাক্তার ! তুমি সুশীল বাবু বাড়ী এত দিন রয়েছ, তবু তোমার দেখ্ছি স্বভাব বদলায় নি।”

ভবতোষ ফটকের দিকে অগ্রসর হইলেন। ললিতের মুখে সহসা কেহ যেন আবীর মাখাইয়া দিয়াছিল। কোনও উত্তর না দিয়া সে সকলের সঙ্গে ভবতোষের অনুসরণ করিল।

## উনত্রিশ

সংক্ষিপ্ত পত্র, কিন্তু পড়িতে আরম্ভ করিয়াই তরুণী সুষমার মুখমণ্ডল ক্রোধে আরক্ত হইয়া উঠিল। সে পত্রখানার বাকিঅংশ পড়িবে না বলিয়াই কোমল করপল্লবে উহা পিষ্ট করিতে উদ্যত হইল। কিন্তু পরক্ষণেই কি ভাবিয়া সে আবার পড়িতে আরম্ভ করিল,—

“মাননীয়াসু—

জানি, আপনাকে পত্র লিখিবার কোন অধিকার আমার নাই—  
উচিত নহে ; কিন্তু কিছু দিন হইতে অন্তরের মধ্যে কাঁটা খচ্-খচ্  
করিয়া বিধিতছে। সে দিন আমার অসভ্য ব্যবহারে আপনি হয়  
ত আরও বিরক্ত হইয়াছেন, তাই ক্ষমার অবসর খুঁজিতেছিলাম।  
কয়দিনের মধ্যে পাই নাই। সব কথা বিমলদাকে খুলিয়া  
লিখিয়াছিলাম। তিনি উত্তর দিয়াছেন, আমি সরাসরি সে ব্যবস্থা  
করিতে পারি। তাঁহার অনুমতি লইয়া আমি আপনার কাছে  
আমার কৃত ব্যবহারের জ্ঞাত মার্জ্জনা ভিক্ষা করিতেছি। আশা করি,  
আপনার ঞ্চায় শিক্ষিতা এবং উচ্চহৃদয়া মহিলার নিকট হইতে  
ক্ষমা মিলিবে।

বিনয়াবনত

“শ্রীমলিত।”

## যমুনাধারা

সুখমার আনন হইতে বিরক্তি ও ক্রোধের রেখা ধীরে ধীরে মিলাইয়া যাইতেছিল। পত্রপাঠ শেষ করিয়া সে কয়েক মুহূর্ত্ত কি ভাবিল।

ক্ষমা? কিসের ক্ষমা? সে হিন্দু শুদ্ধান্তঃপুরচারিণী নারী। পথের মাঝে তাহার সহিত আলাপ করিতে যাওয়া অপরাধ?

সুখমা ভাবিতে লাগিল।

হ্যাঁ, অপরাধ বৈ কি। কোনও অপরিচিতা তরুণীর সহিত নির্জন রাজপথে কোনও যুবকের—হিন্দু যুবকের আলাপ করিবার অধিকার থাকা উচিত নহে, তাহা সে জানে। কিন্তু ললিত বাবু কি সত্যই তাহার অপরিচিত?

কে বলিল? চারি বৎসর পূর্বে—তখন সে উদ্ভিন্ন-যৌবনা, শরীরে ও মনে তখন যৌবনের জোয়ার লাগিয়াছে, সে সময় ত ললিত বাবুর সহিত তাহার অপরিচয় ছিল না! সত্য বটে, ঘনিষ্ঠভাবে বেশী আলোচনা করিবার অবকাশ কখনও ঘটে নাই। তবে রোগশয্যার পার্শ্বে তাহাকে অনুক্ষণ থাকিতে হইত, রোগীর পরিচর্য্যার অবকাশে মিষ্ট সাম্বনা-বাক্যও প্রয়োগ করিতে হইত। সুতরাং ললিত বাবুর সম্বন্ধে অপরিচয়ের অভিযোগ মোটেই খাটে না।

কিন্তু ললিত বাবু লিখিয়াছেন,—“আপনি হয় ত আরও বিরক্ত হইয়াছেন।” ইহার অর্থ কি? “আরও বিরক্তি” তাহার কবে হইয়াছিল? কৈ, সে কথা ত তাহার মনে পড়ে না!

সুখমা নিবিষ্টমনে ভাবিতে লাগিল।

## যমুনাধারা

ওঃ ! তাহার সহিত ডাক্তার বাবুর বিবাহের প্রস্তাব হইয়াছিল ; কিন্তু তাহা ঘটে নাই। এমন প্রস্তাব ত অবিবাহিত নরনারী থাকিলেই হইয়া থাকে ! যত সম্বন্ধ আসে, তাহার অনেকগুলিই ত পরিত্যক্ত হইয়া থাকে। তাহার জন্ম কোনও পক্ষের ক্ষোভের সম্ভাবনা কোথায় ? তবে ?

হাঁ, একটা কথা। সে যে অশিক্ষিত। পাশ করা বিলাতবাত্রা প্রয়াসী ডাক্তার তাহার মত অশিক্ষিতা কন্যাকে বিবাহ করিতে পারেন না, এমনই ভাবের একটা কথা ডাক্তার বলিয়াছিলেন।

সত্য কথাই তিনি বলিয়াছিলেন। সে জন্ম সুষমা ডাক্তারের উপর বিরক্ত হইবে কেন ? কি অধিকারে সে এক জন বাহিরের ব্যক্তি, অনাস্থীর উক্তি গুনিয়া অভিমান, দুঃখ বা ক্ষোভ প্রকাশ করিবে ?

সুষমা ভাবিতে লাগিল।

না, সে কথা কি সত্য ? সে অশিক্ষিতা। ভাবী বিলাত-প্রত্যাগত ডাক্তারের পত্নী হইবার যোগ্যতা তাহার ছিল না বলিয়া যে উপেক্ষা, তাহা কি সত্যই তাহার মনকে আহত করে নাই ? সত্য যাহা, তাহাকে অস্বীকার করিয়া দর্শন লাভ নাই। সত্যই সে মনে মনে অপমানিত হইয়াছিল। সেই অভিমান, অপমানের আঘাত-ফলেই না সে প্রাণপণ যত্নে পরীক্ষায় পাশ করিয়াছিল—প্রেম মহাবিদ্যালয় হইতে দর্শনশাস্ত্রে উচ্চ উপাধি অর্জন করিয়াছিল !

ললিত বাবু উচ্চশিক্ষিত, চিকিৎসক। তিনি বিবাহ করিবেন না, শুধু এই কথাটাই জানাইলে পারিতেন, তাহাতে কাহারও

## যমুনাধারা

কোনও কথা বলিবার থাকিত না। কিন্তু সে অশিক্ষিতা, তাঁহার গৃহিণী হইবার উপযুক্ত নহে বলিয়া সকলের মনে আঘাত দিবার কি প্রয়োজন ছিল ?

বাকু, সে যাহা হইবার অনেক দিন চুকিয়া গিয়াছে। সুষমা সে কথা ত ভুলিয়াই গিয়াছিল।

সুষমার ওষ্ঠ-প্রান্তে মৃদু-হাস্য-রেখা উদ্ভাসিত হইল।

সত্যই কি এত বড় আঘাতের বেদনা সে বিস্মৃত হইতে পারিয়াছিল ?

সে যে সকল উচ্চাঙ্গের বিজ্ঞান-সম্মত গ্রন্থ পাঠ করিয়াছে, দর্শনশাস্ত্র পাঠ করিয়াছে, তাহা হইতে কি এই সার সত্যটুকু সে অর্জন করে নাই যে, যে বাক্য একবার উচ্চারিত হয়, যে চিন্তা একবার মনোরাজ্যে উদ্ভাসিত হয়, যে কার্য একবার অনুষ্ঠিত হয়, তাহা কখনও মরে না ? অনন্তকাল ধরিয়া নিখিল বিশ্বে তাহা অনাহত গতিতে চলিতে থাকে—চির-জাগ্রত থাকে ? বাক্য অমোঘ, চিন্তা শাস্বত, কর্ম চিরন্তন ?

দীর্ঘ চারি বৎসর ধরিয়া ললিত বাবু কি তাঁহার উচ্চারিত বাক্যকে তাই ভুলিতে পারেন নাই— তাই সেই অপমানের স্মৃতি তাঁহার মগ্ন চৈতন্যে জাগ্রত হইয়াছিল ? তাই কি অবকাশ পাইয়া তাহা নূতন ভাবে, নূতন শক্তি সঞ্চয় করিয়া, নবরূপে প্রকাশ পাইতে আরম্ভ করিয়াছে ?

পশ্চিমের খোলা জানালা দিয়া রৌদ্রালোকিত আকাশ দেখা যাইতেছে। দ্বিপ্রহরে সকলেই বিশ্রামতৎপর। পাশের ঘরে যমুনাও

## যমুনাধারা

হয় ত বই পড়িতে পড়িতে ঘুমাইয়া পড়িয়াছে। তাহার জননী দিবা-নিদ্রার শাস্তিটুকু প্রতিদিনই উপভোগ করেন। আজও তিনি নিশ্চিন্ত-মনে ঘুমাইতেছেন।

অবাস্তুর চিন্তাগুলি স্ত্রের ধারা ধারয়া এলোমেলোভাবে আনাগোনা করিতে লাগিল।

ললিত বাবু তাহাকে পত্র লিখিয়া সঙ্গত কার্য্য করিয়াছেন কি? দাদা-না হয় অনুমতিই দিয়াছেন; কিন্তু নিঃসম্পর্কীয়া, 'কুমারী যুবতীর' নিকট এক জন অপরিচিত যুবকের এমনভাবে লেখাও যে অনেকে সমর্থনযোগ্য বিবেচনা করেন না, বিশেষতঃ হিন্দু পরিবারে একরূপ ব্যাপার সত্যই অশোভন, ইহা ললিত বাবুর কি জানা নাই?

স্বামীর আননে আবার বিরক্তির রেখা ধীরে ধীরে ফুটিয়া উঠিল।

না,—সে ললিত বাবুর বর্তমান আচরণ কোনমতেই সমর্থন করিতে প্রস্তুত নহে। একরূপ ভাবে পত্র আদান-প্রদানের প্রশ্রয় সে কখনই দিবে না। অবশ্য সে দিন পথের উপর ললিত বাবু তাহার সহিত কথা বলিয়া যে বিশেষ কিছু অপরাধ করিয়াছিলেন, ইহা তাহার মনে হয় নাই। কিন্তু আজ তিনি ভৃত্যের মারফতে অত্রের অগোচরে তাহাকে পত্র লিখিয়া অগ্রায় কার্য্য করিয়াছেন। এই ভাবে গোপনতার আশ্রয় গ্রহণের কি প্রয়োজন ছিল? তিনি যদি সোজা পথেই চলিতেন, কোন প্রকার সঙ্কোচবোধ যদি তাহার মনে উদ্ভিত না হইয়া থাকে, তাহা হইলে ভৃত্যের মারফতে পত্র না দিয়া,

## বমুনাথারা

সুশীল বাবু অথবা তাহার মার মারফতেও কথাটা জানাইতে পারিতেন।

পত্রের ভিতরের তাৎপর্য না জানিয়া যদি কেহ এই ভাবে পত্র প্রদানের কথা জানিতে পারিত, যদি তাহার মাতা, সুশীল বাবু বা মণিদিদি ইহা লক্ষ্য করিয়া থাকেন, তাহা হইলে তাঁহাদের মনে সন্দেহ সঞ্চারিত হয় নাই কি ?

না, এই পত্ৰ অতি কদর্যা, অতি কুৎসিত। উদ্দেশ্য যতই সাধু হউক, প্রণালীটি অত্যন্ত অসঙ্গত ও অশোভন।

কিন্তু সে কি করিবে? এ ব্যবস্থার উপর তাহার ত কোন হাতই ছিল না। সে পূর্বাঙ্কে যদি জানিতে পারিত, তাহা হইলে প্রতীকারের হয় ত সম্ভাবনা ছিল। কিন্তু—

নিদারুণ বিরক্তিতে সুখমার চিত্ত ভরিয়া উঠিল।

“জানালায় ধারে বসে কি হচ্ছে, সুখি?”

চমকিতভাবে সুখমা ফিরিয়া চাহিল। মণিমলা দ্বারপ্রান্তে দাঁড়াইয়াছিল।

মুহূর্ত্ত চিন্তা করিয়া সুখমা ডাকিল, “দিদি!”

ভগিনীর স্বভাবসিদ্ধ শান্ত কণ্ঠস্বরে উত্তেজনার আভাস পাইয়া বিস্মিতা মণিমলা ঘরের মাঝখানে আসিয়া দাঁড়াইল।

“এই চিঠিখানা প’ড়ে দেখ।”

মণিমলার হাতে সুখমা ললিতের পত্রখানা প্রদান করিল।

চিঠিখানা দুইবার আত্মোপাস্ত পড়িয়া মণিমলা ভগিনীর দিকে চাহিল।

## যমুনাধারা

সুখমা তখন জানালার দিকে মুখ করিয়া বাহিরের দিকে নিস্তব্ধভাবে চাহিয়াছিল।

মণিমালা কি ভাবিতেছিল, সে দিন ডাক্তার বাবু সুখমার সহিত কোথায় কি এমন ব্যবহার করিয়াছেন, যাহার জন্য অন্ততপ্ত হইয়া তিনি সুখমার নিকট ক্ষমা প্রার্থনা করিয়াছেন ?

“কি হয়েছিল রে, সুখি ?”

দিদির প্রশ্নে সুখমা ফিরিয়া চাহিল।

মণিমালা ভগিনীর পার্শ্বে দাঁড়াইয়া আবার সেই প্রশ্ন করিল।

সুখমা ধীরে ধীরে নির্জন রাজপথের ঘটনাটি যথাযথভাবে বিবৃত করিল। কোনও কথা বাদ দিল না।

মণিমালা স্থিরভাবে সকল কথা শুনিয়া খানিক গুম্ হইয়া রহিল।

ললিত বাবু যমুনার প্রতি অনুরাগী, সে বিষয়ে তাহার মনে অণুমাত্র সন্দেহ ছিল না। কিন্তু ডাক্তার বাবুর আচরণে, সুখমার সম্বন্ধে ব্যবহারে তাহার মনে খটকা বাধিয়া গেল। সে চারি বৎসর পূর্বের ঘটনার কথা মাসীমার নিকট শুনিয়াছে। পথের ধারে নিরালস্য, তরুণ যুবক তরুণীনারীর নিকট—যুবতীর বিরক্তির কারণ জিজ্ঞাসা যে ঠিক অসঙ্গত, তাহা মনে করা যায় না, সত্য ; কিন্তু তথাপি মণিমালা ব্যাপারটির স্বাভাবিকতা সম্বন্ধে নিশ্চিত হইতে পারিতেছিল না। মনস্তত্ত্বঘটিত বিবিধপ্রকার উপন্যাস পাঠে মানুষের মনে মনস্তত্ত্বের সূক্ষ্মতিসূক্ষ্ম ঘাত-প্রতিঘাতের রহস্য মানুষকে একটু তত্ত্বাধেয়ী করিয়া তুলে। তাই কি মণিমালা এই



## যমুনাধারা

ব্যাপারের অন্তরালে মগ্ন চৈতন্যের কোনও প্রেরণা আছে কিনা, তাহাই ভাবিতেছিল ?

“মা! মা!—”

শীলার কচি কণ্ঠের আহ্বান মণিমালাকে বাস্তবজগতে ফিরাইয়া আনিল। “সে বলিল, “তুই কি এ পত্রের জবাব দিবি ?”

দৃঢ়কণ্ঠে সুষমা বলিল, “নিশ্চয় না। ডাক্তার বাবু হিন্দু অন্তঃপুরের স্বাভাবিক অবস্থার প্রতি উদাসীন হ’তে পারেন ; কিন্তু আমরা তা কি পারি ?”

হাসিয়া মণিমালা বলিল, “ঠিক কথা। আচ্ছা, এখন চুপ-চাপ থাকা যাক। চিঠিগানা আমার কাছেই রইল।”

শীলা ঘরে ঢুকিয়া বলিল, “মা, ক্ষিদে পেয়েছে।”

“চল মা।”

মণিমালা কণ্ঠার হাত ধরিয়া ঘরের বাহির হইল। যাইবার সময় সে আর একবার পশ্চাৎ ফিরিয়া চাহিল। দেখিল, সুষমা বাতায়ন-পথে বাহিরের দিকেই চাহিয়া রহিয়াছে।

ধীরে ধীরে সে একটা নিশ্বাস ত্যাগ করিয়া ভাঁড়ার ঘরের দিকে চলিয়া গেল।

## ত্রিশ

ভবতোষ রোপ্য-নির্মিত আলবোলার নল মুখ হইতে নামাইয়া স্থিতহাস্তে বলিলেন, “সুশীল বাবুটি চমৎকার লোক কিন্তু, যতীন। পরিবারটি বেশ সুখী এবং সাত্ত্বিকভাবাপন্ন, না, ভাই?”

যতীন্দ্রনাথ বলিল, “বাস্তবিক, সে কথা খুবই সত্য।”

একটু আনমনা হইয়া ভবতোষ বলিলেন, “তবে বিধবা বোনটির জন্ত ভদ্রলোকের মনে একটু দুর্ভাবনা আছে ব’লে বোধ হ’ল!”

যতীন্দ্রনাথ বন্ধুর প্রতি সপ্রশ্ন দৃষ্টি সন্নদ্ধ করিয়া বলিল, “কেন, বল ত?”

ভবতোষ বিস্মিত বন্ধুর দিকে স্থির-দৃষ্টিতে চাহিলেন। তার পর বলিলেন, “যুবতী বিধবা বোনের জন্ত দুর্ভাবনা হয় না?”

“কিসের দুর্ভাবনা! চিরদিন ভরণপোষণের ব্যবস্থা চালাতে হবে ব’লে? কিন্তু শুনেছি, যমুনার স্বামীর প্রচুর বিষয়সম্পত্তি আছে। পৈতৃক টাকাও যমুনা অনেক পেয়েছেন। তবে সে জন্ত সুশীল বাবুর চিন্তার ত কারণ নেই!”

ভবতোষের আলবোলার নল ধূম উগ্দিরণ করিতেছিল। ধূমজালে তাঁহার মুখের সকল অংশ সুস্পষ্ট দৃষ্টিগোচর হইতেছিল না। কাষেই যতীন্দ্রনাথ বন্ধুর মুখমণ্ডলের ভাব-পরিবর্তন লক্ষ্য করিতে পারিল না।

মহারাজ অর্ধ-নিমীলিতনেত্রে বাল্যবন্ধুর দিকে চাহিয়া বলিলেন,

## যমুনাধারা

“কিন্তু মেয়েটির অদৃষ্ট ভেবে দুঃখ হয় না? এত রূপ, এত গুণ, এই ভরা যৌবন; অভাগী দুই বছরের বেশী স্বামিসুখ ভোগ করতে পেলেন না!”

যতীন্দ্রনাথ বলিল, “অবশ্যই দুঃখ হয়। কিন্তু স্বামীর সৌভাগ্য হ’তে বঞ্চিত মেয়ের সংখ্যা এ দেশে অল্প নয়। তাঁরাও দুঃখভোগ করছেন ত!”

ভবতোষ ঈষৎ উত্তেজিতস্বরে বলিলেন, “এ অবস্থা দেখে সত্যি মনে হয়—বালবিধবা বা অল্পবয়সে যারা বিধবা হয়, তাদের বিয়ে দেওয়া উচিত।”

যতীন্দ্রনাথ বহুক্ষণ নীরবে বসিয়া রহিল। তার পর মৃদুস্বরে বলিল, “মহারাজ, তুমি অদৃষ্ট বা কর্মফল স্বীকার কর?”

ভবতোষ বলিলেন, “আমি হিন্দু, সুতরাং ওটা বেশী করেই মানি।”

ঈষৎ হাসিয়া যতীন্দ্রনাথ বলিল, “যার ভাগ্যে যেটা না থাকে, তাকে সে সৌভাগ্য ভোগ কেউ করাতে পারে?”

মহারাজ বলিলেন, “তোমার এ যুক্তি বিধবাদের বেলা যদি খাটাতে চাও, বিপত্নীকদের বেলা সার্থক ক’রে তুলতে পার?”

দৃঢ়স্বরে যতীন বলিল, “না, পারি নে। কিন্তু তাই ব’লে বিপত্নীকদের পুনরায় বিয়ে করাও মোটেই সমর্থন করতে পারি না। আমার বিশ্বাস, যারা দ্বিতীয়বার বিয়ে করে—পুরুষই হোক আর মেয়েই হোক—মনে প্রাণে তারা সুখী হ’তে পারে না।”

মহারাজ হাসিয়া বলিলেন, “না, ভাই, তোমার এ যুক্তি কিন্তু পৃথিবীতে খাটবে না। এই আমাদেরই দেশে ঢের পুরুষ, যখন

## যমুনাধারা

প্রাণসমা প্রিয়ার বিরোধে, দ্বিতীয় এবং তৃতীয়বার বিয়ে ক'রে পরম সুখে কালযাপন করছে, দেখা যাচ্ছে—যাদের মধ্যে বিধবা-বিবাহ আছে, তাদের বিধবারাও পত্যস্তুর গ্রহণ ক'রে বেশ আনন্দে পুত্র-কন্যা নিয়ে ঘরসংসার করছে, তখন তোমার ও যুক্তি কেউ শুনবে না।”

যতীন হাসিয়া বলিল, “আমার যুক্তি ত আমি প্রচার করতে যাচ্ছি না। যা আমার মনের দৃঢ় বিশ্বাস, তাই বলেছি মাত্র। এখনও বলব; যাদের মধ্যে ভালবাসা হয়েছে, এমন দম্পতির এক জন ম'রে গেলে, অন্য জন দ্বিতীয় পত্নী বা দ্বিতীয় পতি গ্রহণ ক'রে কখনও অন্তরে সুখী হ'তে পারে না। দেহের সুখ মনের আনন্দ নয়, মহারাজ!”

“মানি ভাই! তোমার এ কথা আমি সর্বান্তঃকরণে স্বীকার করি। কিন্তু যে জগৎ কথাটা পেড়েছি, তা তোমায় বলতে পারি কি?”

যতীন্দ্রনাথ সবিস্ময়ে বলিল, “আজ বাল্যবন্ধুর সয়ঙ্গ তুমি এমন ক'রে কথা বলছ কেন, মহারাজ!”

ভবতোষ বলিলেন, “তুমি কিছু মনে করো না, ভাই। ওটা কথার মাত্রা হিসাবে বলেছি।”

মহারাজ ভবতোষ নিম্নলিখিত-নেত্রে এক মিনিট ধূমপান করিলেন। তার পর সহসা সোজা হইয়া বসিয়া বলিলেন, “আমি সুশীল বাবুর কাছে শুনেছি, তাঁর বোনটিকে তিনি আবার বিয়ে দিতে চান। যমুনাকে তিনি যে রকম স্নেহ করেন, তাতে তাঁর পক্ষে এ রকম সিদ্ধান্ত করা অস্বাভাবিক নয়? হিন্দুশাস্ত্রে বিধবা-

## যমুনাধারা

বিবাহ আছে, বিদ্যাসাগর মহাশয় প্রমাণ ক'রে গেছেন। প্রচলিত সংস্কার বা প্রথার বাধা সুশীল বাবু লঙ্ঘন করতে চান। তাই আমার পরামর্শ তিনি জানতে চেয়েছিলেন।”

ভবতোষ থামিয়া গেলেন। বন্ধুর দিকে স্থিরদৃষ্টি নিক্ষেপ করিয়া তিনি চাহিয়া রহিলেন।

যতীন্দ্রনাথ অন্য দিকে চাহিয়া কথাটা শুনিতেছিল। বন্ধুকে নীরব হইতে দেখিয়া সে বলিয়া উঠিল, “তা সুশীল বাবুর ঘরোয়া ব্যাপারে আমার কি সংশ্রব, বন্ধু?”

ভবতোষ বলিলেন, “আমি ভেবেছিলুম, হয় ত তোমার সংশ্রব থাকতে পারে। কারণ, তুমিও সুশীল বাবুর পরিবারবর্গের হিতাকাঙ্ক্ষী।”

মৃদু হাসিয়া প্রশান্তকণ্ঠে যতীন্দ্রনাথ বলিল, “সে কথা মানি। সুশীল বাবুর পরিবারবর্গ যাতে সুখী হন, আনন্দে থাকেন, এ কামনা আমি সর্বান্তঃকরণে ক'রে থাকি। কিন্তু তিনি তাঁর বোনের আবার বিয়ে দিতে চান, তাতে আমার মতামতের কোন প্রয়োজন আছে বলে ত আমার মনে হয় না।”

ভবতোষ বলিলেন, “আমার সব কথা বলা হয়নি। আর একটু বললে তুমি সব বুঝতে পারবে। আমাদের ললিত ডাক্তার সুশীল বাবুর বিধবা ভগিনীকে বিয়ে করতে খুব রাজি বলেই মনে হয়। অন্ততঃ সুশীল বাবুর ধারণা যে, ললিতের পক্ষ থেকে কোন আপত্তি আসা দূরে থাকুক, বরং সাগ্রহেই সে রাজি হবে। সামাজিক সমস্যাতে ললিত বিশেষ গ্রাহ্য করে, আমারও এমন ধারণা নেই।”

## যমুনাধারা

অবশ্য আমি যখন হিন্দু এবং শাস্ত্রবিশ্বাসী, তখন আমি সমাজ-বিরোধী কোন কাণ্ড করাকে বাহাদুরী ব'লে মনে করিনে। কিন্তু যমুনার ব্যাপার আমাকেও বিচলিত ক'রে তুলেছে, বন্ধু, সে কথা আমি অস্বীকার করতে পারিনে।”

যতীন্দ্রনাথ দেখিল, ভবতোষের সদাপ্রকৃত মুখে একটা গভীর উত্তেজনার চিহ্ন ফুটিয়া উঠিয়াছে। সে বলিল, “যমুনা কি বিবাহে সম্মত? ললিত বাবু যদি রাজি থাকেন, তাঁকে বিবাহ করতে কি যমুনার আগ্রহ আছে?”

ভবতোষ বলিলেন, “এখানেই ত সমস্যা। আজ পর্য্যন্ত সে কথা যমুনার কাছে কেউ জিজ্ঞাসা করতে সাহস করেনি। পুনরায় বিবাহের তার আদৌ মত আছে কি না, সে কথা জানবার বিশেষভাবে চেষ্টা হয়নি। বাড়ীর সকলে শুধু তার কার্যকলাপ লক্ষ্য ক'রে চলেছেন। কোন কোন বিশেষ ব্যক্তির প্রতি তার শ্রদ্ধাবুদ্ধির পরিচয় জানা গেলে তবে তাঁরা তার অভিমত জানবেন।”

ভবতোষ আবার কি চিন্তা করিতে লাগিলেন। যতীন্দ্রনাথও নীরবে বসিয়া রহিল।

দুই একবার আলবোলায় নলে টান দিয়া মহারাজ বলিলেন, “দেখ, ললিত ডাক্তার কি বল্ছিল জান?”

“কি?”

“তাকে আমি জিজ্ঞাসা করেছিলুম। সে স্পষ্টই স্বীকার করেছে, সুশীল বাবুর বিধবা সহোদরাকে সে পত্নীরূপে পেল্লী নিজেকে ধন্য মনে করে। কিন্তু প্রায় তিন সপ্তাহ সে এখানে আছে, এর মধ্যে এক

## যমুনাধারা

দিনও আশ্বাস পাবার মত কোন লক্ষণই দেখতে পায়নি। এক বাড়ীতে থাকা সত্ত্বেও মেয়েটি তাকে সকল রকমে এড়িয়ে চলে। তাই এখন সে হতাশ হয়ে পড়েছে। অবশ্য তার মনের কথা সে প্রথমে আমাকেও বলতে চায়নি। তবে আমি নানা কৌশলে তার মনের ভাবটা জেনে নিয়েছি। সে কি বলে জান ?”

যতীন্দ্রনাথ বন্ধুর দিকে চাহিয়া কথাটা শুনিবার জগ্ন প্রস্তুত হইল।

ভবতোষ বলিলেন, “ললিত শুধু ডাক্তার নয়, ভাবুকও বটে। মনস্তত্ত্বের দিকটাও সে অনুশীলন করেছে বুলুম। সে বলে যে, সুশীলের ভগিনী তাকে যেমন সর্বপ্রযত্নে এড়িয়ে চলে, তেমন ভাবে তোমাকে এড়িয়ে চলে না। বরং ঠিক উল্টা। ললিতের ধারণা, তোমাকে তার ভাল লাগে এবং তুমিও—”

যতীন্দ্রনাথ বাধা দিয়া বলিল, “ললিত বাবু মনস্তত্ত্বের আলোচনা করতে গিয়ে তার গোলকধাঁধায় ঘুরে বেড়াচ্ছেন, দেখছি। কিন্তু ভদ্রঘরের বিধবা মেয়ের সম্বন্ধে তাঁর এই রকম অহেতুক কৌতূহল এবং মন্তব্য শুনে আমি তাঁর রুচির প্রশংসা করতে পারলাম না, মহারাজ!”

ভবতোষ বুলিলেন—যতীন্দ্রনাথ কিছু বিরক্ত হইয়া উঠিয়াছে। তিনি সহসা বলিলেন, “না হে, আমি পীড়াপীড়ি করাতেই সে অত্যন্ত অনিচ্ছা সত্ত্বে তার মত ব্যক্ত করেছি। এতে তার দোষ কিছু নেই, ভাই!”

যতীন্দ্রনাথ দৃঢ়স্বরে বলিল, “ভদ্রঘরের মেয়ের সম্বন্ধে আমার নিজের কোন বক্তব্য নেই, মহারাজ। তুমি ত জান, এ সকল ব্যাপার নিয়ে মাথা-ঘামাবার সময় এবং রুচি আমার নেই।”

## যমুনাধারা

মহারাজের মুখমণ্ডল ঈষৎ গম্ভীর হইল। তিনি আর কোন কথা বলিলেন না।

এমন সময় অন্তঃপুর হইতে বাহিরে আসিয়া সতু ডাকিল, “বাবা!”  
যতীন্দ্রনাথ পুত্রকে কাছে ডাকিল। সে তাহাকে কোলের কাছে টানিয়া লইয়া বলিল, “জ্যেষ্ঠীমাকে প্রণাম করেছিলে, সতু?”

বালক মাথা নাড়িয়া জানাইল, সে প্রণাম করিয়াছে।

ভবতোষ বলিলেন, “সতুকে স্কুলে দিয়েছ, যতীন?”

“না, ভাই! আমি নিজেই ওকে বাড়ীতে পড়াই। আর একটু বড় হোক, তখন স্কুলে দেওয়া যাবে। তাই ঠিক নয়?”

“খুব ভাল কথা। তবে একা একা ওর একটু কষ্ট হয় বোধ হয়?”

বালক সতু বলিয়া উঠিল, “আমার ত কষ্ট হয় না। আমি রোজ মাসীমার কাছে অনেকক্ষণ থাকি। শীলার সঙ্গে খেলা করি।”

ভবতোষ বলিলেন, “মাসীমা কে, যতীন?”

যতীন্দ্রনাথ সহজ কণ্ঠে বলিল, “সুশীল বাবুর বোনকে ও মাসীমা ব’লে ডাকে। তাঁর কাছে রোজই তিন চার ঘণ্টা থাকে। সুশীল বাবুর মেয়ে শীলার সঙ্গে খেলা করে। সুশীল বাবুর বাড়ীর মেয়েরা সতুকে বড় স্নেহ করেন।”

সতু উচ্ছ্বসিত-কণ্ঠে বলিয়া উঠিল, “বাবা, মাসীমার কাছে যাব। তিনি যা আমায় ভালবাসেন! শীলাও!”

ভবতোষ কোন কথা বলিলেন না। অন্তমনস্কভাবে তিনি কি ভাবিতে লাগিলেন।



## একত্রিশ

সন্ধ্যার পর বেড়াইয়া আসিয়া যমুনা মহাভারত লইয়া বসিল। উমাশশী আসিবার পর হইতে যমুনা আবার নূতন করিয়া রামায়ণ-মহাভারত পড়িতে আবস্ত করিয়াছিল। রামায়ণ শেষ হইবার পর মহাভারত কয়দিন হইতে আরম্ভ হইয়াছে। ঘণ্টাখানেক সে সন্ধ্যার পর এই ভাবে পড়িত। উমাশশী, সুষমা এবং মণিমলা পাঠের সময় উপস্থিত থাকিত। যমুনার কণ্ঠস্বর যেমন মধুর ছিল, তাহার আবৃত্তির ভঙ্গীও ছিল সুন্দর।

আজ সাবিত্রী-সত্যবানের উপাখ্যানাংশ আরম্ভ হইয়াছিল। যমুনা সমগ্র অন্তর দিয়া এই পবিত্র কাহিনী পাঠ করিতেছিল। হিন্দু নারীর কাছে সাবিত্রীর কাহিনী শুধু আদরণীর নহে, অতি পুণ্য অবদানপূত এবং অনুকরণীয়।

মার কাছে বাল্যকালে যমুনা মহাভারত পড়িতে শিখিয়াছিল। জ্ঞানসঞ্চারের সঙ্গে সঙ্গে সাহিত্য-চচ্চা এবং বিদ্যার্জনের স্পৃহা যতই বর্দ্ধিত হইয়াছিল হিন্দুর এই দুইখানি পুরাণেতিহাস—রামায়ণ ও মহাভারতকে সে আরও শ্রদ্ধাপূর্ণ অন্তরে পুনঃ পুনঃ পাঠ করিত।

সাবিত্রী যখন পিতৃনির্দেশে স্বামীর সন্ধানে বাহির হইয়া সত্যবানের গুণগ্রামে মুগ্ধা হইয়াছিলেন, তাঁহারই হস্তে আপনার নারী-জীবনকে সমর্পণ করিবেন বলিয়া পিতার কাছে নিবেদন

## যমুনাধারা

করিয়াছিলেন ; সত্যবান যে অল্লাষু, তাহা কেহ জানিতেন না । দেবর্ষি নারদ যখন সে কথা প্রকাশ করিয়া দিলেন, তখন স্নেহময় পিতৃহৃদয় ব্যাকুল লইয়া উঠিল । কন্যাকে অশ্রু পতি বাছিয়া লইতে রাজা অনুরোধ করিলেন । সাবিত্রী নম্রমধুর, দৃঢ়কণ্ঠে পিতাকে জানাইলেন, হৃদয় একবারই দান করা যায় । দানের জিনিষ ফিরাইয়া অন্যকে অর্পণ করা যায় না । পিতা কি তাঁহার কন্যাকে দ্বিচারিণী হইতে পরামর্শ দিবেন ?

যমুনার কণ্ঠে যেন বহু সহস্র বৎসর পূর্বের সাবিত্রীর বাণীই ঝঙ্কত হইয়া উঠিল । হিন্দুনারীর সনাতন, শাশ্বত উক্তি সমগ্র বাতাসকে এক অভূতপূর্ব ভাবের স্পন্দনে উচ্ছ্বসিত করিয়া ঘরের মধ্যে অনুরণিত হইতে লাগিল ।

মণিমাল্য নন্দার মুখের পানে চাহিয়া শুক্ক হইয়াছিল । হাঁ, হিন্দুনারী ছাড়া এই কথা অন্ত্র এ পর্যন্ত উচ্চারিত হয় নাই । সেও হিন্দুনারী, হিন্দু-স্ত্রী—তাহার সমস্ত অন্তর সাবিত্রীর যুক্তি এবং উক্তিকে সমর্থন করিল ।

সুষমা একমনে উজ্জ্বল আলোকাধারের দিকে চাহিয়াছিল । তাহার অন্তরও এই বহু-শ্রুত সনাতন উক্তিকে পুনরায় সশ্রদ্ধভাবে উপলব্ধি করিয়া তাহার আয়তলোচনপথে যেন প্রকাশ পাইতে চাহিল ।

উমাশশী বলিলেন, “কি মেয়েই জন্মেছিলেন সাবিত্রী ।”

যমুনা তখন পাঠ বন্ধ করিয়া কি চিন্তা করিতেছিল । তাহার দৃষ্টি যেন কোনও স্বপ্নলোকে মুচ্ছিত হইয়াছিল, উমাশশীর কথায় সে

## যমুনাধারা

বলিয়া উঠিল, “সাবিত্রী কি চিরন্তনী হিন্দুনারীর আদর্শ নন, মাসীমা?”

মণিমালা হাসিয়া বলিল, “ঠাকুরঝি যখন কোন বড় বিষয় নিয়ে কথা বলে, তখন ওর বলবার ভাষাও যেন আর এক রকম হয়, নয় কি সুষি?”

সুষমা এতক্ষণ নীরব ছিল। সে বলিয়া উঠিল, “কিন্তু দিদি, সেই যে কথাটা বলতে চেয়েছে, তার ভাষা ওর চেয়ে হাল্কা হ'লে মানাত না।”

উমাশশী বলিলেন, “ওরে, তোরা থাম্। যমুনা মা যে কথাটা বলেছে, তার সবটাই সত্যি। সাবিত্রীর আদর্শ হিন্দুর মেয়েদের চোখের সামনে সেই কোন্ যুগ হতে জল-জল ক'রে জলছে। যে দিন এ দেশের মেয়েরা এ আদর্শ ভুলে যাবে—সাবিত্রী, সীতা, দময়ন্তীর অগাধ স্বামিপ্রেমের মহিমা বুঝবার শক্তি হারিয়ে ফেলবে, সে দিন আর কিছু থাকবে না, মা!”

বলিতে বলিতে উমাশশীর কণ্ঠ গাঢ় হইয়া আসিল। তাঁহার নয়নযুগল সমুজ্জল হইয়া উঠিল।

এক পার্শে বসিয়া সোণার মা মহাভারত পড়া নিবিষ্টমনে শুনিতেছিল। সে বলিয়া উঠিল, “হেই, মাসীমা! এমন পুণ্য কাণ্ডের কথা কেউ ভুলতে পারে না। আমার মুখু মানুষ, আমরাও তাঁদের কথা মেনে চলি।”

এমন সময় বাহিরে শব্দ হইল, “মা কোথায়? সুষি দিদি কৈ গো?”

## যমুনাধারা

• কণ্ঠস্বর সুপরিচিত। মহারাজ ভবতোষ সঙ্গে সঙ্গে ভিতরে আসিয়া পড়িলেন। তাঁহার পশ্চাতে এক নারীমূর্ত্তি।

বাড়ীতে তখন পুরুষ কেহ ছিল না। সুশীল ও ললিত বেড়াইয়া ফিরে নাই।

উমাশশী তাড়াতাড়ি বাহিরে আসিলেন। সঙ্গে সঙ্গে তরুণীরাও ছুটিয়া আসিল।

উমাশশী মহারানীর হাত ধরিয়া সমাদরে ঘরের মধ্যে লইয়া গেলেন। এই মহা অভিজাতবংশের রানী আজ তাঁহাদের গৃহে বেড়াইতে আসিয়াছেন, ইহা অভিনব ব্যাপার। কিন্তু ভবতোষের কাছে অভিনব বলিয়া কোন ব্যবস্থা ছিল না। তিনি এ সকল ব্যাপারে গতানুগতিক পন্থা অনুসরণ করিতেন না।

মহারানী ঘরের মধ্যে প্রবেশ করিয়া প্রথমেই সুষমাকে বলিলেন, “চিন্তে পার, ভাই!”

সুষমা ইতিপূর্বে দুই একবার মহারানী বিভাবতীকে দেখিয়াছিল। পাটনার একবার ভবতোষ সস্ত্রীক দুই মাস ছিলেন। তখনই সে তাঁহার পাটনার প্রাসাদে গিয়া মহারানীর সহিত পরিচিত হইয়াছিল। এই সুদর্শনা, বুদ্ধিমতী মহারানীর সহিত আলাপ-পরিচয়ে সে এতই বিমুগ্ধ হইয়াছিল যে, তাঁহার স্মৃতি সে কোনও দিন ভুলিতে পারে নাই।

মহারাজ বলিলেন, “এতক্ষণ কি হচ্ছিল, দিদিরানীরা?”

সুষমা, যমুনা ও মনিমালা এই দম্ভ-অহঙ্কার-বর্জিত ব্রাহ্মণ মহারাজের চরণতলে নত হইয়া পদধূলি গ্রহণ করিল।

## যমুনাধারা

সুধমা বলিল, “যমুনা মহাভারত পড়ছিল, আমরা শুনছিলাম।”

“বটে ! বটে ! যমুনা দিদি মহাভারত পড়তে বড় ভালবাসেন বুঝি ? তা তোমাদের পড়ায় বাধা দিলাম। আচ্ছা, আমাকে এখানে বসতে দেবে ত ? তুমি পড় দিদি, আমরাও একটু শুন। মহাভারত আমার বড় প্রিয়।”

যমুনা প্রথমতঃ একটু সঙ্কোচ অনুভব করিল। কিন্তু ঐ সদানন্দ পুরুষের ব্যবহার ও আত্মীয়তায় সেও মুগ্ধ হইয়াছিল। সকলে আসনে উপবেশন করিলে, সে লজ্জা-নম্র-কণ্ঠে সাবিত্রীর কাহিনী পাড়িয়া যাইতে লাগিল। বেদব্যাসের রচিত সংস্কৃত শ্লোকচ্ছন্দে বর্ণিত বিষয় পাড়িয়া সে বাঙ্গালায় তাহা ব্যাখ্যা করিতে আরম্ভ করিল। প্রথমটা সঙ্কোচ অনুভূত হইয়াছিল, খানিকটা পড়া হইবার পর, তাহার সে সঙ্কোচভাব চলিয়া গেল। স্থান-কাল-পাত্র ভুলিয়া গিয়া সে যেন কথকের স্থান অধিকার করিয়া মহাভারতের এই অমৃতময়ী কাহিনী বলিয়া যাইতে লাগিল।

তপস্শাক্লিষ্টা, ধ্যানপরায়ণা সাবিত্রী শ্বশুরালয়ে বাক্‌সংঘম করিয়া শ্বশুর, শ্বশুর ও স্বামীর পরিচর্যায় নিরত। এক বৎসর পরে সত্যবান্‌ কালের আহ্বানে চলিয়া যাইবেন। সতী তাহা প্রতিরোধের জন্য একনিষ্ঠ তপস্শা করিয়া চলিয়াছেন। কেহ এই সংবাদ অবগত নহে। সতী অনুক্ষণ সতর্ক দৃষ্টিতে স্বামীর পরিচর্য্যা করিয়া চলিয়াছেন। বেদব্যাসের এই পবিত্র কাহিনী পাঠের সময় যমুনার প্রতি ভবতোষ, নিবিষ্ট-দৃষ্টিতে চাহিয়া রহিলেন। তাঁহার মনে হইতে লাগিল, ধ্যাননিরতা সাবিত্রীর মূর্ত্তি কল্পনার আলোকপাতে

## যমুনাধারা

মানুষকে দেখিতে হয় ; কিন্তু তাঁহার সম্মুখে এই যে তরুণী একাগ্রভাবে সাবিত্রীর কাহিনী পড়িয়া চলিয়া আছে, তাহার মূর্তিতে যেন সত্যযুগের সাবিত্রীর দীপ্তি সমুজ্জ্বল হইয়া উঠিয়াছে । কণ্ঠস্বরে যে প্রগাঢ় তন্ময়তার ঝঙ্কার উঠিতেছে, তাহা অননুশ্রুত । সত্যই তিনি কোনও মানব-মানবীর কণ্ঠে এমন সুর-ঝঙ্কার কখনও শুনে নাই ।

শ্রোতৃবৃন্দ সকলেই মুগ্ধভাবে সত্যবান্ ও সাবিত্রীর কথা মৃত পান করিতেছিল । মহাকালকে পরাজিত করিয়া আদর্শ-সত্য, আদর্শ-নারী এখন সত্যবানের প্রাণ ফিরাইয়া আনিলেন, অন্ধ শত্রুর দৃষ্টান্ত করিয়া অপহৃত রাজ্য লাভ করিলেন, দিকে দিকে আদর্শ-নারীর মহিমা বিঘোষিত হইল, তখন যমুনা পাঠ সাঙ্গ করিল ।

কয়েক মূহূর্ত্ত সমগ্র কক্ষ যেন স্তব্ধভাবে সেই বিউয়িনী নারীশক্তিকে উপলক্ষি করিতে লাগিল । নাহি ! নাহি ! পৃথিবীতে এমন নারী কোনও যুগে জন্মগ্রহণ করে নাহি । কিন্তু নারীজাতি, হিন্দুনারী সেই স্মরণাতীত যুগ হইতে এই মহাশক্তিময়ী নারীর মহিমা উপলক্ষি করিয়া তাঁহারই সান্নিধ্যলাভের চেষ্টা করিতেছে ।

মহারাজ ভবতোষ গাঢ়স্বরে বলিলেন, “যমুনা দিদি, তোমার পড়া শুনে আজ আমার মার কণা মনে হচ্ছে । তিনি রোজ আমাকে মহাভারত প’ড়ে শোনাতেন । আজ থেকে তুমি দিদির পদ থেকে আমার কাছে মার আসন পেলে ।”

কক্ষস্থ সকলেই ভবতোষের ভাববিষয় ~~মতামত~~ ~~বিষয়ে~~ ~~সবিস্ময়ে~~ চাহিয়া রহিল ।

যমুনার মুখ আরক্ত হইয়া ।

## বত্রিশ

উমাশশী বার বার পুল্লের পত্র পাঠ করিলেন ।

বিষয়টা বিশেষভাবে ভাবিয়া দেখিবার । এক দিন যাহাকে জামাতরূপে পাইবার আগ্রহ তাঁহার মনে জাগিয়াছিল, সে ব্যক্তি মনারাসে তাঁহার কন্যাকে উপেক্ষা করিয়াছিল । অবশ্য এ কথা তা, বিনাহযোগ্য কন্যা থাকিলে অনেক সম্বন্ধই আসে ; যত্নাখানের অপমান সহ্য করিতেই হয় । কিন্তু সে কথা নহে । পট্টাচারে কন্যার অবোধ্যতাকে বিক্রপায়কভাবে ব্যাখ্যা না করিয়া ও যত্নাখান করাই বিধি । ভদ্রসমাজে সেই ব্যবস্থাট প্রচলিত । পট্টাচার সভ্য মানুষ ভুলিবে কেন ?

তাঁহার কন্যা আধুনিক যুগের উপযোগী পরীক্ষা তখন পাশ হইতে নাই । সে কথা ত সকলেই জানিত । কিন্তু যেহেতু আমি স্নেহশিক্ষিত, এমন অল্পশিক্ষিতা আমার যোগ্য নহে, এমন ভাবের সত্তব্য কি মানুষের আত্মসম্মান-জ্ঞানকে প্রচণ্ডভাবে আঘাত করে ? উমাশশী কি সে দিন গভীরভাবে আহত হন নাই ?

পুল্ল বিমলচন্দ্র চারি বৎসর পরে আত্ম আবার ললিত ডাক্তারের হিত সূখমার বিবাহের প্রস্তাব করিয়াছে । সব কথা স্পষ্টভাবে লিখে নাই । সে শীঘ্রই আসিয়া—আলোচনার পর ব্যবস্থা করিবে ।

সূখমা এখন স্নেহশিক্ষিতা বলিয়া ললিত ডাক্তার হন ত রাজি **পারে :** কিন্তু উপযাচক হইয়া বিমল আবার তাহার কাছে **কুর্ভা** অনুভব করিল না ? তিনি কন্যার জননী ।

## যমুনাধারা

মানুষকে দেখিতে হয় ; কিন্তু তাঁহার সম্মুখে এই যে তরুণী একাগ্রভাবে সাবিত্রীর কাহিনী পড়িয়া চলিয়াছে, তাহার মুষ্টিতে যেন সত্যযুগের সাবিত্রীর দীপ্তি সমুজ্জ্বল হইয়া উঠিয়াছে । কণ্ঠস্বরে যে প্রগাঢ় তন্ময়তার ঝঙ্কার উঠিতেছে, তাহা অনন্যশ্রুত । সত্যই তিনি কোনও মানব-মানবীর কণ্ঠে এমন সুর-ঝঙ্কার কখনও শুনেন নাই ।

শ্রোতৃবৃন্দ সকলেই মুগ্ধভাবে সত্যবান্ ও সাবিত্রীর কথা মৃত পান করিতেছিল । মহাকালকে পরাজিত করিয়া আদর্শ-সত্য, আদর্শ-নারী এখন সত্যবানের প্রাণ ফিরাইয়া আনিলেন, অন্ধ স্বপ্নের দৃষ্টিলাভ করিয়া অপহৃত রাজ্য লাভ করিলেন, দিকে দিকে আদর্শ-নারীর মহিমা বিঘোষিত হইল, তখন যমুনা পাঠ সাঙ্গ করিল ।

কয়েক মূহূর্ত্ত সমগ্র কক্ষ যেন স্তব্ধভাবে সেই বিজয়িনী নারীশক্তিকে উপলক্ষি করিতে লাগিল । নাই ! নাই ! পৃথিবীতে এমন নারী কোনও যুগে জন্মগ্রহণ করে নাই । কিন্তু নারীজাতি, হিন্দুনারী সেই স্বরণাতীত যুগ হইতে এই মহাশক্তিময়ী নারীর মহিমা উপলক্ষি করিয়া তাঁহারই সান্নিধ্যলাভের চেষ্টা করিতেছে ।

মহারাজ ভবতোষ গাঢ়স্বরে বলিলেন, “যমুনা দিদি, তোমার পড়া শুনে আজ আমার মার কথা মনে হচ্ছে । তিনি রোজ আমাকে মহাভারত প’ড়ে শোনাতেন । আজ থেকে তুমি দিদির পদ থেকে আমার কাছে মার আসন পেলে ।”

কক্ষস্থ সকলেই ভবতোষের ভাববিহ্বল মুখের দিকে সবিস্ময়ে চাহিয়া রহিল ।

যমুনার মুখ আরক্ত হইয়া উঠিল ।



## বত্রিশ

উমাশশী বার বার পুস্তকের পত্র পাঠ করিলেন ।

বিষয়টা বিশেষভাবে ভাবিয়া দেখিবার । এক দিন যাহাকে জামাতরূপে পাইবার আগ্রহ তাঁহার মনে জাগিয়াছিল, সে ব্যক্তি অনায়াসে তাঁহার কন্যাকে উপেক্ষা করিয়াছিল । অবশ্য এ কথা সত্য, বিবাহযোগ্য কন্যা থাকিলে অনেক সম্বন্ধই আসে ; পত্যাখ্যানের অপমান সহ্য করিতেই হয় । কিন্তু সে কথা নহে । স্পষ্টাঙ্গের কন্যার অযোগ্যতাকে বিদ্রূপাত্মকভাবে ব্যাখ্যা না করিয়াও প্রত্যাখ্যান করাই বিধি । ভদ্রসমাজে সেই ব্যবস্থাই প্রচলিত । শিষ্টাচার সভ্য মানুষ ভুলিবে কেন ?

তাঁহার কন্যা আধুনিক যুগের উপযোগী পরীক্ষা তখন পাশ করে নাই । সে কথা ত সকলেই জানিত । কিন্তু বেহেতু আমি উচ্চশিক্ষিত, এমন অল্পশিক্ষিতা আমার যোগ্য নহে, এমন ভাবের মন্তব্য কি মানুষের আত্মসম্মান-জ্ঞানকে প্রচণ্ডভাবে আঘাত করে না ? উমাশশী কি সে দিন গভীরভাবে আহত হন নাই ?

পুত্র বিমলচন্দ্র চারি বৎসর পরে আজ আবার ললিত ডাক্তারের সহিত সুষমার বিবাহের প্রস্তাব করিয়াছে । সব কথা স্পষ্টভাবে লিখে নাই । সে শীঘ্রই আসিয়া—আলোচনার পর ব্যবস্থা করিবে ।

সুষমা এখন সুশিক্ষিতা বলিয়া ললিত ডাক্তার হয় ত রাজি হইতে পারে ; কিন্তু উপযাচক হইয়া বিমল আবার তাহার কাছে প্রস্তাব করিতে কি কুণ্ঠা অনুভব করিল না ? তিনি কন্যার জননী ।

## যমুনাধারা

কণ্ঠার ভবিষ্যতের কথা মনে করিয়া পিতামাতাকে অনেক অপমান লাঞ্ছনা ভোগ করিতে হইয়া থাকে ; কিন্তু এ ক্ষেত্রে তাঁহার অন্তর যেন বিদ্রোহী হইয়া উঠিল ।

হাঁ, তবে যদি নূতন করিয়া ললিতের পক্ষ হইতে প্রথমে প্রস্তাব আসিত, তাহা হইলে তাঁহার কোন আপত্তি হইত না । বিমল— তাঁহার তেজস্বী বুদ্ধিমান্ পুত্র বিমল, এ কি করিতে চলিয়াছে ? মান অপমানের প্রতি বিমলের তীব্র লক্ষ্য আছে, তাহার সহস্র পরিচয় তিনি পাইয়া আসিয়াছেন । সহোদরার বয়োবৃদ্ধির জন্ম— এত দিন কুমারী থাকার জন্ম—শেষে বিমলেরও কি মর্তিভ্রম ঘটিল ?

যাক্, এ কথা এখন তিনি যুগাক্ষরে প্রকাশ করিবেন না । সুখমা যদি জানিতে পারে, তাহা হইলে অভিমানিনী কণ্ঠা অত্যন্ত মর্শ্ববেদনা পাইবে । না, বিমল না আসা পর্য্যন্ত তিনি চুপ করিয়াই থাকিবেন । ললিতের মনোভাবের প্রতিও এখন হইতে লক্ষ্য রাখা দরকার । পুনরার প্রত্যাখ্যানের অবস্থা যাহাতে ঘটিতে না পারে, তাহার ব্যবস্থাও করিতে হইবে ।

উমাশশী পত্রখানা ছিন্ন করিয়া উনানে নিক্ষেপ করিলেন ।

ঠিক সেই সময়ে সুখমা মার কাছে ছুটিয়া আসিল । সে বলিল, “মা, পাটনা থেকে কার চিঠি এসেছে ?”

উমাশশী বলিলেন, “তুই কার কাছে শুন্নি ?”

“কেন, জামাইবাবু বললেন, পাটনা থেকে মাসীমার একখানা খামে চিঠি এসেছে । কে লিখেছে ? দাদা ?”

## যমুনাধারা

উমাশশী সংক্ষেপে বলিলেন, “হঁ ।”

“দাদা কি লিখেছেন, মা ?”

কণ্ঠার বাগ্ৰ প্রংশে উমাশশী বলিলেন, “বৌমাদের নিয়ে সে শীঘ্র এখানে আসছে ।”

সুখমার মন আনন্দে নৃত্য করিয়া উঠিল । সে বলিল, “কবে আসবেন, মা ?”

“তাঁ কিছু লেখেনি । বোধহয় মাসের গোড়াতেই আসবে ।”

“কে আসবে, মাসীমা ?” বলিয়া মণিমলা প্রবেশ করিল ।

“তোরা দাদা বৌমাদের নিয়ে এখানে আসছে লিখেছে ।”

মণিমালার মুখ হর্ষোৎফুল্ল হইয়া উঠিল । আঃ ! কি আনন্দ হইবে। কথাটা স্বামীকে জানাইবার জন্ত সে তাড়াতাড়ি চলিয়া গেল যাইবার সময় বলিয়া গেল, “আমি দাদাকে আসবার জন্ত আজই চিঠি লিখে দেব, মাসীমা ”।

দাদা বৌদিদিদের লইয়া আসিতেছেন, এ সংবাদে সুখমা সুখী হইল বটে ; কিন্তু আদালতের মোকদ্দমা—উপার্জন ছাড়িয়া, বড়দিনের ছুটি শেষ হইয়া যাইবার পর তিনি কেন আসিতেছেন, তাহা সে বুঝিতে না পারিয়া কিছু বিস্মিত হইল ।

মাঝে বলিল, “হঁ মা, দাদা এখানে আসবেন, তাতে তাঁর লোকসান হবে না ?”

উমাশশী হাসিয়া বলিলেন, “সে ব্যবস্থা তোরা দাদা না ক’রে কি আসছে ? \* আমার বোধ হয়, সে মাঝে মাঝে জরুরী মোকদ্দমার দিন এখান থেকে গিয়ে কাষ সেরে আসবে ।”

## যমুনাধারা

কিন্তু এমন কি জরুরী ব্যাপার উপলক্ষে দাদা এখানে আসিতেছেন? আদালতের কাজ পর্য্যন্ত বন্ধ রাখিয়া এ সময়ে আসিবার কি প্রয়োজন? সুসমা বুদ্ধিতে পারিল না বটে, তবে সে ভাবিল, এ জন্ত অনর্থক চিন্তায় লাভ কি আছে?

বৌদিদির নিকট কথাটা শুনিয়া যমুনা হর্ষেৎফুল্ল-মুখে আসিয়া বলিল, “সুষ্টি, ঠাণ্ডা নাকি শীগগীর আসছেন?”

—“ই্যা, যমুনাধারা। দাদা বৌদি হঠাৎ কেন আসছেন, তা বুঝলাম না। বড়দিনের ছুটি চলে গেল, তখন খেয়াল হ'ল না,— এখন কি যে মতলব, তা বুঝছি না।”

সুসমা ঘর হইতে বাহির হইয়া আপন মনে বাগানের দিকে চলিতে লাগিল। গোলাপ-গাছগুলিতে ফুল ফুটিয়াছে। বিবিধ বর্ণের সমাবেশ নয়ন ও মনকে মুগ্ধ করিয়া দেয়। সুশীলের ব্যবস্থা ছিল, নিতান্ত প্রয়োজন না হইলে কোন ফুল কখনই তোলা হইবে না। মাসীমার পূজার জন্ত কিছু কিছু ফুল তোলা হইত। সে জন্ত গাঁদা-ফুলের অভাব ছিল না। জবা ও অপরাজিতা ফুল বারো মাস যাহাতে পাওয়া যাইতে পারে, এমন ভাবের বিভিন্ন জাতীর জবা ও অপরাজিতা ফুল দেওঘরের খাগানে সুশীলের পিতা বহু পূর্ব হইতেই সংগ্রহ করিয়া রাখিয়াছিলেন। পুরাতন মালীরা সে সকল গাছের পরিচর্যায় কোনও দিন যাহাতে উদাসীন না হইতে পারে, সে বিষয়েও সুশীলের সতর্ক দৃষ্টি ছিল। পিতার স্মৃতিকে সজীব রাখিবার জন্ত, তাঁহার যাবতীয় ব্যবস্থা সে পূর্ণমাত্রায় বজায় রাখিয়াছিল। আধুনিক মতবাদ তাহার পিতৃভক্তির কাছে তেমন

## যমুনাধারা

ঠাই পাইত না। বন্ধু-বান্ধবগণ এ জন্ত সুশীলকে পৌরাণিক বলিয়া উপহাস করিতে কুণ্ঠিত হইত না।

সুখমা গোলাপ ও গাঁদাক্ষেত্র পার হইয়া একটা আম্রবৃক্ষের কাছে আসিয়া দাঁড়াইল। অদূরে অনতি-উচ্চ প্রাচীর, তাহার পার্শ্বে ই প্রশস্ত রাজপথ। সে সময়ে পথে বড় কেহ চলিতেছিল না, বেলা এগারটা বাজিয়াছিল।

আম্রবৃক্ষের কিছু দূরে একটি বাঁধানো বেদী বা চত্বর ছিল। সেখানে বসিয়া চারিদিক দেখা যায়। সুখমা সেইখানে বসিয়া পড়িল। তাহার মন কিছু দিন হইতে বিক্ষিপ্ত হইয়া পড়িয়াছিল। কেন যে এই বিক্ষিপ্ততা, তাহা অনুমান করিতে পারিত না; কিন্তু মানসিক অবস্থার এই পরিবর্তন তাহার দার্শনিক চিন্ত আবিষ্কার করিয়া ফেলিয়াছিল। কারণ ব্যতীত কোন কার্য হয় না, ইহা সে জানিত। তাই সে হেতুর সন্ধান নিজেই আরম্ভ করিয়াছিল। কিন্তু এ পর্য্যন্ত বিষয়টি সে আবিষ্কার করিতে পারে নাই।

আহারের বিলম্ব ছিল। সে রাজপথের দিকে চাহিয়া রহিল।

মানুষের মন শূন্য থাকিতে পারে না। চিন্তার পর চিন্তা উর্গনাভের মত সূক্ষ্ম তত্ত্ব সৃষ্টি করিয়া জাল রচনা করিতে থাকে। বিশেষতঃ মন যখন বিক্ষিপ্ত এবং বিক্ষুব্ধ হইয়া উঠে, তখন চিন্তার কোনও ধারাবাহিকতাই থাকে না। ঝটিকার সময় যেমন এলোমেলো বাতাস বহিতে থাকে, চিন্তাও ঠিক তেমনই বিশৃঙ্খলভাবে, উদ্ভট কল্পনার তরঙ্গ তুলিয়া হৃদয়তটে প্রতিহত হইয়া থাকে।

সুখমার চিত্ত-বেলাতেও অনির্দিষ্ট, অসমাপ্ত চিন্তার তরঙ্গ-সমূহ

## যমুনাধারা

আছাড় খাইয়া পড়িতেছিল। বাল্য, কৈশোর, প্রথম যৌবনের নানা ঘটনা নানা আকার ধরিয়া তাহার মানসপটে দেখা দিতেছিল। তাহাদিগকে অবলম্বন করিয়া চিন্তার তরঙ্গ উৎক্ষিপ্ত হইতেছিল। সুখমা শূন্যদৃষ্টিতে চাহিয়া চিন্তার জালে আচ্ছন্ন হইয়া পড়িয়াছিল।

প্রায় অর্দ্ধঘণ্টা পরে সে সহসা রাজপথের দিকে চাহিতেই তাহার মুখমণ্ডলে একঝলক রক্তরাগ ফুটিয়া উঠিল। সে দেখিল, অনতিদূরে পথের ধারে দাঁড়াইয়া ললিতচন্দ্র। তাহার দৃষ্টি পর্য্যন্ত সুখমা যেন দেখিতে পাইতেছিল। অত্যন্ত করুণভাবে সে তাহারই দিকে চাহিয়া রহিয়াছে। অবশ্য কোনও পুরুষ,—পরিচিতই হউক, অথবা অপরিচিতই হউক, কোনও নারীর প্রতি দৃষ্টিপাত করিতেছে, ইহা জানিতে পারিলে, সেই নারীর মন আপনা হইতেই একটু ত্রস্ত হইয়া উঠেই। বিশেষতঃ বাঙ্গালী হিন্দু নারীরা সে দৃষ্টিপাত হইতে দূরে সরিয়া যাইতেই চাহে। সুখমা ললিতের এই দৃষ্টিপাতে সন্ত্রস্ত হইয়া উঠিলেও, তাহার মনে হইল, ললিতের লুক্ক বা কলুষ মনের ছাপ—সে দৃষ্টিতে যেন রেখাপাত করে নাই।

কিন্তু চকিতে সে উঠিয়া দাঁড়াইল।

ঠিক সেই সময়ে মণিমালার কর্ণস্বর শ্রুত হইল। দিদি তাহাকে ডাকিতেছে, এখনই হয় ত আসিয়া পড়িতে পারে। সুখমা দ্রুতগতিতে বাড়ীর দিকে চলিল।

## তেত্রিশ

আর কি ভাল দেখায়? তিন সপ্তাহ হইয়া গিয়াছে, সে নিজের চিকিৎসা-ব্যবসায় ছাড়িয়া অনিশ্চিতের পশ্চাতে লুক্ক আশায় ঘুরিয়া বেড়াইতেছে। যমুনাকে স্ত্রীরূপে পাইবার কোন আশাই নাই। সে স্নানিশ্চিতভাবে বুঝিয়াছে, যমুনা কোন দিনই তাহার দিকে প্রাণিত দৃষ্টি ফিরাইবে না। সে নিশ্চয়ই যতীন্দ্রনাথের অনুরাগিণী। যতীন্দ্রনাথকে যমুনা শ্রদ্ধা করে, তাঁহার সাক্ষাতে সে উৎফুল্ল হইয়া উঠে। সঙ্কোচের অতি ক্ষীণ বাধাও যমুনার কথা, কার্য বা ব্যবহারে প্রকাশ পায় না। যতীন্দ্রনাথ যখন গান করেন, যমুনা আত্মবিস্মৃত হইয়া শুনে। বিশেষতঃ যতীন্দ্রনাথের পুত্রের প্রতি যমুনার আকর্ষণ অত্যন্ত অধিক। এ সকল কি শ্রদ্ধার লক্ষণ নহে? শ্রদ্ধা ত অনুরাগের পূর্বগামিনী। কবি, ঔপন্যাসিক, মানব-মনোবৃত্তির তত্ত্ব-লেখকগণ এই কথাই ত বলিয়া থাকেন। সুতরাং বৃথা এই তরুণীর আশায় থাকিয়া লাভ কি? যাহা দুর্লভ এবং কোনও দিন তাহার কামনাকে সার্থক করিয়া তুলিবে না, তাহার জন্ম লালান্নিত হইয়া বেড়ান ত পৌরুষের দ্যোতক নহে। হাঁ, সে মনে মনে যমুনাকে ভালবাসিয়াছিল।

ললিত সহসা নিশীথ রজনীর অন্ধকারে শয্যা হইতে উঠিয়া বসিল। দীপশলাকার সাহায্যে সে আলোকাধারে আলোকোৎপাদন করিল। অন্ধকার, আজ যেন তাহার কাছে অসহ।

## যমুনাধারা

আলো জ্বালিয়া শয্যায় বসিয়া সে লেপখানা ভাল করিয়া গার জড়াইয়া লইল। শীত অসম্ভব প্রবল। সে ভাবিতে লাগিল।

ভালবাসা? যমুনাকে কি সত্যই সে ভালবাসিয়াছিল?

হাঁ, তাহার কাছে এই তরুণী স্পৃহণীয়া বলিয়াই সে তাহাকে ভালবাসিয়াছে। যদি তাহা না হইত, সে কি যমুনাকে ভালবাসিতে পারিত? যদি সে কুরুপা বর্ষীয়সী হইত, একটা অঙ্গ তাহার বিকল হইত, তবুও কি সে যমুনাকে ভালবাসিতে পারিত?

ললিত চিন্তা করিতে লাগিল।

না, তাহা সে সত্যই পারিত না। কেই বা পারে? ইন্দ্রিয়গ্রামকে বাহিরের রূপই ত আকর্ষণ করে, তাহারই ফলে অনুরাগ জন্মিয়া থাকে। হাঁ, সে কথাও সত্য—গুণের আকর্ষণে মুগ্ধ হইয়াও মানুষ ভালবাসে!

সে একই কথা নহে কি? আকর্ষণ না জন্মিলে ভালবাসা জন্মে না। তা সে দেহেরই হউক বা মনেরই হউক। যমুনার মনের কোন পরিচয়, তাহার গুণের কোনও আকর্ষণ ললিত অনুভব করে নাই। শুধু তাহার মত বিদূষী, সুন্দরী, ঐশ্বর্যশালিনী তরুণীর অকাল-বৈধব্য ললিতের মনে একটা ব্যথার সঞ্চার করিয়াছিল। তার পর যখন সে জানিতে পারিয়াছিল যে, সুশীল বাবু সহোদরার পুনরায় বিবাহ দিবার জন্ত ব্যস্ত তখনই সে যমুনার প্রতি একটা আকর্ষণ অনুভব করিয়াছিল, ভালবাসা জন্মিয়াছিল।

কিন্তু একতরফা ভালবাসার মূল্য কি? কবি বলিয়াছেন, “ভালবাসার নাম আত্মবিসর্জনের আকঙ্ক্ষা।” কিন্তু ললিতের মনে



## যমুনাধারা

এই জাতীয় ভালবাসার প্রতি শ্রদ্ধা নাই। “ভালবাসিবে ব’লে ভালবাসিনে,” এসব কবিকল্পনার উপযুক্ত। যাহারা বাস্তবতার উপাসক, তাহারা ইহাতে কোনও মাধুর্য্যরসের সন্ধান পায় না। বরং তাহার তুলনায় যিনি লিখিয়াছেন—

“আমি নিশিদিন তোমার ভালবাসি, তুমি অবসরমত বাসিও!”—

তাঁহার ভালবাসার ব্যাথায় কিছু লাভের প্রত্যাশা আছে। একতরফা ভালবাসার উপভাস জন্মে, কিন্তু জীবন দুর্ভাগ হয় না কি? ললিতের মুখে মৃদু হাস্যরেখা উদ্ভাসিত হইল।

না, তেমন ভালবাসার জগৎ সে জীবনপাত করিতে পারে না। বস্তুতাত্ত্বিকতার যুগে, শুধু একটা কল্পনা লইয়া জীবনব্যাপী দুঃখ, হাহতাশ—না, সেরূপ সাধনা তাহার নাই। ইহাতে যমুনা—

কিন্তু প্রকৃতই কি সে যমুনাকে ভালবাসিয়াছিল? অথবা এত দিন তাহার অনবদ্য দেহ-মাধুর্য্য, রূপশ্রী, তারুণ্যই তাহাকে আকর্ষণ করিয়াছিল? অথবা আরও কিছু?

ললিত তন্ময়ভাবে চিন্তা করিতে লাগিল।

ভাবের ঘরে চুরী করিলে কোনও লাভ আছে কি? আশ্রয়বঞ্চনা করার কোনও সার্থকতা নাই। না, সে তাহা করিবে না।

মোহিত তাহার সতীর্থ ছিল। পরীক্ষায় মোহিত সকল বিষয়েই পূর্ক্কাবধি তাহাকে পরাজিত করিয়া আসিয়াছিল। বহু চেষ্টা ও সাধনা সত্ত্বেও সে সতীর্থকে কোনও বিষয়ে হঠাইতে পারে নাই। অতি লঘু আয়াসে মোহিত তাহাকে পাছে ফেলিয়া জয়মাল্য লাভ করিয়াছিল। সেই জয়মাল্যের কৌস্তভ-মণি যমুনা। মোহিত

## যমুনাধারা

এখন নাই—কিন্তু যে অমূল্য রত্ন সে ফেলিয়া গিয়াছে, তাহাকে লাভ করিবার বাসনা কি তাহার মগ্ন চৈতন্যে ছিল না ?

ছিল। এই বিরাট সত্যকে অস্বীকার করা চলে না। পৃথিবীর কোনও মানুষ তাহার অন্তরের এই গোপন ইতিহাস জানে না, জানিবার সম্ভাবনাও নাই, কিন্তু দিন-ছনিয়ার মালিক ?

ললিতের সর্কদেহ শিহরিয়া উঠিল। এতদিন সে ঈশ্বরের অস্তিত্বে বিশ্বাস করিতে পারে নাই। কিন্তু সে দিন বৈষ্ণনাথজীর প্রস্তুতলিঙ্গ স্পর্শ করিবার সৌভাগ্য লাভের পর, সে কোনও মতেই নাস্তিক্য-বুদ্ধিকে আমল দিতে পারিতেছিল না। তাহার মনের কোণ হইতে একটা প্রেরণা উদ্ভিত হইয়াছিল—তিনি আছেন।

না, মনের কাছে সে খাঁটি থাকিবে। সত্যই ছাত্রজীবনের ব্যর্থতা, পরাজয়ের ক্ষোভ সে ভুলিতে পারে নাই। তাই মোহিতের পরিত্যক্ত পত্নীকে—এই বিচরী সুন্দরী তরুণীকে লাভ করিবার কামনাই তাহাকে যমুনার প্রতি সবেগে আকৃষ্ট করিয়াছিল। সতীর্থ জীবিত থাকিতে সে যাহা পার নাই, তাহার অবিদ্যমানে তাহার অর্দ্ধাঙ্গিনীকে সে যদি জীবনসঙ্গিনীরূপে লাভ করিতে পারে, তবে তাহার মনের আংশিক ক্ষোভ মিটিবে।

মগ্নচৈতন্যে এই সত্যরূপই কি পরিস্ফুট হইয়া উঠে নাই ? ”

যুবক স্তব্ধভাবে অনেকক্ষণ বসিয়া রহিল।

না, ললিত আত্মবঞ্চনা করিতে চাহে না। সত্যকে অস্বীকার করিয়া মনুষ্যত্বকে অপমানিত করিবার অধিকার কাহারও নাই।

সুতরাং যমুনার প্রতি তাহার এই আকর্ষণ প্রকৃত ভালবাসা—

## যমুনাধারা

প্রেমজনিত, তাহা স্বীকার করা চলে না। ভালবাসা যদি সত্যই তাহার মধ্যে ঘটিবার সম্ভাবনা থাকিত, তাহা হইলে যমুনার দিক হইতে কোনও 'প্রকার সাড়া না আসিলেও সে কেন মনে মনে তাহাকে ভালবাসিয়া তৃপ্ত হইতে পারিতেছে না? প্রতিদানের কামনা তাহাকে এত অধীর ও আগ্রহশীল করিয়া তুলিয়াছে কেন? তাহার এই আকর্ষণকে যদি ভালবাসার পর্যায়ে ফেলা যায়, তাহা দান-প্রতিদানমূলক, অতি নিম্ন-স্তরের আকর্ষণ, ভোগস্পৃহা, আত্মতৃপ্তি তাহার লক্ষ্য।' ভারতবর্ষের শিক্ষা এবং আদর্শ অনুসারে যদি বিচার করিতে হয়, তাহা হইলে ইহাকে প্রেমের পরিবর্তে কাম সংজ্ঞা দেওয়াই সমীচীন নহে কি?

ললিতচন্দ্র অস্থির হইয়া উঠিল। তাহার অন্তরের মানুষ্যটি মাথা খাড়া করিয়া অকরণ দৃষ্টি নিষ্ফেপ করিয়া দৃঢ়কণ্ঠে সেন বলিয়া উঠিল—না, যমুনাকে কোন দিনই ভালবাসার দৃষ্টিতে সে দেখিতে পারে নাই। এত দিন সে আত্মবঞ্চনা করিয়া আসিয়াছে। প্রতীচ্য শিক্ষা ও মনো-বৃত্তির গড্ডলিকা-প্রবাহে ভাসিয়া গিয়া সে যাহাকে প্রেম বলিয়া মনে করিয়াছিল, তাহা কাম ব্যতীত অপর কিছুই নহে। শুধু সে নহে, দেশের অধিকাংশ নরনারী ইদানীং এই মানসিক আকর্ষণকে ভ্রান্তিবশে প্রেম বলিয়াই ব্যাখ্যা করে।

অকস্মাৎ তাহার মানস-দৃষ্টির সম্মুখে সে দিনের একটি চিত্র ভাসিয়া উঠিল। এই বাড়ীতেই সে দিন যতীন্দ্রনাথ পদাবলী গান করিয়াছিলেন। মহারাজ প্ৰভৃতির একান্ত অনুরোধে যতীন্দ্রনাথ সেদিন কীৰ্ত্তন গান এড়াইতে পারে নাই। সে দিন একাদশী তিথি

## যমুনাধারা

ছিল। অভুক্ত অবস্থা ছাড়া যতীন কীর্তন গাহে না। সারাদিন উপবাসী যতীন্দ্রনাথ সন্ধ্যার সময় পদাবলী গাহিতে থাকে।

ললিতের কর্ণে সেই অপূর্ণ সঙ্গীত-মাধুর্য্য এমনই সুধাবর্ষণ করিয়াছিল যে, সে পরে অনেক সময় সেই সকল গানের ঝঙ্কার শুনিতে পাইত। নিশীথ-রজনীর সুরুতার মধ্যে তাহার মনে পড়িল—

“রজকিনী-প্রেম,                      নিকষিত হেম,  
কাম-গন্ধ নাহি তার!”

সত্যিই ত, ইহারই নাম ভালবাসা। আসঙ্গ-লিপ্সা নাই, দান-প্রতিদানের কোন কথা নাই—ভালবাসিয়াই শুধু সুখ, তৃপ্তি, আনন্দ! দৈহিক মিলনের কোন আকর্ষণই প্রকৃত প্রেমের মর্যাদাকে আকৃষ্ট করিতে পারে না। যুরোপ ইহা বুঝে নাই। ভারতবর্ষ এই অপূর্ণ প্রেমের আশ্বাদ শুধু স্বয়ং ভোগ করে নাই, চিরন্তন কালের জন্ত, মনুষ্য জাতিকে উন্নততর অবস্থায় উন্নীত করিবার জন্ত, এই কামগন্ধহীন প্রেম মুক্তহস্তে বিতরণ করিয়াছে।

ললিতচন্দ্র সুরুভাবে অনেকক্ষণ বসিয়া রহিল।

অকস্মাৎ আর একটা চিত্র তাহার মনকে যেন কশাঘাত করিয়া সতর্ক করিয়া দিল। আত্রবৃক্ষমূলে-বেদীর উপর উপবিষ্টা তরুণীর দিকে সে যখন নিবিষ্ট-দৃষ্টিতে চাহিয়াছিল, তখন তাহার সমগ্র অন্তরমধ্যে যেন জাহ্নবী-ধারা-প্রবাহ বহিয়া চলিয়াছিল। তাহাতে মন যেন নির্বেদশূন্য হইয়া উঠিয়াছিল। কি ইহা? কোথা হইতে এমন অবস্থার উদ্ভব হইল? ইহা কি মগ্ন-চৈতন্যের লীলা?

ললিত ভাবিতে ভাবিতে শয্যায় শুইয়া পড়িল।

## চৌত্রিশ

“সুশীল বাবু, অনেকদিন এখানে থাকা গেল। এবার কলকাতা যাবার ইচ্ছে হচ্ছে। শীলার শরীরও সেরেছে। আমার এখানে থাকার আর প্রয়োজন আছে কি?”

সুশীলচন্দ্র ললিতের মুখের দিকে মুহূর্তের জন্য চাহিয়া বলিল, “আপনার প্রাক্টিসের খুব ক্ষতি হচ্ছে, তা বুঝি, ললিত বাবু। আর কয়েক দিন থাকতে আপনার বিশেষ বাধা আছে কি? আমরাও ত কলকাতায় যাব।”

ললিত বলিল, “প্রাক্টিসের ক্ষতি আমি ধরিনে। দুই এক মাসে এমন কিছু এসে যাবে না। তবে আমি এখানে থেকে আপনাদের কোন কাজে ত লাগছি না, তাই বলছিলাম।”

সুশীল হাসিয়া বলিল, “আমাদের কাজে আপনি লাগছেন না? আপনি থাকায় আমি বন্ধুর দুঃখ বা অভাব বুঝতে পারিনি। কত আলোচনা আপনার সঙ্গে চলে। যতীন বাবুকে ত সব সময় পাওয়া যায় না! তবে আপনার হয় ত খুব কষ্ট এখানে হচ্ছে।”

মাথা নাড়িয়া ললিত বলিয়া উঠিল, “ও কথা বলবেন না, সুশীল বাবু! কষ্ট আমার হওয়া দূরে থাক্, এখানে পরম সুখেই আছি। তবে আপনাদের এখানে থেকে কিছু উপকারেই যখন লাগতে পারছি না, তাই ও কথা বলেছিলাম। বেশ, আপনার কথাই মেনে নিলাম। আমি উপস্থিত আর যাবার নাম করবো না।”

## যমুনাধারা

সুশীলচন্দ্রের মুখ প্রসন্ন হইল। সে বলিল, “আজ বিমলদারা পাটনা থেকে এসে পৌঁছবেন।”

ললিতের নয়ন বিস্ফারিত হইল। সে বলিল, “বিমল বাবু হঠাৎ আসছেন যে?”

তাহার বক্ষঃস্পন্দন দ্রুত হইল। সে বিমল বাবুকে কয়দিন পূর্বে যে পত্র লিখিয়াছিল, তাহার সহিত এই আগমনের ত ঘনিষ্ঠ যোগ নাই? সে পত্রে ললিত ত নিজের মনের কথা অনেকটা স্পষ্টভাবেই প্রকাশ করিয়া ফেলিয়াছিল। তবে কি—

ললিত বলিল, “বিমল বাবু কি একাই আসছেন?”

“না, বৌদিদিরাও আসছেন। বেশ আমোদে দিন কাটবে, কেমন নয়, ডাক্তার বাবু?”

সে কথা সত্য। বিমলচন্দ্র যেমন সদানন্দ, তেমনই পরিহাসরসিক। তিনি যেখানে থাকেন, তাহার চারিপার্শ্বে আনন্দোৎসব পড়িয়া যায়।

ললিত বলিল, “আপনি এখন ষ্টেশনে যাচ্ছেন না কি?”

“হাঁ ওরা সবাই গেছে, আমিও তৈরী। আপনি যাবেন?”

যাইবার প্রচণ্ড ইচ্ছা তাহার হইতেছিল। কিন্তু কি ভাবিয়া সে বলিল, “আপনি আগে যান। মহারাজের ওখানে এখন যাব ব’লে আগেই প্রতিশ্রুতি দিয়েছি। না যদি যাই—”

বাধা দিয়া সুশীল বলিল, “না, সেটা ভাল দেখাবে না। বেশ ত, আপনি মহারাজকে বিমলদার আসবার কথা জানাবেন।”

## যমুনাধারা

সুশীল একবার ঘড়ীর দিকে চাহিয়া বলিল, “আর মোটে মিনিট কুড়ি বাকি। আমি চল্লুম, ডাক্তার বাবু।”

দ্রুতপদে সুশীল ষ্টেশনের অভিমুখে ধাবিত হইল।

ললিত মিথ্যা কথা বলে নাই। সত্যই ভবতোষ তাহাকে যাইতে বলিয়াছিলেন। তবে সেখানে বৈকালে গেলেও চলিত। কিন্তু ললিতচন্দ্র অন্তরে বিচলিত হইয়া পড়িয়াছিল। প্রথম সাক্ষাতেই সদানন্দ, সরলপ্রকৃতি, স্পষ্টভাষী বিমলচন্দ্র, যদি এমন কিছু বলিয়া বসেন—বিশেষতঃ সুসমা, যমুনা, মণিমালা প্রভৃতির সাক্ষাতে—তাহা হইলে সত্যই তাহার লজ্জার সীমা থাকিবে না। না, যত বিলম্বে সাক্ষাৎ হয়, ততই তাহার পক্ষে মঙ্গল।

ললিতচন্দ্র আলোয়ানখানা গায় জড়াইয়া পথে বাহির হইয়া পড়িল। পুরণদেহে মহারাজ ভবতোষের বাড়ীর অভিমুখে সে ধীরপদে চলিতে লাগিল।

রাজভবনের নিকট আসিয়া সে একটু স্থিরভাবে দাঁড়াইল। কোনও কারণ ছিল না, শুধু বিলম্ব করাই তাহার উদ্দেশ্য।

তোরণ পার হইয়া মহারাজের বসিবার ঘরে প্রবেশ করিতেই ভবতোষ প্রসন্নকণ্ঠে বলিলেন, “ডাক্তার এসেছ, ভালই হয়েছে।”

গড়গড়ার নল হইতে ধূমরাশি নির্গত হইতেছিল। গভীর আবেশে টান দিয়া ভবতোষ বলিলেন, “নূতন খবর কি, ডাক্তার?”

ললিতচন্দ্র বলিল, “বিমল বাবুরা আজ আসছেন। এতক্ষণে ষ্টেশনে পৌঁছে গেছেন।”

মৃদু হাসিয়া ভবতোষ বলিলেন, “তা জানি। ষ্টেশনে আমিও

## যমুনাধারা

যেতাম ; কিন্তু রাণী বল্লেন যে, সন্ধ্যার পর তাঁকে ও-বাড়ীতে নিয়ে যেতে হবে । বিমলদার স্ত্রী গুঁর বকুলফুল কি না ।”

বিমল বাবু আজ আসিতেছেন, সে কথা মহারাজ কেমন করিয়া জানিলেন, ললিতচন্দ্রের মনে সে সম্বন্ধে প্রশ্ন জাগিয়াছিল । কিন্তু মহারাণী ও বিমল বাবুর স্ত্রী পরস্পর সখীত্বমূত্রে আবদ্ধ জানিয়া সে স্বস্তির নিশ্বাস ত্যাগ করিল ।

“তার পর ডাক্তার, তোমার মনের অবস্থা এখন কি রকম ?”

ললিতচন্দ্র একরূপ প্রশ্নে চমকিয়া উঠিল । কিন্তু ভবতোষের মুখে স্বাভাবিকতার কোনও বৈলক্ষণ্য না দেখিয়া সে বলিল, “কেন, মহারাজ, এরকম প্রশ্ন হঠাৎ আপনার মনে এল কেন ?”

ভবতোষ হাসিয়া বলিলেন, “এমনি জিজ্ঞাসা করছি । তোমার মুখে চিন্তার ছাপ, তাই জিজ্ঞাসা করছি, মন ভাল আছে ত ?”

ললিতচন্দ্র বলিল, “দুর্ভাবনার বিশেষ কোনও কারণ ত নেই । সংসারে একা মানুষ, কাজেই কার জন্যই বা দুর্ভাবনা হবে বলুন ?”

মহারাজ ভবতোষ ডাক্তারের মুখের দিকে দুই চক্ষু স্থাপিত করিয়া বলিলেন, “কেউ না থাকলেও নিজের জন্ত ত মানুষের চিন্তার অভাব নেই হে ।”

ললিত এ কথাই কোন উত্তর দিল না । শুধু প্রাচীর বিলম্বিত একখানি চিত্রের প্রতি চাহিয়া রহিল । বন্ধুর যতীন্দ্রনাথের একখানি তৈলচিত্র—আলেখ্যাবলীর সঙ্গে ভবতোষ গৃহপ্রাচীরে বিলম্বিত রাখিয়াছিলেন ।

ভবতোষ নিরন্তর তরুণ ডাক্তারের ভাবান্তর লক্ষ্য করিয়াছিলেন



## যমুনাধারা

কি না, বুঝা গেল না। তিনি সহসা বলিয়া উঠিলেন, “দেখ ডাক্তার, এ রকম নিঃসঙ্গ জীবন ভাল নয়। আমার পরামর্শ শোন। তাড়াতাড়ি একটা বিয়ে ক’রে ফেল।”

স্নান হাশ্বরেখা ডাক্তারের ওষ্ঠপ্রান্তে চকিতে নৃত্য করিয়া গেল।

“সত্যি ; অর্থের অভাব নেই। বিয়ের বয়স ক্রমেই চ’লে যাচ্ছে। জীবনে মানুষ রস উপভোগ ক’রে সুখী হতে চায়। এখনও যদি বিয়ে কর ত রসমাধুর্য্য ভোগ করবার কিছু সুযোগ পাবে। এর পর সে সুযোগ আর মোটেই থাকবে না।”

এবার ললিত কথা কহিল। সে বলিল, “বিয়েতে অনিচ্ছা নেই, মহারাজ ! কিন্তু—”

সহসা সে থামিয়া গেল। তাহার দৃষ্টি সঙ্গে সঙ্গে প্রাচীর-বিলম্বিত বিশিষ্ট চিত্রখানির উপর সংবদ্ধ হইয়া রহিল।

ভবতোষ পরম উৎসাহভরে ধূমপান করিতেছিলেন। ললিতকে থামিতে দেখিয়া তিনি দৃষ্টি ফিরাইলেন।

“থামলে কেন, ডাক্তার ? মেয়ে পাওয়া যাচ্ছে না ?”

“আজ্ঞে না, মহারাজ। বাঙ্গাল দেশে মেয়ের দুর্ভিক্ষ হয় নি। তবে যেমন চাওয়া যায়, তা কি সুলভ ?

মহারাজ রহস্যভরে বলিলেন, “আদর্শ চিরদিনই মানুষের আয়ত্তের বাইরে থাকে, ডাক্তার। আজ পর্য্যন্ত কোন মানুষই আদর্শকে লাভ করতে পারে নি। তাই ব’লে কি মানুষ শুধু হাহতাশ করেই জীবন কাটিয়ে দেয় ?”

“তবু—”

## যমুনাধারা

বাধা দিয়া উত্তেজিত কণ্ঠে ভবতোষ বলিলেন, “এর মধ্যে ‘কিন্তু’, ‘তবু’ চলবে না। আমি তোমাকে ছোট ভাইয়ের মত স্নেহ করি। তোমার প্রতি আমার বিশেষ দৃষ্টি আছে, সেটা তুমি ভুলে যেও না। কল্পনার পশ্চাতে, দুর্লভ বস্তুর সন্ধানে বৃথা সময় নষ্ট করা বুদ্ধিমানের কাজ নয়। আমি তোমার জন্য একটি ভাল মেয়ে স্থির ক’রে রেখেছি। তাকে বিয়ে ক’রে তুমি সুখী হ’তে পারবে, আমার বিশ্বাস আছে।”

“কিন্তু মহারাজ—”

তর্জনী তুলিয়া ভবতোষ সহাস্ত্রে বলিলেন, “আমি তা বলেছি, ‘কিন্তু’, ‘যদি’ চলবে না। আমাকে তোমার অভিভাবক ব’লে অনেক দিন আগে তুমি নিজেই স্বীকার করেছিলে। আমি তোমার কিসে ভাল হবে না হবে, তা জানি। এটা তোমার বিশ্বাস আছে? আমাকে তোমার হিতকামী ব’লে নির্ভর করতে পার না কি?”

“তা আমি জানি, মহারাজ। আপনি আমার কত উপকার করেছেন, তা কি জানিনে।”

“তবে চুপ ক’রে থাক। তোমার মনের অনেক কথা আমার অজানা নেই। আমি তোমার মঙ্গলকামী, এটা ভুলে যেও না, ভাই।”

ললিত সবিস্ময়ে ভবতোষের দিকে চাহিল। কিন্তু তাহার মুখে সে এমন কোনও আভাসের চিহ্ন দেখিল না, বাহাতে তাহার মনের সন্দেহের নিরসন হইতে পারে। মহারাজ তাহার মনের কথা জানেন? সত্য বটে, এক দিন তিনি তাহার সঙ্গে দীর্ঘকাল নানা বিষয়ের আলোচনা করিয়াছিলেন। সুশীল বাদুর সহোদরা ‘ও

## যমুনাধারা

যতীন্দ্রনাথের সম্বন্ধেও প্রসঙ্গক্রমে অনেক কথাই উঠিয়াছিল ; কিন্তু সে ত যুগান্তরেও এমন কথা বলে নাই যে, যমুনার প্রতি তাহার লোভ আছে । তবে ?—মহারাজ তাহার সহিত আরও নানা প্রসঙ্গের আলোচনা করিয়াছিলেন । বিমল বাবুর সহিত প্রথম পরিচয় কি করিয়া ঘটে, নিউমোনিয়ার আক্রমণ প্রভৃতি বিষয়ের আলোচনাও যে না হইয়াছিল, তাহা নহে । কিন্তু তাহার মানসক্ষেত্রে যে ঝটিকা বহিয়া চলিয়াছিল, তাহার কোন কথাই সে প্রকাশ পাইতে দেয় নাই ।

সহসা ভবতোষের কণ্ঠস্বর তাহাকে চিন্তা-জগৎ হইতে বাস্তব পৃথিবীতে ফিরাইয়া আনিল । মহারাজ বলিতেছিলেন, “তুমি এখানেই এ বেলা খেয়ে যাও না ।”

তাড়াতাড়ি উঠিয়া দাঁড়াইয়া ললিত বলিল, “সেটা কি ঠিক কাজ হবে, মহারাজ ? বিমল বাবুরা এসেছেন । আমার জন্ম সকলেই অপেক্ষা ক’রে থাকবেন । আমি না গেলে যদি অন্য কিছু মনে করেন !”

মৃদুহাস্য করিয়া ভবতোষ বলিলেন, “সে কথা ঠিক বটে । না, তুমি তবে এস ।”

ললিত দ্রুতপদে কক্ষ হইতে নিষ্ক্রান্ত হইল ।

## পঁয়ত্রিশ

“দাদা, সব জিনিষ ত এখানে পাওয়া যাবে না।”

সুশীল বলিল, “আমি কলকাতায় ফর্দ পাঠিয়ে দিয়েছি। যা এখানে পাওয়া যাবে না, সব জিনিষ সন্ধ্যার গাড়ীতেই এসে পৌঁছবে। আমাদের সরকার বাবু সব নিয়ে আসছেন। নাকি সব এখান থেকে কেনা হবে।”

যমুনার মুখ প্রসন্ন হইল।

তখনও প্রভাত-রৌদ্র উজ্জ্বল হইয়া উঠে নাই। সুশীলের চা-পর্ব সবে শেষ হইয়াছিল মাত্র।

যমুনা বলিল, “মহারাজ মহারাণী এঁরা সব আসবেন ত?”

“তুই নেমন্তন্ন করেছিস্, আসবেন না? বতীন বাবুরাও আসবেন। কেউ অনুপস্থিত থাকবেন না।”

কিন্তু সুশীলচন্দ্র যমুনার এই খাওয়ানোর কোন অর্থ আবিষ্কার করিতে পারিতেছিল না। যমুনা ইদানীং যেন পরম রহস্যময়ী হইয়া উঠিয়াছিল। সে কয় দিন হইতে এমনভাবে চলাফিরা করিতেছে, এমন ভাবে সকলের সঙ্গে ব্যবহার করিতেছে, যেন সে এ জগতের অনেক উর্দ্ধে। ইহা সুশীলের কাছে দৃঢ় বলিয়া অনুমিত হইতেছিল না।

বিমলচন্দ্র, ভ্রাতা ও ভগিনীর আলোচনার মাঝে আসিয়া বলিলেন, “আজ তোমরা বেড়াতে বেরোবে না?”

## যমুনাধারা

“চলুন যাই” বলিয়া সুনীল উঠিয়া দাঁড়াইল।

বিমল বলিল, “ললিত ডাক্তার চা শেষ করেই বেরিয়ে পড়েছে। তার সঙ্গে একটা দরকারী কথা ছিল। তা সে একাই বেরিয়ে পড়েছে দেখছি।”

মণিমালা ঘরে প্রবেশ করিতেছিল। কথাটা শুনিতে পাইয়া সে বলিল, “তিনি রোজ একলাই বেড়াতে যান, দাদাবাবু। আমাদের সঙ্গে বড় একটা মেশেন না।”

সুনীল হাসিয়া বলিল, “এটা কিন্তু ডাক্তারের প্রতি অবিচার। তিনি তোমাদের সঙ্গে সঙ্গেই থাকতে চান, কিন্তু তোমরা তাঁকে এড়িয়েই চল। এতে বেচারীর দোষ দিলে চলবে কেন?”

যমুনা নীরবে দাঁড়াইয়াছিল। সে এ প্রসঙ্গের আলোচনায় যোগ দেয় নাই। এবার সে বলিয়া উঠিল, “তার মানে? মেয়েমানুষ যার তার সঙ্গে ঘুরে বেড়াতে যদি না চায়, যার তার সঙ্গে মেলামেশা করা ভাল না বাসে, তাতে কি এড়িয়ে চলা বলে, দাদা?”

সুনীল সহোদরার দিকে ফিরিয়া চাহিল। মণিমালাও সকৌতুকে ননন্দার দিকে দৃষ্টিনিবদ্ধ করিল। বাস্তবিক আজ সর্বপ্রথম যমুনা ললিত ডাক্তারের ব্যক্তিগত প্রসঙ্গ লইয়া আলোচনা করিতেছে।

সুনীল হাসিয়া বলিল, “ললিত বাবুকে যার তার দলে ফেলা কি ঠিক হ’ল, যমু?”

দীপ্তকণ্ঠে যমুনা বলিল, “কেন নয়, তা বলতে পার, দাদা?”

সুধমা বেড়াইবার বেশে এই সময় ঘরের মধ্যে প্রবেশ করিল।

## যমুনাধারা

সুশীল বলিল, “যেহেতু ললিত বাবু আমাদের পারিবারিক চিকিৎসক। তা ছাড়া—”

কিন্তু কি ভাবিয়া সে কথাটা শেষ করিল না।

যমুনা তাহার দাদার কথার শেষাংশের প্রতি লক্ষ্য না করিয়াই বলিল, “পারিবারিক চিকিৎসক হলেই তাঁর সঙ্গে বাড়ীর মেয়েরা অসঙ্কোচে মেলামেশা করবে, চিকিৎসা-ব্যাপারের বাইরের বিষয়ে তাঁকে টেনে আনবে, এ শিক্ষা হিঁড়র ঘরে কোন দিন ছিল না। তোমরা কি সেটা চল করতে চাও, দাদা?”

বিমলচন্দ্র সকৌতুকে এই স্বল্পভাষিনী, শাস্ত্রপ্রকৃতি তরুণীর কথা শুনিতেছিলেন। তিনি সুশীলের স্বন্ধে হাত রাখিয়া বলিলেন, “বোন্ট ঠিক কথাই বলেছে, ভায়া। তোমাদের পশ্চিম দেশের আমদানী সভ্যতা আমারও রুচিকর নয়। সুধি, তুই কি বলিস্?”

সুধমা বলিল, “এখানে দাঁড়িয়ে বৃথা তর্ক না ক’রে বেড়াতে যাবে কি না বল। ললিত বাবু সুশীল বাবুর বন্ধুস্থানীয় হতে পারেন; কিন্তু তাঁর বন্ধুদের সকলের সঙ্গে বাড়ীর মেয়েরা অবাধে মেলামেশা করবে, এটা আশা করা তাঁর উচিত নয়।”

বিমলচন্দ্র স্থিরদৃষ্টিতে সহোদরার আরক্ত আননের দিকে চাহিয়া রহিলেন। ললিত বাবুর প্রতি সুধমারও এই প্রকার মনোভাব কি তাঁহাকে চিন্তিত করিয়া তুলিয়াছিল?

সুধমা যমুনার দিকে আগাইয়া গিয়া তাহার হাত ধরিয়া আকর্ষণ করিল। বলিল, “যমুনাধারা, শালখানা গায় জড়িয়ে চল ভাই বেরিয়ে পড়ি। সাড়ে সাতটা বেজে গেছে।”

## যমুনাধারা

“চল যাই। পিসিমা ও সতুকে আবার ব'লে আসতে হবে।”,  
পুষমা, যমুনা, মণিমালা বিমলচন্দ্রের স্ত্রী চারুশীলাকে, সঙ্গে  
লইয়া বেড়াইতে বাহির হইয়া গেলে, বিমলচন্দ্র বলিলেন, “সুশীল,  
তোমার সঙ্গে আমার একটা জরুরী পরামর্শ আছে।”

সুশীল বলিল, “আমারও আছে। ভারী দরকারী কথা।”

“বেশ ত, পথে যেতে যেতেই আলোচনা করা যাবে।”

সুশীল আলনা হইতে রূপারথানা টানিয়া লইয়া বলিল, “কোন্  
দিকে যাবেন, দাদা?”

বিমলচন্দ্র একটা প্রকাণ্ড চুরুট ধরাইয়া লইয়া বলিলেন,  
“ভবতোষের সঙ্গে সকলেই দেখা করবো, ব'লে এসেছি, সেখানে  
তার সঙ্গে বিশেষ আলোচনা আছে। তোমার পরামর্শও দরকার।”

এমন সময় উমাশশী আসিয়া বলিলেন, “বিলু, তোরা এখন  
কোথায় যাচ্ছিস?”

“ভবতোষের কাছে যাচ্ছি, মা!”

উমাশশী বলিলেন, “খুব ভাল ক'রে ভেবে-চিন্তে তবে এগিও,  
বাবা। আমি ওর মনের কথা জানি। এবার যেন কোন রকমে  
ছেলেমানষী কাণ্ড না ঘটে।”

বিমলচন্দ্র হাসিয়া বলিলেন, “মা, তোমার ছেলেটি বোকা নয়,  
সে বিশ্বাস বোধ হয় তোমার আছে। চোক-কাণ খুলেই থাকা  
আমার স্বভাব। কোন চিন্তা নেই, মা।”

মাতা ও পুত্রের কথায় সুশীল একটু বিস্মিত হইল। সে  
ব্যাপারটা কিছুই অনুমান করিতে পারিল না।

## যমুনাধারা

পথে বাহির হইয়া বিমলচন্দ্র বলিলেন, "তোমার কোন বিশেষ কাজ নেই ত, সুশীল? ভবতোষের সঙ্গে একটা বিষয়ে পরামর্শ করতে চাই। তোমার মতামতও জানা দরকার।"

সুশীল বলিল, "না দাদা, কাজ আবার এখানে কিসের?"

বিমলচন্দ্র চলিতে চলিতে বলিলেন, "সুখির বয়স যথেষ্ট হয়েছে। বাঙ্গালীর ঘরের মেয়েকে আর একদিনও বিয়ে না দিয়ে রাখা চলে না। যে বয়সে মেয়েরা কল্পনা ও কাব্যের রস—অবশ্য বিবাহিত জীবনের—ভোগ করতে চায়, বয়স চ'লে গেলে তা আর ভোগ করা হবে না। সুখির বিয়ে এজন্ম আরও আগে আমার দেবার ইচ্ছা ছিল, কিন্তু আমার সে চেষ্টা সফল হয়নি।"

সুশীল নীরবেই শুনিয়া যাইতেছিল।

বিমল বলিয়া চলিলেন, "চৌদ্দ পনের বছর এ দেশের মেয়েদের পক্ষে যথেষ্ট বয়স। তার পর জীবনের কাব্যরস ভোগের সময় ক্রমেই বাস্তবতার, বাস্তবত্বের পরিণত হয়, এ কথাটা মান কি?"

সুশীল বলিল, "এ কথাটা ওদিক দিয়ে কখনো ভেবে দেখিনি। অন্য দেশে মেয়েরা বেশী বয়সে বিয়ে ক'রে থাকে, তাতে কি তাদের জীবন অসুখী হয়?"

বিমল হাসিয়া বলিলেন, "তুমি ও-দেশ ঘুরে এসেছ। ওদের ভিতরটা দেখবার সময় পেয়েছ কি না, জানিনে। কিন্তু বেশী বয়সে জীবনের কাব্যরস যে শুকিয়ে যায়, এ কথাটা প্রত্যেক মনস্তত্ত্ববিদকে স্বীকার করতে হয়েছে। যাক, সে কথা হচ্ছে না। বিলেতের দৃষ্টান্ত খুব আশার সঞ্চার করে না। দেখ ভাই, আমাদের



## যমুনাধারা

বিয়ে তোমাদের চেয়েও অল্প বয়সে হয়েছে। আমরা জীবনের যে রসটা উপভোগ করতে পেয়েছি, তোমরা তাও পাওনি। এখন যারা বেশী বয়সে বিয়ে করে, তারাও সেটা কল্পনা করবার সুযোগও পায় না, এ আমি ভাল ক'রেই জানি। কারণ, আমার অনেক বন্ধুই তরুণ, আমিও অবশ্য এমন বুড়োও হইনি।”

বিমলচন্দ্র হা হা করিয়া হাসিয়া উঠিলেন !

সুশীল বলিল, “না দাদা, আপনার বয়স চল্লিশের কোঠায় যায়নি, তা আমরা জানি।”

বিমল বলিলেন, “যাক্ সে কথা। এখন সুধমাকে আর বিয়ে না দিবে রাখা মোটেই উচিত নয়। অথচ সুধি বিয়ে করতে রাজি নয়।”

সুশীল অবশ্য এ কথাটা জানিত না। মণিমালা স্বামীর সহিত সকল বিষয়ের আলোচনা করিলেও সুধমার সম্বন্ধে কোনও কথা স্বামীকে বলে নাই। তাই সুশীল বলিয়া উঠিল, “কেন, সুধমা বিয়েতে নারাজ কেন?”

“তা ঠিক জানিনে ভাই। তবে একটা অনুমান মাত্র মনে হয়েছে। সেটা পরে বলছি। সে মাকে অনেক দিন আগেই বলে রেখেছিল যে, তার বিয়ের জন্ত যেন চেষ্টা করা না হয়। কিন্তু আমি তার সে কথা শুনে, তার জীবনটাকে এমন নিঃসঙ্গভাবে থাকতে দেবার অবকাশ দিতে চাইনে। তাই তোমার পরামর্শ চাই।”

তাহারা এই সময়ে ভবতোষের প্রাসাদোপম অট্টালিকার সম্মুখে আসিয়া পড়িয়াছিল। বিমলচন্দ্র বলিলেন, “চল, ভবতোষের সঙ্গে ব'সে আলোচনা করা যাক্।”

## ছত্রিশ

কেন ?—না, সে কোনমতেই এ পত্র পড়িবে না !

পত্রখানি হাতে করিয়া সুষমা অনেকক্ষণ নীরবে বসিয়া রহিল ।

ডাক্তার বাবুর এ ধৃষ্টতা অসহ ! কেন তিনি তাহার কাছে পত্র পাঠাইবেন ? এ বিদেশী রীতিকে সে সর্বাঙ্গুঃকরণে অশোভন বলিয়া মনে করে । হিন্দুর কৃষ্টি এই রীতির বিরোধী । অন্ততঃ ইহাই তাহার বিশ্বাস ।

পূর্বে আর একবার ললিত বাবু তাহার নিকট পত্র লিখিয়া, উত্তর পান নাই, তবে আবার তাঁহার এমন দুঃসাহস হইল কেন ?

সুষমা অত্যন্ত বিরক্ত ও ক্রুদ্ধ হইয়া চুপ করিয়া বসিয়া রহিল ।

পত্রখানি তখন অপঠিত অবস্থায় ভূমিতলে লুটাইতেছিল ।

সকলেই বেড়াইতে বাহির হইয়া গিয়াছে । দাস-দাসী ছাড়া কেহ বাড়ীতে নাই । অত্যন্ত মাথার যন্ত্রণা আরম্ভ হইয়াছিল বলিয়া সে দ্বিপ্রহরে ঘুমাইয়াছিল । সকলকে বলিয়াছিল, আজ সে বেড়াইতে যাইবে না, তবে শরীরটা বড় দুর্বল বোধ হইতেছিল ।

সোণার মা চিঠিখানা তাহার হাতে দিয়া গিয়াছিল ।

সুষমার মনে হইল, পত্রখানা হাতে করিয়া ধরাতেও তাহার নারীত্বের সম্মান যেন আহত হইয়াছে ।

চারিদিকে সর্গস্পূ নীরবতা— সুষমা ভাবিতে লাগিল ।

উত্তেজনা-প্রসূত বিতৃষ্ণা কোতূহল দমন করে ; কিন্তু উত্তেজনা-হ্রাসের সঙ্গে সঙ্গে মানুষের চিত্তক্ষেত্রে কোতূহল ধীরে ধীরে মাথা

## যমুনাধারা

তুলিয়া দাঁড়ায়। মানব-মনের এই বিশিষ্ট অবস্থা সাধারণ ক্ষেত্রে অপ্রচুর নহে। বিশেষতঃ নারীর কোতূহল আরও উদগ্র।

পদপ্রান্তে অবহেলা-নিষ্কিপ্ত পত্রখানির প্রতি চাহিয়া সহসা সে হস্ত প্রসারিত করিল। কি আছে এই পত্রে? আর যাহাই হউক, ললিত ডাক্তার ভদ্র-সন্তান। অবশ্যই তিনি অসঙ্গত অশোভন কোন কথা লিখিবেন না, সে বিশ্বাস তাহার আছে। হাঁ, সে তাঁহাকে নিশ্চয়ই বিশ্বাস করিতে পারে।

কৌতুক হৃদযন্ত্রকে অপেক্ষাকৃত দ্রুততানে স্পন্দিত করিয়া তুলিল।  
•• পত্র খুলিতেই প্রথম ছত্র তাহার দৃষ্টিকে কেন্দ্রীভূত করিল।  
লেখা আছে—“বিমলদার সম্পূর্ণ অনুমোদন পাইয়াছি; কিন্তু তাহা মূল্যহীন—”

স্বধমা তাহার বাম করতল বুকের উপর রক্ষা করিয়া মুহূর্তের জন্য চক্ষু নিম্নীলিত করিল। হৃদযন্ত্রের স্পন্দন-বেগ এত দ্রুত কেন?

অনুর হইতে কে যেন তীব্র কণ্ঠে বলিয়া উঠিল, তুমি না নারী?  
তুমি না মহাশক্তিরূপিণী চণ্ডীর অংশসম্ভূতা?

ঠিক, ঠিক! বিহ্বলতা তাহার সাজে না। নারী কেন দুর্বলতা প্রকাশ করিয়া আপনাকে হীন করিবে? একথানা পত্রে লেখা গোটা ক্ষয়েক কথায় বিচলিত হইবার মত লজ্জার বিষয় কি আছে? বক্ষোদেশ হইতে বাম করতল তুলিয়া লইয়া স্বধমা নয়নযুগল উন্মীলিত করিল। তারপর পত্র পড়িয়া চলিল—

“আপনার অনুকূল স্বীকৃতি ছাড়া আমার জীবনের সর্বশ্রেষ্ঠ কামনা পূর্ণ হইবে না। ভ্রান্ত আশায় লুক্ক মন, মরীচিকার পশ্চাতে

## যমুনাধারা

ঘুরিয়া ঘুরিয়া ক্লান্ত। সে অভিজ্ঞতার কথা এক দিন জানাইবার বড় ইচ্ছা আছে, যদি আপনার অনুমতি পাই। মানুষ অলাভ্য নহে। চারি বৎসর পূর্বে অনভিজ্ঞতার ফলে, যে অনিচ্ছাকৃত অপরাধ করিয়াছিলাম, তাহার সম্পূর্ণ দায়িত্ব আমার। সে অপরাধের প্রায়শ্চিত্ত এতদিন ধরিয়া করিয়াছি। বাহিরের জ্ঞান এত দিন মগ্ন চৈতন্যের স্বরূপ উপলব্ধি করিতে পারে নাই, সে দুর্ভাগ্য আমার। কিন্তু মৃগতৃষ্ণিকার শান্তি মগ্ন চৈতন্যকে আসল রূপে প্রকাশ করিয়া দিয়াছে। সহস্র অপরাধ বিস্মৃত হইয়া যদি হাত ধরিয়া শান্ত, ক্লান্ত সহনাত্মিকে টানিয়া তোলেন, তবে একদিন লক্ষ্যস্থলে পৌঁছিতে পারিব। এখন সবই আপনার দরার উপর নির্ভর করিতেছে। ইতি— ললিত।”

মৃত হস্ত-রেখা স্মধমার অধরপুটে প্রদীপ্ত হইয়া উঠিল। এ হাত কি বিজয়িনীর উল্লাসের ছোতনা অথবা উপেক্ষার বিদ্রুপ ?

পশ্চিমের বাতায়ন-পথে রৌদ্রকরলেখা তখনও ভূমিতলে রেখাপাত করিতেছিল। স্মধমা নীরবে সেই দিকে চাহিয়া বসিয়া রহিল। তাহার চিত্তবেলায় তখন যে তরঙ্গোচ্ছ্বাস হইতেছিল, তাহা অনুমান করিতে প্রয়াস পাইতে হয় না।

ধীরে ধীরে তাহার আননে দৃঢ়সংকল্পের রেখা ফুটিয়া উঠিতে লাগিল। তাহার নয়নের দৃষ্টি আরও সমুদ্রল দীপ্তিতে উদ্ভাসিত হইল। ওষ্ঠে ওষ্ঠ চাপিয়া সে বহুক্ষণ চুপ করিয়া বসিয়া রহিল।

শুধু অপমান ? অপমানের সঙ্গে সঙ্গে ক্ষতির প্রচেষ্টা কি নাই ? সে কি এমনই সহজলভ্য যে, একবার প্রত্যাখ্যানের কশা চালাইয়া

## যমুনাধারা

আবার গ্রহণের জন্য আকৃতি? খালি লাভ ও লোকসান খতাইয়া, যাহারা মানব-জীবনের সর্বশ্রেষ্ঠ ব্যাপারের হিসাব-নিকাশ করিতে চাহে, তাহাদের হৃদয় বলিয়া কোন বালাই নাই, থাকিতে পারে না। যে ব্যাপারে হৃদয়ই প্রধান মূলধন, সেখানে এইরূপ বিকি-কিনির হৃদয় লইয়া যে ব্যক্তি অগ্রসর হয়, সে কি অণ্ডের অপমান এবং সেই সঙ্গে ক্ষতি করে না?

না, না, ললিত বাবুর এ প্রস্তাবের অন্তরালে শুধু হৃদয়হীন কেনাবেচার একটা হীন আয়োজন আছে, ভালবাসার 'সংস্রব' থাকিতেই পারে না। যদি তাহা থাকিত—

মান হাঙ্গামার ওষ্ঠপ্রান্তে খেলা করিয়া গেল।

নিশ্চয়।—চারি বৎসর ধরিয়া তাহাকে প্রতীক্ষা করিয়া থাকিতে হইত না। দীর্ঘ চারিটি বৎসর ধরিয়া ললিত বাবু অপেক্ষাকৃত স্পৃহণীয়া জীবন-সঙ্গিনীর জন্য সন্ধ্যানে ব্যাপৃত থাকিতেন না।

কথাটা কি মিথ্যা? ললিত বাবু ব্রহ্মচারী, সন্ন্যাসী নহেন। গৃহধর্ম পালনের জন্য তাহার উৎসাহ এবং আগ্রহের অবশ্যই অভাব নাই। তাহার উপযোগী পাণ্ডিত্য সুস্পন্দ তাহার যথেষ্টই আছে। সুতরাং তিনি সুবিধাবাদী হিসাবে এখন তাহাকে পত্নীরূপে গ্রহণ করিয়া তাহাকে কৃতার্থ এবং স্বার্থসিদ্ধি করিতে অভিলাষী।

তাহার কি আত্মমর্যাদাজ্ঞান এতটুকু নাই? সে কি খেলার পুতুলের মত ক্রীড়কের নির্দেশে পরিচালিত হইবে?

সুখমা উঠিয়া দাঁড়াইল। পত্রখানা ছিঁড়িবার জন্য তাহার করামুলিগুলি উত্তত হইতেই, কি ভাবিয়া সে নিরস্ত হইল।

## যমুনাধারা

না, ইহা একটা নিদর্শন । ইহা রাখিয়া দিতে বাধা নাই ।

স্বপ্নমা বাক্য খুলিয়া পত্রখানা তন্মধ্যে রাখিয়া দিল ।

মণি দিদিকে এ পত্রখানা আগে দেখাইতে হইবে ।

তরুণী ভাবিতে লাগিল, এ পত্রের কথা তাহার জননীকে বলিবে কি না । বলা ত সম্ভব হইবে সঙ্গত । সে কুমারী কণ্ঠা, মাতার নিকট সকল কথাই জানান তাহার পক্ষে অবশ্য-পালনীয় কর্তব্য ।

কিন্তু তাহার দাদা কি করিয়া ললিত বাবুকে এমন ভাবে পত্র ব্যবহারের অনুমতি দিলেন ? এমন বুদ্ধিমান, জ্ঞানবান—দাদা— তিনি অনেক কথাই জানেন, তাহাকে যে ব্যক্তি একদিন প্রত্যাখ্যান করিয়া তাহাদের বংশের অপমান করিয়াছিলেন, দাদা কেমন করিয়া তাঁহার কৃত সে অপমানের স্মৃতি বিস্মৃত হইলেন ? বিশেষতঃ কুমারী ভগিনীর নিকট এক জন অপর পুরুষকে পত্র লিখিবার অনুমোদন তিনি দিলেন কি করিয়া ? বর্তমান যুগে এ দেশের অনেক শিক্ষিত পরিবার হয় ত ইহাতে কোন দোষ দেখেন না ; কারণ, তাঁহারা বিদেশী শিক্ষা-দীক্ষার প্রভাবে বাঙ্গালীর বৈশিষ্ট্যকে শোচনীয়ভাবে বিস্মৃত হইয়াছেন । কিন্তু তাঁহার দাদা ত সে দলের নছেন ! তিনি বাঙ্গালী হিন্দুর বিশিষ্টতা পূর্ণমাত্রায় রক্ষা করিয়া চলেন । তাঁহার শিক্ষার গুণেই ত কালের উচ্ছৃঙ্খলতা তাহার চিত্তে বা কার্যে কোনও প্রকার প্রভাব বিস্তার করিতে পারে নাই ।

স্বপ্নমা ঘরের মধ্য হইতে বাহির হইল । মন উত্তেজিত ক্ষুর হইলেও তাহার শরীরে তখন কোন গ্লানি ছিল না ।

তখনও পশ্চিম-গগনপ্রান্তে আরক্ত আলোকেবু ঝর্ণা-ধারা যেন

## যমুনাধারা

গড়াইয়া পড়িতেছিল। সেই দিকে মুগ্ধনেত্রে চাহিয়া সে কয়েক মুহূর্ত স্তব্ধভাবে দাঁড়াইল। তার পর রুজপথে নামিয়া সে চলিতে আরম্ভ করিল।

পথের মোড় ঘুরিয়া পুরণদহের রাস্তায় পড়িতেই সে দেখিতে পাইল, নত-মস্তকে গভীর চিন্তামগ্নভাবে কে এক জন আসিতেছে। চাহিয়া দেখিবামাত্র সে বুঝিতে পারিল, লোকটি ললিত ডাক্তার।

ডাক্তার সুষমাকে দেখিতে পাইল না। সে তখন অত্যন্ত অগ্রমনস্কভাবে পথ চলিতেছিল।

সুষমা বামদিকের পথ ধরিয়া দ্রুত চলিতে লাগিল। ললিতচন্দ্রের সান্নিধ্য হইতে সে দূরে—বহুদূরে চলিয়া যাইতে চাহে।

কিছু দূরে গিয়া সুষমা একবার পশ্চাতে চাহিয়া দেখিল। ললিত ডাক্তার তখনও নতশীর্ষে তেমনই ভাবে পথ চলিতেছিল।

সুষমার মনে হইল, যেন কোন গভীর চিন্তার ভারে যুবক আচ্ছন্ন হইয়া পড়িয়াছে। কি সে চিন্তা?

কিন্তু তাহার কি প্রয়োজন? ললিত ডাক্তারের মনে যে চিন্তাই আবির্ভূত হইয়া থাকুক না কেন, সে বিষয়ে মাথা ঘামাইবার তাহার কোন প্রয়োজন নাই।

আর একবার সে পশ্চাতে ফিরিয়া দেখিল। যুবক তখনও অবনত-মস্তকে ধীরে ধীরে চলিয়া যাইতেছিল।

সুষমা আর দাঁড়াইল না। দ্রুতবেগে সে চলিতে লাগিল।

## সাঁইত্রিশ

সূর্য্য পশ্চিম-দিক্‌চক্রবালে আবির্ভাব লাগিয়া নামিয়া যাইতেছিল ।  
তরঙ্গায়িত মাঠে এক দল নরনারী মধুর-গতিতে চলিতেছিল ।  
তাহাদের আলোচনায় যে হাস্য অজস্রধারায় ঝরিয়া পড়িতেছিল,  
তাহাতে দিগন্তলীন সূর্য্যের অন্তিম রাগরেখার স্পর্শ অনুভূত  
হইলেও, মৃদুপদ-সঞ্চারিণী সন্ধ্যার অন্ধকারের আভাসমাত্র ছিল না ।

দলের পুরোভাগে বিমলচন্দ্র, ভবতোষ, সুশীলচন্দ্র ও যতীন্দ্রনাথ ।  
তাহাদের পশ্চাতে চারুশীলা, মণিমালা ও যমুনা । সতু তাহার  
মাসীমার হাত ধরিয়া নৃত্যগতিচ্ছন্দে চলিতেছিল ।

একটু দূরে উমাশশীর সঙ্গে যতীন্দ্রের পিসী । সুসমা সঙ্গে নাই  
বলিয়া মাঝে মাঝে মণিমালা ও যমুনা অন্তমনস্ক হইতেছিল ।

হরলাবুরি হইতে পদব্রজেই সকলে বাসার দিকে ফিরিতেছিল ।  
সন্মুখের মাঠটি মনে একটা আকর্ষণ জাগাইয়া তুলিয়াছিল, তাই পথ  
ছাড়িয়া সকলে মাঠের মধ্য দিয়াই চলিতে আরম্ভ করিয়াছিল ।

দূরপ্রান্তে পূর্বদিকে শাল-গাছের দীর্ঘ দেহগুলি দাঁড়াইয়া ।

হরলাবুরির কালীবাড়ীর আলোচনাই চলিতেছিল ।

ভৈরবী ও ব্রহ্মচারীর প্রসঙ্গে অনেক কথাই যতীন্দ্রনাথ বলিয়া  
ফেলিল । সেবারত বাঙ্গালীর জীবনে কত ভাবে অনুষ্ঠিত হইতে  
পারে—সংসারী জীবন এই সেবারতের সাহায্যে কত শক্তিশেলের  
তীব্র বেদনা তৃপ্তি ও আনন্দ লাভ করিতে পারে, ভৈরবীর  
দৃষ্টান্ত উল্লেখ করিয়া যতীন্দ্রনাথ তাহা বর্ণনা করিতেছিল ।



## যমুনাধারা

ভবতোষ সহাস্ত্রে বলিলেন “প্রাচ্য ও প্রতীচ্যের আদর্শ এ বিষয়ে যেন উত্তর-মেরু হ’তে দক্ষিণ-মেরুর মত পৃথক । নয় কি ?”

যতীন বলিল, “শুধু এ বিষয়ে নয়, সকল বিষয়েই তাই ।”

সুশীল বলিল, “কিন্তু ওদের আদর্শটা যেন প্রাণের স্মৃতিতে দিগ্বিজয় ক’রে চলেছে ।” বিমলচন্দ্র এতক্ষণ চুপ করিয়াছিলেন । তিনি বলিয়া উঠিলেন, “ভায়া, পশ্চিমের দিগ্বিজয়ী জোলুঘ চোখে ধাঁধা লাগিয়ে দেয় সত্যি ; কিন্তু প্রাণ তাতে আছে কি ?”

সুশীল বলিল, “তা’না থাকলে, ওরা সারা বিশ্ব জয় করলে কি ক’রে ? আর সে আদর্শের জন্ত প্রাচ্য এত ব্যস্তই বা কেন ?”

“সেটা প্রাচ্যের দুর্ভাগ্য নয় কি, দাদা ?”

পুরুষ চারি জনই একসঙ্গে ফিরিয়া চাহিলেন ।

কথাটা যমুনার কণ্ঠ হইতে বাহির হইয়াছিল ।

বিমলচন্দ্রের মুখ খুসীতে ভরিয়া উঠিল । তিনি উৎফুল্লকণ্ঠে বলিলেন, “যমুনা ঠিকই বলেছে, সুশীল । আমরা অস্তগামী সূর্য্যের দিকে চেয়ে তার দীপ্তিকে যদি আদর্শ ব’লে মেনে নেই, ঠকেই যাব, ভাই । একটু পরেই সন্ধ্যার অন্ধকার ঘনিয়ে আসবে ।”

যতীন্দ্রনাথ বলিল, “এ দিকে সত্যিই অন্ধকার ঘনিয়ে এসেছে । এখন মাঠ ছেড়ে পথে ওঠা যাক । একটু তাড়াতাড়ি চলাও দরকার ।”

পথটি অপেক্ষাকৃত জনহীন । বায়ুসেবীরা এ দিকে বড় একটা আসে না । শুধু পল্লীপ্রত্যাগতগণের পদতড়নে পথের ধূলি সন্ধ্যার বাতাসকে ভারী করিয়া তুলে ।

সে দিন আকাশে ঠান্দ ছিল । সন্ধ্যার সঙ্গে-সঙ্গেই মাঠ ও পথ

## যমুনাধারা

আলোকিত হইয়া উঠিল। দূরে বৈষ্ণনাথজীর মন্দিরে আরতির ঘণ্টা বাজিতে আরম্ভ করিয়াছিল।

মেয়েরা ধরিয়া বসিল, ঠাকুরের 'শিঙার-বেশ' দেখিতে হইবে।

অভিজাত-বংশের মুকুটমণি ভবতোষ পদব্রজে দীর্ঘপথ চলিয়া ক্লান্ত হইয়া পড়িয়াছেন ভাবিয়া সুশীল বলিল, "কিন্তু মহারাজের—"

বাধা দিয়া ভবতোষ বলিলেন, "সুশীল বাবু, তোমরা আমাকে কিছু মনে কর, বল ত? জান, আমি পাঁচ ছয় ঘণ্টা ধ'রে ক্রিকেট খেলেছি, এক ঘণ্টা ফুটবল খেলে ক্লান্ত কোন দিন হই নি। ছ'বছর আগে পনের মাইলপথ হেঁটে পার হয়েছি জান তা?"

লজ্জিতভাবে সুশীল বলিল, "আমায় ক্ষমা করুন!"

হাসিয়া ভবতোষ বলিলেন, "এতে ক্ষমার কথা কেন আসবে, ভাই! তোমার বিশ্বাসমত কথা বলেছ। এ কথা ত ধনীরা ছল্লালদের সম্বন্ধে একটুও অতিরঞ্জিত নয়।"

'রাবণ' দীঘির পার্শ্ব দিয়া যাত্রিদল শিবগঙ্গার ধারে পৌঁছিল।

ঠিক সেই সময়ে যমুনা বুলিয়া উঠিল, "সুখমা!"

সত্যই ত সুখমাই বটে!

বিমলচন্দ্র ডাকিলেন, "সুখি!"

মস্থর-চরণে, ভূমিলগ্ন দৃষ্টিতে সুখমা উইলিয়ম্‌স্‌ টাডনের মতক হইতে আসিতেছিল। সে দাদার কণ্ঠস্বরে মুহূর্ত্ত চমকিয়া উঠিয়া স্থিরভাবে দাঁড়াইল। সকলে তাহার পার্শ্বে আসিয়া দাঁড়াইলেন।

উমাশী বলিলেন, "তোমার মাথা ধরেছিল, না? স্নেহ কে আছে?"

## যমুনাধারা

ঈষৎ ক্লিষ্টস্বরে সুষমা বলিল, “এখন ভাল আছি। সঙ্গে কেউ নেই। একাই মন্দিরে যাচ্ছি, চল।”

মণিমালা ভগিনীর দিকে দৃষ্টিপাত করিল; কিন্তু কিছুই বলিল না।  
বিমলচন্দ্র সহোদরার দিকে সম্বেহ-দৃষ্টিপাত করিয়া বলিলেন,  
“কিন্তু দেখে যেন মনে হচ্ছে, তোর শরীরটা এখনও সুস্থ হয় নি।”

“না, দাদা, শরীর আমার এখন ভালই। মা, আজ শুনুম্ ঠাকুরের ‘শিঙার-বেশ’ খুব ভাল হবে! তাই দেখবার ইচ্ছে হয়েছে।”

প্রধান প্রবেশ-দ্বারের কাছেই পাণ্ডা ঠাকুরের দর্শন মিলিল। তিনি ত প্রচণ্ড আগ্রহে সকলকে মন্দির-প্রাঙ্গণে লইয়া গেলেন। শিঙার-বেশ সবে আৰম্ভ হইতেছিল।

গন্ধ তৈল-নিষেকে দেবতার দেহ সুরভিত করিয়া শীতল জলে স্নান করান হইল। গাত্রমার্জনার পর অঙ্গরাগ চলিল। জনৈক ভক্ত তখন মধুর-কণ্ঠে মন্দিরতলকে অনুরণিত করিয়া দেবাদিদেবের স্তোত্র গাহিতেছিলেন। ঘৃত-প্রদীপে কক্ষতল উদ্ভাসিত। চন্দন, গন্ধপুষ্প, ধূপের পবিত্র সৌরভ বাতাসকে মাতাল করিয়া তুলিতেছিল।

বহুক্ষণ ধরিয়া নিপুণ হস্তের প্রসাধন ও সাজসজ্জা চলিল। যমুনা, সুষমা, মণিমালা, চারুশীলা আধুনিক যুগের তরুণী। কিন্তু সে দৃশ্যে তাহাদের চিত্ত যেন অভিভূত হইল। আরতির শঙ্খঘণ্টা, পঞ্চপ্রদীপের আরতি দর্শকদিগের চিত্তে একটা অনবদ্য ভক্তি ও আনন্দের প্রস্রবণ উৎসারিত করিয়া দিল।

শঙ্খ-ঘণ্টার ধ্বনি, বোম্ বোম্ হর হর শব্দ পৃথিবীর কোলাহলকে মথিত করিয়া উর্দ্ধলোকে নৃত্যগীতচ্ছন্দে সমুখিত হইতেছিল।

## যমুনাধারা

যমুনার নয়ন মিমীলিত হইল। তাহার মুদ্রিত নেত্রপথে মুক্তাবিন্দু ঝরঝর করিয়া পড়িতে লাগিল। সুখমা তখন পলকহীন নেত্রে সেই বিচিত্র শিঙার-বেশ দেখিতেছিল। তাহার আলোড়িত, মথিত অন্তর-রাজ্যে বিশ্বনিয়ন্তার এই সাড়ম্বর পূজা যেন একটা শিখ চন্দন-প্রলেপ বুলাইয়া দিল। তাহার দুই করপুট সহসা যুক্ত হইল।

অর্দ্ধস্থিমিত-নেত্রে সেই রাজরাজেশ্বর-মূর্তি দেখিয়া তাহার প্রাণ যেন এক অভূতপূর্ব আনন্দরসে ভরিয়া উঠিল।

শ্মশানচারী ব্যাঘ্রচর্ম্মপরিহিত, দরিদ্র শরীরকে কেন রাজবেশে সজ্জিত করিয়া ভক্ত তাহার হৃদয়ের ভক্তি উজাড় করিয়া দেয়, ইহার অন্তর্নিহিত তত্ত্বটি আজ যেন তাহার মানসদৃষ্টির কাছে অমীমাংসিত রহিল না। অনাসক্ত, ত্যাগী, ভোগস্পৃহাহীন দেবতাকে সাজাইবার ক্ষমতা ভক্ত মানব-চিত্ত কেন অধীর হইয়া উঠে, আরাধ্যকে যমগ্র রত্নসম্ভারে সাজাইয়া কেন তৃপ্তি লাভ করে, তাহা প্রাচ্য মন না লইয়া বিচার করিতে যাওয়া ধুষ্টতা।

ভূমিলগ্ন হইয়া সুখমা দেবতার উদ্দেশ্যে হৃদয়ের শ্রদ্ধা নিবেদন করিল। আজ হইতে সে কি এমনই অনাসক্তভাবে' এমনই একনিষ্ঠচিত্তে অহঙ্কার, দম্ভ, আশ্রয়বিলাস বিসর্জন দিয়া, তাঁহারই চরণতলে হৃদয়ের ঐশ্বর্য্যরাশি ঢালিয়া দিতে পারিবে?

পঞ্চপ্রদীপের বিচ্ছুরিত আলোকরেখা সমুজ্জ্বল হইয়া কি নির্দেশ করিতেছে? পঞ্চেন্দ্রিয়কে তাঁহারই সেবায় নিয়োগ করিতে পারিলে, আলোকধারায় তাঁহাকে অর্চনা করিতে পারিলে, শোক, দুঃখ, মনস্তাপের জ্বালা অন্তরকে দহন করিতে পারে না?

## যমুনাধারা

সত্য, অত্যন্ত সত্য । আজ সে পথের রেখা দেখিতে পাইয়াছে ।

“ওরে চল, আরতি হয়ে গেছে ।”

জননীর আকর্ষণে সুষমা কল্পনালোকে হইতে নামিয়া আসিল ।

মন্দিরপ্রাঙ্গণের বাহিরে আসিয়া বাসার দিকে সকলে চলিল ।

সতু সহসা যমুনার অঞ্চল ধরিয়া টানিয়া বলিল, “মাসীমা, কাল সকালে কখন আমরা আসব ?”

যমুনা তাহাকে কোলে তুলিয়া বলিল, “খুব সকালে মানিক !”

“আমি ঠাকুরমা আর বাবাকে নিয়ে খুব সকালে আসুন ।”

যমুনা স্নেহভরে সতুর ললাট ও গণ্ডদেশে চুম্বনবৃষ্টি করিল, পরে ভবতোষকে ডাকিয়া বলিল, “দাদা, কালকের কথা মনে আছে ত ?”

“মনে নেই ? আমি ঠুকে নিয়ে ঠিক সময়ে হাজির হব ।”

“পিসীমা, যতীনদাকে নিয়ে আপনার সকাল সকালে চাই কিছ্বা ?”

“কোন ভুল হবে না, মা । তোমার ডাক কি ভুলতে পারি ?”

তেমাথা পথের সংযোগস্থলে ছই দল বিভক্ত হইয়া গেল ।

বিমলচন্দ্র আকাশের দিকে চাহিয়া বলিলেন, “আজ কি তিথি—”

উত্তর দিল যমুনা । “আজ অষ্টমী । কাল নবমী ।”

উমাশশী হাসিয়া বলিলেন, “যমুনা মার তিথি বেন মুখস্থ ”

যমুনার ওষ্ঠপ্রান্তে মুহূর্তের জন্ত বিছুরেখা খেলা করিয়া গেল ।

কি একটা কথা বলিতে গিয়া, সহসা সে ওষ্ঠে ওষ্ঠ চাপিয়া ধরিল ।

একটা বিয়াদগম্ভীর ছায়া তাহার সুন্দর আননে নামিয়া আসিয়াছিল, কিন্তু বোধ হয়, তাহা কাহারও দৃষ্টিকে আকৃষ্ট করিল না । শুধু সুষমা তাহার দক্ষিণ হস্তখানি একবার চাপিয়া ধরিল ।

## আটত্রিশ

হরনাবুরি হইতে পরিশ্রান্ত হইয়া ফিরিলেও, ভাঁড়ারঘরে মেয়েরা কোমর বাঁধিয়া কাজে লাগিয়াছিল। পঁয়তাল্লিশ দিন যমুনা লোক জন খাওয়াইবে। সুতরাং যতদূর সম্ভব জিনিষ-পত্র গুছাইয়া রাখা হইতেছে। আহারের তখনও কিছু বিলম্ব ছিল।

দেওঘরে যাহা কিছু পাওয়া যাইতে পারে, সংগৃহীত হইয়াছিল। সুশীলের সরকার কলিকাতা হইতে বাকি সব জিনিষ লইয়া, পৌঁছিয়াছে। মেয়েদের মধ্যে উৎসাহের অন্ত ছিল না। চারুশীলা, মণিমলা, সুধমা, যমুনা দাসীদিগকে লইয়া, উমাশশীর নির্দেশমত কাজ করিয়া চলিয়াছিল। সকলেরই মুখে প্রসন্নহাসি, শুধু সুধমার আনন অপেক্ষাকৃত গম্ভীর।

উমাশশী মাঝে মাঝে কাজের ফাঁকে কণ্ঠার দিকে চাহিতেছিলেন। সুধমার গম্ভীর মুখ জননী সতর্ক দৃষ্টি এড়ায় নাই। কিন্তু তিনি সেজন্ত সুধমাকে একটা প্রশ্নও করিলেন না। আর এক জনের তীক্ষ্ণদৃষ্টি সুধমার ভাবপরিবর্তন লক্ষ্য করিয়াছিল সে, মণিমলা।

কাজ সারিতে রাত্রি দশটা বাজিয়া গেল। পূর্ণ দেড় ঘণ্টা লাগিয়াছে। উমাশশী বলিলেন, “এইবার তোরা হাত-মুখ ধুয়ে নে। বাকি সব কাল সকালেই শেষ হয়ে যাবে।”

পুরুষদের আহার শেষে মেয়েরা আহার সারিয়া বিশ্রামের জন্ত শয়নকক্ষে প্রবেশ করিল। কাল সকালে সত্যিই অনেক কাজ আছে।

যমুনা বে ঘরে শয়ন করিত, সুধমা ও উমাশশী ইদানীং সেই

## যমুনাধারা

ঘরেই থাকিতেন। যমুনা ও সুসমা একই শয্যা ভাগ করিয়া লইয়াছিল।

তখনও যমুনা ঘরে আসে নাই। উমাশশীর সহিত অল্প ঘরে কি যেন কাজ করিতেছিল। সুসমা পাণ চিবাইতে চিবাইতে খাটের উপর গিয়া বসিল।

মণিমালা ঘরের মধ্যে প্রবেশ করিয়া সহসা ভগিনীর পৃষ্ঠে মৃদু করাঘাত করিয়া বলিল, “সুধি, তোর আজ কি হয়েছে বল ত?”

সুসমা কোন কথা না বলিয়া ধীরচরণে কক্ষের একপাশে অবস্থিত বাক্স খুলিয়া পত্রখানি লইয়া দিদির হাতে দিল।

মণিমালা আলোর কাছে দাঁড়াইয়া চিঠিখানা মনোবোগ দিয়া পড়িল। তার পর সুসমার দিকে স্থিরদৃষ্টিতে চাহিল।

সুসমা অনুভূত্বিত কণ্ঠে বলিল, “এ ভাবে আমায় বার বার অপমান করবার কি দরকার, দিদি?”

বোধ হয়, মণিমালার ওষ্ঠপ্রান্তে মৃদুহাস্যরেখা দেখা দিবার চেষ্টা গাইল; কিন্তু সেটা দৃষ্টির ভ্রমও হইতে পারে। কারণ, মণিমালা যখন কথা কহিল, তখন তাহার মুখে হাসি ছিল না। সে মৃদুস্বরে বলিল, “কিন্তু আমি ত অপমানের কোন সন্ধান এতে পেলুম না, সুধি?”

“পেলে না!—”

আরও কি সে বলিতে বাইতেছিল; কিন্তু, অধরে ওষ্ঠ চাপিয়া সে কথা বাহির হইতে দিল না। তবে তাহার আয়ত নয়নযুগল হইতে যেন প্রদীপ্ত জ্বালা ছড়াইয়া পড়িল।

## যমুনাধারা

মণিমালা প্রশান্তস্বরে বলিল, “না, বরং সব কথা ভেবে দেখলে বলতে হবে, ললিত বাবু সত্যি তোকেই ভালবাসেন। আমরা তার অনেক প্রমাণ পেয়েছি।

সুধমা এবার উদ্দীপ্তকণ্ঠে বলিল, “ছাই পেয়েছ। তুমি কি জান, দিদি, উনি চার বছর আগে আমাদের কি রকম অপমান করেছিলেন? তা যদি জানতে—”

হাসিতে হাসিতে মণিমালা বলিল, “সব জানি। আরও এমন কথা জানি, যা তুই কখনও কল্পনা করতেও পারবি নে। সত্যি কথা, পুরুষ জাতির মতির স্থির নেই। মেয়েমানুষের মত তারা নয়; কিন্তু তবু বলব, ললিত বাবু তোকে এত দিন বিয়ে করতে না চাইলেও, তিনি তোকে অপমান করতে কোন দিন চান নি।”

যমুনা এমন সময় ঘরের মধ্যে প্রবেশ করিল। সম্ভ্রতঃ আলোচনার শেষ কথাগুলি তাহার কর্ণে প্রবেশ করিয়াছিল।

কোনরকম ভূমিকা না করিয়াই সে বলিল, “সই, মিছে অভিমান করিসনে। আমি তোকে একটা নিদর্শন দেখাচ্ছি। বৌদি, দাঃ বিমল-দা, মাসীমা সবাইকে দেখিয়েছি, তুইও নিজের চোখে দেখ।”

অঞ্চলপ্রাপ্ত হইতে একখানি কাগজ খুলিয়া লইয়া সে সুধমার হাতে দিল। “আজ সকালেই এটা পেয়েছি।”

সুধমা কাগজখানা পড়িতে লাগিল। সহসা তাহার মুখে রক্তোচ্ছ্বাস বহিয়া গেল। উহাতে লেখা ছিল—

“আপনার মত দেবীর কাছে ক্ষমা-প্রার্থনা নিশ্চয় ব্যর্থ হইবে না। তরুণ যৌবনের উচ্ছ্বল মন হিতাহিত বিচার করিতে পারে না।



## যমুনাধারা

চার বৎসর আগে অহংজ্ঞানে মুগ্ধ হইয়া সর্কাপেক্ষা অন্য়  
করিয়াছিলাম। তখন নিজেকে চিনিতে পারি নাই। তার পর  
অবিবেকী মন আরও একটা প্রচণ্ড গর্হিত কাজ করিয়াছিল।  
শুধু লোভ—নিছক লালসা ছাড়া তাহার অন্য় কোন পরিচয় থাকিতে  
পারে না। সতীর্থের পত্নীকে স্বামিহীনা দেখিয়া, পুনরায় তাঁহার  
বিবাহ দিবার কল্পনা চলিতেছে জানিয়া—বামন হইয়া তাঁদের দিকে  
হাত বাড়াইয়াছিলাম। কিন্তু পরে যখন জানিতে পারিলাম, দেবীর  
আসন দেবতার পার্শ্ব, বানর বা ভূতের পার্শ্ব নহে, তখন বুঝিলাম  
শুধু লোভের মায়ায় নিজেকে ভুলাইবার চেষ্টা করিয়াছি। আমি  
শুধু আত্মপ্রবঞ্চনা করিতেই চাহিয়াছিলাম। চার বৎসর পূর্বের যে  
ঘটনা মুহূর্তের জন্ম ও বিস্মৃত হইতে পারা যায় নাই, তাহার অন্তরালে  
নিশ্চয়ই কোন বিরাট সত্য প্রচ্ছন্ন ছিল। এই কয় দিনে ভাল  
করিয়াই বুঝিয়াছি, ভগবান অনুগ্রহ করিয়া বুঝাইয়া দিয়াছেন, চারি  
বৎসর আগে যিনি মুক্তিমতী সেবার গায় আমার মত অসহায়,  
অপরিচিতের রোগশয্যার পাশে দাঁড়াইয়াছিলেন, আমার বিমূঢ় মন  
শুধু এত কাল তাঁহারই স্মৃতির পূজা করিয়া আসিয়াছিল; কিন্তু  
আমি আগে তাহা বুঝিতেই পারি নাই। অহমিকা বাহিরে তাহা  
স্বীকার করিতে চাহে নাই। যদি তাঁহায় করুণালাভে বঞ্চিত হই,  
জানিব, গৃহীর জীবন আমার জন্ম নহে। আপনার সখী কোন  
দিন মার্জ্জনা করিবেন কি না, জানি না। তবে যদি করেন, সে  
জন্ম এক দিনও তাঁহাকে অনুতাপ করিতে হইবে না, এ কথা  
বলিবার মত শক্তি ভগবান্ দয়া করিয়া দিয়াছেন। পুরুষজাতি

## যমুনাধারা

আপনাদের মত একনিষ্ঠতার দাবী করিতে পারে না সত্য, কিন্তু হাত ধরিয়া টানিয়া লইলে তাহারাও মনুষ্যত্বের পরিচয় দিয়া থাকে। আমার মনের গোপন পরিচয় গাইয়া যদি ঘৃণা করেন, তাহা আমার প্রাপ্য। সে জন্ত অভিযোগ করিব না। তবে যদি পারেন, ক্ষমা করিবেন। আপনার বন্ধু—সখীকেও অনুরোধ করিবেন। সুনীল বাবুর আদেশ লইয়া, তাঁহাকে দেখাইয়া আপনার কাছে আবেদন পেশ করিলাম। ইতি—

ললিত।”

দীর্ঘ পত্রের ছত্রে ছত্রে সত্যই কি অন্তরের বেদনা ও অনুতাপ আবরণহীনভাবে প্রকাশ পাইয়াছে? আন্তরিকতার গাঢ় স্পর্শ কি ইহাতে আছে? মানুষ মনের গোপনতম লজ্জার ইতিহাস স্বেচ্ছায় যখন প্রকাশ করে, তখন তাহাকে অভিনয় বলিয়া কি উপেক্ষা করা যুক্তিসঙ্গত? যমুনার প্রতি যে অসঙ্গত মনোবৃত্তি এত দিন প্রবল হইয়া উঠিয়াছিল, সে কথা স্বয়ং প্রকাশ না করিলে কেহই ত জানিতে পারিত না! তবে?

মুহূর্তের মধ্যে প্রশ্নগুলি সুষমার মানসক্ষেত্রে জাগিয়া উঠিল। সে তখনও পত্রের প্রতি চাহিয়াছিল।

যমুনার কলহাস্রে চমকিত হইয়া সুষমা সখীর প্রতি চাহিল। তাহার প্রসন্ন, নিশ্চল আননে শুধু একটা পবিত্র দীপ্তি! সরল—উজ্জল, ক্ষমাসুন্দর নয়নের দৃষ্টি সুষমাকে সচকিত করিয়া তুলিল।

“কি রে, ললিত বাবুকে এখন প্রত্যাখ্যান করতে পারবি তুই?”

যমুনার দৃষ্টি হাসিতেছিল, তাহার কথায় যেন একটা অনবচ্ছ মাধুর্য্য ও শান্তির হিল্লোল বহিতেছিল।

## যমুনাধারা

সুষমা কোনও উত্তর দিল না। সে যন্ত্রচালিতবৎ পত্রখানির দিকে চাহিতেই একটি ছত্র তাহার দৃষ্টিকে আকৃষ্ট করিয়া রাখিল—“চারি বৎসর আগে যিনি মূর্তিমতী সেবার গ্যার, আমার মত অসহায় অপরিচিতের রোগশয্যার পাশে দাঁড়াইয়াছিলেন, আমার বিমুঢ় মন শুধু এত কাল তাঁহারই স্মৃতির পূজা করিয়া আসিয়াছিল। কিন্তু আমি আগে তাহা বুঝিতে পারি নাই। অহমিকা বাহিরে তাহা স্বীকার করিতে চাহে নাই।”

ইহা কি অন্তরের উক্তি, না নির্লজ্জ স্তাবকতা? কিন্তু—

যমুনা সহসা সুষমার কাছে আসিয়া কাণে কাণে বলিল, “সই, আত্মবঞ্চনা করিস নে। আমাকে যতটা বোকা ভাবিস, আমি তা নই। তোর মন—”

সুষমা তাড়াতাড়ি মাথা সরাইয়া লইয়া, যমুনার মুখ দক্ষিণ করতলে চাপিয়া ধরিল।

মণিমালার দিকে দৃষ্টি পড়িতেই সে দেখিল, তাহার দিদি পরম কৌতুকভরে তাহার দিকে চাহিয়া রহিয়াছে।

তবে—তবে কি বাড়ীর সকলেই, তাহার মনের দুর্কলতম অবস্থার সংবাদ রাখে? মা, দাদা, বৌদি, সুশীল বাবু, সকলেরই কাছে কি তাহার অন্তরের গোপনতম ইতিহাস প্রকাশ পাইয়া গিয়াছে? অথচ সর্বপ্রযত্নে সে এই বিষয়টাই প্রকাশ পাইতে দেয় নাই!

লজ্জার অরুণরাগ সুষমার আননে যে মধুর দীপ্তি ফুটাইয়া তুলিল, গৃহের স্বল্পাঙ্ককার তাহা গোপন রাখিতে পারিল না।

সে তাড়াতাড়ি ঘর হইতে বাহির হইয়া গেল। মা তখন

## যমুনাধারা

ভিতরে প্রবেশ করিতেছিলেন। কণ্ঠার ভাবান্তর তাঁহার তীক্ষ্ণ দৃষ্টি অতিক্রম করিতে পারে নাই। তিনি ঘাড় ফিরাইয়া একবার সূষমার দিকে চাহিলেন। মৃদু হাস্যকে দমন করিয়া ঘরের মধ্যে আসিয়া তিনি বলিলেন, “কি রে, মণি?”

“এখন একটা শুভদিন স্থির করতে হবে, মাসীমা!”

বারান্দার প্রান্তে দাঁড়াইয়া সূষমা সে কথাটা শুনিতে পাইল। সে তাড়াতাড়ি সিঁড়ি দিয়া নামিয়া, প্রাঙ্গণ পার হইয়া, পশ্চাতের উঠানে প্রবেশ করিল। বাহিরের প্রচণ্ড শীত তাহাকে এতটুকু নিরুৎসাহ করিতে পারিল না।

জ্যোৎস্নাপ্রাবনে নিস্তরু প্রকৃতি অবগাহন করিতেছিল। দূরে ধূসর জনহীন রাজপথ, বৃহৎ অজগরের মত যেন চন্দ্রালোকে ঘুমাইতেছিল।

সূষমা স্তব্ধভাবে সেই দিকে চাহিয়া দাঁড়াইয়া রহিল।

শীতস্তরু রজনীর বক্ষোদেশে ভেদ করিয়া অশ্রান্ত ঝিল্লীর রাগিনী কি গান গাহিয়া চলিয়াছে? ধরণীর হৃদয়ের গোপনতম কথা কি শঙ্কীতের ঝঙ্কার তুলিয়া অসীম আকাশের চরণতলে আত্মনিবেদন করিয়া চলিয়াছে? দিনের কোলাহলে, রুঢ় আলোকে, অশান্ত গতিবেগে যে কথা বলা চলে না। যখন সূপ্তির নীরবতায় সব শ্রান্ত ক্লান্ত অবসন্ন হইয়া পড়ে, তখনই কি মর্ষকথা গানের তরঙ্গে তরঙ্গে বিচিত্র ছন্দে লীলায়িত হইয়া উঠে? • ”

বক্ষোদেশে দুই করপুট স্থাপন করিয়া সূষমা স্পন্দিত, আলোড়িত হৃদয়কে যেন শাস্ত করিতে চাহিল। সে এখন বালিকা বা কিশোরী

## যমুনাধারা

নহে। তরুণ যৌবনের উদ্যম শ্রোতোধারা তাহার দেহ ও মনে-  
তরঙ্গ তুলিয়া বহিয়া চলিলেও সত্য ঋ মিথ্যা, আন্তরিকতা ও  
অভিনয়ের পার্থক্য বুঝিবার মত শিক্ষা ও জ্ঞান তাহার হয় নাই,  
এ কথা বলা চলে কি? সুতরাং—

“সই!—”

চমকিয়া সে দেখিল, তাহার সখী যমুনাধারা পার্শ্বে আসিয়া  
দাঁড়াইয়াছে।

যমুনা সুষমার একখানি হাত টানিয়া লইয়া বলিল, “এতে রাজ্যের  
কোন কারণ নেই। চল, এখন ভেতরে যাই। বারটা বেঞ্চে  
গেছে। কাল ভোরে কত কাজ আছে, জানিস ত?”

পর-মুহূর্ত্তে পথের দিকে অঙ্গুলিনির্দেশ করিয়া যমুনা বলিল,  
“দেখ।”

“সুষমা চাহিয়া দেখিল, একটি পরিচিত মূর্ত্তি নতদৃষ্টিতে পথের  
উপর পাদচারণা করিতেছে। কোনও দিকে তাহার দৃষ্টি নাই।  
গতি মন্থর, দুই বাহু পশ্চাদ্ভাগে বিস্তৃত। গভীরতর চিন্তায় যে তাহার  
মন আচ্ছন্ন, ভঙ্গী দেখিলে, তাহা অনুমান করিতে মুহূর্ত্তও বিলম্ব  
হয় না।

সুষমা অতিকষ্টে উদ্যতপ্রায় দীর্ঘশ্বাসকে দমন করিল। তার  
পর সখীর হাত ধরিয়া ধীরে ধীরে ভিতরে প্রবেশ করিল।

দ্বার বন্ধ করিবার সময় সে দেখিল, মূর্ত্তি তেমনই নত-দৃষ্টিতে,  
তখনও রাজপথে, বাগানের সম্মুখস্থ অংশে ঘুরিয়া বেড়াইতেছে।

## উনচল্লিশ

প্রভাতে উঠিয়াই বিমলচন্দ্র সুশীলকে দইয়া মহারাজ ভবতোষের ভবনে গিয়াছিলেন ।

চা-পানের পর ভবতোষ বলিলেন, “বিমল-দা, একটু ব’স । উনি এখনই সুশীল বাবুর বাড়ী যাবেন, বাবুস্‌টা ক’রে দিয়ে আসি ।

আজ যমুনা সকলকে খাওয়াইবে, মহারাণী উপমাচিকা হইয়া কয়েকটি জিনিষ প্রস্তুত করিয়া দিবার ভার লইয়াছিলেন । প্রভাতে মান সারিয়াই তিনি প্রস্তুত হইয়াছিলেন ।

মহারাণী চলিয়া গেলে, ভবতোষ বলিলেন, “এইবার কাজের কথা হোক । আবার তাড়াতাড়ি ওখানেও বেতে হবে ত, নৈলে যমুনা দিদির অভিমানের সীমা থাকবে না । এখন সুমমার খবর কি ?”

বিমলচন্দ্র বলিলেন, ব্যাপার যা অনুমান করা গিয়েছিল, অনেকটা তাই । তবে যাই বল, ভবতোষ, নারীচরিত্র সত্যই পুরুষের কাছে দুষ্কর । মেয়েরা এ বিষয়ে সাহায্য না করলে সত্যি আমরা আসল কথাটা টের পেতাম না ।”

ভবতোষ হাসিয়া বলিলেন, “তা হ’লে বল, বৌদি তোমাকে ঠিক সন্ধানই দিয়েছিলেন !”

“তিনি অনেক দিন আগেই আমার বলেছিলেন ; কিন্তু আমার বিশ্বাস হয় নি । যা কিন্তু বরাবরই ঠিক জানতেন, কিন্তু হবার নয় জেনেই প্রকাশ করেননি । সব চেয়ে বেশী সাহায্য করেছে মণিমালা আর যমুনা । আগের ঘটনা যমুনা কিছুই জানত না বলেই

## যমুনাধারা

আমাদের ধারণা ছিল ; কিন্তু সেটা ভুল। সুখমা কবে কোম্‌ সময়ে তার মনের প্রচ্ছন্নভাবে আভাস যমুনাকে দিয়েছিল, তা যমুনা বলে নি। তবু, যমুনা অনেক বছর আগে থেকেই বুঝে নিয়েছিল, কিন্তু ভারী চাপা মেয়ে, বাইরে আভাসমাত্র দেয় নি।”

বিমলচন্দ্রের দিকে চাহিয়া ভবতোষ বলিলেন, “সত্যি, আশ্চর্য্য !”

সুশীলচন্দ্র এতক্ষণ নীরবে বসিয়া আলোচনা শুনিতেন। সে সহসা বলিয়া উঠিল, “আচ্ছা মহারাজ, আমার একটা কথা মনে হচ্ছে, পুরুষের পক্ষে নারীর মনের কথা ঠিক ভাবে জানা সম্ভবপুর নয়।”

ভবতোষ হাসিয়া বলিলেন, “তোমার কি এত দিন অণু রকম ধারণা ছিল, ভাই ?”

সুশীল বলিল, “দর্শনশাস্ত্র নিয়ে আমি এম-এ পাশ করেছিলুম। মনোবিজ্ঞান, মনস্তত্ত্ব এ দুটি বিষয় যত্ন ক’রে তখন পড়েছিলুম, এখনও পড়ি। আমার ধারণা ছিল—”

বিমলচন্দ্র বলিলেন, “থাম্লে কেন, ভায়া। এত দিন ধারণা ছিল, মনুষ্য-চরিত্র জটিল হলেও দর্শন-শাস্ত্রের সাহায্যে স্ত্রীজাতির মনের ভাব দার্শনিক পণ্ডিতগণ ধ’রে ফেলতে পারেন, কেমন ?”

“তাই আমার বিশ্বাস ছিল বির্মল-দা।”

ভবতোষ বলিলেন, “আমি দর্শনশাস্ত্র নিয়ে অনেক নাড়াচাড়া করেছি। বহু কবি ও প্রথম শ্রেণীর সাহিত্যিক ঔপন্যাসিক আমার অন্তরঙ্গ বন্ধু। আমি তাঁদের কি বলেছি জান ? আমি বলেছি, পুরুষের মন দিয়ে মাতৃজাতির মনের পরিমাপ করতে যাওয়া ভুল।”

বিমলচন্দ্র বলিলেন, “আমি এ বিষয়ে তোমাদের সঙ্গে একমত।”

## যমুনাধারা

সুশীল বিস্মিতভাবে উভয়ের মুখের দিকে চাহিয়া বলিয়া উঠিল,  
“তঁারা কি বলেন, মহারাজ?”

“অনেকে সে কথা মানতে চান না। তখন আমি তাঁদের ড  
চারটা ভুল দেখিয়ে দিলুম। বললুম, সারা জীবন ধরে নারীচরিত্রের  
রহস্য জানবার চেষ্টা ক’রে হার মেনেছি। শুধু যাঁরা নিজেকে  
নারীজাতির কাছে পুরুষের বৈশিষ্ট্য বিলোপ ক’রে তাঁদের মনের  
সংবাদ জানবার তপস্যা ক’রে আসছেন, তাঁরা ছাড়া স্ত্রীজাতির  
মনের খবর যথাযথ-ভাবে আর কোহারও পাবার আশা নেই। অবশ্য  
সাধারণ ব্যাপার নিয়ে নয়, গভীর এবং জটিল বিষয়ের কথাই  
বলছি।”

সুশীলচন্দ্র মস্তক আন্দোলিত করিতে করিতে বলিল, “ঠিক  
বলেছেন, মহারাজ! আজ সুষমার ব্যাপার থেকেই এটা স্পষ্ট  
বোঝা যাচ্ছে। তার আগে আমার স্ত্রীও এ বিষয়ে আমার চৈতন্য  
সম্পাদন করেছিলেন।”

ভবতোষ বিমলচন্দ্রের দিকে চাহিয়া বলিলেন, “এখন ওদের  
বিয়ের দিন ঠিক করা চাই ত! কোথায় বিয়ে হবে?”

বিমলচন্দ্র বলিলেন, “পাটনাতেই বিয়ে হবে। যেখানে প্রথম  
আরম্ভ, সেখানেই দাম্পত্যমিলনের শুভবাসর করাই আমার অভিমত।  
মাঘের মাঝামাঝি একটা দিন ঠিক ক’রে নিতে হবে।”

সুশীলচন্দ্র বলিল, “সেই ভাল হবে, বিমলদা! কিন্তু আমার  
একটা কথা আছে, মহারাজ।”

ভবতোষ চাহিয়া দেখিলেন, সুশীলের আনন্দে একটা উদ্বেগের



## যমুনাধারা

চিহ্ন ফুটিয়া উঠিয়াছে। তিনি বলিলেন, “তোমার আবার কি কথা ?  
কঠিন সমস্যা না কি ?”

“তা একটু জটিল বৈ কি। আপনি ত জানেন, যমুনার জল  
আমি মস্ত দুর্ভাবনার পড়েছি। যদি তার আবার বিয়ে দিতে  
পারতুম, তবে নিশ্চিন্ত হওয়া যেত। যতীন বাবুর সঙ্গে যদি হয়,  
বড় ভালই হবে। মনে হয়, যমুনা যতীন বাবুর পক্ষপাতিনী,  
যতীন বাবুও যমুনাকে অপছন্দ করেন না।”

ভবতোষ গম্ভীরভাবে বলিলেন, “সুশীল বাবু, তুমি ঠিক জান,  
যমুনা যতীনের পক্ষপাতিনী ? যদি তা হয়, আমি যতীনের সঙ্গে  
তার বিয়ে দেবার প্রাণপণ চেষ্টা করব।”

বিমলচন্দ্র বলিলেন, “আগে যমুনাকে জিজ্ঞাসা ক’রে দেখা  
উচিত। সে অত্যন্ত বুদ্ধিমতী মেয়ে। সুখমার কাছে এ বিষয়  
খোঁজ নিলে যমুনার মনের সংবাদ নিশ্চয় জানতে পারা যাবে। আজ  
সুখমা, মণিমলা আর তোমার বৌদি, তিন জনে চেষ্টা করলেই সব  
জানা যাবে। যদি তোমার ধারণা সত্য হয়, তা হ’লে—”

কিন্তু তিনি সহসা থামিয়া গেলেন। তার পর বলিলেন, “আজ  
যমুনার থাওয়ানোর ব্যাপারটা চুকে গেলে, সন্ধ্যার পর তার মনের  
ভাব জানবার চেষ্টা করা যাবে। কি বল ?”

মহারাজ বলিলেন, “সেই ভাল। যতীনের ভার আমি  
নিতে পারি।”

বিমলচন্দ্র উঠিয়া দাঁড়াইয়া বলিলেন, “বেলা আটটা বেজে গেছে।  
এবার আমরা চলি। ওদিকের কতদূর কি হ’ল, দেখা দরকার।”

## যমুনাধারা

সুশীল বলিল, “যমুনা যে রকম অভিমানিনী, আমাদের দেখতে না পেলে খুব রাগ করবে। চলুন, দাদা। মহারাজ, আপনি অনুগ্রহ করে একটু তাড়াতাড়ি আসুনেন।”

ভবতোষ বলিলেন, “স্নানটা সেরেই আমি যাচ্ছি। কিন্তু হঠাৎ যমুনার এ সখ হ’ল কেন, আমি তাই ভাবছি। আচ্ছা সুশীল বাবু, মোহিত বাবু কত দিন গত হয়েছে?”

“দু’বছর এখনও হয়নি। বৈশাখ মাসে দু’বছর পূর্ণ হবে।”

ভবতোষ নিম্নলিখিত-নেত্রে কি চিন্তা করিলেন। তার পর বলিলেন, “আচ্ছা, তোমরা এগোও, আমি এখনি আসছি।”

বিমলচন্দ্র সুশীলের সহিত রাজপথে নামিয়া দেখিলেন, প্রভাত-সূর্যের আলোক বৃক্ষ-পল্লবে, পাতার পাতার ঝল-মল করিতেছে। পথে পুরুষ-নারী, বালক-বালিকা, তরুণ-তরুণীরা গরম কাপড়ে দেহ আবৃত করিয়া ভ্রমণে বাহির হইয়াছে।

সাঁওতালপরগণার বাঙ্গালী নরনারীকে দেখিলে মনে আশা ও আনন্দের সঞ্চার হয়। দুই বেলা স্বচ্ছন্দ ভ্রমণ, শরীর ও মনের স্বাস্থ্যরক্ষার পক্ষে কিরূপ প্রয়োজন, বাঙ্গালী সহরের কূপমণ্ডুক হইয়া পড়িলে, তাহা ভুলিয়া যায়। অথচ শরীর ও মনের স্বাস্থ্য অটুট না থাকিলে জীবন-সংগ্রামে জয়লাভের কোন সম্ভাবনাই নাই।

বিমলচন্দ্র সেই কথাই ভাবিতে ভাবিতে চলিয়াছিলেন। ডাকঘরের কাছে আসিয়া তিনি সুশীলকে বলিলেন, “ভায়া, তুমি এগোও। এখানে একটু কাজ সেরে আমি যাচ্ছি।”

সুশীল আর দাঁড়াইল না। বিমলচন্দ্র ডাকঘরের দিকে চলিলেন।

## যমুনাধারা

খানকয়েক টেলিগ্রামের ফরম তাঁহার বিশেষ প্রয়োজন। ডাকঘরের বারান্দার উঠিয়া কয়েকখানি ফরম চাহিয়া লইয়া তিনি মুহূর্ত্ত কি চিন্তা করিলেন।

না, এখন থাক। পাটনার তার করিবার প্রয়োজন আছে সত্য, কিন্তু আজিকার কাজ চুকিয়া যাইবার পর ব্যবস্থা করাই সম্ভব।

পথে নামিয়া সম্মুখদিকে চাহিবামাত্র বিমলচন্দ্র থমকিয়া দাঁড়াইলেন।

ললিত আসিতেছে না? স্নানগত্বিতে, ভূমিলগ্ন দৃষ্টিতে সে পথ চলিতেছে কেন? কাছে আসিতেই ললিতের শুষ্ক, বিবর্ণ মুখ দেখিয়া তিনি বিস্মিত হইলেন। এক রাত্রির মধ্যে অবস্থার এ কি পরিবর্তন! আজ সকালে শয্যাत्याগের কিছু পরেই বিমলচন্দ্র স্নানলীলকে লইয়া ভবতোষের কাছে গিয়াছিলেন। সকালে ললিতের সহিত তাঁহার সাক্ষাৎ হয় নাই—সে তখনও শয্যাत्याগই করে নাই।

ডাক্তারের দক্ষিণ হস্তখানি ধরিয়া বিমলচন্দ্র বলিলেন, “কি হয়েছে, ললিত বাবু, আপনার চেহারা এমন হ’ল কেন?”

ললিতের মুখে চেষ্টাকৃত স্নান হাসি দেখা গেল। সে বলিল, “বোধ হয়, ভাল ঘুম হয় নি, তাই।”

“তা এখন ডাকঘরে কি দরকার?”

মুহূর্ত্ত কি চিন্তা করিয়া ললিত উৎসাহহীন কণ্ঠে বলিল, “কলকাতায় একখানা তার পাঠাবো ব’লে এসেছি।”

বিস্মিতভাবে বিমলচন্দ্র বলিলেন, “কেন?”

অন্যদিকে মুখ ফিরাইয়া লইয়া মৃদু স্বরে ডাক্তার বলিল, “আমি

## যমুনাধারা

আজ রাত্রির গাড়ীতে কলকাতার ফিরে যাব, তাই চাকরকে তার ক'রে দিচ্ছি, সে 'যেন আমার ঘর, বিছানা সব জিনিষ ঠিক ক'রে রাখে।"

বিমলচন্দ্রের বিষয় উত্তরোত্তর বৃদ্ধি পাইল। আবার কি ললিত বাবুর মতপরিবর্তন ঘটিতেছে? তাহার চিত্ত অকস্মাৎ চঞ্চল হইয়া উঠিল।

“আপনি আজই চ'লে যাবেন, একথা ত ছিল না, ললিতবাবু?”

গাথের ওপারে শূন্যদৃষ্টিতে চাহিয়া ললিত বলিল, “কিন্তু থেকে কি লাভ, বিমল বাবু? আমি অভিশাপের মত আপনাদের আনন্দের মাঝখানে এসে দাঁড়িয়েছি। সত্যি আমি অপরাধী; কিন্তু তবু—তবু—”

নৈরাশ্রে উদ্বেল কণ্ঠ সহসা থামিয়া গেল। বোধ হয়, বার্থ আশা ও অভিমানের অশ্রু তাহার নয়নপ্রান্তে আসিয়া সঞ্চিত হইয়াছিল।

“এ আপনি কি বলছেন, ললিত বাবু! আপনার কথা সত্যই আমি বুঝতে পারছি না।”

ললিতের কণ্ঠ আবেগে কুম্পিত হইয়া উঠিল। সে বলিল, “যে অগ্রায় আমি করেছি, প্রত্যাখ্যানই তার উপযুক্ত শাস্তি। আমি তা মাথা পেতেই নেব। যে হতভাগার ছনিয়ায় কেউ নেই, তার অদৃষ্ট—”

ঝর-ঝর করিয়া অশ্রুধারা নয়নপথে নামিয়া আসিল। কোন বাধাই তাহার গতিরোধ করিতে পারিল না।

ললিতচন্দ্রের এই ভাববিপর্যয়ের কোনও হেতু অনুমান করিতে

## যমুনাধারা

না পারিয়া, বিমলচন্দ্র সহানুভূতি-স্নিগ্ধ কণ্ঠে বলিলেন, “কিন্তু আপনার হঠাৎ এই ক্ষোভ কেন, ললিত বাবু ?”

বাম হস্তে অক্ষু মাৰ্জ্জনা করিয়া ললিত বিষয়াভিভূত-ভাবে বিমলচন্দ্রের দিকে চাহিল।

বিমল বলিলেন, “স্বয়মাকে বিবাহ করবার সম্বন্ধে কি আপনি মতপরিবর্তন করেছেন ?”

মতপরিবর্তন ? বিমল বাবু এ কি বলিতেছেন !

কম্পিত মুহূৰ্ণে ললিত বলিল, “আপনারা এ অভাগার হাতে—”

বাধা দিয়া বিমল বলিলেন, “সবই ত স্থির হয়ে গেছে। মাঘের গোড়াতেই পাটনার শুভকাজ করা সকলেরই অভিপ্রেত। কিন্তু আপনার মনে ভুল ধারণা জন্মাল কেন, ললিত বাবু ?”

ললিতের মুখ হর্ষোদ্দীপ্ত হইয়া উঠিল। সে উচ্ছ্বসিত কণ্ঠে বলিয়া উঠিল, “তা হ’লে আমি মাৰ্জ্জনা পেয়েছি ? সকলের নীরব ভাব দেখে আমার উন্টো ধারণা হয়েছিল, দাদা !”

ললিতের হস্ত আকর্ষণ করিয়া বিমল বলিলেন, “বাড়ীতে কাজ, তাড়াতাড়ি চলুন।”

## ‘চল্লিশ

বাহিরের ঘরে নিমন্ত্রিতগণ নানাপ্রকার আলোচনার রত। দেওঘরের পরিচিত প্রতিবেশীদিগকে সুশীল, ললিত প্রভৃতি নানাভাবে পরিচর্যা করিতেছিল। মহারাজ ভবতোষ মজলিসি ব্যক্তি। সকলকে তিনি গল্পে পরিতুষ্ট করিয়া ঘন ঘন তাম্বাকুট-ধূমপান করিতেছিলেন।

ব্যবস্থা ছিল, বেলা বারটার মধ্যে মধ্যাহ্ন-ভোজন শেষ করিতে হইবে। শেষরাত্রি হইতে রন্ধনের কাজ আরম্ভ হইয়াছিল। প্রাচীর-বিলম্বিত ঘটিকায়ত্তে এগারটা বাজিবা-মাত্র ভবতোষ বলিলেন, “সুশীল বাবু, চল, একবার ভেতরের খবর লওয়া যাক্।”

নির্দিষ্ট সময়ের মধ্যে কাজ সম্পন্ন করিবার দিকে সুশীলের ত্রায় ভবতোষেরও বিশেষ ঝোক ছিল। বতীন্দ্রনাথ ও ললিতকে বাহিরের ভার দিয়া ভবতোষ, সুশীল ও বিমলচন্দ্রকে লইয়া ভিতরে প্রবেশ করিলেন।

অস্তঃপুরে রন্ধনশালার কর্মচঞ্চলতা পূর্ণমাত্রায় চলিতেছিল।

ভবতোষ হাসিমুখে বলিলেন, “আজকের যিনি অন্নপূর্ণা তিনি কোথায়?”

মহারাজের কণ্ঠস্বরে সুখমা রন্ধনাগারের দিক হইতে দ্রুতপদে অগ্রসর হইল।

“ঘমুনাকে খুঁজছেন, দাদাবাবু?”

## যমুনাধারা

হাঁ, দিদি! আজ তিনিই ত অন্তসত্র দিচ্ছেন, আমরা সব উপস্থিত। বেশী বিলম্ব আছে না কি?”

“সব প্রস্তুত। আর পনের মিনিটের মধ্যে সবাইকে বসান হবে। মহারানী নিজে কিন্তু অন্তপূর্ণার আসন নিয়েছেন, দাদাবাবু। সাতটা থেকে এগারটার মধ্যে যত রকম রান্না দরকার, তিনি একাই শেষ করেছেন।”

হাসিতে হাসিতে মহারাজ ভবতোষ বলিলেন, “বল কি? তাঁর ননীর দেহ গ’লে যায় নি?”

উমাশশী এমন সময়ে সেখান আসিয়া বলিলেন, “ভবতোষ, বৌমার ধতি ক্ষমতা। আমরা এপাড়া ওপাড়া থেকে আরও চার জন ব্রাহ্মণকন্যাকে যোগাড় করে এনেছিলুম, কিন্তু বৌরানী সবাইকে বসিয়ে রেখেছেন। তিনি বলেন যে, গরীবের মেয়ে তিনি। পঞ্চাশ ষাট জনের রান্না তিনি এখনও একাই করতে পারেন।”

ভবতোষ বলিলেন, “সে কথা সত্যি, মা। উনি রোজ নিজের হাতে দশ বার রকম রান্না না ক’রে থাকতে পারেন না। জানেন ত মা, আমার সঙ্গে রোজ অন্ততঃ বিশ জন লোক খেতে বসে। ওটা আমার ভারী বিক্রী স্বভাব। একা খেতে পারি নে। যাক, আমি গুঁর খোঁজ নিচ্ছি। আমার যমুনা-দি—না, না, আমি তাকে মার আসনেই বসিয়েছি। আমার সে মাটিকে দেখছি নে কেন?”

সুধমা অঙ্গুলি নির্দেশ করিয়া বলিল, “সই আধ ঘণ্টা হ’ল, তার শোবার ঘরে চুকেছে। একটু পরেই সে বার হবে।”

সুধমার মুখে মৃদু, চাপা হাস্যরেখার প্রতি লক্ষ্য না করিয়া

## যমুনাধারা

সুশীল বলিল, “এমন সময়ে সে ঘরে দরজা বন্ধ ক’রে কি করছে?”

উমাশর্মা তখন ভাঁড়ারের দিকে চলিয়া গিয়াছেন। সুষমার আননে তখনও তেমনই রহস্যপূর্ণ হাস্যরুখে সে মৃদুস্বরে বলিল, “দেখবেন, জামাই বাবু?”

সুষমার ভাবভঙ্গিতে সুশীলচন্দ্র, ভবতোষ এবং বিমলচন্দ্র তিন জনেরই মনে বোধ হয় যুগপৎ কোতূহল জাগিয়া উঠিয়াছিল। ভবতোষ বলিলেন, “ব্যাপার কি, বোন?”

“আপনারা আমার সঙ্গে আসুন, জোরের কথা বলবেন না।”

সুষমা পার্শ্বের কক্ষে সম্ভরণে প্রবেশ করিল। বিস্মিতভাবে তিন জন তাহার অনুবর্তী হইলেন।

উভয় কক্ষের মধ্যবর্তী একটি দরজা ও জানালা ছিল। দ্বারটি রুদ্ধ, বাতায়নটির উপরের কপাট ঈষৎ মুক্ত।

সেখানে দাঁড়াইতে বলিয়া সুষমা পার্শ্বের কক্ষের ভিতর চাহিয়া দেখিতে ইঙ্গিত করিল। ভবতোষ অগ্রে সেখানে গিয়া দাঁড়াইলেন। সুষমা যখন তাঁহাদিগকে ডাকিয়া আনিরাছে, তখন নিশ্চয়ই সঙ্কোচের কোনও কারণ নাহি।

ঈষৎমুক্ত বাতায়নের ফাঁক দিয়া ঘরের ভিতর দৃষ্টিপাত করিতেই তাঁহার আননে একটা অপূর্ণ দীপ্তি কুটিয়া উঠিল। সুশীল ও বিমলচন্দ্রকে তিনি কাছে আসিয়া দাঁড়াইতে ইঙ্গিত করিলেন।

পর্যায়ক্রমে তিন জনেরই কোতূহলদৃষ্টি গৃহের অভ্যন্তরভাগের রহস্য ভেদ করিবার জন্য কেন্দ্রীভূত হইল।

ধূপ ও ধূনার মধুর গন্ধ বাতায়নপথে নির্গত হইতেছিল।



## যমুনাধারা

ও কি! যমুনা নিমীলিতনেত্রে কাহার ধ্যান করিতেছে?  
ভগবানের? সুশীলচন্দ্র পরক্ষণেই চমকিয়া উঠিল। তাই কি?

সে দেখিল, বিবিধ প্রকার ভোজ্য, নানাবিধ ফল, মিষ্টান্ন  
গৃহমধ্যে বিবিধ আধারে সজ্জিত রহিয়াছে। এমন কি, যে সকল  
আহার্য্য পাক করা হইয়াছে, তাহার প্রত্যেকটি পদ স্তরে স্তরে  
অর্ঘ্যস্বরূপ নিবেদিত।

সম্মুখে ছোট একটি চৌকীর উপর একখানি আলোকচিত্র।  
কাহার? ঐ আলোকচিত্রটি কাহার?

সুশীলচন্দ্র দেখিল, উহারই নিয়ে একজোড়া 'রোপ্যরচিত  
খড়ম—প্রত্যগ্র পুষ্পভারে তাহার শেষাংশ আয়ুগোপন করিয়া  
রহিয়াছে।

সুশীলচন্দ্রের সর্বদেহ রোমাঞ্চিত হইয়া উঠিল। উক্ত রোপ্যা-  
পাত্রকার ইতিহাস তাহার অপেক্ষা কে ভাল জানে?

যমুনার নিমীলিত নেত্রপথে ধারায় ধারায় মুক্তাবিন্দু ঝরিভেঁছিল।  
তাহার চিত্ত তখন কি ইহজগতের সকল প্রকার সংস্পর্শকে অতিক্রম  
করিয়া, লোকাতীত স্বপ্নলোকে নির্কাসিত হইয়াছিল?

ধীরে ধীরে একটা দীর্ঘশ্বাস সুশীলের অন্তরতম প্রদেশ বহিত  
করিয়া বাহির হইল। সে আর তথায় দাঁড়াইতে পারিল না।  
অভিভূতভাবে সে বাতায়ন-সান্নিধ্য পরিত্যাগ করিল।

কি অসঙ্গত ধারণাকে ভিত্তি করিয়াই না সে কায়াশূচী অবলম্বন  
করিতে চাহিয়াছিল! মানুষের জ্ঞান, অভিজ্ঞতা কত সীমিত!  
তাহার শ্রায় ভ্রান্ত আর কে আছে?

## যমুনাধারা

তিন জন দর্শকই ঘরের বাহিরে আসিয়া দাঁড়াইলেন। সুষমার মুখে তখনও মৃদু হাস্যরেখা জ্বল-জ্বল করিতেছিল।

মহারাজ ভবতোষের মুখে অভূতপূর্ব একটা দীপ্তি বিকশিত হইয়া উঠিল। তিনি মৃদু অথচ গাঢ়স্বরে কহিলেন, “সুশীল বাবু আমরা সত্যই কি ভ্রান্ত !”

এমন সময় দ্বার মুক্ত করিয়া যমুনা ঘরের বাহিরে আসিল।

তাহার বেশের পরিবর্তন সুশীলের সমগ্র অন্তরকে প্রচণ্ডভাবে আহত করিল। সে বিমূঢ় দৃষ্টিতে সহোদরার দিকে চাহিয়া রহিল।

যমুনার করপ্রকোষ্ঠ আজ আভরণশূন্য। সাদা গরদের পাড়-শূন্য বস্ত্র তাহার দেহকে এক অপূর্ব সুষমায়া মহনীর করিয়া তুলিয়াছিল; কিন্তু সুশীল সে দৃশ্য দেখিয়া দৃষ্টি ফিরাইয়া লইল।

যমুনা স্মিত-হাস্তে মৃদুচরণে অগ্রসর হইয়া প্রথমে ভবতোষ, পরে বিমলচন্দ্র ও সুশীলের পদধূলি গ্রহণ করিল।

“দাদা-বাবু আশীর্বাদ করুন।”

ভবতোষ উচ্ছ্বসিত কণ্ঠে বলিলেন, “তোমার সাধনা সফল হোক।”

যমুনার মুখে তেমনই মৃদুহাস্য-রেখা। সে সুশীলের দিকে মুখ ফিরাইয়া বলিল, “দাদা, দুঃখ করো না। আমি বাধ্য হয়েই এ কাজ করেছি। আজ আমার স্বামীর জন্মদিন। আজকে তোমরা মন ভারী ক’রে থাকলে আমার বড় কষ্ট হবে, দাদা।”

ভবতোষ বলিয়া উঠিলেন, “ও, তাই এত আরোজন !”

সুষমা বলিল, “মোহিত বাবু যা যা খেতে ভালবাসতেন, সেই আজ তার প্রিয়জনকে সেই সকল জিনিষ খাইয়ে তৃপ্তি পেতে চায়।”

## যমুনাধারা

বিমলচন্দ্র বলিয়া উঠিলেন, “চমৎকার ! চমৎকার !”

মহারাজ ভবতোষ মুহূর্ত্ত নিমীলিতলোচনে কি চিন্তা করিলেন, তার পর বলিলেন; “এমন দৃশ্য যতীন ও ললিতকে দেখান দরকার।”

বিমলচন্দ্র বলিলেন, “তুমি এখানেই থাক, ভবতোষ। আমি ঙ্গদের ডেকে আন্ছি।”

অতিকুণ্ঠে প্রথম আঘাত সংবরণ করিয়া সুশীল বলিল, “কিন্তু যমুনা, তোর এ বেশ—আমার যে স্ত্রী !”

হাসি-মুখে যমুনা বলিল, “কিন্তু তোমার জগুই আজ ইচ্ছে ক’রে বেশ বদলাতে হ’ল। নৈলে তোমাকে যে লোকাতে পারতাম না, দাদা। আগের বেশ আমার কাছে বেমানান ছিল না। কাবপ, আমি যে রোজ সকল সময় তাঁর সান্নিধ্য অনুভব করতুম !”

যমুনা সহসা থামিয়া গেল। সুষমা বলিয়া উঠিল, “জামাই বাবু, আপনার যদি চোখ থাকত, সহকে ভুল বুঝতেন না। আমরা সবাই যা জানি, আপনি কোনমতেই তা বিশ্বাস করতেন না। কি ভুল আপনাদের—পুরুষমানুষদের।”

সত্যই কি সুশীল এত দিন ব্রাস্ত ধারণা পোষণ করিয়া রাখিয়াছিল ?

বলিষ্ঠ ও যতীন্দ্রকে লইয়া বিমলচন্দ্র এমন সময় ফিরিয়া আসিলেন।

মহারাজ উচ্ছ্বসিত-কণ্ঠে বলিলেন, “একবার ঘরের মধ্যে চেয়ে দেখ। আমার যমুনা-মা, আজ তাঁর স্বামীর জন্মদিনে, স্বামীর

## যমুনাধারা

প্রিয় ঐশ্বর্য্যগুণি আমাদের সকলকে খাইয়ে তৃপ্তি লাভ করতে চান। কিন্তু খড়ম-জোঁড়ারদিকে একবার ভাল ক'রে লক্ষ্য করো, ললিত ডাক্তার।”

যতীন্দ্রনাথের প্রশ্ন অনন উদ্ভাসিত হইল। সে স্নিগ্ধকণ্ঠে বলিল, “মহারাজ, ভুল ভেঙ্গেছে?”

“আমার ক্ষমা কর, যতীন। তুমি মানুষের মত মানুষ, ভাই, তুমি কিছুই অনুমান করেছিলে। আমি আবার তোমার কাছে আমার মূর্খতা স্বীকার করছি।”

ললিতচন্দ্র তখন নির্দাক বিস্ময়ে, একবার ঘরের মধ্যে, আরবার সন্নিহিত তপস্বিনী যমুনার গৌরবোজ্জ্বল মূর্তির প্রতি দৃষ্টিপাত ক'বিতেন।

এমন সময়ে সতু আসিয়া যমুনাকে দুই বাহুবেষ্টনে জড়াইয়া ধরিয়া ডাকিল, “মাসী-মা!”

\* \* \* \*

সন্ধ্যার আকাশে চাঁদ উঠিয়াছিল।

ভোজের উৎসব শেষ হইয়া গিয়াছিল। গোলা বারান্দার এক দিকে পুরুষরা বসিয়া আলোচনা করিতেছিলেন। ভোগী, সুখী এবংতোষ তখনও নিজের বাড়ী ফিরিয়া যান নাই; যতীন্দ্র, ললিত, বিমল ও সুনীলের সহিত আসন্ন বিবাহ সম্বন্ধে আলোচনা করিতেছিলেন।

এমন সময় অকুণ্ঠিতচরণে বনুনা সতু ও শীলাকে দুই হাতে ধরিয়া সেখানে আসিয়া দাঁড়াইল।

## যমুনাধারা

মহারাজ বলিলেন, “আমার মার কোন নতুন হুকুম আছে,  
সলজ্জভাবে যমুনা বলিল, “যতীনদার, কাছে একটা আঞ্জি  
মাছে।”

“আমার কাছে, দিদি?”

“হাঁ, দাদা, আপনারই কাছে। আমার আঞ্জি মঞ্জুর হবে  
কি না, জানি না।”

সকলেই যমুনার কণার ভঙ্গীতে হাসিতে লাগিল।

যতীন্দ্রনাথ বলিল, “এখন দিদির হুকুমটা শোনা যাক।”

স্মিতহাস্তে যমুনা বলিল, “সতুকে আমার দেবেন, দাদা?”

“নিশ্চয়, নিশ্চয়! সতুকে মানুষ গ’ড়ে তোলবার ভার তোমার  
রৈল, দিদি। আমি জানি তোমার মত কেউ ওকে মানুষ করতে  
পারবে না।” তার পর অক্ষুটভাবে যেন স্বগতই বলিয়া চলিল, “আর  
অনুমোদন হবেই!”

একটু থামিয়া গাঢ়স্বরে যতীন বলিল, “তবে মাঝে মাঝে এক  
আমি গিয়ে দেখে আসব—সে অধিকার আমার দিও, দিদিরানি!”

যমুনা বলিল, “আপনি কলকাতাতেই চলুন না, দাদা?”

“না, দিদি। “আমি যত দিন বাঁচব, দেওঘর ছেড়ে যেতে  
পারব না। এখানে—”

কিন্তু সে কথাটা শেষ করিল না। দাড়োয়ার তীরেই একদিন  
তাহার চিতা জলিয়া উঠিয়াছিল। বন্ধনের লক্ষপাক যে; যতীন্দ্রকে  
এখানে বাঁধিয়া রাখিয়াছে!

সুশীল বলিল, “সতু ও শীলা তোর কোলেই মানুষ হবে। আমার

## যমুনাধারা

তাঁহেই সুখী হব। তার পর তোর দাদার উপর আর যেন  
অভিমান ক'রে থাকিস্ নে, ভাই!”

মহারাজ বলিয়া উঠিলেন, “যমুনাধারার স্নিগ্ধ প্রবাহে ওরা মানুষ  
হয়ে উঠুক, আর তোর দৃষ্টান্ত যেন অনুকরণ করতে পারি,  
যমুনা-মা!”

চন্দ্রালোকিত সন্ধ্যা যেন নীরবে সেই স্বস্তিবাচন অঞ্চল পাতিয়া  
গহণা করিল।

সমাপ্ত







